

中華民國三十四年二月

張江陵全集上



上海图书馆藏书



A541 212 0013 4379B


# 張江陵全集序

余前以孫子十三篇。戚南塘紀效新書及練兵實紀。袁宮桂自衛新知。奉爲治兵安民之規尺。刊頒將校遵守。又將曾滌笙求闕齋集。與胡潤芝奏疏書牘。手鈔語錄。以爲修己治人之典型。結習且三十年。邇來抗心希古。知人論世。讀其書而得窺見其勛業之炳著。如明張江陵者。亦爲余所景仰之一人。夫有明末葉。君主昏庸。官吏媮惰。上恬下嬉。政治窳腐久矣。洎江陵入贊中樞。不辭勞怨。努力振刷。史稱萬曆初政。中外乂安。海內殷阜。紀綱法度。莫不修明。

誠非偶然。考江陵挾持之具。其大旨不外厲行法治。信賞必罰。綜覈名實而已。其失却時代性之擁護君權。忠鯁過人者。姑且勿論。卽如考成朝局。嚴課官吏。振舉武功。勦捕盜賊。制服蠻夷。懲治豪右。驅逐儉壬。莫不雷厲風行。一時振肅。其他凡有益於國計民生者。亦靡不次第畢舉。所謂法治人治。兩者俱盡。江陵生平服膺子產及武侯之嚴法。其志趣已可概見。若論其功業。江陵殆有過之。至其身後。遭禍。乃專制駭主。妄聽讒言所致。於江陵節概。仍無所損。清代四庫全書提要。至謂其功過不能相掩。實未一究其當日所處之環境與地位。成敗論人。豈云持平。大凡威柄



獨操。裁抑必衆。精覈所在。樹怨自多。於是悠悠之口。可以成錦。可以鑠金。何難積毀於無言枯骨。良用浩歎。然而江陵得剖白於天下。後世者賴全書之存也。其當日之心跡。與夫政猷之展佈。無不斑斑可考。足與史乘相互證明。卷末附錄。後人評議各家。言各有當。因將全書重付排印。用廣播傳。俾後之講求治法者有所取資焉。中華民國二十四年一月蔣中正序於軍事委員會辦公室



張江陵全集序

# 重刊例言

一 此書凡四刊本。一明刊本。二鄧刊本。三陶刊本。四爽刊本。爽本關於後人論列及題詠諸作。廣爲採輯。故由四十七卷增至四十八卷。且變更刊編次。（前刊列詩編首）以奏疏列前。書牘次之。文集詩集又次之。女誡直解又次之。較之前刊爲當。獨其目錄則各冠于每一集之前。全編分五集。仍可合成全書。但既稱全書。目錄分離。殊乖體例。茲由本會重爲編訂。各集前後次序。一循爽舊。惟目錄則統納編首。庶昭畫一。並將爽刊第五集附錄（卽四十七八兩卷）各作者目錄概行列入。俾便檢尋。

一 我國古籍。向不注意分開句讀。鈎棘模糊。動多訛誤。此在文化上影響殊大。每逢句讀費解時。當必增多無謂之腦煩。宜讀者望而生厭。茲刊依照前刊本細攷詳稽。點逗分句。俾讀者一目瞭然。自信較爽刊爲明晰也。

一 爽刊附錄。對文忠諸子若孫諸述略傳記。有混入各家序跋評論中者。殊失倫次。現均附于文忠行實之後。以歸一律。俾攷求文忠家世者得備覽焉。

一 茲刊編審及校讎。僅閱數星期。就中有譌脫及無法辨別者。一仍其舊。未便擅改。其有錯漏顯著者。無不隨處證正。然時間匆遽。欲求精審。誠非易事。容有舛謬。希大雅教正之。

# 清四庫全書提要

太岳集四十六卷

浙江巡撫  
採進本

明張居正撰。居正有書經直解已著錄。神宗初年。居正獨持國柄。後毀譽不一。迄無定評。要其振作有爲之功。與威福自擅之罪。俱不能相掩。至文章本非所長。集中奏疏啓劄最多。皆在廟堂時論事之作。往往縱筆而成。未嘗有所鍛鍊也。

清四庫全書提要



張文忠公遺像



# 明史本傳

張居正字叔大。江陵人。少穎敏絕倫。十五爲諸生。巡撫顧璘奇其文。曰。國器也。未幾。居正舉於鄉。璘解犀帶以贈。且曰。君異日當腰玉。犀不足溷子。嘉靖二十六年。居正成進士。改庶吉士。日討求國家典故。徐階輩皆器重之。授編修。請急歸。亡何。還職。居正爲人。頎面秀眉目。鬚長至腹。勇敢任事。豪傑自許。然沈深有城府。莫能測也。嚴嵩爲首輔。忌階。善階者皆避匿。居正自如。嵩亦器居正。遷右中允。領國子司業事。與祭酒高拱善。相期以相業。尋還理坊事。遷侍裕邸講讀。王甚賢之。邸中中官亦無不善居正者。而李芳數從問書義。頗及天下事。尋遷右諭德兼侍讀。進侍講學士。領院事。階代嵩首輔。傾心委居正。世宗崩。階草遺詔。引與共謀。尋遷禮部右侍郎。兼翰林院學士。月餘。與裕邸故講官陳以勤俱入閣。而居正爲吏部左侍郎。兼東閣大學士。尋充世宗實錄總裁。進禮部尙書。兼武英殿大學士。加少保。兼太子太保。去學士五品。僅歲餘。時徐階以宿老居

首輔。與李春芳皆折節禮士。居正最後入。獨引相體。倨見九卿。無所延納。問出一語。輒中肯。人以是嚴憚之。重於他相。高拱以狠躁被論去。徐階亦去。春芳爲首輔。亡何。趙貞吉入。易視居正。居正與故所善掌司禮者李芳謀。召用拱。俾領吏部。以扼貞吉。而奪春芳政。拱至。益與居正善。春芳尋引去。以勤亦自引。而貞吉殷士儋皆爲所搆罷。獨居正與拱在。兩人益相密。拱主封俺答。居正亦贊之。授王崇古等以方略。加柱國太子太傅。六年滿。加太傅。吏部尙書建極殿大學士。以遼東戰功。加太子太師。和市成。加少師。餘如故。初。徐階旣去。令三子事居正。謹而拱銜階甚。嗾言路追論不已。階諸子多坐罪。居正從容爲拱言。拱稍心動。而拱客搆居正納階子三萬金。拱以誚居正。居正色變。指天誓。辭甚苦。謝拱不審。兩人交遂離。拱又與居正所善中人馮保郟。穆宗不豫。居正與保密處分後事。引保爲內助。而拱欲去保。神宗卽位。保以兩宮詔旨。逐拱。事具拱傳。居正遂代拱爲首輔。帝御平臺。召居正獎諭之。賜金幣及繡蟒斗牛服。自是賜賚無虛日。帝虛已委居正。居正亦慨然以天下爲己任。中外想望豐采。居正勸帝遵守祖宗舊制。不

必紛更。至講學。親賢。愛民。節用。揚急務。帝稱善。大計廷臣。斥諸不職。及附麗拱者。復具詔召羣臣。廷飭之。百僚皆惕息。帝當尊崇兩宮。故事。皇后與天子生母並稱皇太后。而徽號有別。保欲媚帝生母李貴妃。風居正以並尊。居正不敢違。議尊皇后曰仁聖皇太后。皇貴妃曰慈聖皇太后。兩宮遂無別。慈聖徙乾清宮。撫視帝。內任保。而大柄悉以委居正。居正爲政。以尊主權。課吏職。信賞罰。一號令。爲主。雖萬里外。朝下而夕奉行。黔國公沐朝弼數犯法。當逮。朝議難之。居正擢用其子馳使縛之。不敢動。既至。請貸其犯。鍋之南京。漕河通。居正以歲賦逾春。發水橫溢。非決則涸。乃采漕臣議。督艘卒以孟冬月完運。及歲初畢。發少罹水患。行之久。太倉粟充盈。可支十年。互市饒馬。乃減太僕種馬。而令民以價納太僕金。亦積四百餘萬。又爲考成法。以責吏治。初。部院覆奏。行撫按。勸者嘗稽不報。居正令以大小緩急爲限。誤者抵罪。自是一切不敢飾非。政體爲肅。南京小奄醉辱給事中。言者請究治。居正謫其尤激者趙參魯於外。以悅保。而徐說保裁抑其黨。毋與六部事。其奉使者。時令緹騎陰誦之。其黨以是怨居正。而心不附保。居正以

御史在外往往凌撫臣。痛欲折之。一事小不合。詬責隨下。又勅其長加考察。給事中余懋學請行寬大之政。居正以爲風已。削其職。御史傅應楨繼言之尤切。下詔獄杖戍。給事中徐貞明等羣擁入獄。視具橐餽。亦逮謫外。御史劉臺按遼東。誤奏捷。居正方引故事繩督之。臺抗章論居正專恣不法。居正怒甚。帝爲下臺詔獄。命杖百遠戍。居正陽具疏救之。僅奪其職。已卒戍臺。由是諸給事御史益畏居正。而心不平。常是時太后以帝冲年。尊禮居正甚至。同列呂調陽莫敢異同。及吏部左侍郎張四維入。恂恂若屬吏。不敢以僚自處。居正喜建豎。能以智數馭下。人多樂爲之。盡。俺答款塞。久不爲害。獨小王子部衆十餘萬。東北直遼左。以不獲通互市。數入寇。居正用李成梁鎮遼。戚繼光鎮薊門。成梁力戰卻敵。功多。至封伯。而繼光守備甚設。居正皆右之。邊境晏然。兩廣督撫殷正茂。凌雲翼等亦數破賊有功。浙江兵民再作亂。用張佳允往撫卽定。故世稱居正知人。然持法嚴覈。驛遞省。冗官清。庠序多所澄汰。公卿羣吏。不得乘傳。與商旅無別。郎署以缺少。需次者輒不得補。大邑士子額隘。艱於進取。亦多怨之者。時承平久。羣盜蝟起。

至入城市。劫府庫。有司恆諱之。居正嚴其禁。匿弗舉者。雖循吏必黜。得盜。斬卽決。有司莫敢飾情。盜邊海錢米盈數例。皆斬。然往往長繫。或瘐死。居正獨亟斬之。而追捕其家屬。盜賊爲衰止。而奉行不便者。相率爲怨言。正居不恤也。慈聖太后將還慈甯宮。諭居正謂我不能視皇帝朝夕。恐不若前者之向學勤政。有累先帝付託。先生有師保之責。與諸臣異。其爲之朝夕訥誨。以輔台德。用終先帝憑几之誼。因賜坐。蟒白金綵幣。未幾。丁父憂。帝遣司禮中官慰問。視粥藥止哭。絡繹道路。三宮賻贈甚厚。戶部侍郎李幼孜欲媚居正。倡奪情議。居正惑之。馮保亦固留居正。諸翰林王錫爵。張位。趙志皋。吳中行。趙用賢。習孔教。沈懋學輩皆以爲不可。弗聽。吏部尙書張瀚以持慰留旨被逐去。御史曾士楚。給事中陳三謨等。遂交章請留中行。用賢。及員外郎艾穆。主事沈思孝。進士鄒元標。相繼爭之。皆坐廷杖。謫斥有差。時彗星從東南方起。長亙天。人情洶洶。指目居正。至懸謗書通衢。帝詔諭羣臣。再及者誅無赦。謗乃已。於是使居正子編修。嗣修。與司禮太監魏朝。馳傳往代司喪。禮部主事曹誥治祭。工部主事徐應聘治喪。居正請無造朝。



以青衣素服角帶入閣治政。侍經筵講讀。又請辭歲俸。帝許之。及帝舉大婚禮。居正吉服從事。給事中李涑言其非禮。居正怒。出爲僉事。時帝顧居正益重。常賜居正<sub>正</sub>札。稱元輔張少師先生。待以師禮。居正乞歸葬父。帝使尙寶少卿鄭欽。錦衣指揮史繼書護歸。期三月葬畢卽上道。仍命撫按諸臣先期馳賜<sub>正</sub>書敦諭。範帝賚忠良銀印以賜之。如楊士奇。張孚敬例。得密封言事。戒次輔呂調陽等。有大事毋得專決。馳驛之江陵。聽張先生處分。居正請廣內閣員。詔卽令居正推。居正因推禮部尙書馬自强。吏部右侍郎申時行。入閣。自强素逢居正。不自意得之。頗德居正。而時行與四維皆自昵於居正。居正乃安意去。帝及兩宮賜賚慰諭有加禮。遣司禮太監張宏供張餞郊外。百僚班送。所過地有司飭廚傳。治道路。遼東奏大捷。帝復歸功居正。使使馳諭。俾定爵賞。居正爲條列以聞。調陽益內慚。堅臥。累疏乞休不出。居正言母老不能冒炎暑。請俟清涼上道。於是內閣兩都部院寺卿。給事御史。俱上章請趣居正亟還朝。帝遣錦衣指揮翟汝敬馳傳往迎。計日以俟。而令中官護太夫人以秋日田水道行。居正所過。守臣率長跪。撫按

大吏越界迎送。身爲前驅。道經襄陽。襄王出候。要居正宴。故事。雖公侯謁王。執臣禮。居正具賓主而出。過南陽。唐王亦如之。抵郊外。詔遣司禮太監何進宴勞。兩宮亦各遣大璫李琦。李用。宣諭賜八寶金釘川扇。御膳餅果醪醴。百僚復班迎入朝。帝慰勞懇篤。予假十日而後入閣。仍賜白金彩幣寶鈔羊酒。因引見兩宮。及秋。魏朝奉居正母行。儀從煊赫。觀者如堵。比至。帝與兩宮復賜賚加等。慰諭居正母子。幾用家人禮。時帝漸備六宮。太倉銀錢多所宣進。居正乃因戶部進御覽數目陳之。謂每歲入額不敵所出。請帝置坐隅時省覽。量入爲出。罷節浮費。疏上。留中。帝復令工部鑄錢給用。居正以利不勝費。止之。言官請停蘇松織造。不聽。居正爲面請。得損大半。復請停修武英殿工。及裁外戚遷官恩數。帝多曲從之。帝御文華殿。居正侍講讀畢。以給事中所上災傷疏聞。因請振。復言上愛民如子。而在外諸司。營私背公。剝民罔上。宜痛鉗以法。而皇上加意撙節。於宮中一切用度。服御。賞賚。布施。裁省禁止。帝首肯之。有所蠲貸。居正以江南貴豪怙勢。及諸姦猾吏民善逋賦。選大吏精悍者嚴行督責。賦以時輸。國藏日益充。而豪猾率

怨居正。居正服將除。帝召吏部問期日。勅賜白玉帶大紅坐蟒盤蟒。御平臺召對。慰諭久之。使中官張宏引見慈慶慈寧兩宮。皆有恩賚。而慈聖皇太后加賜御膳九品。使宏侍宴。帝初卽位。馮保朝夕親起居。擁護提抱有力。小扞格。卽以聞慈聖。慈聖訓帝嚴。每切責之。且曰。使張先生聞。奈何。於是帝甚憚居正。及帝漸長。心厭之。乾清小璫孫海客用等。導上遊戲。皆愛幸。慈聖使保捕海用杖而逐之。居正復條其黨罪惡。請斥逐。而令司禮及諸內侍自陳。上裁去留。因勸帝戒遊宴。以重起居。專精神以廣聖嗣。節賞賞以省浮費。卻珍玩以端好尙。親萬幾以明庶政。勤講學以資治理。帝迫於太后。不得已皆報可。而心頗嫌保居正矣。帝初政。居正嘗纂古治亂事百餘條。繪圖以俗語解之。使帝易曉。至是復屬儒臣紀太祖列聖寶訓實錄。分類成書。凡四十。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尙。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去姦邪。曰納諫。曰理財。曰守法。曰儆戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農桑。曰興教化。曰

明賞罰。曰信詔令。曰謹名分。曰裁貢獻。慎曰賞賚。曰敦節儉。曰慎刑獄。曰褒功德。曰屏異端。曰飭武備。曰御戎狄。其辭多警切。請以經筵之暇進講。又請立起居注。紀帝言動。與朝內外事。日用翰林官四員入直。應制詩文。及備顧問。帝皆優詔報許。居正自奪情後。益褊恣。其所黜陟。多由愛憎。左右用事之人。多通賄賂。馮保客徐爵擢用至錦衣衛指揮同知。署南鎮撫。居正三子皆登上第。蒼頭游七入賞爲官。勛戚文武之臣。多與往還通姻好。七具衣冠報謁。列於士大夫。世以此益惡之。亡何。居正病。帝頻頒勅諭問疾。大出金帛爲醫藥資。四閱月不愈。百官並齋醮爲祈禱。南都秦晉楚豫諸大吏。亡不建醮。帝令四維等理閣中細務。大事卽家令居正平章。居正始自力。後憊甚。不能徧閱。然尙不使四維等參之。及病革。乞歸。上復優詔慰留。稱太師張太岳先生。居正度不起。薦前禮部尙書潘晟。及尙書梁夢龍。侍郎余有丁。許國。陳經邦。已復薦尙書徐學謨。曾省吾。張學顏。侍郎王篆等可大用。帝爲黏御屏。晟馮保所受書者也。強居正薦之。時居正已昏甚不能自主矣。及卒。帝爲輟朝。諭祭九壇。視國公兼師傅者。居正先以六載滿。加

特進中極殿大學士。以九載滿。加賜坐蟒衣。進左柱國。蔭一子尙寶丞。以大婚。加歲祿二百石。錄子錦衣千戶爲指揮僉事。以十二載滿。加太傅。以遼東大捷。進太師。益歲祿二百石。子由指揮僉事進同知。至是。贈上柱國。諡文忠。命四品京卿錦衣堂上官。司禮太監。護喪歸葬。於是四維始爲政。而與居正所薦引王篆。曾省吾等交惡。初。帝所幸中官張誠。見惡馮保。斥于外。帝使密調保及居正。至是。誠復入。悉以兩人交結恣橫狀聞。且謂其寶藏踰天府。帝心動。左右亦浸言保過惡。而四維門人御史李植極論徐爵與保挾詐通姦諸罪。帝執保禁中。逮爵詔獄。謫保奉御居南京。盡籍其家。金銀珠寶鉅萬計。帝疑居正多蓄益。心豔之。言官劾篆省吾。并劾居正。篆省吾俱得罪。新進者益務攻居正。詔奪上柱國太師。再奪諡。居正諸所引用者。斥削殆盡。召還中行用賢等。遷官有差。劉臺贈官。還其產。御史羊可立復追論居正罪。指居正搆遼庶人憲嬾獄。庶人妃因上疏辯寃。且曰。庶人金寶萬計。悉入居正。帝命司禮張誠及侍郎邱樞。偕錦衣指揮給事中籍居正家。誠等將至荊州。守令先期錄人口。錮其門。子女多遯避空室中。比門啓。餓

死者十餘輩。誠等盡發其諸子兄弟藏。得黃金萬兩。白金十餘萬兩。其長子禮部主事敬修。不勝刑。自誣服寄三十萬金于省。吾篆。及傳作舟等。尋自縊死。事聞。時行等與六卿大臣合疏請少緩之。刑部尙書潘季馴疏尤激楚。詔留空宅一所。田十頃。贍其母。而御史丁此呂復追論科場事。謂高啓愚以舜禹命題。爲居正策禪受。尙書楊巍等與相駁。此呂出外。啓愚削籍。後言者復攻居正不已。詔盡削居正官秩。奪前所賜璽書。四代誥命。以罪狀示天下。謂當剖棺戮屍。而姑免之。其弟都指揮居易。子編修嗣修。俱發戍烟瘴地。終萬歷世。無敢白居正者。熹宗時。廷臣稍稍追述之。而鄒元標爲都御史。亦稱居正。詔復故官。予葬祭。崇禎二年。禮部侍郎羅喻義等。訟居正寃。帝令部議。復二廕及誥命。十三年。敬修孫同敞請復武廕。併復敬修官。帝授同敞中書舍人。而下部議敬修事。尙書李日宣等言。故輔居正受遺輔政。事皇祖者十年。肩勞任怨。舉廢飭弛。弼成萬歷初年之治。其時中外乂安。海內殷阜。紀綱法度。莫不修明。功在社稷。日久論定。人益追思。帝可其奏。復敬修官。同敞負志節。感帝恩。益自奮。十五年。奉勅慰問湖廣諸王。因



令調兵雲南。未復命。兩京相繼失。走詣福建。唐王亦念居正功。復其錦衣世廕。授同敞指揮僉事。尋奉使湖南。聞汀州破。依何騰蛟于武崗。永明王用廷臣薦。改授同敞侍讀學士。爲總兵官劉承蔭所惡。言翰林吏部督學必用甲科。乃改同敞尙寶卿。以大學士瞿式耜薦。擢兵部右侍郎。兼翰林侍讀學士。總督諸路軍務。同敞有文武材。意氣慷慨。每出師。輒躍馬爲諸將先。或敗奔。同敞危坐不去。諸將復還戰。或取勝。軍中以是服同敞。大將王永祚等久圍永州。

大兵赴救。胡一青率衆迎敵。戰敗。同敞馳至全州。檄楊國棟兵策應。乃解去。

順治七年。大兵破嚴關。諸將盡棄桂林走。城中虛無人。獨式耜端坐府中。適同敞自靈川至。見式耜。式耜曰。我爲留守。當死此。子無城守責。盍去諸。同敞正色曰。昔人恥獨爲君子。公顧不許同敞共死乎。式耜喜。取酒與飲。明燭達旦。侵晨被執。諭之降。不從。令爲僧。亦不從。乃幽之民舍。雖異室。聲息相聞。兩人日賦詩倡和。閱四十餘日。整衣冠就刃。顏色不變。旣死。同敞屍植立。首墜。躍而前者三人。皆辟易。而居正第五子允修。字建初。

蔭尙寶丞。崇禎十七年正月。張獻忠掠荊州。允修題詩于壁。不食而死。

明史本傳

# 張江陵全集目錄

## 卷一 奏疏

陳六事疏

請冊立東宮疏

請宥言官以彰聖德疏

請停取銀兩疏

請宥言官疏

再乞酌議大闕典禮以明治禮疏

請皇太子出閣講學疏

## 卷二 奏疏

謝召見疏

兩宮尊號議

謝賜玉帶疏

看詳禮部議兩宮尊號疏

請諭戒邊臣疏

遵諭自陳不職疏

請戒諭羣臣疏

乞崇聖學以隆聖治疏

請酌定朝講日期疏

擬日講儀注疏

辭免恩命疏

再辭恩命疏

三辭恩命疏

四辭恩命疏

謝賜勅獎賞疏

山陵禮成奉慰疏

纂修事宜疏

謝賜貂鼠疏

辭免筵宴疏

議處黔國公沐朝弼疏

謝御筆大書疏

再謝御書疏

卷三 奏疏

進帝鑑圖說疏

帝鑑圖說述語附



謝銀幣疏

明制體以重王言疏

請開經筵疏

廣東奏捷辭免加恩疏

謝堂樓額名并賜金疏

請稽查章奏隨事考成以修實政疏

考滿謝賚銀幣疏

考滿辭加恩疏

進講章疏

請定面獎廉能儀注疏

謝御筆大書疏

謝恩贊父母疏

謝宸翰疏

進實錄辭免加恩疏

再辭恩命疏

遼東大捷辭恩疏

謝御劄獎勵疏

進職官書屏疏

卷四奏疏

議處史職疏

請裁抑外戚疏

請申舊章飭學政以振興人才疏

論邊事疏

進郊禮圖考疏

郊禮新舊考附

被言乞修疏

謝恩疏

乞宥言官疏

奉諭看詳民本疏

卷五奏疏

請重修大明會典疏

進世宗御筆疏

請擇有司蠲逋賦以安民生疏

考滿辭免恩命疏

考滿謝手勅加恩疏

再辭恩命疏

三辭恩命疏

請敘錄日講諸臣疏

辭加恩疏

議處就教舉人疏

請停止內工疏

嶺西大捷辭免加恩疏

奏請聖母裁定大婚吉期疏

纂修書成辭恩命疏

請決重囚疏

卷六奏疏

聞憂謝降諭宣慰疏

謝遣官賜賻疏

謝兩宮太后賜贖疏

謝卹典疏

乞恩守制疏

再乞守制疏

謝賜甜食疏

三乞守制疏

謝降諭慰留疏

乞暫遵諭旨辭俸守制預允歸葬疏

謝賜點心甜食疏二首

乞恢聖度宥愚蒙以全國體疏

謝召見疏

謝內府供給疏

謝免自陳疏

請別遣大臣以重大禮疏

謝皇太后慈諭疏

乞遵守慈諭疏

卷七奏疏

遼東大捷辭免加恩疏

辭上巾恩賞疏

再辭遼東大捷加恩疏

乞歸葬疏

大婚禮成辭免加恩疏

再乞歸葬疏

謝准假歸葬疏

請簡用閣臣疏

奉旨薦舉閣臣疏

請給勘合疏

謝賜勅諭并銀記疏

謝兩宮賜路費疏

召辭紀事

謝召見面辭疏

謝遣官郊餞疏

歸葬事畢謝恩疏

請寬限疏

奉諭擬遼東賞功疏

奉諭還朝疏

謝遣官郊迎疏

謝兩宮遣使郊勞疏

謝召見疏

卷八奏疏

乞鑒別忠邪以定國是疏

奉旨迎母就養謝遣官郊勞疏

謝兩宮聖母疏

謝賜母首飾等物疏

謝兩宮聖母疏

爲故大學士高拱乞恩疏

請裁定宗藩事例疏

番夷求貢疏



召見紀事

請更定時享祝文疏

看詳戶部進呈揭帖疏

論外戚封爵疏

請停止輸錢內庫供賞疏

卷九奏疏

請罷織造內臣對

請酌減增造段疋疏

服闋謝降勅召見賜衣帶金器疏

召見平臺記事

辭免恩命疏

再辭恩命疏

辭考滿加恩疏

歸政乞修疏

再乞休致疏

謝聖諭疏

請專官纂修疏

請處治邪佞內臣疏

請清汰近習疏

請敷陳謨烈以裨聖學疏

請停止工程疏

### 卷十奏疏

請用翰林官更番侍直疏

議外戚子弟恩蔭疏

文華殿論奏

患病謝遣醫并乞假調理疏

謝賜粥米食品疏

謝聖諭存問并賜銀兩等物疏

謝遣中使趣召并賜銀八寶等物疏

卷十一 奏疏

考滿謝手勅賜賚疏

考滿謝恩命疏

再辭恩命疏

奉諭整肅朝儀疏

請蠲積逋以安民生疏

進大閱圖頌卷疏

給假治疾疏

請乞優禮者碩以光聖治疏

給假謝恩疏

恭謝賜問疏

乞骸歸里疏

恭謝手勅疏

再懇生還疏

送起居館講大寶箴記事

送起居館論邊情記事

卷十二奏疏 附表

論時政疏

代謝賜御製答輔臣賀雪吟疏

辭免恩命疏

遵詔自陳不職疏

賀瑞雪表

代徐相公賀瑞雪表

紫極殿成賀表

紫宸宮賀表

賀瑞穀表 二首

賀瑞鹿表

賀瑞兔表

聖壽節賀表 六首

卷十三表

賀靈雨應祈表 六首

賀瑞雪表 七首

賀冬至表 五首

賀元旦表 七首

卷十四書牘

答列卿毛介川

答南中提學御史耿楚侗

答中丞洪芳洲

答總督魏確菴

答宗伯董潯陽

答雲南巡撫陳見吾

答兩廣督撫張元洲

答少司馬楊二山

與中丞孫淮海

與參議高廉泉

答張中翰仰峯

答司馬楊二山

答廣西熊巡撫

答中丞梁鳴泉

答御史顧公曰唯

答馬總兵

答鮑撫劉北川

答河道巡撫翁見海

答廣西熊巡撫

答南祭酒姜鳳阿

與薊遼總督譚一華二通

答某巡撫

答閩中巡撫

答湖廣李布政

答奉常羅月巖

答憲長宋陽山

與薊遼總督

與兩廣總督

與廣西巡撫

寄太宰吳望湖

與薊遼總督

與兩廣熊督撫



答奉常劉小魯

答雲南巡撫陳見吾

與薊遼督撫

與薊遼督撫

與應天龐巡撫

與湖廣巡撫

答湖廣雷巡按

與薊鎮督撫

與司成胡劍西

答歐少卿

答涂巡撫

答王巡按

答凌參政

答施兵憲

與薊鎮巡撫

與魏巡撫

與兩廣督撫

答薊撫朱龍岡

與荊州趙知府汝泉

答朱巡撫

與薊遼督撫王鑑川

答兩廣總督劉帶川

答浙撫谷近滄

答督學曾確菴

答陝撫王鑑川

與楚學憲胡廬山

與憲使羅月巖

答福建涂巡撫

答南太宰吳望湖

答魏巡撫

答吳操江

答薊遼劉督撫

答司知縣

答荊州趙知府

與分宜尹

與劉進士禹謨

答凌參政洋山

答閩撫涂任齋

答中丞孫淮海

答中丞李沽渠

答漕河督撫

答中丞谷近滄

答總督譚二華論任事籌邊

答兩廣總督熊近湖論廣寇

答楊兵憲

答薊鎮戚總兵

與漕河督撫

答兩廣總督熊近湖

答司空林退齋

答閩中涂巡撫

答閩中督撫

答方巡撫金湖

答施兵憲

答南司徒馬鍾陽

答張廬山

答督撫魏確菴

答督撫王鑑川

答南司徒張華峯

答憲長楊晴川

答薊遼總督魏確菴

答中翰張後湖

答遼東巡撫方金湖

答山西按院饒成山

答湖廣按院雷信菴

答遼撫方金湖二通

答湖廣撫院劉唐巖

答荆守徐太室

答閩撫熊北潭

答楚按院雷信菴

卷十五書牘

答應天巡撫海剛峯

答薊鎮巡撫

答薊鎮撫院王鑑川

答藩伯施恆齋

答楚學道胡廬山論學

答薊鎮督撫計邊鎮臺工

答薊鎮撫院王鑑川論薊邊五患

答北邊撫院孟豐麓

答薊鎮總督譚二華言邊事

答薊鎮撫院劉北川言分將當虜

與薊鎮巡撫

與薊遼總督謀俺答板升之始

答宣大巡撫劉白川

與薊遼總督譚二華論遏虜爭功

答兩廣督撫

答兩廣李蟠峯

與撫院王鑑川訪俺谷爲後來入貢之始

答王鑑川策俺答之始

再答王鑑川策俺答

與王鑑川言制俺酋款貢事 二通

與方金湖言制俺酋款貢事

寄太史吳後菴

與王鑑川謀取板升制虜

與王鑑川計送歸那吉事

答徐太室憲長

答王鑑川



與王鑑川議堅封貢之事

答王鑑川計貢市利害

答南御史張懷州

寄陳松谷相公

與王鑑川計四事四要

答荆關水部金省吾

卷十六書牘

與薊鎮楊巡撫

答三邊總督郜文川

答貴州撫院阮沙城

答督撫鑑川

答廣西撫院李蟠峯

答兩廣殷石汀論平古田事

答楚按院陳燕野

答松谷陳相公

答三邊總督戴晉菴

與楚撫院汪南明

答兩廣殷石汀

答河道按院胡玉吾二通

答河南巡撫梁鳴泉

答閩中憲使李義河

答南宗伯秦華峯

答薊遼總督王鑑川

答貴州撫院阮沙城

答憲長施恆齋

答河南巡撫梁鳴泉

答郝巡撫

答河南巡撫梁鳴泉

答宗伯高南宇

答河道潘印川

答關中憲使義義河述時政

答邊鎮巡撫

答總督方金湖

答薊鎮巡撫劉百川

答石麓李相公

答楚按院陳燕野辭表闔

答宣大巡撫吳環洲策黃酋

答薊鎮總督王鑑川言邊屯

答吳環洲策黃酋

答雲南撫院阮沙城

答總憲凌洋山言邊地種樹設險

答棠川殷相公

答宣大巡撫言虜求佛經

答臺長蕭兌嶠

答翰學張鳳盤

卷十七書牘

答總憲孫華山

答兩廣殷石汀計剿廣寇

答荊州道府辭兩院建坊

答楚撫院汪南明辭建坊

答奉常陸五臺論禪

答南司寇謝泰東論刑獄

答宣大巡撫計處黃把二虜

答邊道吳道南

答兩廣殷石汀

答松谷陳相公

答宮端吳澤峯

答憲長徐太室

答應天撫院

答河漕王敬所

答楚按院陳燕野

答總督王鑑川計處黃酋

答王鑑川論東運之衰

答奉常周少泉

與王鑑川計虜情

答臺長蕭兌喁

答宗伯潘水簾

答兩廣郭華溪計剿廣寇

答藩伯陳疊山

答宣大巡撫吳環洲

答二邊總督戴晉菴

答楚撫院汪南明

答邊鎮督撫

答應天撫院張崕崧

答王鑑川

答棠川殷相公

答宣大巡撫劉平川

答薊遼總督

答三邊總督郜文川

答鄖陽巡撫凌洋山

答兩廣殷總督

答司馬劉清渠

答司馬戴育菴

答薊鎮巡撫楊晴川

答孫巡按

答孫兵備

答薊鎮巡撫吳環洲

與王鑑川言虜王貢市

答劉總督

答王鑑川

答總憲李石塘

答荆守王古林

答三邊總督郜文川

答杜晴江



與南刑部謝太東

答湖廣巡撫趙汝泉

答參議吳道南

與南宗伯秦華峯

答兩廣殷石汀

答河漕總督王敬所

與郭總憲

答巡漕張懷洲

與戚總兵

答巡撫吳環洲

答孫巡按

答劉總督

答王督漕

與河道萬巡撫論河漕兼及時政

答王鑑川

答總憲朱龍岡

答王鑑川計處黃昆二虜

卷十八書牘

答李中溪有道尊師

答潘總憲笠翁

答趙汝泉

答汪司馬南明

答司馬吳堯山

與蜀撫曾確菴計劃都蠻之始

與廣東按院唐公

與楚中撫臺辭建第助工

答保定巡撫孫立亭

答文宗謝道長

答宣大孫巡撫

答巡撫吳環洲

答閱視司馬吳堯山

與操江巡撫院言棍徒假借

答閱視汪司馬南明

答司馬萬兩溪

答兩廣總督殷石汀

答保定巡撫孫立亭

答河漕劉總督

答巡撫郭華溪

答荆守王古林

答吳堯山言宏願濟世

答吳參議道南

答總憲張峴崧言公用舍

答王鑑川

答劉總督

答薊鎮巡撫言優假將官

答河漕王敬所言漕運

答吳環洲

答宗伯董幼海

答兩廣殷石汀

答崇王

答問卿李漸菴論用人

答藩參高廉泉親家

答河漕王敬所

答劉總督

答兩廣殷石汀

答總憲張嵒喙

答王鑑川

答汪南明

答王敬所

與蜀撫曾確菴計劃都蠻

答荆南道施華江

與王敬所論大政

答南學院謝虬峯

答殷石汀計剿海寇

與河漕萬兩溪論辨和克讓

答郭華溪

答張總憲

與王鑑川言兢業邊事

答司馬王繼津

與王繼津論君臣之義

與殷石汀論吏治

答蜀撫曾確菴

與廣東督撫

與閩中巡撫劉凝齋

答督撫吳環洲

答工部郎中劉公伯燮言用人毀譽

答大司馬萬兩溪

答王鑑川

答冏卿陸五臺

與李太僕漸菴論治體

答吳環洲

答吳道南

與殷石汀經略廣賊

答王敬所

與楚撫趙汝泉言嚴家範禁請託

與曾確菴計平都蠻善後事

與薊遼總督方金湖言任事

答殷石汀

答趙汝泉

答總憲吳太恆

答太常殷秋溟

答王敬所

答吳環洲二通

答廣西撫臺郭華溪

答翰學余同麓

答宗伯董溥陽



與王敬所言關防棍徒假借

卷十九書牘

答河漕王敬所

答蜀撫曾確菴

答藩伯吳小江

答銓部李石塘

答總憲廖春泉

答廣西巡撫郭華溪

答督撫劉百川

答保定巡撫孫立亭

與荆南道府二公

答兩廣殷石汀

答巡撫張公守約

答薊遼總督方金湖計處板升逆種

答中溪李尊師論禪

答總憲李漸菴

答殷石汀

答薊遼總督撫吳環洲言虜情

答殷石汀言宜終功名答知遇

與操江宋陽山

答方金湖

答宣府吳撫院

答應天巡撫宋陽山論均糧足民

答薊鎮吳環洲料虜虛報誑賞

答兩廣殷石汀

答總憲劉紫山

答方金湖計服三衛屬夷

與南臺長言中貴不干外政

答延鎮巡撫張太石

答甘肅巡撫侯掖川

答薊遼方金湖

答滇撫羅野亭

與河道傅后川

答兩廣殷石汀計招海寇二通

答蜀撫曾確菴計都蠻善後事

答方金湖

答殷石汀

答傅后川議河道

答薊鎮王巡撫

答薊鎮吳環洲

答兩廣殷石汀

答吳環洲

答少參吳道南

一十書牘

答薊鎮總督方金湖

答河道總督王敬所

答兩廣總督殷石汀

答少參吳道南

答應天巡撫宋陽山

答甘肅巡撫侯掖川

寄石麓李相公

答河漕舒按院

答應天撫院王古林

答吳環洲

答山西撫院鄭範溪

答浙撫謝松屏言防倭

答應天撫院宋陽山言防倭

答吳環洲論邊臣任事

答陝西督播石毅菴

答三邊總答論番情

答按院陳公文衡覈事實

答少參吳道南

答督撫張嵒峽

答石麓李相公

答閩撫劉凝齋

答雲南巡撫王毅菴

答督撫吳堯山

答省中羅涇坡論士風

答河漕劉百川言開膠河

答河道徐鳳竹

答山東撫院李漸菴言吏治河漕

答薊鎮總督方金湖

答滇撫王毅菴論夷情戒多事

答甘肅巡撫侯掖川

答列卿楊本菴

答山東巡撫李漸菴

答總督方金湖

答河道徐鳳竹

答司馬王西石

答閩撫劉凝齋

答兩廣督撫凌洋山

寄趙大州相公

答劉虹川總憲

答督撫吳環州言敬事後食之義

答兩廣凌洋山

答薊鎮巡撫

答隴右大參李翼軒

答傅諫議

答河道徐鳳竹

卷二十一 書牘

答應天巡撫宋陽山

答總兵戚南塘

答閩撫劉凝齋

答松谷陳相公

答奉常陸五臺論治體用剛

答河道吳自湖



答兩廣浚洋山計勦羅盤寇

答河漕王敬所

答兩廣督撫計勦海賊

與雲南巡撫王凝菴

答應天巡撫論大政大典

答河道吳白湖

答楚撫陳文峯

答王敬所

答河道潘印川

答操江王少方

答河道吳公桂芳

答總憲吳公

答廉憲胡公邦奇

答操江王少方

答巡撫鄭範溪

答應天按院舒念庭

答薊遼總督方金湖

答鄭範溪

答遼東巡按沈鶴石

答薊遼總督楊晴川

答南總憲吳堯山言法律章奏

答閩邊邵文川言戰守功闕

答總督楊晴山計處屬夷

答總督張心齋計戰守邊將

答山西崔巡撫計納叛招降之策

與總督方金湖以奕諭處置邊事

答雲南撫院王毅菴

答南臺諫

答南列卿張曙崧

答督撫吳環洲

答山西崔巡撫

答楚按院向明臺

答南臺長陳萊峯

答總督方金湖

答潘巡撫

答河道吳自湖言蠲積逋疏海口

答應天巡撫宋陽山

答總督楊晴川

答方金湖

答閩劉撫凝齋

答遼東巡撫張心齋

答吳環洲

答雲南巡撫何萊山論夷情

答陝西學道李翼軒

答吳道南

卷二十二書牘

答兩廣凌洋山

答總憲李漸菴言驛遞條編任怨

答河道吳自湖計河漕

答河道潘巡撫

答總憲李漸菴言人臣節儉之義

答閩撫龐惺菴

答織造許樞使

答總憲張嶠崧言用人

答總憲葛與川論友道

答林王宏齋

答滇王凝菴

答宣大王巡撫言薊邊要務

答徐太室言釋怨爲公

答薊遼總督

答甘肅巡撫侯掖川計套虜

答滇撫何萊山

答少宰楊二山言條編

答河道吳自湖 二通

答石麓李相公

答總督張心齋

與張心齋計不許東虜款貢

答總憲董嵩河

答河道吳自湖計分淮導河策

答憲長周友山言弭盜非全在不欲

與藩伯曾陽柏

答樞使張容齋

答蘇鎮巡撫楊晴川

答福建巡撫商燕陽

答河漕傅厚川

答總憲陳我度

答應天巡撫胡雅齋言嚴治爲善愛

答何臺長

答河道巡撫

答宋陽山

答吳總憲

答楚學道金省吾論學政

答閩撫龐惺菴言嚴以成惠

答戶部王疏菴

答守備太監王函齋

答薊遼答督方金湖言俺酋西行不利

答河道吳自湖

答巡撫高鳳翥

答四川總兵劉草堂

答兩廣凌洋山計羅旁善後

答滇撫王凝齋

答司寇王西石

答藩伯張周田

答南司成屠平石論爲學

答邊鎮巡撫

答總憲高鳳翥



答太宰王疏菴

答藩伯楊魏村

答河道吳自湖

答甘肅巡撫侯掖川

答吳環洲

答薊鎮巡撫陳我度言辭俸守制

答西巡撫宋禮齋

答李石麓相公

一十三書牘

答河道司空吳自湖言任人任事

答河漕按院林雲源言爲事任怨

答薊遼總督張心齋言東師報捷

答凌洋山辭餽助

答宜都知縣許印峯

答翰學張陽和

答織造太監孫東瀛

答薊鎮總兵戚南塘計邊事

答司空李義河

答周王

答本兵方金湖言邊功宜詳覈

居廬答豫所鳳盤乾菴瑤泉四相公

答樞輔張容齋

答松谷陳相公

答憲長周友山

答甘肅巡撫董石坡

答應天巡撫胡雅齋言內府清汰鋪墊

答河道巡撫潘印川計淮黃開塞策

答憲長林碧潭

答憲使張周田

答潘印川

答憲長張敬齋

答宣大巡撫吳環洲

答薊遼總督梁鳴泉計處市馬

答棘卿劉小魯言止剋山事

答總兵戚南塘

答吳道南

答應天巡撫

答陝西學道李翼軒

答兩廣劉凝齋

答三邊總督郜文川

答憲長周友山明講學

答甘肅巡撫侯掖川

答司空雷古和敍知己

答南司成許海嶽

答宣大巡撫吳環洲

答王鑑川

答邊鎮督撫

答少宰楊二山

答三邊總督郜文川

答遼東周巡撫

答滇中王巡撫

答兩廣劉凝齋

答遼東安巡撫

答兩廣劉凝齋條經略海寇四事

答鄭藩伯

卷二十四書牘

答南列卿陳我度

答操江胡玉吾

答貴州巡撫何萊山 二通

答甘肅巡撫侯掖川 二通

答宣大巡撫吳環洲

答豫所呂相公

答南司成許海嶽

答河道潘印川

答楚按院郭龍渠

答福建巡撫耿楚侗言治術

答楚學道金省吾

答漣卿劉小魯

答甘肅巡撫侯掖川

答浙江巡撫言馭將

答宣大王巡撫

答河道潘印川論河道就功

答吳環洲

答總憲吳近溪

答邊鎮張巡撫

答遼東安巡撫

答雲南巡撫劉九澤

答陝西學道李翼軒

答甘肅侯巡撫

答三邊總督郃文川

答兩廣劉凝齋

答福建巡撫耿楚侗談王霸之辨

答進鮮樞使言進俸騷擾

答邊鎮賈巡撫

答兩廣劉凝齋言賊情軍情民情

答南守備許樞使

答河漕姜按院

答錢按院

答應天巡撫仲遺論收遺才

答雲南巡撫

答吳總憲

答宣大巡撫吳環洲言虜構釁之機

答應天巡撫胡雅齋

答憲長周友山講學

答河道潘印川

答宣大張巡撫



答南兵部凌洋山言水災

答福建巡撫耿楚侗

答宣大巡撫

答張巡撫

答陝西提學李翼軒

答應天巡撫胡雅齋

答藩伯徐公學古

答河道巡撫

答大同巡撫賈存宇計遼薊協爲聲援

答兩廣劉凝齋

答保定巡撫張濟東

答南司馬凌洋山

答兩廣劉凝齋論嚴取與

答藩伯周友山論學

答三邊總督郅文川

答陝西學道李翼軒

答兩廣劉凝齋計處海賊

答河道江心源言棍徒假借

答義建巡撫耿楚侗

答薊鎮巡撫張岵嶧

答南守備樞使喬誠齋言治差役騷擾

答殷石汀

答兩廣巡鹽

答陝西學道李翼軒

卷二十五書牘

答雲南饒巡撫

答邊鎮巡撫高鳳翥

答山西巡按趙用吾

答兩廣劉凝齋

答司成張宏陽

答劉凝齋

答宣大鄭範溪言省扈蹕惠程

答甘肅巡撫侯掖川

答翰學黃葵陽

與浙江巡撫

答按院王公蔚

答雲南巡撫言沐鎮守安土司事

答賈春宇

答憲長徐中台

答宗伯董潯陽

壽松谷相公

答藩伯賀澹菴言得國士

寄有道李中溪言求歸未遂

答兩廣劉凝齋料擒海賊

答周府宗侯西亭言春秋辨疑

答海道潘印川

答福建巡撫耿楚侗言致理安民

答楚布政馮修吾

與楚院王見峯

答甘肅巡撫侯掖川

答兩廣劉凝齋

答保定巡撫張濟東

答河道潘印川

答臺長邵梅墩

答承天守備樞使王涵齋

答官府總督鄭範溪

答江西巡撫王又池

答石麓李相公

答楚撫院王見峯

答順天張巡撫

答宣府張巡撫

答憲副吳道南

答司寇王西石

答河道潘印川

答宣大巡撫鄭範溪

答山西徐巡撫

答太僕羅聞野

答南兵兼河道凌洋山

答湖廣巡按朱謹吾辭建亭

答兩廣劉凝齋

答福建巡撫耿楚侗

答保定巡撫張濟東

答司空陸五台二通

答宣大巡撫鄭範溪

答二邊總督

答總兵戚南塘授擊土蠻之策

答藩伯徐中臺

答南京守備樞使喬誠齋

答藩伯賀澹菴

答浙江吳巡撫

答宗伯董潯陽

答學院李公言得失毀譽

答臺長陳楚石

答審決江南帥御史

答大同巡撫賈春宇二通

答宣大巡撫鄭範溪

答巡撫棘澗言士稱知己

答兩廣劉凝齋

答大同巡撫賈春宇

答薊遼總督張崐濂

答陳松谷相公

答翰學陳玉壘

答宣大巡撫鄭範溪

答宣大薊遼邊鎮傅備邊

答宣大巡撫鄭範溪傅備邊

答薊遼總督張崐濂



答宣大巡撫

答薊遼總督張岨峽

答南科吳公瑄

答薊遼總督張岨峽

卷二十六書牘

答藩伯金省吾

答三邊總督郜文川

答司成姜鳳阿

答翰長公東塘

答宣大巡撫

答兩廣總督劉凝齋

答大同巡撫賈春宇

答薊鎮巡撫周樂軒

答應天張按院

答應天巡撫孫小溪

答宣大巡撫鄭範溪

答巡撫劉公國光

答周府宗侯西亭

答翰長張公程

答盧鳳按院陳公用賓

答按院張公簡

答鄭範溪

答宣府張巡撫

答院辛公應乾

張江陵全集 目錄

答薊遼總督鄭範溪

答應天巡撫孫小溪

答南臺長郭熙宇

答翰長公東塘

答山東巡撫何來山

答河漕淩洋山

答河道巡撫褚愛所

答宣大巡撫賈春宇

答鄖陽巡撫楊本菴

答總督張嶢嶸計虜酋鈴東其支屬

答河漕淩洋山言賑濟捕盜

答應天巡撫孫小溪言捕盜

答薊遼吳環洲

答兩廣劉凝

答宣大巡撫賈春宇言邊事

答四川巡撫張濂濱

答巡撫辛慎軒

答王西石

答宣大巡撫鄭範溪

答山東巡撫何來山

答宣大巡撫鄭範溪

答蘇松巡按曾公士楚言撫按職掌不同

答宣府巡撫張嶠喙言虜情

答巡按龔公懋賢

張江陵全集 目錄

答薊遼總督張峒

答薊遼撫督吳環洲

答山東巡撫何來山言均田糧覈吏治

答宣府張峒

答江西巡撫王又池

答宣府張峒

答司馬王鑑川言抱恙勉留

答溪鎮鄭範溪

答宣府張峒

答薊遼總督吳環洲

答耿楚侗

答翰長公東塘

答山東巡撫楊本菴

答廣西憲副吳道南

答四川巡撫張濂濱

答應天巡撫孫小溪

答三邊總督鄭範溪

答巡撫吳公定

答大同巡撫賈春宇計俺酋死言邊事

答大同巡撫賈春宇

壽司寇王西石

答諫議蕭公廩

答大同巡撫賈春宇

答三邊總督鄭範溪計順義襲封事

答宗伯何震川

答巡撫蕭雲峯

答遼東巡撫周樂軒

寄山東巡撫楊本菴

卷二十七書牘

答上師相徐存齋三十一通

與符卿徐仰齋

答奉常徐雲巖

答應天巡撫朱東園

答問卿徐敬吾

答奉常徐仰齋

答符卿徐繼齋二通

答松江兵憲蔡春臺

答河南巡撫梁鳴泉

答應天撫院

答符卿徐繼齋

答陳節樞

答司空曹傅川

答司馬王鑑川

答少司馬曹傅川

答張操江

答中元高相公 四通

答參軍高梅菴

與參軍高梅菴



答司寇曹傅川

答參軍高梅菴 四通

答司馬曹傅川 二通

與河南周巡撫

卷二十八書牘

與南學院吳初泉

與文選李石塘

與南學院周少魯

答姜巡撫言李公卹典事

答應天巡撫

與南列卿王公

與南掌院趙麟陽

與操江王少方

答廉憲王鳳洲 十五通

附答楚按舒念庭

答藩伯王麟洲

答陝西學道王麟洲

示季子懋修

謝病別徐存齋相公

啓叢司馬雙江

答中丞孫槐溪

答劉白川

與司成馬孟河

與邊鎮巡撫王西石

與吳川樓給諫

答西夏直指耿楚侗

答胡劍西太史

答羅近溪宛陵尹

寄徐太學國式

寄高孝廉元谷 三首

答貴陽開府霽巖吳老師

答周鶴川鄉丈論禪

答閩中開府汪南溟 二首

答蜀中開府譚二華

卷二十九文

承天大志紀贊

基命紀贊

龍飛紀贊

聖孝紀贊

大狩紀贊

寶謨紀贊

御製紀贊

陵寢紀贊

宮殿紀贊

禮樂紀贊

苑田紀贊

卷三十文

軒皇問道治世長生頌

張江陵全集 目錄

神母授圖萬年永賴頌

萬壽無疆頌

聖壽無疆頌

得道長生頌

離肅殿箴

聖母圖贊

接引佛讚

鐘鼎硯銘

工部左給事中邱岳并妻勅命一道

工部左給事中邱岳父母勅命一道

卷三十一文

辛未會試程策三道

卷三十二文

勅建涿州二橋碑文

勅建承恩寺碑文

重修海會寺碑文

勅修東嶽廟碑文

勅建慈壽寺碑文

勅建萬壽寺碑文

勅建五臺山大寶塔寺記

特進光祿大夫柱國太師兼太子太師成國公追封定襄王諡恭靖朱公神道  
碑

特進光祿大太柱國太保兼太子太傅掌錦衣衛事後軍都督府左都督贈太  
傅諡忠僖朱公神道碑

卷三十三文

光祿大夫柱國少傅兼太子太傅吏部尙書建極殿大學士贈太保諡文簡豫  
所呂公墓誌銘

光祿大夫柱國少師兼太子太師吏部尙書贈太保諡襄毅楊公墓誌銘  
中憲大夫都察院左僉都御史霽寰吳公墓誌銘

封通議大夫兵部右侍郎兼都察院右僉都御史鏡川吳公暨配淑人合葬墓  
誌銘

素菴戴公墓誌銘

處士立齋高翁墓誌銘

遼府承奉正王公墓誌銘

勅封承德郎刑部山西司主事雲谷曹公墓表

卷三十四文

人主保身以保民論

葬地論

翰林院讀書說

來鴈說

義命說

擬韓信諭燕書

擬唐回鶻嗚沒斯率衆內附詔宰相李德裕撰異域歸忠傳賜之羣臣賀表

會昌二年

卷三十五文

辛未會試錄序

少師存齋徐相公七十壽序

少師存齋徐相公八十壽序

壽封翁觀吾王年丈六十序



翰林爲師相高公六十壽序

門生爲師相中元高公六十壽序

重刊西漢書序

刻灤州志序

送李漢涯之永清序

重刊大明集禮序

贈畢石菴先生宰朝邑敘

贈荆門守黃君陞開封貳守序

賀雲溪翁汪老先生八十壽序

玉林清賞詩序

卷三十六文

贈水部周漢浦權竣還朝序

贈袁太守入覲奏績序 二首

壽漢涯李翁七十序

賀少宰鎮山朱公重膺殊恩序

送大曹長暘谷南先生赴雷都考功序

贈羅惟德擢守寧國敍

賀少司寇少崖傅公三品奏最序

賀襄王殿下序

封君堯溪劉先生七十壽序

壽李母杜夫人七十序

雲海子序

西陵何氏族譜序

錦冰集序

種蓮子戊午稿序

贈霽翁尊師吳老先生督學山東序

卷三十七文

辛未進士題名記

京師重建貢院記

司禮監太監馮公預作壽藏記

遊衡嶽記

後記

襄陽府科第題名記

學農園記

荊州府題名記

宜都縣重修儒學記

荆門州題名記

重築松滋縣城記

王承奉傳

卷三十八文

題竹林舊隱卷

跋葉母還金傳

跋會稽徐珊四寶編

方氏建水射銘

元海子著書評

書胡氏先訓卷

祭張龍湖閣老文

祭朱公文

祭兵部侍郎傅公文

祭勅封翰林檢討陳公文

祭少司成晁春陵文

祭李封君文

祭封一品李太夫人文

祭封一品嚴太夫人文

祭秦白崖先生文

先考觀瀾公行略

處士方田李公行狀

卷三十九文

雜著

卷四十詩

恭述祖德詩

恭勸聖詩學

恭頌母德詩

擬西北有織婦

柬李鵷野

述懷

送高廉泉之任

送黎忠池二首

適志吟

蒲生野塘中

羽林郎

余有內人之喪一年矣偶讀韋蘇州傷內詩愴然有感

朱鳳吟

喜雨獨酌

同汪雲溪太守李龍洲侍御劉百洲太守錢羅湖州守岳東潯別駕登懷庾樓

修竹篇

雨齋遊蕭氏園亭

七賢咏

夜燕曲

怨歌行

再寄胡劍西二首

瀟湘道中

暮宿田家

謁岳廟作

祝融峰

謁晦翁南軒祠示諸同志

同貞菴殿下李羅村飲述齋園亭

人日對雪贈朱鎮山

宿荆門寄懷郢中知舊

獨漉篇

卷四十一詩 七言古

遼左奏捷

恭題皇四駿圖四首

恭詠畫鹿四首

太平歌

送勅使閱武



張江陵全集 目錄

白燕曲四首

應制題畫馬二首

元夕行

送徐浴泉考績還任

三瑞詩爲嚴相公賦

曹紀山督學題老子出關圖見寄謝之

贈國子馬生行

桃溪書屋

寶劍篇

皇貴妃發引鼓吹詞附

漢江

割股行

雪中東劉生

雙燕詞

送黃將軍

卷四十二詩 五言律

應制荷花詩

應制題百子圖

應制題畫四首

孝恪皇太后遷祔鼓吹詞一首輓歌十首

賦得玉河冰泮

閣試秋霽

秋夜感懷寄欽之二首

山月曉仍在

張江陵全集 目錄

返照

送范比部恤刑廣右四首

元夕

秋夕省直

雙河寺小憩

送黎封部參藩廣右二首

郊寺送客二首

雨中遇周比部

題隱菴遠寄亭

登仲宣樓二首

送汪遠峰太史省親二首

咏虎邱圖

孝烈皇后挽歌二首

莊敬太子挽歌

送張少渠之鄞

寄枝江殿下

初秋四首

送楊別駕之瀘

同李石麓張西吳遊正法寺二首

送趙方泉出按應天二首

宿裕州侯晴

月下懷曹紀山侍御二首

送朱文石使楚二首

與李義河給諫約遊衡岳不至奉嘲二首

重遊蕭氏園亭二首

送張襄之歸新喻

送石椽

半山亭

方廣寺宴坐次念菴先生韻并致仰懷

訪大方禪僧次念菴先生韻

送毛青城謫滇南

書羅醫師鳳岡卷

寄題秀溪

別草堂作

同輩之子文人日立春喜雪二首

成趣園夜讌限韻二首

送田青邱之南雄兼寄拒山先生二首

臨湖曲六首

送徐太學國式歸省

後九月九日賞菊閣試

馬上見西山

出左掖

卷四十三詩 七言律

恭紀聖德中興十事詩

恭祝萬壽無疆二首

恭頌聖德詩二首

園丘陪祀有述

恭侍講讀紀事

張江陵全集 目錄

春日侍講

皇上祝聖母

遼左大捷

慶成侍宴

文華殿進講大寶箴應制二首

上林春曉

題荷花應制

元兔

黃鸚鵡

五色鸚鵡

玉兔

題畫貓應制

聖壽朝賀

送羅比部守寧國

壬戌七月望夕初幼嘉陳子嘉二年兄過訪次韻

中秋前二夜與諸君共集雙河寺

賦得秋色老梧桐

送初幼嘉年兄還鄂三首

秋日集曾工部宅得天字

送翁雲松琴士還浙

詠江濱梅得陽字

塞下曲

送王邑博之定海

江中對月得鄭字



范比部魯工部洪山人夜過得龍字

王明府之吉水席上致別

懷曾水部

省中對雪再用前韻

省中春望次吳侍御房山喜聞倭退寄郝侍御韻

再次吳侍御別陳侍御韻

送周比部慮囚江南便歸省觀二首

左闕校閱除書

送梁鳴泉給諫冊封晉藩

病懷

卷四十四詩 七言律

巽州圖爲沈封君題

壽王觀吾封君

夜過吳侍御得來字

中秋前再過吳侍御得陽字

味祕草堂卷爲貞菴王孫賦

送涂司理之敘州

聞警

月夜登城

送方金湖之寧津

遊南海子

慰留生臥病苦吟

李石麓晉翰學入直撰文遙賀

元日望闕

元日感懷

和貞一王孫八嶺山韻

寄胡劍西太史二首

留別新鄉方大尹

壽馬年兄母八十

送譚少石之湘鄉

和答龍湖閣老舟中見示

雪中招友

九日宴汪年兄宅得清字

贈貞菴王孫二首

送楊生南歸

送呂部諫參知秦中

送林儀部視楚學

送陳見吾考績南還因寄親友二首

觀音巖次羅念菴韻

贈沈山人次李義河韻

宿南臺寺

出方廣寺

潛江憫澇

應城訪李義河給諫宿古城寺

吳大尹道南見訪古城寺楊溫泉李義河張陽蘇李万城夜集

泊漢江望黃鶴樓

山居

正月初四日南郊禮成

春日禁中卽事

送楊孝廉下第歸

病懷

度河

七夕詠戲呈曹紀山館丈

西內卽事二首

對菊

鍾山堂

袁少參之廣東

卷四十五詩

五言排律

七言排律

七言絕句

扈從齋壇賜觀齋宮溫室紀恩

便殿奏事紀恩

賜御膳紀恩

擬咏四時山水花木翎毛畫四首

題孫公遺愛祠

上林春曉

泰陵春祀

壽巖少師三十韻

梅中舍有作邀余賦

朱漢水墓

柏亭

遼左奏捷奉諭以授略成功賜白金襲衣紀恩

應制題畫鹿四首

應制題畫漁人二首

張江陵全集 目錄

應制題畫馬

應制題四景翎毛

應制咏瓶花六言二首

江漢古意二首

安肅道中雪

自兜率往南臺行空霧中

水簾洞 飛泉在朱陵洞最奇絕

聽泉

飛來船 石船挂山畔

應制白鶴吟十首

題呂仙口號 十三歲應試作

題竹 十三歲應試作于楚王孫園亭

文華殿對

卷四十六女誠直解

上大婚禮成蒙聖母慈聖皇太后命直解漢班昭女誠以教宮闈進呈聖制

曹大家女誠序

卑弱第一

夫婦第二

敬慎第三

婦行第四

專心第五

曲從第六

和姊妹第七

卷四十七 附錄

張江陵全集

目錄



張文忠公行實

張敬修

編次先公文集凡例敬題

張懋修

書牘凡例敬題

同上

先公致禍之由敬述

同上

血書

張敬修

允修死難紀略

張同奎

上六部稟帖

同上

文忠諸子傳

清康熙 荊州府志

卷四十八 附錄

本傳

周聖楷 楚寶

張同敏傳

同上

張太岳集序

明禮部 尙書 沈鯉

書太岳先生文集後

門生 呂 坤

張文忠公詩跋

馬啓圖

太師張文忠公啓跋

高以儉

太岳先生文集評 與徐從善知己

劉芳節

張文忠公改葬碑文

明萬曆時  
江陵知縣 石應嵩 雲南

張文忠公論

沈 鯉

書張文忠公集後

明天啓時舉  
人貴州參政 陳治紀 道立  
邑人

張太岳先生詩序

明遼瀋  
後裔 孔自來 伯雍  
邑人

張文忠公遺事 荊州府志

清順治  
時翰林 宋學洙 長修  
邑人

張文忠公論

胡克敬 孟常  
邑人

江陵救時之相論

林 澂 鹿巷  
錢塘

答洪稚存二書

清乾隆  
時翰林 袁 枚 簡齋  
錢塘

熊襄愍公傳跋

答子壽比部書

憫忠賦

擬恭進四書直解帝鑑圖說表

顧梁汾纂張太岳書札奏疏小引

帝鑑圖詩序

重刻太張岳先生全集序

又序

張文忠公祠堂記

張文忠公祠落成祭文代

江陵書院記代

謁張文忠公祠

尹民昭

清道光時御史 朱琦

清道光時主事 王柏心

同上

曹國桀 叔方邑人

清道光時郎中 梅曾亮 伯言上元

清道光時江蘇巡撫 陶澍 雲汀安化

陳鑾 江夏

清光緒時荆宜施道 爽良 召南滿洲

張振綱 紀廷復州

王闓運 壬秋湘潭

明王啓茂 天根石首

江陵相公祠

明孔自來

讀張文忠公傳

王釀 山翁

弔張相國文忠公墓

夏熙臣

謁張文忠公墓 款花居稿

清嘉慶時舉人程爓 曉山邑人

讀張文忠公集題後

清道光時貢生陳燾 琴希邑人

都門謁鄉祠見茶陵應山二公像而無江陵慨然久之歸當摹寄配廟食於不

朽焉即用前韻柬夔臣宮允以堅此諾

王柏心

謁張文忠公墓

爽良

爽本重刻述例

田楨

張江陵全集 目錄

# 張江陵全集卷一奏疏

## 陳六事疏

臣聞帝王之治天下。有大本。有急務。正心修身。建極以爲臣民之表率者。圖治之大本也。審幾度勢。更化宜民者。救時之急務也。大本雖立。而不能更化以善治。譬之琴瑟。不調。不解而更張之。不可鼓也。恭惟我皇上踐祚以來。正身修德。講學勤政。惓惓以敬。法祖爲心。以節財愛民爲務。圖治之大本。旣以立矣。但近來風俗人情。積習生弊。有頽靡不振之漸。有積重難反之幾。若不稍加改易。恐無以新天下之耳目。一天下之心志。臣不揣愚陋。日夜思惟。謹就今時之所宜者。條爲六事。開款上請。用備聖明採擇。臣又自惟幸得以經術遭逢聖主。備位輔弼。朝夕與同事諸臣。寅恭諧協。凡有所見。自可隨事納忠。似不必更有建白。但臣之愚昧。竊見皇上有必爲之志。而淵衷靜默。臣下莫能仰窺。天下有願治之心。而舊習因仍。趨向未知所適。故敢不避形迹。披瀝上陳。期於宣

昭主德。而齊一衆志。非有他也。伏乞聖慈垂鑒。俯賜施行。天下幸甚。臣愚幸甚。

計開

一省議論。臣聞天下之事。虛之貴詳。行之貴力。謀在於衆。斷在於獨。漢臣申公云。爲治不在多言。願力行何如耳。臣竊見頃年以來。朝廷之間。議論太多。或一事而甲可乙否。或一人而朝由暮跲。或前後不覺背馳。或毀譽自爲矛盾。是非淆於唇吻。用舍決於愛憎。政多紛更。事無統紀。又每見督撫等官。初到地方。卽例有條陳一疏。或漫言數事。或更置數官。文藻競工。覽者每爲所眩。不曰此人有才。卽曰此人任事。其實蒞任之始。地方利病。豈盡周知。屬官賢否。豈能洞察。不過採聽於衆口耳。讀其詞藻。雖若爛然。究其指歸。茫未有效。比其久也。或并其自言者而忘之矣。卽如昨年皇上以虜賊內犯。特勅廷臣集議防虜之策。當其時。衆言盈庭。羣策畢舉。今又將一年矣。其所言者。果盡舉行否乎。其所行者。果有實效否乎。又如薊鎮之事。初建議者。曰吾欲云云。當事者。亦曰吾欲云云。曾無幾何。而將不相。士譁於伍。眞論繁興。訛言踵至。於是議罷練兵者。又紛

紛矣。臣竊以爲事無全利。亦無全害。人有所長。亦有所短。要在權利害之多寡。酌長短之所宜。委任責成。庶克有濟。今始則計慮未詳。旣以人言而遽行。終則執守靡定。又以人言而遽止。加之愛惡交攻。意見橫出。讒言徼中。飛語流傳。尋之莫究其端。聽者不勝其眩。是以人懷疑貳。動見譸張。虛曠歲時。成功難睹。語曰。多指亂視。多言亂職。此最當今大患也。伏望皇上自今以後。勵精治理。主宰化機。掃無用之虛詞。求躬行之實效。欲爲一事。須審之於初。務求停當。及計慮已審。卽斷而行之。如唐憲宗之討淮蔡。雖百方阻之。而終不爲之搖。欲用一人。須慎之於始。務求相應。旣得其人。則信而任之。如魏文侯之用樂羊。雖謗書盈篋。而終不爲之動。再乞天語。叮嚀部院等衙門。今後各宜仰體朝廷省事尙實之意。一切章奏。務從簡切。是非可否。明白直陳。毋得彼此推諉。徒託空言。其大小臣工。亦各宜秉公持正。以誠心直道相與。以勉修職業爲務。反薄歸厚。尙質省文。庶治理可興。而風俗可變也。伏乞聖裁。

一振紀綱。臣聞人主以一身而居乎兆民之上。臨制四海之廣。所以能使天下皆服從。



其教令。整齊而不亂者。紀綱而已。綱如網之有繩。紀如絲之有總。詩曰。勉勉我王。綱紀四方。此人主太阿之柄。不可一日而倒持者也。臣竊見近年以來。紀綱不肅。法度不行。上下務爲姑息。百事悉從委狗。以模稜兩可。謂之調停。以委曲遷就。謂之善處。法之所加。唯在於微賤。而強梗者雖壞。法于紀。而莫之誰何。禮之所制。反在於朝廷。而爲下者或越理犯分。而恬不知畏。陵替風漸成。指臂之勢難使。賈誼所謂跋盭者深可慮也。然人情習玩已久。驟一振之。必將曰。此拂人之情者也。又將曰。此務爲操切者也。臣請有以解之。夫狗情之與順情。名雖同而實則異。振作之與操切。事若近而用則殊。蓋順情者。因人情之所同欲者而施之。大學所謂民之所好好之。民之所惡惡之者也。若狗情則不顧理之是非。事之可否。而惟人情之是便而已。振作者。謂整齊嚴肅。懸法以示民。而使之不敢犯。孔子所謂道之以德。齊之以禮者也。若操切則爲嚴刑峻法。虐使其民而已。故情可順而不可狗。法宜嚴而不宜猛。伏望皇上奮乾剛之斷。普離照之明。張法紀以肅羣工。攬權綱而貞百度。刑賞予奪。一歸之公道。而不必曲徇乎私情。政教號

令必斷於宸衷。而毋致紛更於浮議。法所當加。雖貴近不宥。事有所枉。雖疎賤必申。仍乞勅下都察院。查照嘉靖初年所定憲綱事理。再加申飭。秉持公論。振揚風紀。以佐皇。上明勵精之圖。庶體統正。朝廷尊。而下有法守矣。伏乞聖裁。

一重詔令。臣聞君者。主令者也。臣者。行君之令。而致之民者也。君不主令。則無威。臣不行君之令。而致之民。則無法。斯大亂之道也。臣看得舊規。凡各衙門章奏。奉旨有某部看了來。說者。必是緊關事情。重大機務。有某部知道者。雖若稍緩。亦必合行事務。或關係各地方民情利病。該衙門自宜參酌緩急。次第題覆。至於發自聖衷。特降勅諭者。又與泛常不同。尤宜上緊奉行事。乃無壅滯。蓋天子之號令。譬之風霆。若風不能動。而霆不能擊。則造化之機滯。而乾坤之用息矣。臣竊見近日以來。朝廷詔旨。多廢格不行。抄到各部。概從停閣。或已題奉欽依。一切視爲故紙。禁之不止。令之不從。至於應勘應報。奉旨行下者。各地方官尤屬遲慢。有查勘一事。而十數年不完者。文卷委積。多致沉埋。干證之人。半在鬼錄。年月既遠。事多失真。遂使漏網終逃。國有不伸之法。覆盆自苦。人

懷不白之冤。是非何由而明。賞罰何由而當。伏望勅下部院等衙門。凡大小事務。既奉明旨。須數日之內。即行題覆。若事理了然明白易見者。即宜據理剖斷。毋但諉之撫按議處。以致耽延。其有合行議勘問奏者。亦要酌量事情緩急。道里遠近。嚴立限期。責令上緊奏報。該部置立號簿。登記註銷。如有違限不行奏報者。從實查參。坐以違制之罪。吏部卽以此考其勤惰。以爲賢否。然後人思盡職。而事無壅滯也。伏乞聖裁。

一覈名實。臣聞人主之所以馭其臣者。賞罰用舍而已。欲用舍賞罰之當。在於綜覈名實而已。臣每見朝廷欲用一人。當事者輒有乏才之嘆。竊以爲古今人才不甚相遠。人主操用舍予奪之權。以奔走天下之士。何求而不得。而曰世無才焉。臣不信也。惟名實之不覈。揀擇之不精。所用非其所急。所取非其所求。則上之爵賞不重。而人懷僥倖之心。牛驥以並駕而俱疲。工拙以混吹而莫辨。才惡得而不乏。事惡得而有濟哉。臣請略言其概。夫器必試而後知其利鈍。馬必駕而後知其駑良。今用人則不然。稱人之才。不必試之以事。任之以事。不必更考其成。及至僨事之時。又未必明正其罪。惟魯少文者。

以無用見譏。而大言無當者。以虛聲竊譽。倜儻伉直者。以忤時難合。而脂韋逢迎者。以巧宦易容。其才雖可用也。或以卑微而輕忽之。其才本無取也。或以名高而尊禮之。或因一事之善。而終身借之以爲資。或以一動之差。而衆口訾之以爲病。加以官不久任。事不責成。更調太繁。遷轉太驟。資格太拘。毀譽失實。且近來又有一種風尚。士大夫務爲聲稱。舍其職業。而出位是思。建白條陳。連編累牘。至覈其本等職業。反屬茫昧。主錢穀者。不對出納之數。司刑名者。未諳律例之文。官守旣失。事何由舉。凡此皆所謂名與實爽者也。如此則真才實能之士。何由得進。而百官有司之職。何由得舉哉。故能妄以爲世不患無才。患無用之道。如得其道。則舉天下之士。唯上之所欲爲。無不應者。臣願皇上慎重名器。愛惜爵賞。用人必考其終。授任必求其當。有功於國家。卽千金之賞。通候之印。亦不宜吝。無功國家。雖噸啖之微。敝袴之賤。亦勿輕予。仍乞勅下吏部。嚴考課之法。審名實之歸。遵照祖宗舊制。凡京官及外官。三六年考滿。毋得概引復職。濫給恩典。須明白開具職稱。平常不稱職。以爲殿最。若其功過未大顯著。未可遽行黜陟者。

乞將誥勅勳階等項。酌量裁與。稍加差等。以示激勸。至於用舍進退。一以功實爲準。毋徒眩於聲名。毋盡拘於資格。毋搖之以毀譽。毋雜之以愛憎。毋以一事概其平生。毋以一眚掩其大節。在京各衙門佐貳官。須量其才器之所宜者授之。平居則使之講究職業。贊佐長官。如長官有缺。卽以佐貳代之。不必另索。其屬官有諳練故事。盡心官守者。九年任滿。亦照吏部陞授京職。高者卽轉本衙門堂上官。小九卿堂官。品級相同者。不必更相調用。各處巡撫官。果於地方相宜。久者或就彼加秩。不必又遷他省。布按二司官。如參議久者。卽可陞參政。僉事久者。卽可陞副使。不必互轉數易。以滋勞擾。如此。則人有專職。事可責成。而人才亦不患其缺乏矣。此外如臣言有未盡者。亦乞勅下該部。悉心講求。條列具奏。伏乞聖裁。

一固邦本。臣聞帝王之治。欲攘外者。必先安內。書曰。民爲邦本。本固邦寧。自古雖極治之時。不能無夷狄盜賊之患。唯百姓安樂。家給人足。則雖有外患。而邦本深固。自可無虞。唯是百姓愁苦。思亂。民不聊生。然後夷狄盜賊乘之而起。蓋安民可與行義。而危民

易與爲非。其勢然也。恭惟皇上嗣登大寶。首下蠲卹之詔。黎元忻忻。方切更生。獨昨歲以元年蠲賦一半。國用不足。又邊費重大。內帑空乏。不得已差四御史分道督賦。三都御史清理屯鹽。皆一時權宜。以佐國用之急。而人遂有苦其搜括者。臣近日訪之外論。皆稱不便。緣各御史差出。目覩百姓窮苦。亦無別法清查。止將官庫所儲。盡行催解。以致各省庫藏空虛。水旱災傷。視民之死。而不能賑。兩廣用兵。供餉百出而不能支。是國用未充。而元氣已耗矣。臣竊以爲天之生財。在官在民。止有此數。譬之於人。稟賦強弱。自有定分。善養生者。唯撙節愛惜。不以嗜欲戕之。亦皆足以卻病而延壽。昔漢昭帝承武帝多事之後。海內虛耗。霍光佐之。節儉省用。與民休息。行之數年。百姓阜安。國用遂足。然則與其設法征求。索之於有限之數。以病民。孰若加意省儉。取之於自足之中。以厚下乎。仰惟皇上卽位以來。凡諸齋醮土木淫侈之費。悉行停革。雖大禹之克勤克儉。不是過矣。然臣竊以爲矯枉者必過其正。當民窮財盡之時。若不痛加省節。恐不能救也。伏望皇上軫念民窮。加惠邦本。於凡不急工程。無益徵辦。一切停免。敦尙儉素。以爲

天下先。仍乞勅下吏部。慎選良吏。牧養小民。其守令賢否殿最。惟以守已端潔。實心愛民。乃與上考。稱職不次擢用。若但善事上官。幹理簿書。而無實政。及於百姓者。雖有才。能幹局。止與中考。其貪污顯著者。嚴限追贓。押發各邊。自行輸納。完日發遣發落。不但懲貪。亦可以爲實邊之一助。再乞勅下戶部。悉心講求財用之所以日匱者。其弊何在。今欲措理。其道何由。今風俗侈靡。官民服舍。俱無限制。外之豪強并兼。賦役不均。花分詭寄。恃頑不納。田糧偏累小民。內之官府造作。侵欺冒破。奸徒罔利。有名無實。各衙門在官錢糧。漫無稽查。假公濟私。官吏滋弊。凡此皆耗財病民之大者。若求其害財者而去之。則亦何必索之於窮困之民。以自耗國家之元氣乎。前項催督御史。事完之後。宜卽令回京。此後不必再差。重爲地方之病。其屯鹽各差。都御史應否取回別用。但責成於該管撫按。使之悉心清理。亦乞勅下該部。從長計議。具奏定奪。以後上下唯務清心省事。安靜不擾。庶民生可遂。而邦本獲寧也。伏乞聖裁。

一飭武備。臣惟當今之事。其可慮者莫重於邊防。廟堂之上所當日夜圖畫者。亦莫急

於邊防。邇年以來。虜患日深。邊事久廢。比者屢蒙聖諭。嚴飭邊臣。人心思奮。一時督撫將領等官。頗稱得人。目前守禦。似亦略備矣。然臣以爲虜如禽獸。然不一創之。其患不止。但戰乃危事。未可易言。須從容審圖。以計勝之耳。今之上策。莫如自治。而其機要所在。惟在皇上赫然奮發。先定聖志。聖志定而懷忠蘊謀之士。得效於前矣。今譚考皆曰。吾兵不多。食不足。將帥不得其人。臣以爲此三者皆不足患也。夫兵不患少。而患弱。今軍伍雖缺。而糧籍具存。若能按籍徵求。清查影占。隨宜募補。著實訓練。何患無兵。捐無用不急之費。併其財力。以撫養戰鬪之士。何患無財。懸重賞以勤有功。寬文法以伸將權。則忠勇之夫。孰不思奮。又何患於無將。臣之所患。獨患中國無奮勵激發之志。因循怠玩。結務偷安。則雖有兵食良將。亦恐不能有爲耳。故臣願皇上急先自治之圖。堅定必爲之志。屬任謀臣。修舉實政。不求近功。不忘有事。熟計而審行之。不出五年。虜可圖矣。至於目前自守之策。莫要於選擇邊吏。團練鄉兵。併守墩堡。令民收保。時簡精銳。出其空虛以制之。虜卽入犯。亦可不至太失。此數者。昨雖已經閣部議行。臣愚猶恐人心



玩愒日久。尙以虛文塞責。伏乞勅下兵部。申飭各邊督撫。務將邊事着實舉行。俟秋防畢日。嚴查有無實效。大行賞罰。庶沿邊諸郡。在在有備。而虜不敢窺也。再照祖宗時京營之兵數十萬。雖今不足。尙可得八九萬人。若使訓練有方。亦豈盡皆無用。但士習驕惰。法令難行。雖春秋操練。徒具文耳。臣考之古禮。及我祖宗故事。俱有大閱之禮。以習武事。而戒不虞。今京城內外。守備單弱。臣常以爲憂。伏乞勅下戎政大臣。申嚴軍政。設法訓練。每歲或間歲。季冬農隙之時。恭請聖駕親臨校閱。一以試將官之能否。一以觀軍士之勇怯。有技藝精熟者。分別賞賚。老弱不堪者。印行汰易。如此。不惟使輦轂之下。常有數萬精兵。得居重馭輕之道。且此一舉動。傳之遠近。皆知皇上加意武備。整飭戎事。亦足以伐狂虜之謀。銷未萌之患。誠轉弱爲強之一機也。伏乞聖裁。奉聖旨。覽卿奏。俱深切時務。具見謀國忠懇。該部院看議行。

請册立東宮疏

臣聞太子者。國之大本。君之儲貳。自昔聖帝明王。莫不早建元良。預定儲位。所以尊宗廟。重社稷也。臣昔侍藩邸。竊聞皇子聰明岐嶷。睿質夙成。我皇上茂膺天眷。篤生聖子。中外人心。咸切仰戴。去歲皇上登極之初。禮官卽疏請冊立。伏奉聖諭。以皇子年尙幼。先賜名而後冊立。臣有以見皇上慎重大禮之意。但人心屬望已久。大計亦宜早定。查得我祖宗故事。宣宗以宣德三年立英宗爲皇太子。時年二歲。憲宗以成化十一年立孝宗爲皇太子。時年六歲。孝宗以弘治五年立武宗爲皇太子。時尙未周歲也。今皇上年已六歲。比之孝廟。年適相符。較之英武兩朝。則已過其期矣。伏望皇上率由祖宗之舊章。深惟社稷之長計。以今首春吉日。勅下禮官。早正儲宮之位。以定國本。以慰羣情。至於出閣講學。及一應朝賀等禮。稍俟數年。皇子容體充實。然後舉行。亦未爲遲。臣愚昧荷皇上恩遇。列在輔臣之末。事關宗社。不敢不盡其愚。伏惟聖慈俯允施行。天下幸甚。

奉御批。禮部本上允行。

請宥言官以彰聖德疏

昨該吏科給事中石星疏陳時政。冒犯天威。伏奉御批。石星這廝。惡言訕上。好生無理。着錦衣衛拏在午門前。着實打六十棍。爲民當差。不許欺縱。臣一聞此旨。不勝驚駭。仰惟皇上聖德寬弘。天覆地載。卽位以來。敬大臣。體羣臣。矜不能。赦小過。至於言官論事。往往曲賜含容。未嘗輕加罪責。今一旦有此處分。不知石星所言何事。致觸聖怒如此。今日於該科取其原本觀之。乃知石星所言。委爲狂妄。不知事體。如鼇山燈在正月二十間。已卽撤去。皇上於宮中遊宴。一切減省。在廷之臣。方切仰戴。而星乃信其誤聞。輒肆誣詆。至於經筵日講。已奉有欽依。擇日舉行。陸鳳儀差寫聖諭。已奉旨處分。不許救擾。而星乃嗷嗷焉。復以爲言。此其狂愚無識。恣肆妄言。在星誠爲有罪。而在皇上亦有不能忍受者矣。但臣惓惓之愚。竊以爲科道乃朝廷耳目之官。職司糾正。必平日養其剛直之氣。寬其觸讟之誅。而後遇事敢言。無所畏避。四方利弊。得以上聞。我皇上登極

之初。特下明詔。廣求直言。故大小臣工。莫不以幸際昌辰。遭逢明主。凡有一得之愚。皆願獻於闕下。今若因此一事。將石星遂加重譴。四方聞之。必謂朝廷求言特虛文耳。轉相告戒。以言爲諱。雖有忠謀讜論。四方利病。誰肯爲朝廷言者。石星一人固不足惜。然因此折言官之氣。開忌諱之門。則於聖朝從諫之盛美。豈不有虧。明詔求言之初意。豈不相背哉。且自古順耳之言易從。逆耳之言難聽。於逆耳難受之言。而能曲容之。乃爲盛德。臣追思皇上昔在藩邸。臣因進講漢光武殺直臣韓歆事。反覆開導。言人臣進言之難。嘆惜光武以明聖之主。不能容一韓歆。書之史冊。甚爲盛德之累。荷蒙皇上改容傾聽。又於宮中御書文武獻納四字。置之座側。是皇上因臣之言有所感悟。而欲廣納忠謀。以追堯舜之治也。今一聞直言。遂爾加罪。則皇上昔時所以感悟於臣言者。其心爲何如哉。臣又訪得石星原任行人。去年十月間。始選爲給事中。草野之人。少不更事。乍被選用。職司言責。不量淺深。急於圖報。故發言狂妄如此。原其本心。實亦無他。今旣杖之於朝。則妄言者已知所警。乃又盡褫其職。發爲編氓。臣竊以爲過矣。今大臣皆持

祿養交。莫肯盡言。諫官皆懼於天威。不敢申救。人臣緘默苟容。恐非國家之福。臣受皇上厚恩。備位輔導。有股肱心膂之託。誠不願皇上有此過舉。伏望聖慈哀憫狂愚。曲賜寬宥。將石星召還原職。或謫降外任。以倡敢言之氣。以開自新之門。則言者之狂妄。益無以解於天下之公惡。而皇上包容直臣之美。宥過赦罪之仁。將垂之萬世而有光矣。

留中

請停取銀兩疏

閣中公本

昨者恭睹聖諭。欽取戶部銀三十萬兩。隨該戶部奏稱邊費重太。國用不足。欲乞聖明。停止取用等因。奉御批。已有旨了。臣等看得祖宗朝。國用邊餉。俱有定額。各處庫藏。尙有贏餘。自嘉靖二十九年。虜犯京師之後。邊費日增。各處添兵添馬。修堡修城。年例犒賞之費。比之先朝。數幾百倍。奏討請求。殆無虛日。加以連年水旱災傷。百姓徵納不前。庫藏搜括已盡。臣等備查御覽揭帖。計每歲所入折色錢糧。及鹽課贖贖事例等項銀

兩。不過二百五十餘萬。而一歲支放之數。乃至四百餘萬。每年尙少銀一百五十餘萬。無從措處。生民之骨血已罄。國用之廣。品無經。臣等日夜憂惶。計無所出。方與該部計議。設處支持。目前尙恐不給。若又將前項銀兩取供上用。則積貯愈虛。用度愈缺。一旦或有饑荒盜賊之事。何以應之。該部所以懇切具奏。誠事勢窮蹙。有萬不得已者也。仰惟皇上嗣登大寶。屢下寬卹之詔。躬行節儉。以先天下。海內訢訢。方幸更生。頃者以來。買辦漸多。用度漸廣。當此缺乏之際。臣等實切隱憂。輒敢不避煩瀆。披瀝上請。伏願皇上俯從該部之言。將前項銀兩。免行取進。仍望念國儲之日乏。懷儉德之永圖。節賞賚。以省財用。停買辦。以寬民力。如上供之費。有必不可已者。照祖宗舊制。止於內庫收用。至於該部所儲。專以備軍國重大之費。庶國用可以漸裕。而民力可以少甦也。臣等無任惶悚隕越之至。

奉御批。朕覽卿等所奏。戶部銀兩缺乏。內庫亦缺銀兩。朕方取。既這等說。且取十萬來。卿等傳示。不必再來奏擾。

請宥言官疏 公本

本月十一日。臣等在閣辦事。忽聞御史詹仰庇以言事忤旨。命錦衣衛擊在午門前打一百棍。發爲民。臣等不勝驚愕。緣此本未經發票。不知所言何事。至於觸犯聖怒如此。昨於該科查問原本。乃知奏內以清查內官監錢糧。末後一段。有再照等語。詞涉狂妄。致干譴責。乃其自取。臣等何敢黨護。復行奏擾。但惟朝廷設耳目之官。正欲其每事匡正。有所裨益。卽或有所觸犯。亦必曲賜含容。以養其剛直之氣。然後遇事敢言。無所畏避。若譴怒重加。摧折過甚。將使諫臣喪氣。箝口不言。倘國家有大利害。朝廷有大奸惡。誰敢復爲皇上言者乎。且臣等再三參詳仰庇疏意。止因該監錢糧未明。欲行清查。以資國用。原其本心。實亦無他。若以其出言狂躁而罪之。或量爲罰治。亦足懲戒。乃杖之於朝廷之上。盡褫其官。似爲少重矣。比見九卿科道諸臣。皆向臣等言皇上天性寬仁。卽位以來。敬大臣。體羣臣。矜不能。赦小過。卽一二言官有言及乘輿者。亦未嘗輒加罪。

責。乃今仰庇以指摘內監一事。遂赫然震怒。有死處分。似非皇上平日所以優容言官之意。責臣等職居輔導。坐視不救。臣等無以應之。深切惶悚。查得隆慶元年。該吏科都給事中胡應嘉。以建言得罪。奉旨爲民。適蒙天恩。矜宥。改從降調。至今大小臣工。無不稱頌。如蒙聖慈。哀矜狂愚。勅下吏部查照。應嘉事例。將仰庇量調外任。或降邊方雜職。令其省改圖報。則我皇上天寬地容之量。赦過宥罪之仁。將傳之萬世而有光矣。臣等又惟言路之通塞。實天下治忽所關。我聖祖有訓。凡天下利病。許諸人直言無隱。所以防壅蔽而杜奸萌也。伏望皇上今後凡臣下有建白條陳。悉發下臣等看詳。有可採者。卽望嘉納施行。或有妄言無當。不知忌諱者。亦乞俯賜包容。以倡敢言之氣。杜欺蔽之端。庶下情無壅。而治道可興也。臣等無任懇切祈望之至。奉御批。知道了。該衙門知道。

### 再乞酌議大閱典禮以明治體疏



近該南京刑科給事中駱問禮奏稱大閱古禮。非今時所急。不必仰煩聖駕親臨等因。緣臣於去年七月條陳六事。內一款飭武備中議及前事。荷蒙聖明採納允行。原臣本意。止以京營戎務。廢弛日久。緩急無備。先年雖屢經言。建白。該部題奉欽依。釐革整飭。迄今數十餘年。竟無成效。臣竊以爲國之大事在戎。今人心懈惰如此。若非假借天威。親臨閱視。不足以振積弱之氣。而勵將士之心。又自皇上御極以來。如耕耨以示重農之意。視學以彰崇儒之美。一人大典禮。皆已次第舉行。則大閱之禮。亦古者聖王詰兵治戎。安不忘危之意。且稽之列聖實錄。在祖宗朝亦間有行者。遂爾冒昧具奏。上請其意。但欲借此以整飭戎務。振揚威武而已。然自臣原疏觀之。此不過飭武備中之一事。其惓惓納忠之意。委不在此。揆之當今時務。委非所急。今駱問禮欲乞皇上先其所急。留神萬幾。以勵庶職。此誠根本切要之論。又謂豐端宜防。巡幸宜謹。尤爲計慮深遠。非臣淺陋所及。臣聞人臣進言於君。不必其說之盡行。事有至當之論。不必其初之爲是。况臣職忝輔導。一言一動。務合天下之公。尤不宜拂衆論而執己見以爲是也。伏乞

勅下該部。再加詳議。如果事體未便。不必另議停止。夫始以爲可行而行之。繼以爲當止而止之。惟求以便於國家耳。輔臣科臣之言何擇焉。臣若不自言之。該部無從酌議。輒敢冒昧。瀆奏。伏乞聖明俯覽。愚誠不勝幸甚。

奉御批。該部看了來說。

請皇太子出閣講學疏 公本

昨該禮部禮科題請東宮出閣講學。臣等衡粟擇日具儀。奉御批。年十齡來奏。此我皇上保愛東宮。不欲以講誨勞之也。臣等敢不仰體聖心。但竊聞孔子有云。愛之能勿勞乎。勞之正所以成其愛也。遠稽古禮。近考祖制。皆以八歲就學。蓋人生八歲。則知識漸長。情竇漸開。養之以正。則日就矩矱。養之不正。則日就放逸。所關至重也。故周成王在襁褓之中。卽周召太公爲之師保。爲之置三少。爲之選天下之端士以衛翼之。自孩提有識。卽見正事。聞正言。而成王爲有周之令主。良有以也。敬惟東宮殿下。英明天錫。睿

智夙成。今已入齡。非襁褓矣。正聰明初發之時。理欲互勝之際。必及時出閣。遴選孝友敦厚之士。日進仁義道德之說。予以開發其智識。於以薰陶其德性。庶前後左右所與處者皆正人。出入起居所見聞者皆正事。作聖之基。以豫養而成。天下之本。以早教而端也。若必待十齡。去此尙有二年之遠。中間倘所見所聞。少有不正。則關係非輕。早一日則有一日培養之益。遲一年則少一年進修之功。惟皇上深省焉。臣等職叨輔導。義不容默。用是不避煩瀆。懇切陳請。恭候命下。臣等會同禮部酌議簡便儀注。上請欽定施行。伏望聖明俯賜俞允。

隆慶四年正月二十日上

# 張江陵全集卷二 奏疏

## 謝召見疏

先該臣以祇役山陵。回還中署致病。具奏請假調理。本月十九日辰刻。忽聞中使傳奉聖旨。宣召臣入。皇上御平臺。命臣至寶座前。親渙玉音云。先生爲父皇陵寢辛苦受熱。又以國家事重。命臣只在閣調理。不必給假。臣叩頭承旨訖。復奉皇上親諭云。凡事要先生盡心輔佐。且追述先帝之言。加以忠臣之獎。臣感激涕零。不能仰視。因伏奏。臣叨受先帝厚恩。親承顧命。敢不竭力盡忠。以圖報稱。方今國家要務。惟在遵守祖宗舊制。不必紛紛更改。至於講學親賢愛民節用。又君道所當先者。伏望聖明留意。蒙皇上親答云。先生說的是。臣又奏目今天氣盛暑。望皇上在宮中慎起居。節飲食。以保養聖躬。茂膺萬福。蒙皇上親答云。知道了。與先生酒飯喫。隨頒賜銀五十兩。紵絲四表裏。內蟒龍斗牛各一疋。臣叩頭祇謝而出。欽此。臣竊惟召見禮臣。迺祖宗朝盛事。先帝臨御六

年。淵穆聽政。屢經羣臣奏復。俱未蒙賜允。天下臣民仰望此舉。殆非一日。我皇上甫登寶位。方在妙齡。卽慨然發自淵衷。修明曠典。此誠上下交泰之期。宗社萬年之福也。而臣愚乃得首逢其盛。可不謂非常大幸哉。但念臣起自草茅。行能無取。適先帝踐祚之初。卽拔寘密勿之地。及龍馭上賓之日。又恭承憑几之言。茲遇皇上紹統凝基。更新理化。自揣位高才薄。方欲以不能而止。而皇上迺曲憐舊物。俯鑒樸愚。特御內臺。宣臣入見。得以密邇天光。親聆溫獎。夫恭閱山陵。臣之分也。而皇上以父皇之重。過憫其勞。俾之在閣調理。代言備問。臣之職也。而倉卒奏對之言。皆蒙優納。而禁帑駢蕃之錫。尤出常規。所上異恩。有一于此。皆足爲當世希豔。而臣愚一旦兼得之。其何以仰答眷知。副此千載一時之盛際哉。臣聞古所稱爲輔弼大臣者。在于贊成君德。又安海內。責任甚鉅。固非臣愚所能稱塞上意。而人臣之道。必秉公爲國。不恤其私。乃謂之忠。臣少受父師之訓。于此一字講明甚熟。迨登仕籍以來。業業操持。未嘗有墜。今伏荷皇上天語諄諄。恩若父子。自非木石。能不奮勵。臣之區區。但當矢堅素履。罄竭猷爲。爲祖宗謹守成

憲不取以臆見紛更。爲國家愛養人才。不敢以私意用舍。此臣皇上之職分也。仍望皇上思祖宗締造之艱。念皇考顧遺之重。繼今益講學勤政。親賢遠姦。使宮府一體。上下一心。以成雍熙悠久之始。臣愚幸甚。天下幸甚。

奉聖旨。覽卿奏謝。知道了。禮部知道。

### 兩宮尊號議

今日伏蒙皇上召臣至平臺。面諭臣曰。皇后是朕嫡母。皇貴妃是朕生母。尊號上先生可多加幾字。欽此。臣仰見我皇大孝根心。純切懇至。臣連日方欲以此上請。但以大行皇帝尊諡大禮。尙未告成。故未敢先請。茲蒙面諭。臣不勝悚仄。恭惟聖母皇后儷體先帝。表正宮闈。聖母皇貴妃誕毓聖躬。翊宣坤教。恩隆罔極。德並無疆。誠宜各極其尊稱。乃可仰慰乎聖孝。但係國家重大典禮。臣之愚昧。豈敢擅專。伏乞勅下禮部會同多官參考前代禮文。仰稽祖宗故事。議擬具奏。容臣再加斟酌。上請聖裁。庶足以光昭一

代之盛典。仰成皇上之大孝乎。

奉聖旨。禮部會同多官議擬來說。

### 謝賜玉帶疏

今日該文書官尙文口傳聖旨。先生忠心爲國。特賜光素玉帶一圍。齎捧到閣。臣謹叩頭祇領。訖伏念臣猥以虛庸。早參密勿。屬真主龍飛之始。首文僚振鷺之班。依乘偶會于風雲。遇合深投于魚水。皇上念臣才雖猶衆心。實無他嘗。恭承憑几之言。可不孤負。展之託。內臺賜見。兩塵綸綍之溫諄。中禁分珍。屢拜篚筐之稠疊。豈期異數。洊逮微蹤。獎以忠心。已荷隻字。袞袞之重。錫之鞶帶。更驚萬釘玉質之輝。追琢其章。溫潤而栗。龍精炳朗。渙頒寵踰于緇衣。虹彩紛綸。祇玩光騰於紫閣。顧惟讜質。冒此殊恩。感奚啻於九遷。懼實深於三褫。臣謹當比德於玉。用書諸紳。道不下視而自存。必匪躬乃可報主。帶則有餘而若礪。一舉手不敢忘君。惟俯殫犬馬之忱。庶仰答乾坤之造。

## 看詳禮部議兩宮尊號疏

伏蒙發下禮部一本。內稱會議兩宮尊號。謂前代禮文典制不同。稱謂無據。仰稽我祖宗舊典。惟天順八年。憲宗皇帝尊嫡母皇后爲慈懿皇太后。生母皇貴妃爲皇太后。則與今日事體正爲相同。但於嫡母特加二字。而於生母止稱皇太后。則尊尊親親之別也。然今恩德之隆。旣爲無間。則尊崇之禮。豈宜有殊。且臣居正恭奉。面諭欲兼隆重其禮。各官仰體孝思。亦皆樂爲將順。今擬兩宮尊號。於皇太后之上。各加二字。並示尊崇。庶於祖制無愆。而於聖心亦慰。又謂先朝母后徽稱。有加至四字。六字。八字者。皆因朝廷有大慶典。以漸致隆。如大婚禮成。誕生皇子之類。其初則止於二字。乃定制也。今聖母福壽無疆。皇上萬年御歷。將來吉祥喜慶之事。將層見必至。尊號徽稱。有加無已。固不在此時之驟增也。臣居正愚昧仔細。看詳各官所議。揆之情禮。似爲允當。伏望聖明裁酌。俯從衆議。先期奏聞。二聖母並加尊稱。以成大孝。



禮母奉聖旨。這典禮既經多官會議停當。兩聖母徽號依擬。於皇太后之上並加二字。以盡朕尊尊親親至情。內閣擬來看。

### 請諭戒邊臣疏

臣看得北虜連年款塞。目前雖若安寧。然虜情叵測。戒備宜謹。况今國有大故。或啓戎心。隆慶元年之事。可爲鑒戒。臣愚伏望特勅兵部。令其行文各邊總鎮巡等官。秋防在邇。比常務要倍加儆備。庶可永保無虞。亦以見皇上臨御之初。留心邊事。蓋鼓舞振勵之一機也。臣謹擬勅稿上進。伏乞聖明裁定。發下書寫。於初六日早朝發行。皇帝勅諭兵部。朕荷皇天眷命。嗣承大統。內治既定。外備宜嚴。目今邊患雖甯。未可恃爲無事。爾兵部便行文與各邊總督鎮巡等官。秋防伊邇。今歲事體。比之常年。倍宜謹備。選將練兵。積餉修守等項事務。都要着實舉行。如有因循怠玩。沿習舊套。以致債事的。都拿來治以重罪。決不輕宥你。部裏亦要常差的當人員。偵探邊事虜情。從實奏報。以俟朝

廷處畫。如或朦朧誤事。一體重治不饒。欽哉。故諭。

### 遵諭自陳不職疏

該吏部都察院節奉聖諭。朕初嗣大位。欲簡汰衆職。圖新治理。兩京六部等衙門四品以上官。俱着自陳去留。取自上裁。欽此。臣仰惟皇上渙發德音。式序在位。欲剔瑕蠹。以新化理。意義甚盛。然臣愚竊以爲官有崇卑。則稱有難易。任有大小。則責有重輕。今百司庶府之官所分理者一事耳。卽有不稱。亦不過一肢病耳。若閣臣之職。上以輔養君德。贊理萬幾。下以表率百僚。兼綜庶務。一有不稱。則化機爲之壅窒。庶事爲之隳墜。其爲害豈特一肢之病而已哉。徼時厚幸。受先帝付託之重。荷皇上知遇之隆。非不欲捐糜此身。以圖報答。奈臣性質闇昧。學術空疎。雖不敢逞小智。以紊舊章。而綜理劇繁。力有不逮。雖不敢昵私交。以樹黨與。而老成英俊。薦拔未周。雖不敢怙權勢。以便身圖。而水旱盜賊之時間。吏治民風之未善。徒切憂惶。一籌罔効。是臣奉職無狀之明驗。可見

於此矣。乃濫竽政府。六年於茲。品秩驟躋於孤卿。封廕屢叨於前後。則今閣臣之中。冒倖忝竊者。又莫甚於臣也。夫易一棧不若得一棟。評衆臣不若簡柄臣。今皇上於百司庶府之官。旣已一一而評汰之矣。乃政本之地。不加精覈。非致理之要也。伏望皇上念內閣爲機衡之地。愚臣爲不職之尤。特賜罷免。以儆曠瘼。別求賢哲。以充任使。則大小臣工咸知自勵。而於新政亦爲有補。

奉聖旨。卿元輔重臣。公忠端慎。勳望素隆。中外具瞻。朕茲嗣位。方切倚託。宜益展謀猷。贊成新治。所辭不允。吏部知道。

### 請戒諭羣臣疏

茲者大小臣工自陳考察。俱已竣事。一時朝政始覺更新。但人心陷溺已久。宿垢未能盡除。若不特行戒諭。明示以正大光明之路。則衆心無所適從。化理何由而致。臣等謹擬勅諭一道。具稿呈覽。伏乞聖明裁定。發下寫完用寶。於本月十六日早朝特召吏部

官捧出。集百官於午門外宣諭施行。

皇帝勅諭文武羣臣。蓋聞理道之要在正人心。勸阻之機。先示所向。朕以冲幼獲嗣。丕基夙夜兢兢。若臨淵谷。所賴文武賢臣。同心畢力。弼予寡昧。共底昇平。乃自近歲以來。士習澆漓。官方剝缺。鑽闕隙竇。巧爲躐取之媒。鼓煽朋儔。公事擠排之術。詆老成廉退。爲無用。謂讒佞便捷爲有才。愛惡橫生。恩讎交錯。遂使朝廷威福之柄。徒爲人臣酬報之資。四維幾至於不張。九德何由而咸事。朕初承大統。深燭弊源。亟欲大事芟除。用以廓清氛濁。但念臨御茲始。解澤方覃。鋤鋤或及於芝蘭。密網恐驚乎鸞鳳。是用去其太甚。薄示戒懲。餘皆曲賜矜原。與之更始。書不云乎。無偏無黨。王道蕩蕩。無黨無偏。王道平平。朕方嘉與臣民。會歸皇極之路。爾諸臣亦宜痛湔宿垢。共襄王道之成。自今以後。其尙精白乃心。恪恭乃職。毋懷私以罔上。毋持祿以養交。毋依阿洩忍以隨時。毋噂沓翕訛以亂政。任輔弼者當協恭利衷。毋昵比於淫朋。以塞公正之路。典銓衡者當虛心鑑物。毋任情於好惡。以開邪枉之門。有官守者或內或外。各宜分猷念。以濟艱難。有言

責者公是公非。各宜奮讜直。以資聽納。大臣當崇養德望。有正色立朝之風。小臣當砥礪廉隅。有退食自公之節。庶幾朝清政肅。道泰時康。相臻師師濟濟之休。歸於蕩蕩公平之域。爾等亦皆垂功名於竹帛。綿祿蔭於子孫。顧不美歟。若或沉溺故常。堅守舊轍。以朝廷爲必可背。以法紀爲必可干。則我祖宗憲典甚嚴。朕不敢赦。百爾有位。宜悉朕懷。欽哉故諭。

### 請崇聖學以隆聖治事

竊惟自古帝王。雖具神聖之資。尤必以務學爲急。我祖宗列聖。加意典學。經筵日講。具有成憲。用能恢弘治理。坐致昇平。仰惟皇上睿哲天成。英明神受。自昔毓德春宮。令聞已彰於四海。茲者光膺大寶。臨朝聽政。動不出辭。無一不中於禮節。用人行政。無一不當乎人心。中外臣工。歡欣仰戴。皆以皇上爲不世出之主。若從此再加學問之功。以講求義理。開廣聰明。則太平之業。可計日而待也。臣等謬以菲陋。職叨輔弼。伏思培養君

德。開導聖學。乃當今第一要務。臣居正又親受先帝顧託。追惟憑几之言。亦惓惓以講學親賢爲囑。用敢冒昧上請。今一應大典禮。俱已次第修舉。時值秋涼。簡編可近。伏望皇上思先帝付託之重。勤始終典學之功。乘此清秋。將講讀令典。亟賜舉行。以慰天下臣民之望。臣等又查得弘治十八年該大學士劉健等以孝宗皇帝山陵甫畢。題請先行日講。至次年二月始開經筵。奉武宗皇帝聖旨依擬行。今先帝梓宮在殯。服色不使。比及山陵事竣。時已迫冬。殿庭高曠。亦難臨御。合無照弘治十八年例。勅下禮部於八月中旬。擇日請皇上於文華後殿先行日講。容臣等參酌累朝事宜。定擬簡便儀注。及講讀人員。恭請聖裁。其經筵會講。俟明春首舉行。庶聖德日益。聖治日隆。而臣等犬馬圖報之忱。亦可少效於萬一矣。臣等不勝惓惓顙望之至。

奉聖旨。覽卿等奏。具見忠愛。八月擇吉。先御日講。經筵候明春舉行。吏部知道。

### 請酌定朝講日期疏

竊惟講學勤政。故明主政治之規。保護聖躬。尤臣子愛君之惓。今開講期近。臣等伏念皇上日每視朝。朝後又講。似於聖體太勞。恐非節宣之道。若論有益於身心。有裨於治道。則視朝。又不如勤學之爲實務也。臣等愚見。欲乞皇上每月定以三六九日視朝。其餘日俱御文華殿講讀。非大寒大暑。不輟講習之功。凡視朝之日。卽免講。講讀之日。卽免朝。庶聖體不致太勞。而聖德亦爲有益。臣等未敢擅便。謹擬傳帖上進。伏乞聖明裁覽。發下禮部遵行。

傳帖

聖旨。朕方在諒陰。哀慕深切。日臨朝政。心實未安。今後除大禮大節并朔望陞殿。及遇有大事。不時宣召大臣諮問外。其常朝每月定以三六九日。御門聽政。餘日俱免朝參。只御文華殿講讀。其一應謝恩見辭人員。遇免朝之日。止於午門外行禮畢。卽各供職事。不必候補。祥之後。還照舊行。禮部知道。

## 擬日講儀注疏

照得日講期近。臣等謹查照累朝事例。酌擬儀注。開坐上請。伏乞聖明裁定。勅下臣等遵行。

### 計開

一伏覲皇上在東宮講讀大學至傳之五章。尙書至堯典之終篇。今各於每日接續講讀。先讀大學十遍。次讀尙書十遍。講官各隨卽進。講畢各退。

一講讀畢。皇上進煖閣少憩。司禮監將各衙門章奏進上御覽。臣等退在西廂房伺候。皇上若有所諮問。乞卽召臣等至御前。將本中事情。一一明白敷奏。庶皇上睿明日開。國家政務。久之自然練熟。

一覽本後。臣等率領正字官恭侍皇上進字畢。若皇上欲再進煖閣少憩。臣等仍退至西廂房伺候。若皇上不進煖閣。臣等卽率講官再進午講。



- 一近午初時。進講通鑑節要。講官務將前代興亡事實。直解明白。講畢各退。皇上還宮。
- 一每日各官講讀畢。或聖心於書意有疑。乞卽下問。臣等再用俗說講解。務求明白。
- 一每月三六九視朝之日。暫免講讀。仍望皇上於宮中有暇。將講讀過經書。從容溫習。
- 一或看字體法帖。隨意寫字一幅。不拘多寡。工夫不致間斷。
- 一每日定以日出時。請皇上早膳畢。出御講讀。午膳畢。還宮。
- 一查得先朝事例。非遇大寒大暑。不輟講讀。本日若遇風雨。傳旨暫免。

### 辭免恩命疏

節奉手勅吏部。朕嗣承大統。內閣輔臣翊贊効勞。茲特加恩。少師兼太子太師吏部尚書建極殿大學士張居正。加授左柱國進兼中極殿大學士。還廕一子尙寶司司丞。照新銜給與誥命。欽此。仰惟皇上光纘丕圖。恩隆逮下。覃敷大賚。首及弼臣。此千載一時之盛際也。臣敢不祇承休命。仰副聖心。但念臣猥以凡庸。受知先帝。早蒙親簡。擢賓鼎

司官品驟躐于孤卿。封廕累叨於前後。逮我皇上嗣位以來。鑒臣忠實無他。被以晉接之榮。託以首輔之重。獎褒賜賚。卓越前聞。臣夙夜省循。如夢如覺。未知何緣。際此殊寵。伏惟乾坤高厚。雖捐糜此身。不足以仰酬其萬一矣。乃今特廕綸綍。禮數愈隆。旣錫以加勳進殿之榮。又重以廕典綸章之渥。舊恩未報。新寵荐臨。將使微臣何修何爲。可以稱塞。何顏何面。可以堪承。况左柱係文品穹階。而中極乃殿學峻秩。在先朝名德。猶不敢居。豈臣之駑愚。可容忝竊。至若符臺世賞。以待有功。臣有何勳庸。僥此厚倖。夫能薄而位高。則易有覆餗之虞。勞微而獲厚。則詩有伐檀之刺。臣雖極愚。自量甚審。若不揣分于止足。必將速咎于顛躓。此臣所以跼天躓地。震懼而不甯者也。伏望皇上憐臣福分已過。將至災危。察臣控辭甚真。非有矯飾。特回成命。俾守舊官。庶朝廷名器之隆。不致濫予。而臣子分義之正。亦獲少安。

奉聖旨。卿勸講春宮。弼贊新政。獨秉公忠。茂宣勞勩。特加恩數。用示眷酬。宜承成命。不必過辭。吏部知道。

## 再辭恩命疏

昨奉手勅。以閣臣翊臣効勞加恩。臣謬叨輔首。蒙被獨隆。該臣具疏辭免。奉聖旨。卿勸講春宮。弼贊新政。獨秉公忠。茂宣勞勩。特加恩數。用示眷酬。宜承成命。不必過辭。吏部知道。欽此。臣捧誦綸音。仰悉皇上體念臣工。微勞必錄。臣卽宜遵奉。徐圖稱塞。但臣反覆思惟。於分甚非所宜。於心實不能安。用敢不避煩瀆。再申前悃。臣惟朝廷慎重名器。必自貴近始。所以示大公也。人臣雖竭力效勞。不敢言功。所以昭大分也。往者皇上毓德春宮。臣備員內閣。提調講讀。乃其常職。何功之有焉。及皇上應期撫運。光膺大寶。臣受先帝顧託之重。夙夜兢兢。惟以不克稱塞是懼。於凡大體大政。皆遵率祖宗彝典。祇奉皇上英斷。臣不過鞠躬仰成于下而已。又何功之有焉。乃昨承明詔。既蒙翊贊之褒。茲奉溫綸。又荷公忠之獎。殊榮異數。疊至薦臨。帝眷宸恩。愈隆益渥。力輕於鴻毛。而任重於泰山。恩深於滄溟。而報微於涓露。臣朝夕省循。誠不自知其死所矣。臣聞賞僭則

濫及匪人。知足乃免於殆辱。然賞疑惟重。在明主不失厚下之仁。而履盛忘危。在人臣必致顛隳之咎。臣所以跼蹐震懼。屢控而不止者。非以辭榮也。乃以避咎也。伏望聖慈俯鑒愚誠。特垂愈允。收回成命。使服舊官。則皇上知臣之深。道臣於罪。九遷不爲榮。百朋不爲重。而臣居於百僚之首。有地容身。亦可以紓誠効力。圖報於萬一矣。奉聖旨。卿受遺輔政。有安定社稷之功。勳蔭未足以酬。豈可過爲遜免。宜勉承眷命。以副朕懷。不允所辭。吏部知道。

### 三 辭恩命疏

昨奉手勅。加恩閣臣。臣自以勞微賞重。分不目安。再疏辭免。奉聖旨。卿受遺輔政。有安定社稷之功。勳蔭未足以酬。豈可過爲遜免。宜勉承眷命。以副朕懷。不允所辭。吏部知道。欽此。臣詞不宣心。莫回天聽。過蒙眷獎。彌切冰兢。然臣所以屢控而不止者。非以沽名也。竊有款悃之愚。敢終爲皇上陳之。臣惟明君以禮。使臣榮其身。不若行其志。大臣

以身率物。有諸已乃可求諸人。臣謬以庸愚。荷蒙皇上眷過優隆。信任專篤。寵以師臣之禮。口承晉接之每。榮事必諮。有言必聽。是臣之志已行。願已遂矣。即使臣職居冗散。列在庶僚。亦足以震耀一時。垂聲千載。况臣官品已極。涯分已逾。但懼福薄不能承受耳。又何敢過冒非分之恩。以速必然之咎耶。此臣自揣分義如此。臣又聞古語云。朝廷之上讓而處。下民猶犯禮。晉之大夫范宣子讓。其下皆讓。戰之前史。以爲美譚。故大臣者。民之表也。仰惟皇上臨御之初。將振舉綱維。作新化理。頃奉勅諭。勉大臣以崇養德望。飭小臣以砥礪廉隅。臣忝爲大臣。卽不能樹德隆望。挽回師濟之風。亦宜思砥行矜名。恪守廉隅之節。若覲顏濫冒。不知止足。則瘵素之罪。臣實尸之。貪進之戒。臣先犯之。何以率先百僚。表正頽俗。亦非皇上所以振勵臣工之意也。臣抱此二端。日夕悚仄。用敢冒昧屢懇。仰瀆宸嚴。伏望皇上曲察愚誠。特垂俞允。則不惟愚臣微分獲以少安。其於聖明新政。亦爲小補。

奉聖旨。朕知卿性篤忠貞。不因爵賞而勸。但勲廕酬功。係累朝彝典。原非過制。卿宜以

成命爲恭。不必同執謙讓。所辭不允。還着寫勅獎諭。風勵臣工。賞銀一百兩。大紅紵絲蟒衣一襲。彩段四表裏。該衙門知道。

#### 四辭恩命疏

昨該臣三疏辭免勳蔭恩典。奉聖旨。朕知卿性篤忠貞。不因爵賞而勸。但勳蔭酬功。係累朝彝典。原非過制。卿宜以承命爲恭。不必固執謙讓。所辭不允。還着寫勅獎諭。風勵臣工。賞銀一百兩。大紅紵絲蟒衣一襲。彩段四表裏。該衙門知道。欽此。又該文書房官張孝兩次到閣。口傳聖旨。欲臣領受。臣祇奉綸音。愈增慚悚。無地自容。念臣素性朴愚。恥爲文飾。若徒務廉讓之迹。至於瀆擾君父。以欺世盜名。則其罪尤大。又臣所不敢爲也。但自揣分義。萬分不能自安。故屢控宸嚴。冀申愚款。前後所奏。字字皆出於肺腸。句句直陳其悃。詎意犬馬之誠。不能動天。錫予之隆。吏出望外。既不解其所已有。又復益其所本無。是在愚臣則叨冒之中。愈爲叨冒。在朝廷則加恩之外。重復加恩矣。國家

馭臣之柄。與人臣自處之道。豈不兩失之乎。且賜勅獎諭。蓋以臣爲廉而獎之。以示勸也。若使臣旣不得遂其辭讓之私。又冒此非分之獲。則臣爲貪夫矣。貪得之人。獎于何有。獎貪以勸廉。猶郤行而求前也。揆之事理。未見其順。參之公論。必以爲非。此臣所以甯冒煩瀆之罪。而不能覲顏承受者也。伏望皇上鑒臣愚誠。恕臣萬死。將前項恩數。俯容辭免。是皇上知臣之深。信臣之篤。九鼎百朋。不足以喻其榮重矣。粉骨捐軀。不敢忘報。

奉聖旨。卿屢辭恩命。詞意懇至。謙讓之風。足勵有位。茲特准辭。以成卿勞謙之美。勅諭賞賚。照前旨行。該衙門知道。

### 賜勅獎賞疏

今日伏蒙聖恩。特遣文書房官內官監太監劉大用頒賜獎諭勅書一道。銀一百兩。大紅紵絲蟒衣一襲。彩段四表裏。齋捧到臣私寓。臣謹焚香叩頭祇領。訖草疏冒陳。方懼

干乎嚴譴。恩綸賁錫。乃曲荷乎優嘉。精鏐頒御府之珍彩。服出尙衣之製。聲傳里閭。光動簪紳。臣猥以庸流。被茲殊寵。衰職無一字之補。璽書塵十札之褒。感與愧并。懼將榮至。臣謹當祇承彝訓。矢竭愚忠。崇讓獎恬。倡百辟和衷之義。鞠躬盡瘁。贊一人垂拱之休。

### 山陵禮成奉慰疏

臣於十八日伏奉欽命。前詣昭陵。恭題穆宗莊皇帝神主。至卽恭叩玄宮。見其精固完美。有同神造。寶城三面俱完工。甚堅厚。及周視山川形勢。結聚環抱。比之前日考卜之時。更覺佳勝。誠天地之奧區。帝王之真宅也。十九日辰時奉遷梓宮。入皇堂行題主禮畢。奉安於獻殿。未時掩玄宮。是日又喜天氣澄爽。人物昭融。祇役臣工無不欽忭。仰惟我大行皇帝仁厚之德。貫澈宇宙。故得天人協佑。事事美成。可以上慰兩宮聖母永慕之誠。仰成皇上慎重大事之孝矣。臣伏思數日之間。聖心必爲懸切。爲此除候回京之



日另行復命外。謹先具題奉慰以聞。

奉聖旨。覽卿奏皇考梓宮已入皇堂。大事克襄。足慰我兩宮聖母哀念。朕心深用嘉慰。卿爲國忠勤。始終備盡。朕知道了。禮部知道。

### 纂修事宜疏

昨該臣等題請預定纂修實錄官員。奉聖旨。是禮部知道。欽此。除欽遵具題外。臣等又惟事必專任。乃可以圖成。工必立程。而後能責效。查得隆慶元年六月初一日開館纂修世宗肅皇帝實錄。經今六年。尙未脫藁。雖屢膺先帝聖問。迄無成功。任總裁者。恐催督之致怨。一向因循。司纂修者。以人衆而相推。竟成廢閣。臣等日食大官之饌。茫無一字之補。素餐曠職。實切兢慚。然揆厥所由。皆以未嘗專任而責成之故也。蓋編撰之事。必草創。修飾。討論。潤色。工夫接續不斷。乃能成書。而其職任緊要。又在於副總裁官。顧掌部事。則有簿書綜理之繁。直經幃。則有侍從講讀之責。精神不專。職守靡定。未免顧

此失彼。條作忽輟。是以歲月徒悠。而績效鮮著也。今兩朝並纂。二館齊開。若不分定專任。嚴立限程。則因循推捱。其弊愈甚。臣等看得吏部右侍郎兼翰林院侍讀學士諸大綬。禮部左侍郎兼翰林院侍讀學士王希烈。原係世宗肅皇帝實錄副總裁官。今查各館草藁俱已纂完。但未經修飾。二臣雖任部堂。止是佐理。尙有餘功。及左春坊左諭德兼翰林院侍讀中時行。右春坊右諭德掌南京翰林院事。今行取王錫爵。職任宮坊。事務尤簡。皆可以專心著作之事。合無責令諸大綬王希烈專管纂修世宗肅皇帝實錄。中時行王錫爵專管纂修穆宗莊皇帝實錄。日每俱在史館供事。仍立爲限程。每月各館纂修官務要編成一年之事。送副總裁看詳。月終副總裁務要改完一年之事。送臣等刪潤。每年五月間臣等即將纂完稿本進呈一次。十月間又進呈一次。大約一月之終。可完一年之事。一季之終。可完三年之事。從此漸次累積。然後成功可期。其餘副總裁等官陸樹聲等。或理部休暇。相與討論。或侍講優閒。令其補湊。不必責以程限。不致兩妨。各館纂修官務以職業爲重。公家爲急。不得別求差假。圖遂私情。書成之日。分別

敘錄。但以效勞多寡爲差。不復計其年月久近。如此庶人有定守。事易考成。在各官可免汗青頭白之譏。而臣等亦得以道曠職素餐之吝矣。此雖纂修一事。而國家用人之理。綜覈名實之道。實寓於斯。伏惟聖明裁斷。勅下臣等遵行。再照皇祖歷世四紀。事蹟浩繁。編纂之工。卒難就緒。皇考臨御六年。其功德之實。昭然如日中天。皆諸臣耳目之所睹記。無煩蒐索。不假闕疑。但能依限加功。自可刻日竣事。合無不拘朝代次序。俟穆宗莊皇帝實錄纂成之日。容臣等先次進呈。却令兩館各官併力俱纂。世宗肅皇帝實錄。則兩朝大典可以次第告成矣。

奉聖旨。這纂修事理。都依擬行。卿等還宜督率各官。上緊用心編纂。用成兩朝大典。稱朕光昭前烈之意。該衙門知道。

### 謝賜貂鼠疏

伏蒙皇上念臣等日侍講讀。時值冬寒。特賜臣居正貂鼠皮六箇。臣調陽貂鼠皮二箇。

臣等謹頓首祇領。訖仰惟皇上天縱睿資。日新聖學。雖值沍嚴之候。尙勤講習之功。臣等但愧經術空疎。無裨啓沃。敢以風寒奔走。自愛髮膚。豈意聖慈曲垂軫念。珥貂寵錫。恩尤重於解衣。溫綈傳宣。煖已逾於挾纊。宋祖開疆重武。遠頒介冑之臣。今明主稽古右文。特賜章縫之侶。茲爲曠典。實邁前聞。臣等敢不罄竭悃誠。寅恭夙夜。敷陳仁義之道。必見效於日就而月將。簡求侍從之儒。期不至於十寒而一暴。

### 辭免筵宴疏

先該禮部題本月二十六日開館纂修穆宗莊皇帝實錄。查得累朝舊例。先於本部欽賜筵宴。次日入館。今次監修等官。亦合照例筵宴。奉聖旨。是欽此。臣等竊照纂修賜宴。向累朝彝典。但今玄象垂戒。伏聞皇上在宮中齋心露禱。減膳徹樂。又特諭百官痛加修省。臣等夙夜皇皇。方切兢惕。豈敢爲此飲食宴樂之事。非唯於禮有不可。於心亦實有不安也。且一宴之資。動至數百金。省此一事。亦未必非節財之道。伏望皇上俯鑒臣

等愚衷。特免賜宴。只於二十六日照常開館供事。以少見臣等兢懼不敢自寧之誠。臣等無任惶恐俟命之至。

奉聖旨。卿等以修省辭宴。具見慎畏。准辭免辦。禮部知道。

### 議處黔國公沐朝弼疏

伏蒙發下兵部三法司會議原任雲南總兵官黔國公沐朝弼罪狀一本。內稱朝弼罪惡顯著。法應處死。臣等看得朝弼稔惡有年。世宗皇帝時即欲拏問重處。但以其元勳後裔。未忍即寘於法。止於罰住祿米。隆慶二三年間。屢經撫按及科道官論劾。先帝亦不忍如刑。止令革任閒住。朝弼乃不知感恩省改。作惡愈甚。謀害親子。擅殺無辜。揆其情罪。處死不枉。但其始祖三世。皆有大功於國家。曾關給鐵券。子孫許免一死。非有反逆實跡。似應稍從寬宥。待以不死。庶爲情法之中。夫因其有罪而逮問之。既足以破奸究之膽。念其先功而寬釋之。又足以彰肆赦之恩。國法皇仁。兩得之矣。

兵部法司奉聖旨。你每說的是。沐朝弼屢抗明旨。積惡多年。擅殺無辜。情罪深重。本當依律處死。但念元勳世裔。姑從輕着革去冠帶爲民。押發南京隨住。還着內外守備衙門羈管。何文等併蔣福等撫按官問擬具奏。

### 謝御筆大書疏

茲者伏蒙皇上親灑宸翰。賜臣居正元輔大字一幅。良臣大字一幅。臣調陽輔政大字一幅。臣等恭捧天章。不勝欽戴。仰惟皇上天縱睿資。日勤聖學。至於操觚染翰。雖作聖之餘功。亦莫不究其精微。窮其墨妙。一點一畫。動以古人爲法。臣等每侍幃幄。輒欣仰欽服。不能自己。茲者所賜大至盈尺。運筆尤難。乃裁自聖心。不由摹擬。比之常日所書。更爲佳妙。且筆意遒勁飛動。有鸞翔鳳翥之形。信所謂雲漢之章。翰墨之寶也。願臣等淺薄。謬蒙眷獎。恭覩之餘。欣愧交至。謹各摹臨入梓。懸扁居第。晨夕瞻仰。如對天顏。其御書真蹟。當什襲珍藏。永爲世寶。

再謝御書疏

伏蒙皇上親灑宸翰。賜臣爾惟鹽梅大字一幅。汝作舟楫大字一幅。該文書房官王宦恭捧到閣。臣謹叩頭祇領。訖仰惟皇上聖哲夙成。英明天挺。必得名世俊乂之佐。乃爲格心啓沃之資。臣猥以虛庸。謬膺簡任。雖葵忠自許。心恆切於傾陽。而蚊力難勝。懼每深於履薄。乃蒙皇上寘諸左右。託以股肱。前旣承良臣元輔之褒。茲復荷舟楫鹽梅之寄。渥恩踵至。眷顧彌隆。寶墨淋漓。宛降從於天上。瓊章燦爛。忽光動於人間。卓然雲漢之昭回。矯若鳳鸞之翔翥。寵榮浥被。感愧交并。臣敢不景行前修。對揚休命。孜孜納誨。罔少懈於夙宵。汲汲求賢。式欽承乎德意。期少効濟川調鼎之用。庶以答天高地厚之恩。

# 張江陵全集卷三奏疏

## 進帝鑑圖說疏

臣等聞商之賢臣伊尹告其君曰。德惟治。否德亂。與治同道罔不興。與亂同事罔不亡。唐太宗曰。以銅爲鑑。可正衣冠。以古爲鑑。可見興替。臣等嘗因是考前史所載治亂興亡之迹。如出一轍。大抵皆以敬天法祖。聽言納諫。節用愛人。親賢臣。遠小人。憂勤惕厲。卽治。不畏天地。不法祖宗。拒諫遂非。侈用虐民。親小人。遠賢臣。樂樂怠傲。卽亂。出於治則雖不階尺土一民之力。而其興也勃焉。出於亂則雖藉祖宗累世之資。當國家熙隆之運。而其亡也忽焉。譬之佩蘭者之必馨。飲鴆者之必殺。以是知人主欲長治而無亂其道無他。但取古人已然之迹。而反己內觀。則得失之效。昭然可睹矣。仰惟皇上天縱英資。光膺鴻寶。孜孜誦習。懋殷宗典。學之勤。事事講求。邁周成訪落之軌。海內臣民莫不翹首跂足。想望太平。臣等備員輔導。學術空疎。夙夜兢兢。思所以佐下風效啓沃者。



其道無繇。竊以人求多聞。事必師古。顧史家者流。亡慮千百。雖儒生皓首。尙不能窮。豈人主一日萬幾所能遍覽。乃屬講官臣馬白強等。略倣伊尹之言。考究歷代之事。除唐虞以上皇風玄邈紀載未詳者。不敢采錄。謹自堯舜以來。有天下之君。撮其善可爲法者八十一事。惡可爲戒者三十六事。善爲陽爲吉。故用九九。從陽數也。惡爲陰爲凶。故用六六。從陰數也。每一事前。各繪爲一圖。後錄傳記本文。而爲之直解附於其後。分爲二冊。以辨淑慝。仍取唐太宗以古爲鑑之意。僭名歷代帝鑑圖說。上呈睿覽。昔班伯指畫屏以諫。意專戒懲。張九齡千秋金鑑一書。詞涉隱諷。今臣等所輯。則媿惡並陳。勸懲斯顯。譬之薰蕕異器。而臭味頓殊。冰鏡澄空。而妍媸自別。且欲觸目生感。故假像於丹青。但取明白易知。故不嫌於俚俗。雖條目僅止百餘。而上下數千載理亂之原。庶幾略備矣。伏望皇上俯鑒愚忠。特垂省覽。視其善者取以爲師。從之如不及。視其惡者用以爲戒。畏之如探湯。每興一念。行一事。卽稽古以驗今。因人而自考。高山可仰。毋忘終簣之功。覆轍在前。永作後車之戒。則自然念念皆純。事事合理。德可媿於堯舜。治將埒於

唐虞而千萬世之下。又必有願治之主。效忠之臣。取皇上今日致治之迹。而繪之丹青。守爲模範者矣。

### 進帝鑑圖說述語

右善可爲法者。八十一事。臣等旣論次終篇。乃作而歎曰。嗟乎。孟軻稱五百年必有王者興。傳曰。千年一聖。猶且暮也。詎不信哉。夫自堯舜以至於今。代更幾世。主更幾姓矣。而其可取者。三十餘君而已。中間又或單舉一善。節取一行。究其終始。尙多可議。其完善燦懿。卓然可爲世表者。纔什一耳。可不謂難哉。天祐我明。聖神繼作。臣等嘗伏讀我祖宗列聖實錄。仰稽創守鴻規。則前史所稱聖哲之事。無一不備者。略舉其概。如二祖之開基靖難。身致太平。則堯舜湯武。功德並焉。典宥貽休。謨烈垂後。則漢綱唐目。巨細具焉。昭皇帝之洪慈肆宥。培植國脈。則解網澤骨之仁也。章皇帝之稽古右文。勵精圖治。則宏文延英之軌也。睿皇帝之聘禮處士。訪問治道。則蒲輪玄纁之舉也。純皇帝之

親愛諸王。厚遇廊邸。則惇睦友于之風也。敬皇帝之延見羣臣。曲納讜言。則揭器止輦之明也。肅皇帝之心存敬一。治本農桑。則丹書無逸之箴也。皇考穆宗莊皇帝之躬修玄默。服戎懷遠。則垂衣舞干之化也。其他片言之善。一事之美。又不可以殫述。蓋明興纔二百餘年。而聖賢之君。已不啻六七作矣。以是方內乂安。四夷賓服。重熙襲洽。迭耀彌光。致治之美。振古罕儷焉。猗歟休哉。豈非乾坤光岳之氣。獨鍾于昭代。河清里社之兆。並應於今日哉。詩曰。下武維周。世有哲王。王配于京。世德作求。我明蓋軼有周而特盛矣。今皇上睿哲挺生。膺期撫運。又將觀光揚烈。以遠追二帝三王之治焉。臣等何幸。躬逢其盛。

右惡可爲戒者。三十六事。自古人君覆亡之轍。大略不出乎此矣。彥曰。前人蹟。後人戒。然世主皆相尋而不改。彼下愚不移。固無足論。主如晉武唐玄莊宗之流。皆英明雄武。又親見前代敗亡之禍。或間關險阻百戰以取天下。及其志得意盈。迷心酖毒。遂至一敗塗地。不可收拾。其視中才守成之主。反不逮焉。書曰。惟聖罔念作狂。成敗得失之機。

可畏也哉。臣等嘗伏讀我太祖高皇帝實錄。與侍臣論及古來女寵宦寺外戚權臣藩鎮夷狄之禍。侍臣曰。叔季之君。至於失天下者。常在於此。高皇帝曰。朕究觀往古。深爲用戒。然制之有道。若不惑於聲色。嚴宮闈之禁。貴賤有體。恩不掩義。則女寵之禍。何自而出。厚其恩賚。不任以事。苟干政典。裁以至公。則外戚之禍。何由而作。宦寺便習。供給使令。不假以兵柄。則無宦寺之禍。不設丞相。六卿分職。使上下相維。大小相制。防耳目之壅蔽。謹威福之下移。則無權臣之禍。藩鎮之設。本以衛民。使財歸有司。兵必合符而調。豈有跋扈之憂。修武備。謹邊防。來則禦之。去不窮追。則無夷狄之虞。淵哉睿謀。誠萬世聖子神孫所當遵守而弗失者也。至於端本澄源。正心修身。以銷釁孽於未萌。杜間隙於無迹者。則又備載寶訓及御製諸書。伏惟聖明留意焉。臣等不勝幸甚。

隆慶六年十二月十八日。奉聖旨。覽等卿奏。見忠愛懇至。朕方法古圖治。深用嘉納。圖冊留覽。還宣付史館。以昭我君臣交修之義。禮部知道。

謝銀幣疏

昨該臣等以所輯帝鑑圖冊進呈睿覽。面蒙天語嘉納。隨又節奉聖諭。卿等進帝鑑圖冊。於君道甚有裨益。賜元輔居正銀五十兩。紵絲四表裏。以示朕嘉獎忠悃之意。欽此。伏念臣猥以迂踈。謬蒙知遇。雖無伊尹致其君必爲堯舜之學。實有魏徵勸其主力行仁義之心。故每因事以納忠。益以責難而爲敬。顧葵藿徒塵於傾嚮。而涓埃何補於崇深。豈意聖明特垂鑒獎。恩綸溫綍。已踰華袞之褒。彩幣精鏐。更拜尙方之錫。寵榮薦被。感愧交并。履厚戴高。知報酬之無地。鞠躬盡瘁。惟捐殞以爲期。

明制體以重王言疏

竊照閣臣之職。專一視草代言。故其官謂之知制誥。若制詞失體。以致輕褻王言。則閣臣爲不職矣。謹按舊規。凡官員應給誥勅。該部題奉。欽依手本到閣。撰述官先具稿送

臣等看詳。改定謄寫。進呈候批紅發下。撰述官用關防掛號。然後發中書舍人寫軸用寶。此定制也。至於制命之詞。貴在簡嚴莊重。乃爲得體。查得成化弘治年間誥勅。敘本身履歷功績。不過百餘字。祖父母父母及妻室。不過六七十字。至於慶典覃恩。則其詞尤簡。蓋以恩例概及。比之考績不同。故以資被爲榮。不必詳其閱歷。此制體也。近年以來。俗尙干求。詞多浮靡。撰述官沿襲宿弊。往往不候進呈。先將文稿傳示於人。其中詞語又過爲誇侈。多至數百千言。或本無實行。虛爲頌美。或事涉幽隱。極力宣揚。臣等方欲爲之更定。而本官已先得稿登軸矣。夫誥勅者。朝廷所以告諭臣下者也。臣諛其君。猶謂之佞。况以上諛下。是何理乎。查得嘉靖十二年該大學士張孚敬等。題爲重誥勅事。奉世宗肅皇帝聖旨。卿等所言。足見敬慎至意。近年以來。委的誥詞之文。浮泛誇譽。至於數百。甚非制體。甚非王言。今後都着刪去浮詞。以存實體。欽此。又該本官題爲前事參論制勅房辦事大理寺評事岳梁。撰擬南京兵部尙書陶琰贈官誥文。浮詞誇誕。又不先送內閣看詳。輒便進呈等因。奉世宗肅皇帝聖旨。卿等另撰誥文來看。岳梁驍

賣浮詞。蔑視制辭。不遵前旨。着法司提了問。欽此。比時嘉靖初年。誥勅之文。視成化弘治雖爲稍繁。然尙未知近年之甚也。竊以禮貴從先。辭尙體要。况命令之辭。乃一代典制。傳之四方。垂之後世。所關非小。此係臣等職掌。不容不爲釐正。伏乞皇上念朝廷體統之當尊。國家典制之當守。勅下臣等戒諭各撰述官。自今以後。凡爲制誥。必須復古崇實。毋得徇情飾辭。以壞制體。及文字未經進呈。亦毋得預行傳示。以市私交。如此庶王言重。國體尊。而臣等亦得以守其常職矣。奉聖旨。卿等說的是。後今誥勅文字。都着刪去浮詞。務崇本實。各官撰完送閣。卿等選妥仔細看詳改定。乃可進覽。如有仍前徇情飾辭。及不候進呈預行傳示的。照例參來處治。該部知道。

請開經筵疏

去年八月內。該臣等題爲乞崇聖學以隆聖治事。奉聖旨。覽卿等奏。具見忠愛。八月內擇吉先御日講。經筵候明春舉行。禮部知道。欽此。今年正月初五日奉聖諭。初七日開

日講。諭卿等知之。欽此。臣等恭照經筵日講。皆所以仰成聖德。講明治道。在我祖宗列聖自有成規。去年臣等因山陵未畢。歲事將終。故請皇上先御日講。次開經筵。荷蒙聖明。卽賜允行。後值隆冬。講讀不輟。茲於年節假內。卽已諭開日講。臣等仰見我皇上揚勵之誠。法天行健。緝熙之學。與日俱新。誠宗社萬萬年無疆之慶也。但經筵盛典。亦宜次第舉行。且在廷臣工。久切快覩之望。伏乞勅下禮部。遵照前旨。於二月內。擇日具儀。暨舉令典。其合用知經筵。同知經筵。及侍班講讀。執事侍儀等官。容臣等查照舊規。議擬上請。仰候聖裁施行。庶勸講之禮。既不廢於公庭。造膝之言。又日陳於左右。聖功已密而益密。聖德日新而又新矣。

萬曆元年正月初十日奉聖旨。是禮部知道。

### 廣東奏捷辭免加恩疏

今日早該臣等恭侍皇上講讀畢。伏蒙面諭。以兵部覆廣東奏捷本。謬及臣等運籌効



勞欲加陞廕。臣等自愧無功。當卽面奏辭免。又蒙皇上再三獎諭。以先朝舊典。必欲另行擬票。臣等仰見天恩隆重。未敢面違。謹承旨叩頭而出。隨具揭瀝誠控辭。未蒙俞允。茲又蒙聖諭。嶺東積寇蕩平。皆卿等贊謀廟堂。致無遺策。功當首論。擬勅來行。欽此。臣等祇奉綸音。愈切惶懼。竊惟論功行賞者。朝廷之大典。視草演綸者。儒臣之常職。比者嶺寇蕩平。實仰伏我皇上天威遠播。及督臣將士協心奮力所致。臣等官居禁近。職在代言。旣無親冒矢石之勞。又非典司戎旅之任。雖曾參帷幄之末議。借前箸以効畫。皆仰遵廟謨。幸而微中。豈敢貪冒天功。覬叨懋賞。且人臣有難報之恩。無必酬之勞。臣等備員輔弼。仰戴高厚。卽捐糜此身。猶不足以報答其萬一。况今陰陽失調。旱沴爲虐。閭閻寂寞。盜賊公行。皆臣等奉職無狀所致。方惶恐俟罪之不暇。又何敢僥偶逢之幸。以掩不職之尤。冒非分之恩。以重忝竊之咎哉。明主馭下。施一概之平。亦不宜獨私親近。橫予濫及。以失遠方將士之心。乖朝廷激勸之義也。臣等反覆思惟。心悚背汗。所有加恩勅諭。萬不敢擬。伏望皇上俯鑒愚誠。特停前命。俾臣等獲安微分。免於罪愆。則聖明

體諒之恩。雖九遷之榮。十世之賞。不足以喻其隆赫矣。卿功在社稷。乃勞謙不有。足立臣極。朕心甚嘉。特賜卿銀一百兩。紵絲六表裏。蟒衣一襲。稍示酬報之典。宜承恩眷。慎勿又辭。內監給。

### 謝堂樓額名并賜金疏

昨者臣以恭建樓堂。尊藏宸翰。不揣輕微。妄以額名上請。伏奉聖旨。覽卿奏。具見忠敬。樓名與做捧日。堂名純忠。工部製扁。差官懸安。朕知卿素秉廉節。特賜御前銀一千兩。少給工費。卿宜承命勿辭。欽此。隨又蒙皇上親灑宸翰。特降手勅諭元輔。朕以卿純忠爲社稷。有捧日之功。故以爲堂樓名。卿其欽承之。故諭。欽此。及又頒賜御筆大字二幅。對句一聯。特遣文書官尙文恭捧到臣私寓。臣謹叩首祇領。訖。璇題昭揭。旣黏制墨之新。寶棗煥頒。復荷賜金之渥。光騰里第。榮動朝紳。切念臣猥以譚材。濫居首輔。龍飛虎變。幸逢千載之期。鳳翥鸞迴。屢拜十行之劄。顧惟蓬華。懼藏謨訓以非宜。爰就扮榆。特

建樓堂而祇奉。及是經營之始。始僭求榜額之懸。何意聖明。卽垂矜允。謂臣躬扶景運。頗殫捧日之勤。察臣志抱樸愚。知慕純忠之節。遂紆神畫。肇錫嘉名。瓊翰輝煌。焯彼雲章之麗。玉音諄復。蔚焉袞字之褒。猶曲軫乎小廉。乃特頒乎大賚。兼金千鎰。出內庭麟裏之奇。廣廈萬間。遂寒士帡幪之願。昔馬周之遇唐主。但承給宅之恩。若方平之在宋朝。僅賜文儒之字。如臣所際。振古未聞。茲蓋伏遇一皇上英資天縱。睿學日新。煥乎堯文。闡乾坤經緯之祕。康哉舜績。追明良喜起之風。遂令一介之末蹤。獲玷九重之庥命。美增輪奐。江山藉以光華。彩溢圖書。珠璧森其布列。臣敢不式嚴琰寫。瞻天奉咫尺之威。載謹家藏。奕世作雲仍之寶。尙當覲名思義。純心奉公。就日雲霄。勉罄丹忱于葵藿。輸忠社稷。矢堅素履于冰淵。

萬歷元年六月十八日奉聖旨。卿勲德並茂。朕親撰堂樓額名以賜。用示褒嘉。未足以盡酬眷之意。覽奏謝。知道了。禮部知道。

## 請稽查章奏隨事考成以修實政疏

臣等竊聞堯之命舜曰。詢事考言。乃言底可績。皋陶之論治曰。率作興事。欽哉。屢省乃成。蓋天下之事不難於立法。而難於法之必行。不難於聽言。而難於言之必效。若詢事而不考其終。興事而不加屢省。上無綜覈之明。人懷苟且之念。雖使堯舜爲君。禹皋爲佐。恐亦難以底績而有成也。臣等竊見近年以來。章奏繁多。各衙門題覆。殆無虛日。然敷奏雖勤。而實効蓋尠。言官議建一法。朝廷曰可。置郵而傳之四方。則言官之責已矣。不必其法之果便否也。部臣議釐一幣。朝廷曰可。置郵而傳之四方。則部臣之責已矣。不必其弊之果釐否也。某罪當提問矣。或礙於請託之私。概從延緩。某事當議處矣。或牽於可否之說。難於報聞。徵發期會。動經歲月。催督稽驗。取具空文。雖屢奉明旨。不曰着實舉行。必曰該科記着。顧上之督之者雖諄諄。而下之聽之者恆藐藐。鄙諺曰。姑口頑而婦耳頑。今之從政者殆類於此。欲望底績而有成。豈不難哉。臣居正當先帝時。曾

上便宜六事。內詔令一款。亦嘗疊疊言之。隨該吏部題覆。欲各衙門皆立勘合文簿。事下各撫按官。皆明立程限。責令完報。然亦未聞有如期令而以實應者。甚者寢格如初。茲遇皇上躬不世出之資。勵精圖治。百執事亦皆兢兢務脩其職業。無敢以玩愒弛廢者。蓋庶幾乎。率作興事矣。獨所謂考言屢屢者。尙未加之意焉。竊恐致理之道有未盡也。查得大明會典內一款。凡六科每日收到各衙門題奏本狀。奉聖旨者。各具奏目。送司禮監交收。又置文簿陸續編號。開具本狀。俱送監交收。又一款。凡各衙門題奏過本狀。俱附寫文簿後。五日各衙門具發落日期。赴科註銷。過期稽緩者參奏。又一款。凡在外司府衙門。每年將完銷過兩京六科行移勘合填寫底簿。送各科收貯。以備查考。欽此。及查見行事例。在六科則上半年仍具奏目繳本。在部院則下半年仍具手本。赴科註銷。以是知稽查章奏。自是祖宗成憲。第歲久因循。視爲故事耳。請自今伊始。申明舊章。凡六部都察院遇各章奏。或題奉明旨。或覆奉欽依。轉行各該衙門。俱先酌量道里遠近。事情緩急。立定程期。置立文簿存照。每月終註銷。除通行章奏不必查考。

者。照常開具手本外。其有轉行覆勘提問議處催督查覈等項。另造文冊二本。各註緊關略節。及原立程限。一本送科註銷。一本送內閣查考。該科照冊內前件逐一附簿候查。下月陸續完銷。通行駐簿。每於上下半年繳本。類查簿內事件。有無違限未銷。如有停閣稽遲。卽開列具題。候旨下各衙門詰問。責令對狀。次年春夏季終繳本。仍通查上年未完。如有規避重情。指實參奏。秋冬二季。亦照此行。又明年仍復挨查。必俟完銷乃已。若各該撫按官奏行事理。有稽遲延閣者。該部舉之。各部院註銷文冊。有容隱欺蔽者。科臣舉之。六科繳本具奏。有容隱欺蔽者。臣等舉之。如此月有考。歲有稽。不惟使聲必中實。事可責成。而參驗綜覈之法嚴。卽建言立法者。亦將慮其終之罔效。而不敢不愼其始矣。致理之要。無踰于此。伏惟聖明裁斷施行。臣等不勝大願。奉聖旨。卿等說的是。事不考成。何由底績。這所奏。都依議行。其節年未完事件。係緊要的。着該部院另立期限。責令完報。若不係錢糧緊要及年遠難完的。明白奏請開除。毋費文移煩擾。

考滿謝資銀幣疏

臣以六年考滿。伏蒙聖恩。頒賜銀五十兩。紵絲四表裏。原封鈔五千貫。茶飯卓五卓。羊三隻。酒三十瓶。又特奉聖諭。先生啓沃朕心。平治天下。功已在社稷。茲當六年考滿。特於例外加賜銀一百兩。蟒衣斗牛各一襲。少示優眷。不必辭。欽此。該文書房官劉東恭捧到臣私寓。臣謹焚香叩頭祇領。伏念臣猥以庸流。膺茲鉅畀。致身紫閣。荏苒已踰乎十朞。竊祿清朝。循省蔑聞乎寸補。茲者恭遇我皇上生知作聖。神授當天。臣既慶曠世之奇逢。復荷先皇之重託。每欲數陳仁義。奉明主於三代之隆。振肅紀綱。布皇風於八區之外。而學慚啓沃。才匪平章。心維切於葵傾。力實慰於蚊負。茲當再考。曾匪一長。方虞汰黜之必加。豈意恩私之橫及。楮頒內帑。饌出天廚。上尊養羊。絡繹在道。白金綵幣。炫爛充庭。又塵聖藻之親裁。特降宸綸而賁獎。隆以不名之禮。加之異數之恩。俸彼靈章重寶。真逾于朋白。斯皇命服申錫。奚啻于至三。臣有何德。能冒此榮寵。分涯已過。

懼顛隕以非遙。覆載難名。將報酬之奚以。惟當益堅精白。矢竭衷丹。放踵摩顛。苟利國家而奚惜。銘心鏤骨。惟安社稷以爲圖。臣無任激切感激之至。

### 考滿辭加恩疏

准吏部咨。奉聖旨。元輔居正。社稷重臣。忠勤茂著。茲六年考績。朕心嘉悅。着支正一品俸。進中極殿大學士。廕一子中書舍人。給與應得誥命。欽此。臣聞命自天。措躬無地。伏念臣本以凡庸。躡司鼎軸。自先朝受任以來。誤承優眷。及皇下嗣服之始。更受特知。而臣上不能以皇王之道。啓沃聖心。下不能紓討遠之猷。平章國政。敵風因循而未振。實效踈濶而罔臻。是臣莫副倚毗之專。而適叢瘵曠之咎也。茲當課績。方俟黜幽。豈意聖慈。更加降施。昨者宸章賜獎。已蒙踰例之恩。今者綸音傳溫。更荷非常之寵。跼蹐自省。夢寐若驚。夫無基而厚墉。則圯傾立至。器小而受距。則覆滿隨因。豈惟輿議之所共譏。實亦天道之所必忌。故往歲大賚加恩。臣屢疏辭免。幸蒙俞允。乃卽少安。今敢不避宸



嚴。再陳愚悃。伏望皇上察臣素抱朴忠。絕無矯飾。特收成命。俾圖後功。庶國恩不爲濫施。而羣工亦克用勸矣。臣無任懇切祈望之至。

奉聖旨。考績加恩。朝廷彝典。於勲德未足爲酬。宜承眷命。不必再辭。吏部知道。

### 進講章疏

臣等一歲之間。日侍皇上講讀。伏見聖修益懋。聖志彌堅。盛暑隆寒。緝熙罔間。臣等備員輔導。不勝慶幸。但惟義理必時習而後能悅。學問必溫故而後知新。况今皇上睿明日開。若將平日講過經書。再加尋繹。則其融會悟入。又必有出乎舊聞之外者。臣等謹將今歲所進講章。重復校閱。或有訓解未瑩者。增改數語。支蔓不切者。卽行刪除。編成大學一本。虞書一本。通鑑四本。裝潢進呈。伏望皇上萬幾有暇。時加溫習。庶舊聞不至遺忘。新知日益開豁。其於聖躬。實爲有補。以後仍容臣等接續編輯。進呈御覽。仍乞勅下司禮監鏤板印行。用重永久。雖章句淺近之言。不足以仰窺聖學精微之奧。然行遠

升高。或亦一助云爾。

### 請定面獎廉能儀注疏

昨該吏部都察院欽奉聖諭。開具各在外廉能官員。請照舊例宴賞。該臣等於文華殿面奏。伏蒙皇上親發玉音。將各官引來。朕面加獎諭。欽此。隨奉聖旨。這廉能官着吏部都察院堂上官并吏科都給事中掌河南道御史引來會極門。朕面加獎賞。欽此。臣等竊惟致理之道。莫急於安民生。安民之要。惟在於覈吏治。前代令主欲興道致治。未有不加意於此者。如臣等前所進帝鑑圖說中。褒獎守令。召試縣令諸事。載之史冊。以爲美譚。我太祖高皇帝每遇各地方官來京奏事。常召見賜食。訪問民間疾苦。雖縣丞典史。有廉能愛民者。亦特差行人賫勅獎勵。或封內醪金幣以賚之。迨宣順弘治之間。亦間舉宴賞之典。故二百餘年重熙累洽。興致太平。實由於此。恭遇皇上天縱聖明。勵精圖治。茲當考察之初。大明黜陟之典。又特蒙天語。諭臣等欲引見廉能官員。破格獎賞。

仰窺聖心。蓋以深納臣等圖說所陳。而遠追我聖祖綜覈吏治之軌也。宗社生靈。曷勝慶幸。但此係特典。久未舉行。且遠方外吏。從來未覩朝廷之禮。若不先示以儀節。使之演習。恐一旦震佈天威。倉皇失措。又非所以昭德意光盛舉也。伏乞欽定行禮日期。勅下禮部。略倣祖宗時御會極門午朝之儀。定擬簡便儀注。上請聖裁。明示各衙門遵行。庶臨期不致差誤。且曠典肇舉。懿範昭垂。貽之萬世。永有烈光矣。

奉聖旨。着於十八日行禮部便具儀來看。

### 謝御筆大書疏

昨者伏蒙聖上召臣等於文華殿。恭視御書大字。賜臣居正宅揆保衡大書一幅。臣調陽同心夾輔大書一幅。六部都察院通政司大理寺堂上掌印官九員各正己率屬大書一幅。日講官五員各責難陳善大書一副。正字官各敬畏大書一副。臣等今日早朝後。謹率同諸臣。恭詣會極門。該司禮監太監曹憲恭捧頒給。俱叩頭祇領。訖。仰惟皇上

睿哲天成。英明神授。不惟聖修之學已造於精深。雖於翰墨之微。亦臻夫佳妙。臣等前此雖日侍左右。恭視傲寫。然未嘗見御筆大書如是之妙。筆意飛動。若驚鴻矯鳳之飛。翻體格莊嚴。儼周鼎商彝之陳列。日二十餘紙。八十餘字。咄嗟之間。搖筆立就。初若不經意。而鋒穎所落。奇秀天成。臣等恭視仰觀。心悚神駭。祇深欽怵。莫罄揄揚。今日頒給九卿諸臣。亦莫不相顧驚嘆。歡呼頌仰。誠曠世之奇逢。間代之鴻寶也。謹當與諸臣慶戴殊恩。對揚休命。共竭驚鈍。仰佐熙明。臣等無任欣喜踴躍之至。

### 謝恩賚父母疏

欽蒙聖諭。朕聞先生父母俱存。年各古稀。康健榮享。朕心嘉悅。特賜大紅蟒衣一襲。銀錢二十兩。又玉花墜七件。彩衣紗六疋。乃奉聖母恩賜。咸欽承。着家僮往賚之。外銀錢二十兩。是先生的。欽此。該文書官劉東恭捧到閣。臣謹叩頭祇領。訖伏以綸綍疏榮。疊荷尙方之特賜。庭闈錫類。載分長樂之餘歡。恩出非常。感同罔極。竊念臣猥從寒薄。躡

致台司。自惟一介之侗愚。實本二親之訓育。晨昏久曠。寧忘不寐之懷。雲日長瞻。適獲俱存之幸。稀齡並屆。封誥重膺。謂已藉君父之厚榮。足以慰人子之至願。豈意宸衷之軫念。載承聖母之推恩。敷天語以丁寧。覩奎章而燦爛。金錢錯落。重頒百鎰之珍。綺縠方空。兼備六珈之飾。忽從天上。遙落人間。慈光借賁於桑榆。湛露下霑於草莽。考之前史。惟唐元振宋王溥。登輔相在雙親偕老之年。稽諸本朝。惟原吉母李賢父。蒙存問於二子得君之日。然未有寵榮烜赫。賚予駢蕃。如臣遭際之極盛。至隆者也。此蓋伏遇皇上神聖宅中。寬仁逮下。斂五位康寧之福。錫厥庶民。推兩宮尊養之心。刑於四海。遂令微陋。薦被恩施。以及怙恃之私。並沐生成之造。士而知已許身。尙不爲難。臣之受恩捐軀。豈足云報。謹當欽承聖貺。戒僮僕以星馳。歸奉親歡。傳子孫爲世寶。仰天顏之咫尺。守庭訓以周旋。身體髮膚。苟利國家而何惜。股肱元首。庶希喜起以交孚。

謝宸翰疏

昨該臣等以翰林院所產白燕及內閣嘉蓮進獻。隨奉手諭。白燕蓮花俱進獻聖母。其是嘉悅。却獨產翰林院中。先閣於密勿之地。上天正假此以見先生爲社稷祥瑞。花中君子。朕賴先生啓沃。固不敢顛縱。何德之有。欽此。恭惟聖母德配坤元。舍萬彙而發育。皇上道隆乾運。躋四海於昇平。協氣薰蒸。休禎駢集。乃猶泯鴻工於不宰。遜大美而弗居。特渙溫綸。謬申眷獎。此誠聖不自虛。謙而又謙之心也。願臣猥以庸虛。叨司鼎鉉。變調靡效。敢貪天功以自私。歌頌難名。真忘帝力於何有。捧誦綸音。不勝感戴愧悚之至。

### 進實錄辭免加恩疏

准吏部咨。節奉手勅。皇考實錄修完。朕心嘉悅。總裁輔臣張居正。着兼支尙書俸。廕一子做中書舍人。如勅奉行。欽此。備咨到臣。臣聞命自天。措躬無地。仰惟皇考穆宗莊皇帝。駿德鴻功。增光列祖。睿謨懿行。垂範百王。臣祇奉明綸。總司紀錄。徒慚淺陋。莫罄揄揚。不加譴訶。已爲榮幸。豈敢復萌希覬之想。以重瘝素之尤。夫祿以奠食。必有兼人之

能。而後可以食兼官之祿。廕以酬勞。必有超世之功。而後可以蒙延世之賞。臣謬以淺薄。得效編摩。載筆操觚。乃詞臣之常職耳。有何勤勞。可當懋賞。且頃者屢奉溫旨。宴賚駢蕃。恩禮優渥。藉曰酬勞。不啻厚矣。况本無勞。何可踰冒。故昨者欽奉聖諭。令臣等擬勅。加恩監修總裁官。臣再三退避。不敢自擬。仰蒙天語諄諄。復差文書官傳諭同官大學士呂調陽另擬。必欲令臣同霑恩命。而其所擬。乃又越分超等。反出諸臣之上。將使臣益跼蹐惶汗。而不能自寧也。伏望皇上鑒臣惻誠。素無矯飾。收回成渙。特賜允俞。俾臣得少效犬馬之微勤。不至速躋顛之重咎。則皇上遂臣之志。保臣之終。尤遷百朋。不足。以喻其榮重矣。

奉聖旨。皇考功德。紀述詳實。卿總裁首臣。勤勞爲多。加恩已有成命。宜卽勉承。不必固辭。吏部知道。

### 再辭恩命疏

頃以纂修穆宗莊皇帝實錄告成。荷蒙聖恩。曲軫微勞。勅加封廕。隨該臣具本辭免。奉聖旨。皇考功德。紀述詳實。卿總裁首臣。勤勞爲多。加恩已有成命。宜卽勉承。不必固辭。吏部知道。欽此。大聽莫回。冰兢愈至。竊以有勞必錄者。明主厚下之仁。敬事後食者。人臣奉公之節。夫臣之於君。事無大小。孰非所當盡心畢力以爲之者。爲之而有功。分義當然。勞於何有。爲之而無功。譴責是虞。矧敢他覲。故人臣進不敢以其能要利於上。退不敢以其事尸功於己。此事使之大分。古今之通義也。臣以草茅孤介。荷先帝顧託之重。蒙皇上眷遇之隆。夙夜皇皇。慮無以報。藉使臣有奇勳異能。銘之太常。勒之鐘鼎。其於臣子分義。固未能有加秋毫之末也。况纂修之役。不過從事於楮墨觚翰之間。又非有執殳荷戈之勞。重鉅艱危之任也。而遂以此施勞於己。微寵於上。其毋乃非人臣自處之義乎。且履盛靡盈。古人所戒。臣叨忝已極。涯分已踰。若冒竊不止。必致殃咎。故在諸臣可受。而臣獨不可受也。伏望皇上察臣之愚。曲賜俞允。因以明君臣分義於天下。使爲人臣者皆知盡心所事。而不敢萌希覬之心。則臣節純而主道立矣。臣屢冒天威。



不勝戰悚隕越之至。

奉聖旨。卿每事有功不居。屢辭恩命。茲又惓惓以君臣分義爲言。具見忠貞大節。特准辭廕。以成卿美。兼俸可勉。承之。稍存舊典。吏部知道。

### 遼東大捷辭恩疏

昨該兵部覈敘遼東功次。濫及臣等。請加恩賚。已卽具揭辭免。茲奉聖諭。遼東大捷非常。皆卿等運籌之功。例宜廕陞。還擬勅來行。欽此。恩綸寵彼。敢不遵承。但臣等竊惟慶賞之典。激勸攸關。必當其功。乃可服衆。茲者遼左之捷。實仰賴我皇上聖武昭布。神威疊震。一時文武將吏。遵奉廟算。同心戮力之所致。然論其力戰之功。尙當以將士爲首。故臣等昨者擬票。加恩該鎮諸臣。首敘總兵。賜賚獨厚。雖總督巡撫。身在地方。親理戎務者。亦視之有差。誠以摧鋒陷堅。躬冒矢石。本諸將士之力。固非坐而指畫者所可同也。况如臣等身不出乎禁闈。足不履乎戎行。雖曾借筭效畫。演綸授事。不過奉英主之

眷謀。效閤臣之常職耳。乃欲緣此遂攘以爲功。冒叨恩寵。則九邊之士聞之。必將曰我輩披堅執銳。千辛萬苦。乃得一級之賞。而彼乃掠而有之。武夫力而獲諸原。書生坐而享其利。不惟以功蒙賞者不知所勸。而旁觀逃聽之人。亦將憤惋而不平矣。非所以昭大公明激勸也。矧昨者皇上以大捷告廟。自引冲年涼德。而以成功歸之祖宗列聖。夫以皇上之明聖。猶不肯自以爲能。必歸之烈祖。臣等何知。乃敢貪天之功以爲己力乎。且閣臣以邊功受賞。亦自近時有之。非我祖宗朝盛德事也。臣等反覆思惟。加恩一節。斷不敢當。伏望皇上俯鑒臣等愚悃。絕無一毫矯飾。竟寢其事。免令臣等撰勅。因以明朝廷大公之典。作九邊將士之氣。其於聖政亦爲有補。所有原奉聖諭一道。謹收藏閣中。以彰天眷。臣等不勝感戴悚慄之至。

奉聖旨。卿等所奏誠意懇切。准辭免。各賜銀一百兩。綵段四表裏。大紅紵絲蟒衣一襲。稍示眷酬。

謝御筭獎勵疏

昨該臣等以大捷加恩。具疏辭免。奉聖旨。卿等所奏。誠意懇切。准辭免。各賜銀一百兩。綵段四表裏。大紅紵絲蟒衣一襲。稍示眷酬。欽此。臣又特奉御筆勅諭。元輔張少師。朕以幼冲嗣位。賴先生匡弼啓沃。四方治安。九邊寧靖。我祖宗列聖亦鑒知先生之功。就加顯爵。不爲過。乃屢辭恩命。惟一誠輔國。自古忠臣如先生者罕。朕今知先生實心不復強。特賜坐蟒衣一襲。銀錢五十兩。以示酬眷。申成先生美德。其欽承之。故勅欽此。該文書官太監劉東恭捧到臣私寓。臣謹叩頭祇領。不勝感泣。竊念臣山澤之賤。懼也。不自意徼時厚幸。致身台鼎。遭逢英主。龍飛。又謬以章句淺陋。爲帝者師。其中倚託之重。契合之深。雖在廷之臣。猶有不及知者。每自思惟。士爲知己者死。古俠客者流。急人之難。旣已存亡生死矣。而猶不矜其能。不望其報。况臣之於君。有不可逃之分。受不能報之恩者乎。今以臣之遭遇如此。而不思畢忠竭力。以圖稱塞。或雖忠於所事。而有一毫

計功謀利。徼寵覬恩之心。則爲俠士之弗如。故臣當事以來。夙夜兢兢。恆欲使功浮於食。事過所受。犬馬之心。於是乃安。其抗違恩命。冒瀆宸嚴。至於屢控而巳者。實以愚抵此耳。仰荷聖慈。特垂兪允。又親灑宸翰。曲賜褒嘉。諒其實心。不復相強。是皇上之知臣也。以心。而不在于爵祿象縻之厚。微臣之遇主也。以道。而非由於要寵竊祿之私。此古之聖賢豪傑所爲。夢想而不獲一覩者也。臣何緣何幸。有此遭際。至於坐蟒。乃尊貴之服。豈臣下之可僭乎。金錢乃玉府之珍。非貧士之所宜有。殊恩特賚。更踰分涯。臣又將何修何爲。可以報稱。繼自今。惟當益堅精白。矢竭衷丹。惟社稷之是圖。何髮膚之可惜。更願皇上終鑒愚誠。曲成微志。凡非分之恩。踰格之賞。勿復濫及。以畢臣惓惓圖報之忱。苟遂其愚。死無所憾。

### 進職官書屏疏

竊以安民之要在法知人。辨論官材。必考其素。願人主尊居九重。坐運四海。於臣下之

姓名貫址尙不能知。又安能一一別其能否而黜陟之乎。朝著之間。百司庶府尙不能識。又安能旁燭於四方郡國之遠乎。考之前史。唐太宗以天下刺史姓名書於御座屏風。坐臥觀覽。唐宣宗知涇陽令李行言之賢。書其名於殿柱。不次擢用。我成祖文皇帝嘗書中外官姓名於武英殿南廊。仁宗昭皇帝亦命吏部尙書蹇義兵部尙書李慶。具各都司布政按察司官履歷。揭於奉天門西序。良以輿圖遼廓。官府分羅。身旣難以遍歷。故託之標記以廣其明。知旣難以周知。故操其要約而運諸掌。君心也。臣股肱耳目也。人之一心。雖賴股肱耳目以爲之視聽持行。而心之精神亦必常流通於股肱耳目之間。然後衆體有所管攝。而各效其用。此明君所以總條貫。而御人羣之要道也。仰惟皇上天挺睿明。勵精圖知。今春朝覲考察。親獎廉能。頃者吏部奏除躬臨銓選。其加意於吏治人才如此。顧今天下疆里尙未悉知。諸司職務尙未盡熟。雖欲審別其道無由。臣等思所以推廣德意。開發聖聰者。謹屬吏部尙書張瀚兵部尙書譚綸。備查兩京及在外文武職官。府部而下。知府以上。各姓名籍貫及出身資格。造爲御屏一座。中三扇

繪天下疆域之圖。左六扇列文官職名。右六扇列武官職名。各爲浮帖。以便更換。每十日該部將陞遷調改各官。開送內閣。臣等令中書官寫換一遍。其屏卽張設於文華殿後。皇上講讀進字之所。以便朝夕省覽。如某衙門缺某官。該部推舉某人。卽知其人原係某官。今果堪此任否。某地方有事卽知某人見任此地。今能辦此事否。臣等日侍左右。皇上卽可親賜詢問。細加商確。臣等若有所知。亦得面盡其愚。以俟聖斷。一指顧問。而四方道里險易。百司職務繁簡。一時官員賢否。舉莫逃於聖鑒之下。不惟提綱挈要。便於觀覽。且使居官守職者。皆知其名常在朝廷左右。所行之事。皆得達於宸聰。其賢者將兢兢焉。爭自淬勵。以求見知於上。不才者亦將凜凜焉。畏上之知。而不敢爲非。皇上獨運神智。坐以照之。垂拱而天下治矣。臣等謹將所製職官御屏一座。隨本上進。伏乞勅下該衙門進收。如法張設。恭請聖明俯覽。以少盡臣等因事納忠之誠。

奉聖旨。覽卿等奏。進職官書屏。欲朕周覽輿圖。審察衆職。誠知人安民要務。具見匡弼之忠。朕心深用嘉悅。圍屏着進收設於文華殿後。以便朝夕省覽。該衙門知道。

張江陵全集 卷三

# 張江陵全集卷四奏疏

## 議處史職疏

准禮部手本該本部題覆翰林院編修張位奏爲懇乞聖明申飭史職以光新政事。議照裁定史職。係閣臣題請。合照本官奏內事。理將一應事宜。詳行議擬上請。奉欽依到閣。臣等謹欽遵議得。國初設起居注官。日侍左右。紀錄言動。實古者左史記事。右史記言之制。逾後詳定官制。乃設翰林院修撰編修檢討等官。蓋以紀載事重。故設官加詳。原非有所罷廢。但自職名更定之後。遂失朝夕記注之規。以致累朝以來。史文闕略。昔世宗皇帝嘗諭大學士張璠。日日每有左史右史之官。歷代因之。我聖祖創翰林之制。亦有編修修撰之名。但未見居此職者。盡乃事云。是紀錄之職。本自備官。曠廢之由。實在臣下。卽如邇者纂修世宗皇考實錄。臣等祇事總裁。凡所編緝。不過總集諸司章奏。稍加刪潤。概括成編。至于仗前柱下之語。章疏所不及者。卽有見聞。無憑增入。與夫稗



官野史之書。海內所流傳者。欲事采錄。又恐失真。是以兩朝之大經大法。雖罔敢或遺。而二聖之嘉謨嘉猷。實多所未備。凡此皆由史臣之職廢而不講之所致也。矧我皇上聰明天啓。淵哲性成。踐祚以來。善政鴻猷。班班可述。類非章疏所能盡見。若不及時紀錄。奚以章闡盛美。垂法無極。所據申明史職。光復祖制。以備一代令典。在于今日。委不可缺。臣等祇奉明命。仰稽成憲。參酌時宜。謹將一應合行事宜。逐條詳列于後。伏乞聖明裁定施行。

計開

一議分管責成。照得史臣之職。以紀錄起居爲重。顧宮禁邃嚴。流傳少實。堂廉遠隔。聽睹非真。則何以據事直書。傳信垂後。看得日講官密邇大顏。見聞真的。又每從閣臣之後。出入便殿。卽有密勿謀議。非禁祕不可宣露者。閣臣皆得告語之。合今日講官日輪一員。專記注起居。兼錄聖諭詔勅冊文等項。及內閣題稿。其朝廷政事見於諸司章奏者。另選年深文學素優史官六員。專管編纂事。分六曹以吏戶禮兵刑工爲次。每人專

管一曹。俱常川在官供事。不許別求差遣。及託故告假等項。致裁公務。

一議史臣侍直。謹按禮儀定式。凡遇常朝記事官。居文武第一班之後。近上便于觀聽。卽古螭頭載筆之意。洪武二十四年。定召見臣下儀。以修撰編修充侍班官。卽古隨使入直紀事之意。今宜遵照祖制。除陞殿例用史官侍班外。凡常朝御皇極門。卽輪該日記注起居并史官共四員。例子東班各科給事中之上。午朝御會極門。列于御座西稍南。專一記言動。凡郊祀耕藉幸學大閱諸典禮。亦令侍班隨從紀錄。至于不時宣召。及大臣祕殿獨對者。恐有機密。不必用史官侍班。但令入對大臣自紀聖諭。及奏對始末。封送史館詮次。其經筵日講。則講官卽記注起居。亦不必另用侍班。

一議纂輯章奏。照得時政所寄。全在各衙門章奏。今除內閣題稿并所藏聖諭詔勅等項。該閣臣令兩房官錄送史館外。其各衙門章奏。該科奉有旨意發抄到部。卽全抄一通。送閣轉發史館。至于欽天監天文祥異。太常寺祭祀日期。各令按月開報。其抄本不必如題奏揭帖格式。但用常行白紙。密行楷書。不論本數多寡。併作一封送入。

一議紀錄體例。照得今次紀錄。祇以備異日之考求。俟後人之刪述。所貴詳核。不尙文詞。宜定著體式。凡有宣諭。直書天語聖諭詔勅等項。備錄本文。若諸司奏報一應事體。除瑣屑無用文義難通者。稍加刪削潤色外。其餘事有關係。不妨盡載原本。語涉文移。不必改易他字。至于事由顛末。日月先後。務使明白。無致混淆。其間事蹟可垂勸戒者。但據事直書。美惡自見。不得別以己意。及輕信傳聞。妄爲褒貶。

一議開設館局。照得東西十館。原係史臣編校之所。密邇朝堂。紀述爲便。今合用東館。近上四所。令史臣分直其中。一起居。二吏戶。三禮兵。四刑工。除典守謄錄人役。隨同供事外。一應閒雜人等。不許擅入。其合用紙劄筆墨酒飯等項。俱照纂修例給。

一議收藏處所。照得國史古稱爲金匱石室之書。蓋欲收藏謹嚴。流傳永久。今宜稍倣此意。月置一小櫃。歲置一大櫃。俱安放東閣左右房內。每月史官編完草稿。裝爲七冊。一冊爲起居。六冊爲六曹事蹟。仍于冊面各記年月。史官姓名。送內閣驗訖。卽投入小櫃。用文淵閣印封鎖。歲終。內閣同各史官。尙取各月草稿。收入大櫃。用印封鎖如前。永

不開視。

一議謄錄掌管。照得史館紀錄所用謄錄典守官吏。見今纂修實錄。即可通融選用。合將各館謄錄官。選取勤謹善書者二員。專謄祕密文字。行吏部選撥善書貼寫辦事吏十二名。專寫各衙門章牘。撥當該吏四名。專管文冊。及朝夕啓閉館門常川供事。滿日各照常送部撥補。不給恩典。

一議補修記注。伏覩聖明踐祚之始。卽召見輔臣於平臺。二年之春。召見計廉廈能卓異者。面賜獎諭。邇者以吏兵二部奏除文武職官。又親臨銓選。皆古帝王之盛節。三年之間。鴻猷善政。不可縷數。茲者曠典修復。亦合將二年以前事蹟。追書謹錄。用傳萬世。擬令各官除每日照前供事外。兼將二年以前起居初政。亦照月分曹。以次纂錄。其詔勅等項。內閣查付各衙門章奏。行六科照月類抄一冊。送內閣轉發。

萬曆二年二月二十日。奉聖旨。史臣紀錄時政。我祖宗成憲具存。但近年任此職者。因循曠廢。遂成闕典。今宜及時修舉。卿等旣議處停當。都依擬行。禮部知道。

請裁抑外戚疏

伏蒙發下工部覆武清伯李偉請價自造墳塋一本。該文書官孫斌口傳聖旨。該部折價太薄。從厚擬來。欽此。臣等看得李偉乃皇家至親。與衆不同。皇上仰體聖母篤念外家之意。禮宜從厚。但昨工部尙書郭賓等見臣等言先朝賜賚外戚恩典。唯玉田伯蔣輪家爲最厚。正與今聖母家事體相同。故本爵亦遂據蔣輪例以請。及查嘉靖二年蔣輪乞恩造墳。原係差官蓋造。未曾折價。該部處辦木石等料。當時估計該銀二萬兩。卷案具存。該部因本爵自比蔣輪例。故卽查蔣輪例題覆。其做工班軍及護墳田土。另行撥給。原不在此數。今奉聖諭欲令從厚。臣等敢不仰體皇上孝心。且臣等犬馬之情。亦欲借此少效微悃於聖母之家。但該部查照舊例。止於如此。今欲復厚。惟在皇上奏知聖母。發自宸衷。特加優賚。固非臣下所敢擅專也。臣等又惟昔玉田伯乃世宗皇帝親母家也。當時章聖皇太后母儀天下。世廟奉事母后。篤厚外家。何所不至。而其所給乃

僅於此數。想以祖宗以來相傳恩例如此。有難以踰越耳。今皇上孝事聖母。豈能有加於世廟。而聖母之篤厚外家。亦豈能有踰於章聖皇太后乎。今以世宗皇帝之所不能加。章聖太后之所不可踰。而聖母與皇上必欲破例處之。此臣等所以悚懼而不敢擅擬者也。夫孝在無違。而必事之以禮。恩雖無窮。而必裁之以義。貴戚之家。不患不富。患不知節。富而循禮。富乃可久。越分之恩。非所以厚之也。踰涯之請。非所以自保也。臣等侍罪輔弼。不敢不盡其愚。伏惟聖慈垂鑒。

### 請申舊章飭學政以振興人才疏

竊惟養士之本。在於學校。貞教端範。在於督學之臣。我祖宗以來。最重此選。非經明行修。端厚方正之士。不以輕授。如有不稱。寧改授別職。不以濫充。且兩京用御史。外省用按察司風憲官爲之。則可見居此官者。不獨須學行之優。又必能執法持憲。正己肅下者。而後能稱也。記曰。師嚴然後道尊。道尊然後民知敬學。臣等幼時。猶及見提學官多

海內名流。類能以道自重。不苟徇人。人亦無敢干以私者。士習儒風。猶爲近古。近年以來。視此官稍稍輕矣。而人亦罕能有以自重。旣無卓行實學。以壓服多士之心。則務爲虛譚賈譽。賣法養交。甚者公開倖門。明招請託。又憚于巡歷。苦於校閱。高座會城。計日待轉。以故士習日敝。民僞日滋。以馳騫奔趨爲良圖。以剽竊漁獵爲捷徑。居常則德業無稱。從仕則功能鮮效。祖宗專官造士之意。駸以淪失。幾具員耳。去年仰荷聖明特勅吏部。慎選提學官。有不稱者。令其奏請改黜。其所以敦崇教化。加意人才。意義甚盛。今且一年矣。臣等體訪各官。卒未能改於其故。吏部亦未見改黜一人。良以積習日久。振盪爲艱。冷面難施。浮言可畏。奉公守法者。上未必卽知。而已被傷於衆口。因循頽靡者。上未必卽黜。而且博譽於一時。故寧抗朝廷之明詔。而不敢挂流俗之謗議。寧壞公家之法紀。而不敢違私門之請託。蓋今之從政者。大抵皆然。又不獨學校一事而已。臣等頃因南直隸提學御史褚鈇浙江提學僉事喬因阜赴閣會勅。因查先朝以來相傳。舊稿所載。提學職任。本自崇嚴。且別項官員。勅諭俱不開款。獨提學勅開款。殆如國學監

視之制。中間委任責成。極其鄭重。但居此官者。不能着實遵奉。自隳職守。夫勅諭者。所以命官分職。而屬之以事者也。彼既不能遵奉。上命恪恭。乃職而責士子。以率從其教。不亦難乎。臣等查得嘉靖初年。世宗皇帝嘗詔吏部。將天下提學官。通行考察。改黜。蓋僅有存者。又詔禮部。沙汰天下生員。不許附學。過於廩增之數。今之士習。凋敝已極。卽按先朝故事。大加洗滌。亦豈爲過。但臣等竊以爲積廢旣久。舉當以漸。驟於操急。人或不堪。且約束不明。申令不熟。不獨奉行者之罪。亦在上者之過也。臣等謹將勅諭舊稿。再加酌擬。附以近日題准事例。逐款開列。上請聖裁。備載勅內。仍昭示天下。使居此官者。知上之所以責之者如此。則雖被怨蒙謗。而有所弗恤。人之視之。知彼之責任如此。亦將斂手息喙。而莫之敢撓。撫按以此覈其能否。部院以此定其黜陟。使人皆知敦本尙實。而不敢萌僥倖之心。則振興人才之一大機也。仍乞勅下吏禮二部。以後務要加意此官。慎重其選。其各見任提學官。一體俱換與新勅。以便遵守。書曰。作新民。堯使契掌教。命之以勞來匡直輔翼。又從而振德之。今臣等所言。非敢過爲操切。亦不過申明



舊章。以作新振德之耳。伏惟聖明裁斷施行。再照提調學校。固憲臣之責。而羣居教習。又在儒學教官。顧近來考貢之法太疎。士之衰老貧困者。始告授教職。精力既倦於鼓舞。學行又歉於模範。優游苟祿。潦倒窮途。是朝廷以造士育才之官。爲養老濟貧之地。冗蠹甚矣。今後凡廷試歲貢生員。容臣等遵照先朝事例。嚴加考試。有不堪者。盡法黜落。提學官照例提問降調。其願就教職者。該部先行考閱。有年力衰憊者。卽行揀退。不准送試廷試。學業荒疎。不堪師表者。發下該部驗其年力尙壯。送監肄業。以須再試。如年已衰。不必發監。遙授一職。回籍榮身。庶官無冗曠。士有師模。十年之後。人才當可勝用矣。謹題請旨勅諭提學官事理。

計開

一聖賢以經術垂訓。國家以經術作人。若能體認經書。便是講明學問。何必又別標門戶。聚黨空譚。今後各提學官督率教官生儒。務將平日所習經書義理。着實講求。躬行實踐。以需他日之用。不許別創書院。羣聚徒黨。及號招他方遊食無行之徒。空譚廢業。

因而啓奔競之門。開請託之路。違者。提學御史聽吏部都察院考察奏黜。提學按察司官聽巡按御史劾奏。遊士人等。許各撫按衙門訪拏解發。

一孝弟廉讓。乃士子立身大節。生員中有敦本尙實。行誼著聞者。雖文藝稍劣。亦必量加獎進。以勵頽俗。若有平日不務學業。囑托公事。或捏造歌謠。興滅詞訟。及敗倫傷化。過惡彰著者。體訪得實。不必品其文藝。卽行革退。不許徇情姑息。亦不許輕信有司教官開送。致被挾私中傷。誤及善類。

一我聖祖設立臥碑。天下利病諸人皆許直言。惟生員不許。今後生員務遵明禁。除本身切已事情。許家人抱告有司。從公審問。倘有冤抑。卽爲昭雪。其事不干已。輒便出入衙門。陳說民情。議論官員賢否者。許該管有司申呈提學官。以行止有虧革退。若糾衆扛幫。聚至十人以上。罵詈官長。肆行無禮。爲首者。照例問遣。其餘不分人數多少。盡行黜退爲民。

一國家明經取士。說書者以宋儒傳註爲宗。行文者以典實純正爲尙。今後務將頒降

四書五經。性理大全。資治通鑑綱目。大學衍義。歷代名臣奏議。文章正宗。及當代誥律典制等書。課令生員誦習講解。俾其通曉古今。適於世用。其有剽竊異端邪說。炫竒立異者。文雖工。弗錄。所出試題。亦要明白正大。不得割裂文義。以傷雅道。

一各省提學官奉勅專督學校。不許借事枉道。奔趨撫按官。干求薦舉。各撫按二司官。亦不許侵伊職掌行事。若有不由提學官考取。徑自行文給與生儒衣巾。及有革退生員。赴各衙門告訴復學者。卽將本生問罪革黜。若提學官有行止不端。怠玩曠職者。許巡按御史指實劾奏。

一該管地方。每年務要巡視考校一遍。不許移文代委。及於隔別府分。調取生儒。以致跋涉爲害。亦不許令師生匍匐迎送。考畢卽於本地方發落。明示賞罰。不許攜帶文卷於別處發案。致令吏書乘間作弊。士子無所勸懲。亦不許招邀詩朋酒友。游山玩水。致啓倖門。妨廢公務。其水陸夫馬廩給。隨帶吏書。俱照常行。

一提學官巡歷所屬。凡貪污官吏。軍民不法重情。及教官干犯行止者。原係憲司。理當

拏問。但不許接受民詞。侵官喜事。其生員犯罪。或事須對理者。聽該管衙門提問。不許護短曲庇。致令有所倚恃。抗拒公法。

一廩膳增廣。舊有定額。迨後增置附學。名色冒濫居多。今後歲考。務要嚴加校閱。如有荒疎庸耄。不堪作養者。卽行黜退。不許姑息。有捏造流言。思逞報復者。訪實拏問。照例問遣。童生必擇三場俱通者。始收入學。大府不得過二十人。大州縣不得過十五人。如地方乏才。卽四五名亦不爲少。若鄉宦勢豪。干託不遂。暗行中傷者。許徑自奏聞處治。一兩京各省廩膳科貢。皆有定額。近來有等奸徒。利他處人才寡少。往往詐冒籍貫。投充入學。及有詭寫兩名。隨處告考。或假捏士夫子弟。希圖進取。或原係娼優隸卒之家。及曾經犯罪。問革變易姓名。援納粟納馬等例。僥倖出身。殊壞士習。訪出。嚴行拏問。革黜。若教官納賄。容隱生員。扶同保結者。一體治罪革罷。

一府州縣提調官員。宜嚴束生徒。按季考校。凡學內殿堂齋房等屋損壞。卽辦料量工修理。其齋夫膳夫學糧學田等項。俱要以時撥給。不許遲誤尅減。

一生員之家。依洪武年間例。除本身外。戶內優免二丁差役。

一生員考試不諳文理者。廩膳十年以上。發附近處充吏。六年以上。發本處充史。增廣十年以上。發本處充吏。六年以上。罷黜爲民。

一儒學教官。士子觀法所係。按臨之日。考其學行俱優者。禮待獎勵。其行履無過。但學問疎淺者。一次考驗。姑行戒飭。再考無進。送吏部別用。老病不堪者。准令以禮致仕。若卑污無恥。素行不謹者。不必試其文學。卽拏問革黜。

一考貢照近日事例。每歲預將次年應貢生員。限年六十以下。三十以上。屢經科舉者。六人。嚴加考選。取其優者充貢。定限次年四月到部聽候廷試。文理不通者。卽行停降。年老衰憊者。姑授與冠帶榮身。不許但挨次濫貢。其有停廩降廩者。必考居一二等。方許收復。未收復者。不許起送應貢。如有濫貢及廷試。發回五名以上。提學官照例降調。一補貢有缺。務查人文未經到部。果在一年以裏者。將原給批咨硃卷追繳。方取年力精壯。文學優長者一人補貢。定限該貢年分。次年到部。方准收考。如有不遵舊例。年將

遠貢缺濫補市恩者。起送到部。卽將本生發回革廩肄業。提學官參究。  
一遇鄉試年分。應試生儒名數。各照近日題准事例。每舉人一名。取科舉三十名。此外不許過多一名。兩京監生。亦依解額照數起送。有多送一名者。各監試官徑行裁革。不許入場。

一名宦鄉賢孝子節婦及鄉飲禮賓。皆國之重典。風教所關。近來有司忽于教化學校。是非不公。濫舉失實。激勸何有。今後提學官宜以綱常爲己任。遇有呈請。務須核真。非年久論定者。不得舉鄉賢名宦。非終始無議者。不得舉節婦孝化。非鄉里推服者。不得舉鄉飲賓僕。如有妄舉。受人請求者。師生人等。卽以行止有虧論。其從前冒濫混雜。有玷明典者。照近例徑自查革。

一所轄境內。有衛所學校。一體提調整理。武職子弟。悉令習讀武經七書。百將傳。及操習武藝。有願習舉業者。聽社學師生。一體考校。務求明師責成。量免差役。其行止有虧。及訓誥句讀音韻差訛。字畫不端。不通文理者。卽行革退。

萬曆三年五月初三日。奉聖旨。學校人才所係。近來各提學官不能飭躬端範。精勤考閱。只虛譚要譽。賣法市恩。殊失祖宗專官造士之意。卿等所奏。俱深切時弊。依擬再行申飭。所開條件。一一備載勅內。着各着實遵行。有仍前違怠曠職的。吏部都察院務要指實考察奏黜。不許徇情。九部知道。

### 論邊事疏

昨該遼東巡撫張學顏等報稱。賊二十餘萬。謀犯遼東。前哨已到大寧。請兵請糧。急於星火。至於上廛聖慮。面諭臣等。虜寇猖獗。深以爲憂。比時臣等已卽面奏。著月非虜騎狂逞之時。料無大事。請寬聖懷。今據薊鎮總兵官威繼光揭稱。諸酋久已解散。時下正議掣兵。及臣等使人於宣府密探西虜青把都動靜。則本酋一向在巢住牧。未嘗東行遼東。所報皆屬夷誑賞之言。絕無影響。數日以來。更不聞消息矣。臣等因此反切憂慮。夫兵家之要。必知彼己。審虛實而後可以待敵。可以取勝。今無端聽一訛傳之言。遽爾

倉皇失指。至上動九重之憂。下駭四方之聽。則是彼已虛實。茫然不知。徒借聽於傳聞耳。其與風聲鶴唳。草木皆兵者何異。似此舉指。豈能應敵。且近日虜情狡詐。萬一彼常以虛聲恐我。使我驚惶。疲於奔命。久之懈弛不備。然後卒然而至。措手不及。是在彼反得先聲後實。多方以誤之之策。而在我顧犯不知彼己。百戰百敗之道。他日邊臣失事。必由於此。故臣等不以虜之不來爲喜。而深以邊臣之不知虜情爲慮也。兵部以居中調度爲職。尤貴審察機宜。沉謀果斷。乃能折衝樽俎。坐而制勝。今一聞奏報。遂爾張皇。事已之後。又寂無一語。徒使君父日焦勞於上。以憂四方。而該部以題覆公牘。謂足了本兵之事耳。臣等謂宜特諭該部。詰以虜情虛實之由。使之知警。且秋防在邇。薊遼之間。近口旣爲虛聲所動。征調疲困。恐因而懈怠。或至疎虞。尤不可不一儆戒之也。臣等愚見如此。伏惟聖明裁斷施行。

卽日奉聖諭。兵部前報虜賊數十萬欲犯遼東。前哨已到近邊。朕心日夕懸慮。今經旬日。如何又聲息杳然。不知前賊果否入犯。該鎮有無失事。你部裏如何通不以聞。着從



實說來。

### 進郊禮圖考疏

茲者恭遇皇上肇舉郊禋大典。臣等謹輯郊禮新舊圖考。進呈睿覽。舊禮者太祖高皇帝所定也。新禮者世宗皇帝所定也。按天地之祭。自周以來。或分或合。其禮不一。然大率合祭者爲多。國朝自洪武以後。一向合祭。嘉靖年間。始建分祭之制。然識者咸以合祀爲便。顧茲重典。今日未敢輕議。謹輯爲禮書二冊。首敍分合沿革之由。次具壇壝陳設規制圖。次列儀注樂章等項。而以臣等淺陋之見。略述其概。竊附於後。以備聖明他日裁擇。且以仰贊明禋之萬一。臣等又惟國之大事在祀。祀之大者曰郊。茲者皇上親郊之始。正百辟具瞻之初。况郊壇高曠。霜露凝寒。登降周旋。禮文繁縟。必須寅竭誠悃。乃可孚格於重元。必須收斂精神。乃能成全乎大禮。雖聖敬乾誠。昭格有素。然茲當行禮之期。凡起居飲膳。念慮動止之間。尤宜倍加謹慎。務期積誠致潔。真如上帝之降臨。

可也。臣等又無任懇切祈望之至。

萬歷三年十一月初三日。奉聖旨。覽卿等奏進郊禮圖冊。又導朕以積誠致潔。恭承大祭。具見忠敬。朕知道了。圖冊留覽。禮部知道。

### 郊禮新舊考附

國初建圜丘於鍾山之陽。以冬至祀天。建方丘於鍾山之陰。以夏至祀地。洪武二年始奉仁祖淳皇帝西向配享。十年春。始定合祀之制。時以天地壇大祀殿未成。暫於奉天殿行禮。至十二年正月。乃合祀於大祀殿。仍奉仁祖配享。命官分獻日月星辰嶽鎮海瀆山川諸神。凡一十四壇。三十二年。更奉太祖高皇帝配享。永樂十八年。北京天地壇成。每歲仍合祀如儀。南京壇有事則遣官祭告。洪熙元年。奉太配高皇帝太宗文皇帝同配享。嘉靖九年。初建圜丘於大祀殿之南。每冬至祀天。以大明夜明星辰雲雨風雷從祀。建方澤於安定門外。每歲夏至祀地。以五嶽五鎮四海四瀆陵寢諸山從祀。俱止。

奉太祖一位配享。而罷太宗之配。其大祀殿。則以孟春上辛日行祈穀祭。奉太祖太宗同配享。十年又改以啓蟄日行祈穀禮于圜丘。仍止奉太祖一位配享。十七年秋九月。詔舉明堂大享禮於大內之玄極寶殿。奉睿宗獻皇帝配享。玄極寶殿卽舊欽安殿也。是冬十一月。上皇天上帝尊號。十八年春行祈穀禮于玄極寶殿。不奉配。二十四年拆大祀殿。改建大享殿。命禮部歲季用秋奉請卜吉。行享殿大禮。隨又命仍暫行于玄極寶殿。隆慶元年。詔罷祈穀大享二祭。復玄極寶殿。仍名欽安殿。而天地則分祀。如世宗所更定云。臣等謹按國初天地分祀。至洪武十年。聖聖乃定爲合祀之制。每歲以正月上辛日行禮於南郊大祀殿。列聖遵行百六十餘年。至世宗皇帝始按周禮古文。復分建南北郊。俱壇而不屋。南郊以冬至。北郊以夏至行禮。而二至之外。復有孟春祈穀。季秋大享。歲凡四郊焉。隆慶改元。詔廷臣議郊祀之禮。時議者並請罷祈穀大享。復合祀天地於南郊。先帝深惟三年無改之義。獨以祈穀大享在大內行禮。不便。從禮官議罷之。而分祀姑仍其舊。蓋亦有待云爾。夫禮。因時宜。本乎人情者也。高皇帝初制郊禮分

祀者十年矣。而竟定於合祀者。良以古今異宜。適時爲順。故舉以歲者。人之始也。卜以春初。時之和也。歲惟一出。事之節也。爲屋而祭。行之便也。百六十餘年。列聖相承。莫之或易者。豈非以其至當允協。經久而可守乎。今以冬至極寒。而裸獻於星露之下。夏至盛暑。而駿奔於炎敲之中。一歲之間。六飛再駕。以時以義。斯爲戾矣。且成祖文皇帝再造宇宙。功同開創。配享百餘年。一朝而罷之。於人情亦有大不安者。故世宗雖分建園方之制。而中世以後。竟不親行。雖肇舉大享之禮。而歲時禋祀。止於內殿。是斯禮之在當時。已窒礙而難行矣。况後世乎。臣等愚昧。竊以爲宜遵高皇帝之定制。率循列聖之攸行。歲惟一舉合祀之禮。而奉二祖並配。斯於時義允協。於人情爲順。顧郊禋重典。今且未敢輕議。謹稽新舊規制朝儀。而略述其概。以俟聖明從容裁斷焉。

### 被言乞修疏

昨以御史劉臺論列。具奏乞休。伏奉聖旨。卿赤忠爲國。不獨簡在朕心。實天地祖宗所

共降。監被讒邪小人。已有旨重處。卿宜以朕爲念。速出輔理。勿介浮言。吏部知道。欽此。臣捧讀恩綸。涕泗交集。念臣受先帝重託。旣矢以死報矣。今皇上聖學尙未大成。諸凡嘉禮尙未克舉。朝廷庶事尙未盡康。海內黎元尙未咸若。是臣之所以圖報先帝者。未罄其萬一也。臣豈敢言去。古之聖賢豪傑。負才德而不遇時者多矣。今幸遇神聖天縱。不世出之主。所謂千載一時也。臣又豈可言去。皇上寵臣以賓師不名之禮。待臣以手足腹心之託。相親相倚。依然藹然。無論分義當盡。卽其恩款之深洽。亦自有不能解其心者。臣又何忍言去。然而臣之必以去爲請者。非得已也。蓋臣之所處者危地也。所理者皇上之事也。所代者皇上之言也。今言者方以臣爲擅作威福。而臣之所以代王行政者。非威也。則福也。自茲以往。將使臣易其塗轍。勉爲巽順以悅下耶。則無以逭於負國之罪。將使臣守其故轍。益竭公忠以事上耶。則無以逃於專擅之譏。况今讒邪之黨。實繁有徒。背公私行。習弊已久。臣一日不去。則此輩一日不便。一年不去。則此輩一年不便。若取臣之所行者。卽其近似而議之。則事事皆可以爲作威。事事皆可以爲作福。

睚眦之讒。日譁於耳。雖皇上聖明。萬萬不爲之投杼。而使臣常負疑謗于其身。亦豈臣節之所宜有乎。此臣之所以輒轉反側。而不能不惕於衷也。伏望皇上憐臣之志。矜臣之愚。特賜罷歸。以解羣議。博求廊廟山林之間。必有才全德備之士。既有益于國。而又無惡於衆者。在皇上任之而已。臣屢瀆宸嚴。無任戰慄隕越之至。

萬曆四年正月二十六日。奉聖旨。卿精誠可貫天日。雖負重處危。鬼神猶當護佑。讒邪陰計。豈能上干天道。朕亦知卿貞心不貳。決非衆口所能搖惕。已遣司禮監隨堂官往諭朕意。卿宜卽出視事。勉終先帝顧託。勿復再辭。吏部知道。

### 謝恩疏

昨該臣以被論乞休。未蒙俞允。今日伏蒙聖恩。特降御筆諭元輔。先帝以朕幼小付託先生。先生盡赤忠以輔佐朕。不辭勞。不避怨。不居功。皇天后土祖宗必共鑒知。獨此畜物爲黨。喪心狂。發悖言。動搖社稷。自有祖宗法度。先生不必如此介意。只思先生顧命。

朕所倚任。保安社稷爲重。卽出輔理。朕實惓惓。佇望。特賜燒割一分。手盒一副。長春酒十瓶。用示眷懷。先生其欽承之。慎勿再辭。欽此。該司禮監太監孫隆恭捧到臣私寓。臣謹焚香望闕叩頭。祇領訖。念臣賦性愚戇。處事乖方。雖橫被乎惡言。實自貽乎伊感。仰塵聖念。遣慰再三。載降宸綸。匪頒稠疊。惡彼讒慝。直欲爲有北之投。鑒此惓誠。固止其居東之請。捧誦未畢。涕淚交零。竊念臣矢死報國。本其素心。因毀乞骸。殊乖本願。緣未舍砥名礪行之小節。忽自忘忍恥成事之大忠。茲奉誨言。乃發深省。夫事惟求諸理之至當。心奚必於人之盡知。况臣款款之愚。旣特孚於昭鑒。則諸呶呶之口。誠無足爲重輕。謹當仰體聖懷。益殫赤悃。冰霜自保。雖嫌怨以奚辭。社稷是圖。何髮膚之敢惜。臣不勝感戴激切之至。

萬歷四年正月二十七日。奉聖旨。覽奏謝。知卿勉出輔理。朕心乃悅。知道了。禮部知道。

乞宥言官疏

伏蒙發下鎮撫司打問御史劉臺一本。該文書官邱得用口傳聖旨。劉臺這廝。讒言亂政。着打一百充軍。擬票來行。欽此。臣謹欽遵。與同官二臣商確擬票開。竊伏白惟古之聖賢。所最惡者讒言亂政之人。大舜曰。朕疾讒說殄行。震驚朕師。若不在時。侯以明之。撻以記之。大學曰。惟仁人放流之。屏諸四夷。不與同中國。良以讒說之人。以是爲非。以非爲是。其意不過欲誣害良善。以洩其怨憤狠毒之私。而其害乃至於覆人國家。故雖以帝舜之仁。孔子之聖。猶畏而惡之如此。今皇上之痛惡劉臺。欲加重處。是卽大舜之疾頑讒。孔子之所謂惟仁人能惡人者也。臣又何敢引嫌自避。不爲皇上除讒去惡。以定國是。顧臣思之。臺言官也。前日御史傅應禎虛捏旨意。誣損聖德。皇上欲廷杖之。臣竊以皇上一向虛己受諫。今一旦衆辱此人。將使居言路者畏懼。自保而不敢正言。故再三爲之懇乞。荷蒙聖慈俯從。曲賜寬宥。免其箠杖。天下莫不稱仁焉。今臺之讒狠亂國。其罪固不減於應禎。然其所誣詆者臣也。比之君父則相懸矣。前應禎誣訕皇上。臣以言官之故。猶爲乞免。今臺誣害臣。臣以被害之故。卽欲盡法。是臣以所惡於下者事



上而愛君父不如愛己身。臣不敢也。又臣觀臺疏中尙有垂白父母在家。臣實惻然憐之。夫彼之背本反噬。忍爲不義。固自忘其父母。度彼父母之心。豈不念其子耶。箠楚之下。死生難料。萬一被創而死。以憂及其父母。或致並殞。則於皇上如天之仁。或亦有所歉焉。而臣之心又大有所不能自安者矣。伏望聖慈俯鑑臣愚。免其廷杖。謫戍重罪。薄加退斥。以警頑讒。則皇上不行浸潤之哲。與赦過宥罪之仁。並行而不悖矣。臣非敢違旨市恩。以沽流俗之譽。蓋亦事理合當如此。伏惟聖明垂允焉。

萬曆四年二月初七日。奉聖旨。這等讒狠姦人。卿還申救他。可爲忠慈之至。姑准從寬。該衙門知道。

### 奉諭看詳民本疏

伏蒙發下山東魚臺縣民屈琛一本。奏訐本縣鄉官僉事隨府違法事情。該文書官孫斌口傳聖旨。這本說隨府曾受業於屈琛。是他師長。乃敢非理誣害。可擬旨拏來處治。

欽此。臣等仰見皇上留心政務。於四方民情。靡不周覽。又惡其以弟子而犯師長。欲加重治。誠振揚法紀。矯正頹薄之大機也。臣等不勝欽服。但參詳屈琛所奏。忿起於劉軫之告訟。歸咎於隨府之唆使。遂發其平日不法事情。若使其其實。則隨府之罪。誠宜重治。但此項民本。其中亦多誣罔不實之處。若徑擬旨拏問。恐因而開告訐之門。長刁訟之風。嘉靖年間王聯趙祖鵬等事可鑒也。以宜照常下都察院臣等傳示聖意。令其行與山東巡按御史從公審鞫。所奏果實。卽將隨府參提問罪。若有虛捏。自宜坐以誣告之條。庶四方民隱無不畢達。而無情者亦不得盡其辭矣。

張江陵全集 卷四

# 張江陵全集卷五奏疏

## 請重修大明會典疏

准禮部手本該禮科給事中林景暘等題爲泰道方享。國家閒暇。懇乞聖明及時修輯成憲。以垂永圖。以光繼述。大孝事。要將弘治十五年以後事例。命官編輯。增入會典等因。該本部覆稱。大明會典一書。卽唐宋六典會要之遺意。以昭一代之章程。垂萬年之成憲。至精且當。顧其爲書。成於弘治之末年。至今代更四聖。歲踰六紀。典章法度。不無損益異同。其條貫散見於簡冊卷牘之間。凡百有司艱於考據。諸所援附。鮮有定畫。以致論議煩滋。法令數易。吏不知所守。民不知所從。其非所以定國是而一人心也。嘉靖年間世宗皇帝嘗命儒臣續修會典。自弘治十五年至嘉靖二十人年而止。已經進呈。未蒙刊布。隆慶二年。都御史孫應鼈亦嘗奏請彙輯嘉靖事例。附入會典。今給事中林景暘等復申前請。委於政理有裨。但今兩朝實錄。尙未告成。披閱校正。日不暇給。若復

兼修會典。未免顧此失彼。合行翰林院候實錄進呈畢日。另行題請開館。揀選儒臣分局纂修。仍先行文各該衙門選委司屬官。將節年題准見行事例。分類編集。呈送堂上官校勘明白。候開館之日送入史館。以備采擇等因。萬曆二年五月初六日奉聖旨。是欽此。欽遵。手本到閣。臣等恭照會典一書。於昭代之典章法度。綱目畢舉。經列聖之因革損益。美善兼該。比之周官唐典。信爲超軼矣。顧其書創修於弘治之壬戌。後乃闕如。續編於嘉靖之己酉。未經頒布。又近年以來。好事者喜於紛更。建議者諛諂國體。條例紛紜。自相抵牾。耳目淆惑。莫知適從。我祖宗之良法美意。幾於淪失矣。今幸聖明御極。百度維新。委宜及今編輯成書。以定一代之章程。垂萬年之典則。先該科臣建議。該部題覆。比時委因兩朝實錄未成。勢難兼理。今穆宗皇帝實錄進呈已久。世宗皇帝實錄編纂已完。臣等刪潤功亦將畢。催督繕寫。計歲終可以進呈。所有編纂諸臣。在館稍暇。前項欽奉明旨。續修會典一節。相應及時舉行。合候命下。查照弘治嘉靖年間事例。擇日開館。命官纂緝。仍乞勅下禮部照依先題事理。催各該衙門將見行事例。選委司屬

官素有文學者。分類編輯。送館備錄。其一應纂修事宜。及合用官員職名。容臣等陸續開具奏聞。謹題請旨。奉聖旨。是。禮部知道。

### 進世宗御筆疏

先該臣等面奏。以皇上聖齡日長。乞留神政務。省覽章奏。暇時間取皇祖世宗皇帝所親批舊本覽閱。以爲裁決庶務之法。已荷聖明嘉納。茲臣等恭查閣中所藏皇祖親筆聖諭六十三道。御製四十四道。聖旨并票帖共七十道。又於纂修館中揀得嘉靖十年起至二十年止。親批奏題本共六十五本。進上睿覽。恭惟我世祖天縱總明。繼統之後。二十年間。勵精圖治。孜孜問學。其英謨睿斷。誠有非前代帝王所能及者。休望皇上萬幾之暇。特加省閱。則致理之力。不外於法祖而得之矣。

請擇有司觸通賦以安民生疏

竊惟致理之道。莫要愈安民。書曰。民惟邦本。本固邦寧。民安邦固。卽有水旱盜賊敵國外侮之虞。而人心愛戴乎上。無土崩瓦解之勢。則久安長治之術也。然欲安民。又必加意於牧民之官。方今聖明在上。一時郡邑長吏。固莫不爭自淬勵。勉修職業。以求無負於明時。但虛文矯飾。舊習尙存。剝下奉上。以希聲譽。奔走趨承。以求薦舉。徵發期會。以完簿書。苟且草率。以逭罪責。其實心愛民。視官事如家事。視百姓如子弟者。實不多見。故皇上雖有安民之心。而上澤不得以下究者。職此之故也。臣等思得明春。又當外官考察之期。一舉一措。乃天下嚮背所係。伏望聖明。特勅吏部。令其預先虛心訪覈。各有司官賢否。惟以安靜宜民者爲最。其沿襲舊套。虛心矯飾者。雖浮譽素隆。亦列下考。撫按以此覈屬官之賢否。吏部以此別撫按之品流。朝廷以此觀吏部之藻鑒。若撫按官不能悉心甄別。而以舊套了事。則撫按官爲不稱職矣。吏部宜秉公汰黜之。吏部不能

悉心精覈。而以舊套了事。則吏部爲不稱職矣。朝廷宜秉公更置之。庶有司不敢以虛僞蒙上。而實惠旁乎。元元之大幸也。臣等又查得隆慶六年六月詔書一款。自嘉靖四十三年四十四年四十五年并隆慶元年錢糧。除金花銀不免外。其餘悉從蠲免。其二年三年四年各糧。免十分之三。至於淮安徐州以水患。廣東惠潮二府以兵傷。則并隆慶二年三年亦從蠲免。恩至渥矣。乃該地方猶不能追納。至萬曆二年戶部乃議於拖欠七分之中。每年止帶徵三分。而民猶以爲苦何也。蓋緣各有司官不能約己省事。無名之征求過多。以致民力殫竭。反不能完公家之賦。其勢豪大戶侵欺積猾。皆畏縱而不敢問。反將下戶貧民責令包貼。近來因行考成之法。有司官懼於降罰。遂不分緩急。一概嚴刑追併。其甚者又以資貪吏之囊橐。以致百姓嗷嗷。愁嘆盈閭。咸謂朝廷催科太急。不得安生。夫出賦稅以供上者。下之義也。憐其窮困量行蠲免者。上之恩也。於必不可免之中。又爲之委曲調處。是父恩之恩也。今乃不知感戴。而反歸過於上。則有司官不能奉行之過也。然愚民難以戶曉。損上乃可益下。須賴皇下方行節儉。用度漸舒。



又以北虜納款。邊費稍省。似宜曲垂寬恤。以厚下安民。合無勅下戶部查各項錢糧。除見年應徵者分毫不免外。其先年拖欠帶徵者。除金花銀遵詔書仍舊帶徵外。其餘七分之中。通查年月久近。地方饒瘠。再行減免分數。如果貧瘠不能完者。悉與蠲除。以甦民困。至於漕運糧米。先年亦有改折之例。今查京通倉米足支七八年。而太倉銀庫所積尙少。合無比照先年事例。將萬歷五年漕糧。量行改折十分之三。分派糧多及災傷地方徵納。夫糧重折輕。既足以寬民力。而銀庫所入。又藉以少充。是足國裕民。一舉而兩得矣。臣等待罪輔弼。日夜思所以佐皇上布德元元。輯寧邦本。計無便於此者。伏乞聖明採納施行。生民幸甚。萬曆四年七月初六日。奉聖諭。吏戶二部。朕奉天子民。注存邦本。思欲固國安民。必得良有司加意牧養。近來各地方官。雖頗知守已奉法。然虛文粉飾。舊習未除。今朝覲考察在邇。着吏部悉心訪察各官賢否。惟以牧愛百姓者爲最。其有弄虛文。事趨謁。剝下奉上。以要浮譽者。考語雖優。必寘下等。并撫按官一體論黜。近又聞各有司官催徵錢糧。不分緩急。一概嚴併。又畏縱富豪奸猾。偏累小民。致有流

離失所者。朕甚憫之。今後除見年應納錢糧不免外。其以前拖欠。着戶部分別年月。久近分數多少。具奏蠲免。萬曆五年漕運糧米。暫行改折十分之三。以寬民力。各着實奉行。

### 考滿辭免恩命疏

茲者臣以一品九年考滿。該吏部題奉聖旨。朕元輔受命皇考。匡弼朕躬。勲德茂著。茲一品九年考績。恩禮宜隆。着加特進左柱國陞太傅。支伯爵俸。兼官照舊給與。應得誥命。遷寫勅獎勵。賜宴禮部。廕一子做尙寶司司丞。以稱朕褒答忠勞至意。欽此。有命自天。措躬無地。伏念臣本以譴陋。謬秉台衡。受先帝顧托之隆。荷皇上倚毗之重。禮之以師傅。待之以腹心。異數隆施。駢至疊錫。亦欲罄其狗馬之力。用以少答高厚之恩。而學術迂疎。行能淺薄。朝夕獻納。不過口耳章句之麤。手足拮据。率皆法制品式之末。心力徒竭。績效罔聞。茲當九載課績之期。正應三考黜幽之典。豈謂既逃於顯斥。乃尤濫被

乎殊恩。退自省循。若臨淵谷。臣聞有非常之才。然後有非常之功。有非常之功。乃可受非常之賞。五等厚祿。三公峻階。饗賜大烹。廕承延世。皆所謂非常之賞也。雖先朝名臣碩輔。耆德元勳。膺此數者。蓋亦無幾。臣何有功德。可以堪承。若不揣分義之安。必自速顛隳之咎。此所以展轉思惟。不敢以爲榮。而深以爲懼也。除勳階勅獎誥命。賤恩不敢瀆辭。謹已恭領。其諸特典。萬非所堪。伏望皇上俯鑒愚誠。收回成命。俾臣得安義勉。效馳驅。則皇上施推心之愛。百朋未足爲榮。而愚臣保知足之規。九死不敢忘報。臣不勝感激惶懼之至。

萬歷四年十月十九日。奉聖旨。卿以碩德宏才。夙佐皇考。親承顧命。輔朕冲年。閱歷滋深。忠勞獨茂。功在社稷。澤被生民。茲特循彝典。加恩。猶未愜於朕志。卿宜勉遵成命。副朕眷懷。所辭不允。吏部知道。欽此。

考滿謝手勅加恩疏

茲者臣以一品九年考滿。該吏部題奉聖旨。踰例加恩。臣自揣愚分不安。謹已具疏辭免。隨遣中使頒賜銀五十兩。貯絲四表裏。內大紅織金胸背斗牛一表裏。羊三隻。茶飯卓五卓。酒三十瓶。新鈔五千貫。臣疊荷恩施。已不勝感戴矣。今日又蒙特遣司禮監隨堂太監孫秀。齋奉御筆手勅諭元輔。先生親受先帝遺囑。輔朕冲年。今四海昇平。四夷賓服。實賴先生匡弼之功。先生精忠大勳。朕言不能述。官不能酬。惟我祖宗列聖。必垂鑒知。陰祐先生子孫世世與國咸休也。茲歷九年考績。特於常典外。賜銀二百兩。坐蟒蟒衣各一襲。歲加祿米一百石。薄示褒眷。先生其欽承之。勿辭。欽此。又該文書官太監孫得勝齋獎勵勅書一道。各恭捧到臣私第。臣謹焚香叩頭祇領。伏念臣謬司鼎鉉。歷有歲年。親承先帝憑几之言。特荷皇上倚衡之寄。雖嘗誓捐辱質。勉竭苦心。而戴高厚者有難報之恩。肩繁重者無可底之績。日申月飭。特祖宗已試之規。夕惕朝乾。乃臣子本然之分。論君德則聰明自天。而淺學無裨。語治功則謀猷惟后。而綿力何有。愆尤徒積。汰斥爲宜。豈意聖明復從甄敘。穹階世賞。既按功令以宣麻。宸藻奎章。復廑睿思。

而賜札嘉乃丕績。居然虞廷讓美之風。惟公德明。藹矣周宣毗賢之命。重以寶棗精鏐之貺。兼之綺衣赤紱之榮。不稼不耕。久已被素餐之刺。非勳非戚。乃冒膺詔祿之恩。瞻此駢施。灼然異數。將控辭而弗獲。欲酬報以奚由。惟當益殫疲蹇。勉效馳驅。知我者天。卽違俗而違借。許身于國。惟盡瘁以爲期。臣無任激切感戴之至。

### 再辭恩命疏

昨以一品九年考滿。荷蒙聖恩。踰例陞賞。臣自揣分義不安。具疏辭勉。奉聖旨。卿以碩德宏才。夙佐皇考。親承顧命。輔朕冲年。閱歷滋深。忠勞獨茂。功在社稷。澤被生民。茲特循彝典。加恩。猶未愜于朕志。卿宜勉遵成命。副朕眷懷。所辭不允。吏部知道。欽此。天聽未回。冰兢愈切。敢陳微悃。再控宸嚴。臣聞人之受享。各有分量。受過其量。鮮不爲災。譬之雨澤。所以生物。過多或反有傷。甘膳所以養人。太飽亦能致疾。臣幸以一介庸豎。爲帝者師。紆朱拖紫。揖讓人主之前。當軸秉衡。平章軍國之重。所謂千載一時之遇也。乃

自受任以來。宸綸蕃錫。異數殊恩。所以加于臣者。歲無虛月。雖膏雨普潤。而臣之被澤。爲獨隆。江河同飲。而臣之饜腹。已先飽矣。及茲止足。猶懼滿盈。若復浸灌不已。貪饜無厭。其有不至於災患者乎。欲貴雖人同情。履危良亦可畏。與其貪得以速咎。何如自抑以圖存。臣雖至愚。豈不自審。且太傅之秩。古謂三公。本朝文臣無居此者。惟嘉靖初年。大學士楊廷和。曾奉命特加。旋亦辭免。彼定策元老。猶不敢當。臣何人斯。可以叨冒。至於伯祿部宴符丞之廕。雖先朝輔臣間有蒙被者。然或因一事而偶加。或以積久而漸及。固未有不論功閥。一朝而盡畀之者。夫以國典之所未嘗予者。而臣獨冒然以受之。昔人之所未曾備者。而臣乃兼得而有之。豈惟天道所忌。蓋亦公論不平。早夜思惟。如負芒刺。用是不避煩瀆。復陳其愚。伏望聖慈。冊垂矜允。使臣得以其未盡之力。勉效驅馳。是皇上之所以厚臣而保其終也。臣于冒天威。無任隕越悚慄之至。萬歷四年十月二十二日。奉聖旨。朝廷設立三公之職。用弘化理。得賢則授。自古已然。朕以卿精忠大勳。經邦論道。厥惟其人。特進崇階。允孚公論。至於增祿設廕等項。亦皆累朝優禮輔臣。

常典。安得以盛滿爲嫌。過執謙遜。其尙體朕至意。毋復固辭。吏部知道。欽此。

## 二 辭恩命疏

頃以拜恩踰分。再疏辭免。奉聖旨。朝廷設立三公之職。用弘化理。得賢則授。自古已然。朕以卿精忠大勳。經邦論道。厥惟其人。特晉崇階。允孚公論。至於增祿宴廕等項。亦皆累朝優禮。輔臣常典。安得以盛滿爲嫌。過執謙遜。其尙體朕至意。毋復固辭。吏部知道。欽此。捧誦溫綸。愈深跼蹐。欲仰承恩眷。則分不自安。將再瀆宸嚴。又懼貽重譴。思惟展轉。寢食靡寧。然臣所以屢控而終不能已者。非矯也。緣臣前歲以遼東大捷。荷藏聖恩。欲加陞廕。臣具疏辭免。中間引古俠士酬報知己之義。以及人臣敬事後食之心。每欲事過所受。功浮於食。犬馬之誠。於是乃安。自今凡非分之恩。踰格之賞。無復濫及。庶大義克盡。微志獲伸等因。已荷聖明俯垂矜允。又特加綸獎。風勵臣工。是臣之微誠。旣已仰孚於聖鑒。臣之愚忠。又已盟心而自許矣。乃今未有尺寸之效。以自副其功。浮於食

之心。而非分之恩。踰格之賞。又復濫及。則臣向之所以陳辭者。不過矯飾之虛言。而皇上之所以許臣者。亦未爲相信之深至矣。臣不敢自背其言。上以欺主。外以欺人。故不避煩瀆。瀝血陳誠。必望聖慈特垂俞允。倘微志隻伸。卽通侯之爵未爲榮。萬鍾之祿不爲富矣。臣屢冒天威。無任戰慄隕越之至。萬歷四年十月二十五日。奉聖旨。卿有定國安民大功。加秩賜祿。未足酬賞。乃猶固執謙遜。至於再三。朕覽所奏詞。益用懷歉。茲重違卿意。特准辭免。太傅伯祿成。卿忠志。用立臣極。其餘常典。悉宜勉承。以見君臣相體之義。慎勿又辭。該部知道。欽此。

### 請敘錄日講諸臣疏

臣等伏觀皇上踐祚以來。日御講筵。孜孜問學。隆冬盛暑。未嘗少間。而侍講諸臣申時行等亦夙夜在公。勤誠匪懈。在諸臣以勸講爲職。雖竭忠盡瘁。分所當然。豈敢有所希覬。但臣等竊以爲敬事後食者。人臣靖共之心。有勞必銀者。明主激勸之典。况先朝於



日講官亦每特加優禮。所以重聖學也。督皇上聰明日開。聞見日廣。雖天挺英資。匪由學習。而諸臣開導啓沃之功。亦似有不可泯者。伏望聖慈俯軫諸臣微勞。酌其年資。量加陞級。以示激勵。勅下吏部詮註遵行。夫諸臣之勞愈深。則皇上典學之功愈進。諸臣之被恩愈渥。則朝廷崇儒之典愈光矣。

### 辭加恩疏

昨該臣等以講讀諸臣學士申時行等效勞年久。乞恩陞級。以示激勸。茲該文書官孫斌口傳聖意。俯念臣等提調講讀。亦有勞動。欲一體加恩。令臣等具擬上請。欽此。臣等伏奉綸音。不勝感激。敢不欽遵。以仰承恩眷。但念臣等猥以淺薄。俱蒙皇上簡任輔弼。輔弼之職。上則培養君德。翼贊廟謨。下則表率羣僚。修明庶政。其職最爲繁重。最難稱塞。若提調講讀。不過職分中之一事實。與諸臣之專供一職者不同。雖每日趨侍講筵。改定講義。亦不過總其大綱。率領諸臣以供事而已。又何功之可言。何勞之可錄。夫掠

人之美以自爲功。謂之竊。無其實而冒其賞。謂之忝。忝與竊。臣等不敢爲也。伏望皇上俯鑒微忱。免廬聖念。所有加恩一節。萬不敢承。止將原本擬稟上請。伏乞聖裁。臣等仰蒙恩念。不勝感激圖報之至。

### 議處就教舉人疏

昨該禮部開送乞恩就教舉人。臣等會同翰林院掌院事學士申時行。遵奉欽依。出題考試。取中上卷八卷。中卷三百三十六卷。俱堪授教職。已經封卷進呈。臣等又查得先年就教舉人。多授以府州縣學訓導之時。令其以舉人署教事。仍准下科會試一次。三年之後。考其年力精壯通達民事者。乃陞有司正官。次則量轉學正教諭。以次漸陞有司。蓋以就教舉人皆未經國學作養。故使之分署教職。資其廩給。以進學習事爲將來用之地也。近年以來。此意寢失。舉人乞恩者。概授以學正教諭。絕無除訓導者。不及三年。卽陞知縣。又以願就者多。學正教諭缺少。除授不盡。則縱令回籍。下科仍以舉

人會試之後始從選除。甚非正禮。由是舉人以就教爲捷徑。不復坐監。而祖宗造士作人之意。寔以不存。臣愚竊以爲居今之時。欲盡復初制。固非人情所堪。亦宜酌議釐正。以敦士習。合無勅下吏部。將今次臣等所定上卷八卷及中卷十名以前。具授以州學正。中卷二百名以前。俱授縣學教諭。二百名以後。俱授以府州縣。各人才衆多。所在儒學訓導。仍俱准下科會試一次。三年之後。考其有才力能治民者。始陞授有司正官。今次查有見缺。盡與院授。如員缺不敷。省令在部聽候陸續選除。毋得徇情。縱令回籍。致乖政體。以後年分俱照例施行。如此。則舉人不敢僥倖於徑截之途。而國學由此充實。亦作興人才之一端也。

### 請停止內工疏

該文書官邱得用口傳聖旨。慈慶慈寧兩宮。着該衙門修理見新。只做迎面。欽此。臣等再三商榷。未敢即便傳行。竊惟治國之道。節用爲先。耗財之原。工作爲大。然亦有不

已者。或居處未寧。規制當備。或歷歲已久。敝壞當新。此事之不容已者也。於不容已者而已之。謂之陋。於其可已而不已。謂之侈。二者皆非也。恭惟慈慶慈寧。乃兩宮聖母常御之所。若果規制有未備。敝壞所當新。則臣等仰體皇上竭情盡物之孝。不待聖諭之及。已卽請旨修建矣。今查慈慶慈寧俱以萬曆二年興工。本年告完。當其落成之日。臣等嘗恭詣閱視。伏覩其巍崇隆固之規。彩絢輝煌之狀。竊以爲天宮月宇。不是過矣。今未踰三年。壯麗如故。乃欲壞其已成。更加藻飾。是豈規制有未備乎。抑亦敗壞所當新乎。此事之可已者也。况昨該部該科屢以工役繁興。用度不給爲言。已奉明旨。以後不急工程。一切停止。今無端又興此役。是明旨不信於人。而該部科必且紛紛執奏。徒彰朝廷之過舉。滋臣下之煩言耳。方今天下民窮財盡。國用屢空。加意撙節。猶恐不足。若浪費無已。後將何以繼之。臣等灼知兩宮聖母。欲皇上祈天永命。橫福愛民。亦必不以此爲孝也。臣等備員輔導。凡可將順。豈敢抗違。但今事在可已。因此省一分。則百姓受一分之賜。使天下黎民萬口同聲。祝聖母之萬壽。亦所以成皇上之大孝也。伏望聖慈

俯鑒愚忠。將前項工程暫行停止。俟數年之後。稍有敝壞。然後重修未晚。臣等干冒宸嚴。無任悚慄之至。

萬曆五年五月二十一日。上隨該文書官口傳聖旨。先生忠言。已奏上聖母停止了。

### 嶺西大捷辭免加恩疏

昨蒙發下兵部題覈廣東羅旁大捷。請敘錄有功人員本。臣已酌量擬票上請。茲該文書官孫斌口傳聖旨。廣東大捷。全是先生每運籌。都該廩賞。改票來行。欽此。臣等不勝感激。不勝惶悚。茲者嶺西之役。兵不踰時。而俘獲四萬有餘。拓地千里之遠。誠爲殊常大捷。然此皆祖宗垂祐。皇上聖武布昭。下則將士用命之所致也。臣等參預密勿。適會成功。有何勞動。敢冒恩賞。况前已奉旨。以後邊功不許敘及輔臣。臣等又豈敢身自犯之。伏望聖明俯鑒。臣等愚衷。所有加恩一節。特賜停寢。庶臣等犬馬微分。得以少安。謹將原票封進。隨奉聖諭。廣東大捷。實賴先生每運籌。賜元輔銀一百兩。蟒衣一襲。彩段

四表裏。次輔二各銀八十兩。四表裏。欽此。

### 奏請聖母裁定大婚吉期疏

該文書官送下欽天監一本。題稱皇上下大婚禮。擇於十二月大利。然未定有年分。臣等恭照祖宗列聖婚期。多在十六歲出幼之年。英宗皇帝九歲登極。正統七年正月成婚。武宗皇帝十五歲登極。正德元年八月成婚。世宗皇帝亦十五歲登極。嘉靖元年九月成婚。皆在十六之年。今皇上聖齡方在十五。中宮亦止十四歲。若待來年十二月。則過選婚之期。一年有餘。於事體未便。若即用今年十二月。則又太早矣。該監又稱。一年之間。止利十二月。餘月皆有礙。臣等竊惟帝王之禮。與士庶人不同。凡時日禁忌。皆民間俗尚。然亦有不盡然者。臣居正素性愚昧。不信陰陽選擇之輒。凡有舉動。只據事理之當爲。時勢之可爲者。卽爲之。未嘗拘泥時日。牽合趨避。然亦往往誤蒙天幸。動獲吉利。况皇上爲天地百神之王。一舉一動。皆將奉職而受事焉。又豈陰陽小術可得而拘禁。

耶。兩宮聖母既已慎選賢淑。作配聖躬。臣等亦豈不欲及早贊成嘉禮。以爲萬年嗣續之計。以慰四海仰望之心。但如該監所言。實未穩便。適聞文書官向臣等說聖母慈意。亦欲候明年二三月萬物發生之時。舉行大禮。仰惟聖母睿見。極其允富。考之古禮。皆以仲春。會男女桃夭之吟。見於風人。今若定以春時。則既有合於天地交泰萬物化醇之意。且當聖齡十六。又率遵乎累朝列聖之規。不遲不早。最爲協中。夫婚姻大事。人道所重。然必待父母之命。媒妁之言。自天子以至於庶人一也。今此大禮。亦惟取裁於聖母之一言耳。仰煩睿思。再加斟酌。定以明歲。或取三月春煖之時。或用四月清和之候。諭下臣等傳示各衙門遵行。其該監本。合無姑且留中。以俟裁定施行。隨該文書官口傳聖母諭。先生說的是。今定以明年三月。次日奉御批。欽天監本朕奉聖母慈諭。着於明年三月內擇吉行禮。

纂修書成辭恩命疏

昨奉聖諭以皇祖實錄書成。命臣等撰勅加恩監修總裁官。臣自以官品已極。涯分久踰。不敢再叨。謹欽遵將英國公張溶并同官二臣擬勅上進。茲該文書官邱得用口傳聖旨。皇祖四十五年實錄。字字句句都是先生費心看改幾次。我盡知道。先生恩該首加。却怎的不擬。這勅着另改擬了纔行。欽此。臣恭聞寵命。愧懼交并。追惟我皇祖世宗皇帝實錄。自先帝嗣統之初。已卽降纂修之命。一向因循廢閣。竟未脫藁。迨臣當事。始定爲章程。嚴其期限。然後責成有據。端緒可尋。其中編摩草創。雖皆出於諸臣之手。然實無一字不經臣刪潤。無一事不經臣討論。旣更定其文義。復讎討其差訛。窮日逮夜。冒暑凌寒。蓋五年於茲。而今始克就。鞭驚策蹇。寧靡寸勞。况書成加恩。累朝彝典。皇上按故事錄微勞。臣卽循例仰承。亦豈得爲溢濫。但臣有匹夫微志。硜硜欲以自遂者。向已屢控宸嚴。茲敢再陳素悃。臣以羈單寒士。致位台鼎。先帝不知臣不肖。臨終親握臣手。屬以大事。及遭遇聖明。眷倚彌篤。寵以賓師之禮。委以心膂之託。渥恩殊錫。豈獨本朝所無。考之前史。亦所希覲。每自思惟。古之節士。感遇知己。然諾相許。至於抉面碎首。



而不辭。既已存亡死生矣。而猶不矜其能。不食其報。况君臣分義。有不可逃于天地之間者乎。用是盟心自矢。雖才薄力儻。無能樹植鴻鈞。以答殊眷。惟於國家之事。不論大小。不擇閒劇。凡力所能爲。分所當爲者。咸願畢智竭力以圖之。嫌怨有所弗避。勞瘁有所弗辭。惟務程功集事。而不敢有一毫覬恩謀利之心。斯於臣子分義。庶乎少盡云爾。故自皇上臨御以來。所加於臣文武錄廕。不啻四五矣。而臣皆未敢領。昨以九年任滿。皇上欲授臣以三公之官。給臣以五等之祿。臣亦懇疏陳辭。必得請而後已。豈敢異衆爲高。以沽流俗之譽哉。蓋素所盟誓者至重。不敢自皆其初心故也。近年以來。君臣之義不明。敬事之道不講。未有尺寸。卽生希冀。希冀不得。輒懷缺望。若執左契而責報于上者。臣竊非之。每欲以身爲率而未能也。今乃以楮筆供奉之役。卽叨橫恩渥澤之施。則平日所以勸勉諸臣者。皆屬矯僞。人誰信之。此臣所以展轉思惟。有不能一日自安者也。臣聞人臣事君。無隱情。無二辭。今臣所言。皆已真吐肺腸。辭理俱竭。藉惟皇上復申前命。臣亦不過再執此辭。而稟奏屢騰。言語煩瀆。非皇上以手足腹心待臣之義也。

萬望聖慈俯鑒愚衷。特賜停寢。俾臣微志獲伸。雖蔬食沒齒。有餘榮矣。所有改勅一節。萬不敢擬。謹將原稿封進。伏乞聖裁施行。

萬曆五年八月二十一日。奉聖旨。卿社稷大功。不止纂修一事。乃屢辭恩命。遜美弗居。覽奏。真忠大義。深激朕衷。特允所辭。以成卿勞謙之美。風激臣工。仍宣付史館。昭垂萬世。該部知遣。欽此。

### 論決重囚疏

昨該司禮監大監孫得勝口傳聖旨。奉聖母諭。今歲大喜。命臣等於刑科三覆奏。本上擬旨。暫免行刑。欽此。仰惟聖母慈悲不殺之仁。皇上將順好生之美。臣等敢不仰承以廣德意。但查我祖宗舊制。凡官吏軍民人等犯該死罪。有決不待時者。有監至秋後者。鞫問既明。悉依律處決。未有淹禁累年不行處斷者。至嘉靖末年。世宗皇帝以齋醮奉元。始有暫免不決之令。或間從御筆所勾。量行處決。然其實近年姑息之弊。非我祖宗

垂憲之典也。夫春生秋殺。天道所以運行。雨露霜雪。萬物因之發育。若一歲之間。有春生而無秋殺。有雨露而無雪霜。則歲功不成。而化理或滯矣。明王奉若天道。其刑賞予奪。皆奉天意以行事。書曰。天命有德。五服五章哉。天討有罪。五刑五用哉。若棄有德而不用。釋有罪而不誅。則刑賞失中。慘舒異用。非上天所以立君治民之意矣。臣等連日詳閱法司所開重重招情。有殺祖父母父母者。有毆死親兄及同居尊屬者。有殺一家非死罪三人者。有強盜劫財殺人者。有鬪毆逞兇登時打死人命者。據其所犯。皆絕滅天理。傷敗彝倫。仁人之痛惡。覆載之所不容者。天欲誅之。而皇上顧欲釋之。其無乃違上天之意乎。康誥曰。惟迪茲。不于我政人得罪。天惟與我民彝。大濬亂曰。乃其速由文王作罰。刑茲無赦。言彼寇攘姦宄。不孝不友之人。所犯至於如此。若爲政者不加之以罪。則天與我民之常道。將至於泯滅。此壞亂。必須速依文王所作之法。刑之而無赦。此書乃皇上近日所講習者。夫文王視民如傷。古所稱仁聖之主。而於此等之人。亦必刑之而無赦者。良以爲惡之人。彼自蹈於刑辟。雖欲生之而不可得也。且稂莠不鋤。嘉禾

不茂。寃憤不泄。戾氣不消。今聖母獨見犯罪者身被誅戮之可憫。而不知被彼所戕害者皆含寃蓄憤於幽冥之中。明王聖主不爲之一泄。彼以其怨恨寃苦之氣鬱而不散。上或蒸爲妖沴氛祲之變。下或招致凶荒疫癘之災。則其爲害。又不止一人一家受其荼毒而已。獨奈何不忍於有罪之兇惡。而反忍於無辜之良善乎。其用仁亦舛矣。况此等之人。節經法司評審。九卿大臣廷鞫。皆已衆證明白。輸服無辭。縱使今年不決。將來亦無生理。不過遲延月日。監斃牢獄耳。餘與其暗斃牢獄。而人不及知。何如明正典刑。猶足以懲奸而伸法乎。法令不行。則犯者愈衆。年復一年。充滿囹圄。旣費關防。又虧國典。其於政體又大謬也。伏願皇上念上天之意不可違。祖宗之法不可廢。毋惑於浮屠之說。毋流於姑息之愛。奏上聖母。仍將各犯照常行刑。以順天道。若聖心不忍盡殺。或仍照去年例。容臣等揀其情罪尤重者。量決數十人。餘姑半固監候。俟明年大婚吉典告成。然後概免一年。則春生秋殺。仁昭義肅。並行而不悖矣。臣等叨與密勿。此關係朝廷大政。祖宗舊典。不敢不盡其愚。伏惟聖明裁擇。

萬歷五年九月十四日。文書官口傳聖旨。先生說的是。今年照舊例行刑。

# 張江陵全集卷六奏疏

## 聞憂謝降諭宣慰疏

本月二十五日。得臣原籍家書。知臣父張文明。以九月十三日病故。臣一聞訃音。五內崩裂。茲者伏蒙皇上親灑宸翰。頒賜御劄。朕今覽二輔所奏。得知先生之父棄世十餘日了。痛悼良久。先生哀痛之心。當不知何如里。然天降先生。非尋常者比。親承先帝付託。輔朕冲幼。社稷奠安。天下太平。莫大之忠。自古罕有。先生父靈。必是懽妥。今宜以朕爲念。勉抑哀情。以成大孝。朕幸甚。天下幸甚。欽此。該司禮監太監李佑恭捧到臣私第。臣不忠不孝。禍延臣父。乃蒙聖慈。曲軫哀憐。犬馬餘生。慰諭優渥。臣哀毀昏迷。不能措詞。惟有痛哭泣血而已。臣不勝激切哀感之至。

## 謝遣官賜賻疏

臣於本月二十五聞臣父憂。今日欽奉聖旨。賜臣銀五百兩。紵絲十表裏。新鈔一萬貫。白米二十石。香油二百斤。各樣碎香二十斤。蠟燭一百對。麻布五十疋。該司禮監隨堂太監魏朝恭捧到臣私第。臣謹叩頭祇領訖。伏念臣犬馬微生。樛蒲賤質。事主不能效匡扶之力。事親不得盡菽水之歡。以致抱恨終天。雖生猶死。仰荷聖慈。曲垂憫念。昨旣奉慰諭之勲。慊茲又拜錫賚之降渥。顧此殊恩。今昔罕覩。臣一家父子。歿者啣環結草。存者碎首捐軀。猶不足以仰報聖恩於萬一也。臣哀苦愚衷。昏迷罔措。仰天泣血。辭不能宣。誠不勝激切感戴之至。萬歷五年九月二十七日。

### 謝兩宮太后賜賻疏

臣于本月二十五日。聞臣父憂。今日欽奉仁聖皇太后懿旨。賜臣銀五百兩。紵絲十表裏。新鈔一萬貫。白米二十石。香油二百斤。各樣碎香二十斤。蠟燭一百對。麻布五十疋。該慈慶宮管事太監張仲舉恭捧到臣私第。臣謹叩頭祇領訖。伏念臣罪惡甚重。禍延

臣父。以致抱恨終天。痛苦幾絕。仰荷慈恩垂憐。犬馬殘生。諭慰諄切。又特頒厚賻。赫奔充庭。顧此殊恩。古今罕遇。臣一家父子。歿者啣環結草。存者捐軀殞首。猶不足以仰報慈恩于萬一也。臣哀苦愚衷。辭不能布。誠不勝激切仰戴之至。

慈聖皇太后賻禮謝疏同前

### 謝卹典疏

臣于本月二十八日。該禮部題爲卹典事。欽奉聖旨。是朕元輔功在社稷。伊父卹恩。委宜從厚。着照例與祭葬。仍加祭五壇。各差官前去祭葬。以示優眷。欽此。伏念臣負罪積愆。禍延臣父。仰荷聖慈。特頒恩卹。塵溫綸之俯賁。視彝典而加優。犬馬何有微勞。烏鳥獲伸私悃。古今罕遇。存歿均霑。臣雖糜骨捐軀。莫能仰酬洪造于萬一也。臣哀苦病懃。未能匍匐闕庭。俯伏叩謝。不勝激切仰感之至。萬歷五年十月初二日。



### 乞恩守制疏

臣于本月二十五日。聞父訃音。卽移咨吏部題請放臣回籍守制。隨該吏部題奉聖旨。朕元輔受皇考付託。輔朕幼冲。安定社稷。朕深切倚賴。豈可一日離朕。父制當守。君父尤重。准過七七不隨朝。你部裏卽往諭。着不必具辭。欽此。臣在憂苦之中。一聞命下。驚惶無措。臣聞受非常之恩者。宜有非常之報。夫非常者。非常理之所能拘也。臣一介草茅。忝司政本。十有餘年。受先皇顧託之重。荷聖主倚毗之專。無論平日所承。隆恩異數。超軼古今。卽頃者聞憂之日。兩宮聖母爲臣憫惻。聖心感動爲臣悽惋。慰弔之使。絡繹道途。賻贈之資。充溢筐篚。又蒙皇上親灑宸翰。特降璽書。中間慰藉之勤篤。勉喻之諄切。尙有溢于聖言之外者。臣伏而讀之。一字一淚。雖旁觀遜聽之人。亦無不傷心酸鼻者。夫自古人臣。以忠結主。商則成湯之于伊尹。高宗之于傅說。周則成王之于公旦。漢則昭烈之于諸葛亮。其隆禮渥眷。辭命誥諭之文。載在史冊。至今可考。固未有謙抑下

異親信敬禮。如皇上之于臣若是之懇篤者。此所謂非常之恩也。臣於此時舉其草芥賤軀。摩頂放踵。粉爲微塵。猶不足以仰答於萬一。又何暇顧旁人之非議。狗匹夫之小節。而拘拘於常理之內乎。且人之大倫。各有所重。使幸而不相值。則固可各伸其重。而盡其所當爲。不幸而相值。難以並盡。則宜權其尤重者而行之。令臣處君臣父子兩倫相值。而不容並盡之時。正宜稱量而審處之者也。况奉聖諭。謂父制當守。君父尤重。臣又豈敢不思以仰體而酌其輕重乎。顧臣思之。臣今犬馬之齒纔五十有三。古人五十始服官政。而本朝服制止於二十七個月。計臣制滿之日。亦五十六歲耳。此時自量精神體力。尙在強健。皇上如不以臣爲不肖。外則操戈執銳。宣力于疆場。內則荷橐持籌。預議于帷幄。遠邇閒劇。惟皇上之所使。雖赴湯火。死不敢避。是臣以二十七月報臣父。以終身事皇上。昔人所謂報國之日長。報劉之日短者也。如此則君臣父子之倫。雖不得以並盡。而亦不至于相妨。夫古人有啣哀赴官。墨纒從政者。有金革之事則可。方今賴皇上威德。四郊無壘。九塞清塵。故臣欲以其間少盡私情。此臣之所以籲天泣血。哀

鳴而不能自己者也。伏望聖慈垂念烏鳥微情。曲賜允許。不惟臣之愚衷獲安。臣父有知。亦啣感于九泉矣。

萬歷五年十月初二日。奉聖旨。卿篤孝至情。朕非不感動。但念朕昔當十齡。皇考見背。丁寧以朕囑卿。卿盡心輔導。迄今海內乂安。蠻貊率服。朕冲年垂拱仰成。頃刻離卿不得。安能遠待三年。且卿身繫社稷安危。又豈金革之事可比。其強抑哀情。勉遵前旨。以副我皇考委託之重。勿得固辭。吏部知道。欽此。

### 再乞守制疏

頃者以臣父病故。奏乞回籍守制。伏奉聖旨。卿篤孝至情。朕非不感動。但念朕昔當十齡。皇考見背。丁寧以朕囑卿。卿盡心輔導。迄今海內乂安。蠻貊率服。朕冲年垂拱仰成。頃刻離卿不得。安能遠待三年。且卿身繫社稷安危。又豈金革之事可比。其強抑哀情。勉遵前旨。以副我皇考委託之重。勿得固辭。吏部知道。欽此。臣在痛楚困憊之中。捧誦

綸音。至先帝顧託一節。觸地號天。肝腸寸裂。夫人之相與。然諾相許。猶能捐軀赴義。死且弗背。臣于國家。冀土草芥之臣耳。先帝不知臣不肖。臨終託臣以大事。叮寧付囑。言猶在耳。中道而背之。雖施于交友。然且不可。乃敢以此事。吾君父。而自蹈于誅夷之罪乎。蓋臣今所乞於皇上者。非長往遠引。背而去之之謂也。痛念臣父別來十有九年。雖陟帖之懷。時時在念。而以國家事重。未敢言私。竊常自擬。俟皇上大婚禮成。暫乞一假歸省。不圖一旦奄至于此。使臣抱恨終天。今日雖得歸家。亦知扳號無及。但念臣父生身恩重。今縱不得再覩其音容。然及其未殯。憑棺一慟。身負簣土。加于邱壠之上。猶得少道其違曠之咎。以慰冥漠之魂。比及禫除。臣當不俟宣召。馳赴闕庭。以聽任使。是臣未盡愚忠。尙有俟於他日也。若此願不獲。將負痛終身。雖勉強在此。而精神沮喪。心志昏迷。發慮出謀。必至乖舛。或因而鬱鬱致病。喪此殘軀。則忠孝君親。兩俱有損。此臣所以展轉悽惶。而不能已於哀鳴也。夫君臣之義。無所逃於天地之間。君之於臣。欲其生則生。欲其死則死。命之進則進。命之退則退。臣豈敢以區區螻蟻微情。仰干大義之重。

所以屢控而不止者。亦恃皇上平日諒臣之深。眷臣之篤。憑寵怙恩。而覲幸於一獲耳。臣連日痾切窮苦。心蘊結而難紓。語荒迸而無次。惟聖慈哀憐臣下情。不勝瀝血抆淚。懇切祈望之至。

萬歷九年十月初五日。奉聖旨。覽奏詞。益哀懇。朕惻然不寧。但卿言終是常理。今朕冲年。國家事重。豈常時可同。連日不得面卿。朕心如有所失。七七之期。猶以爲遠。矧曰三年。卿平日所言。朕無一不從。今日此事。卻望卿從朕。毋得再有所陳。吏部知道。欽此。

### 謝賜甜食疏

伏蒙聖母皇上特遣近侍官孫良尙銘到臣私第。頒賜甜食二盒。茶食二盒。又傳奉慈諭旨。臣節哀自愛。臣謹叩首祇領。不勝感戴天恩之至。

萬歷五年十月初四日

## 三乞守制疏

比者臣再疏陳乞。伏奉聖旨。覽奏詞益哀懇。朕惻然不寧。但卿言終是常理。今朕冲年。國家事重。豈常時可同。連日不得面卿。朕心如有所失。七七之期。猶以爲遠。矧曰三年。卿平日所言。朕無一不從。今日此事。卻望卿從朕。毋得再有所陳。吏部知道。欽此。又聞同官二臣言。昨送本官將臣奏本到閣。傳奉聖意云。雖上百本。亦不能從。嗟乎。古語云。犬馬之誠。不能動人。譬人之誠。亦不能動天。臣始不信。今乃見之。臣前後所奏。哀苦迫切之情。非不仰觸聖心也。悲鳴號泣之聲。非不上徹天聽也。然竟不能徼一二之幸於萬分之中者。仰窺皇上之心。不過以數年以來。舉天下之重。盡屬於臣。見臣鞠躬盡瘁。頗稱意指。將謂國家之事。有非臣不能辦者。此殆不然也。夫人之才識。不其相遠。顧上用之何如。臣之不肖。豈真有卓犖超世之才。奔軼絕塵之力。惟皇上幸而用之。故臣得盡其愚耳。今在廷之臣。自輔臣以至於百執事。孰非臣所引薦者。觀其器能。咸極一時。

之選。若皇上以用臣之道而用諸臣。諸臣以臣心之忠而事皇上。將臣平日所稱聖賢道理。祖宗法度。此兩言者。兢兢守之。持而勿失。則固可以端委廟堂。而天下咸理。是臣雖去。猶未去也。何必專任一人。而使天下賢者不得以各效其能乎。且臣尙有老母。年亦七十二歲。素嬰多病。昨有家人到。致臣母意。囑臣早歸。田野之人。不知朝廷禮法。將謂臣父既沒。理必奔喪。屈指終朝。倚闥而望。今若知臣求歸未得。相見無期。鬱鬱懷思。因而致病。則臣之心益有不能自安者矣。皇上方以孝養兩宮。何不推此心以及臣之母乎。夫人之最難遺者。憂思之情也。臣本孱弱之軀。數日之間。上戀君恩。下念父母。欲留既不可。欲去則未能。抱此沉思。寢食俱廢。若使憂能傷人。則臣之身亦有不能自保者矣。皇下誠欲用臣。何不生全之。以責他日之效乎。臣聞獸死不擇音。今臣情勢窘急。無可奈何。踞地號天。誠不自知其詞之過激。而有干於嚴譴也。惟聖慈哀其愚而矜許之。臣無任拭淚拔血懇切仰干之至。

奉聖旨。朕爲天下留卿。豈不軫卿迫切至情。忍相違拒。但今日卿實不可離朕左右。着

司禮監差隨堂官一員。同卿子編修嗣修。馳驛前去營葬卿父。完日卽迎卿母來京侍養。用全孝思。卿宜仰體。朕委曲眷留至意。其勿再辭。該衙門知道。欽此。

### 謝降諭慰留疏

臣三疏陳情。未蒙俞允。今日該司禮監太監何進恭捧御筆諭元輔。朕以冲幼。賴先生爲師。朝夕訥誨。以匡不逮。今再三陳乞守制。於常理固盡。於先帝付託大義。豈不鮮終。况朕學尙未成。志尙未定。一日二日萬幾尙未諳理。若先生一旦遠去。則數年啓沃之功。盡棄之矣。先生何忍。已有旨特差司禮監官同先生子前去。造葬事完。便就迎接先生老母來京侍養。以慰先生孝思。務要勉遵前旨。入閣辦事。豈獨爲朕。實所以爲社稷爲蒼生也。萬望先生仰體聖母與朕惓惓懇留至意。毋勞又有所陳。欽此。念臣以一縷微情。屢瀆天聽。方蹊伏苦由。以待譴誅。乃荷聖慈。曲垂矜宥。旣道其抗違之罪。又申之慰勉之辭。念臣情切送終。特遣樞臣而造葬。知臣心懸歸省。遂將老母以偕來。眷念周



詳。卹存懇至。實曠古所未聞之盛事。皆人臣不當得之殊恩。臣伏地頂天。叩心雪涕。乾坤並育。何獨憐於蟲豸之微。雨露隆施。乃偏潤於根荄之朽。念茲罔極。欲報奚繇。苟可藉手於一酬。寧借闔門之千指。臣無任仰戴天恩。激切哀感之至。

### 乞暫遵諭旨辭俸守制預允歸葬疏

頃者臣三疏陳情。伏奉聖旨。朕爲天下留卿。豈不軫卿迫切至情。忍相違拒。但今日卿實不可離朕左右。着司禮監差隨堂官一員。同卿子編修嗣修。馳驛前去營葬卿父。完日。卽迎卿母來京侍養。用全孝思。卿宜仰體朕委曲眷留至意。其勿再辭。該衙門知道。欽此。又奉聖諭。朕以冲幼。賴先生爲師。朝夕納誨。以匡不逮。今再三陳乞守制。於常理固盡。於先帝付託大義。豈不鮮終。况朕學尙未成。志尙未定。一日二日萬幾尙未諳理。若先生一旦遠去。則數年啓沃之功盡棄之矣。先生何忍。已有旨特差司禮監官同先生子前去造葬事完。便就迎接先生老母來京侍養。以慰先生孝思。務要勉遵前旨入

閣辦事。豈獨爲朕。實所以爲社稷爲蒼生也。萬望先生仰體聖母與朕惓惓懇留至意。毋勞又有所陳。欽此。臣迫於一念微情。蠢愚不能自解。憑恃寵眷。屢瀆宸嚴。不加譴訶。已爲厚幸。乃又仰塵聖心。曲加體卹。施之以禮之所不當得。以伸其追慕之情。資之以力之所不能爲。以遂其懷歸之願。凡可以安臣之志而慰臣之私者。皆親勞聖慮。屈已下逮。爲臣圖之。無論臣心悲感銜結。凡朝士大夫見者聞者。無不惻切歎頌。皆以大義責臣。謂殊恩不可以橫干。君命不可以屢抗。旣以身任國家之重。不宜復顧其私。臣連日枕塊自思。且感且懼。欲再行陳乞。恐重獲罪戾。且大婚期近。先帝之所付託。與國家之大典禮。莫此爲重。乃一旦委而去之。不思效一手一足之力。雖居田里。於心寧安。用是茹忍哀悰。不敢再申前請。謹當恪遵前旨。候七七滿日。不隨朝赴閣辦事。日侍講讀。但乞聖慈俯諒愚哀。容令在官守制。所有應支俸薪。准令盡數辭免。一應祭祀吉禮。俱不敢與。入侍講讀。及在閣辦事。俱容青衣角帶。出歸私第。仍以縗服居喪。凡章奏應具銜者。仍容加守制二字。使執事不廢於公朝。下情得展於私室。臣職子道。庶幾少全。再

惟人子事親。送終爲大。臣父雖蒙特恩。遣官治葬。然窀穸之事。必躬必親。乃可無悔。今卜地營塋。須明年三四月間。乃可竣工。計此時大禮已成。國務稍暇。至期仰懇聖恩。仍容臣乞假一行。送父歸窆。便迎臣母一同來京。臣得了此一念。則自此之後。皆報國之日矣。臣不識進止。敢預乞命旨。以爲他日請行之地。伏惟聖慈矜許。臣不勝感激祈望之至。

奉聖旨。卿爲朕勉出。朕心始慰。這所奏俱准歸葬一節。還候旨行。吏部知道。欽此。

### 謝賜點心甜食疏

今日伏蒙聖母仁聖皇太后特遣司房太監劉彥保到臣私第。頒賜甜食一盒。七品點心一盒。又傳奉慈諭。天氣寒冷。着臣節哀自愛。臣謹叩首祇領。不勝感戴天恩之至。

又

今日伏蒙聖母慈聖皇太后皇上特差答應近侍李忠到臣私第。頒賜上用甜食二盒。

素點心四盒。卷簽麵觔二盒。又傳奉慈諭。天氣寒冷。少要煩惱。臣謹叩頭祇領。不勝感戴天恩之至。

### 乞恢聖度宥愚蒙以全國體疏

比因翰林院編修吳中行等疏言。臣當遵禮回籍守制。至有詆臣爲忘親貪位者。以致上干天怒。俱獲重譴。又蒙特降聖諭。宣示百官。朕承天明命。爲天下君。進退予奪。朕實主之。豈臣下所敢自擅。元輔張居正。受皇考顧命。輔朕幼冲。據忠宣猷。弼成化理。以其身任社稷之重。豈容一日去朕左右。茲朕體其至情。厚加恩卹。凡人子所以榮親送終之典。備極隆異。元輔孝思。已無不盡。亦不在此一行。且綱常人紀。君臣爲大。元輔既受皇考付託。義不得復顧其私。爲朕倚任。義不得愬然自遂。朕爲社稷至計。懇切勉留。羣臣都當助朕留賢。纔是同心爲國。叵奈羣奸小人。藐朕冲年。忌憚元輔忠正。不使己私。乃借綱常之說。肆爲擠排之計。欲使朕孤立於上。得以任意自恣。殊爲悖逆不道。傾危

社稷大傷朕心。茲已薄示處分。用懲奸罔。凡爾大小臣工。宜各明于大義。恪共職業。共成和衷之治。如或黨奸懷邪。欺君無上。必罪不宥。欽哉。故諭。欽此。該禮部刊布到臣。臣傷痛之餘。驚魂未定。忽聞朝廷有此處分。悚神心悸。寢食靡寧。臣聞非常之元。必致感於衆庶。經生之見。每堅守其故常。夫惟聖人在天子之位。乃能執義理之中正。建皇極以導民。固非經生學士之所能窺也。臣雖不肖。鄒魯之教。習聞之矣。束髮修行。至於白首。雖一言一動之微。猶兢兢如執玉捧盈。罔敢失墜。况事關綱常人紀。士君子立身大節。而可苟焉以自越於名教乎。自從初計。以至於今。其叩心泣血。呼號於旻天之下者。不啻三四矣。乃臣也。請之彌哀。而皇上留之愈固。留之而不得。至於親勞萬乘之重。爲臣圖慮私情。特遣心膂之臣。爲臣經理家事。則朝廷之恩。至於不可復加。而臣之苦心。殆顛連而無告矣。夫臣所遇之時何時也。所居之任何任也。所事之君何君也。所受之恩何恩也。皇上舉人子之力不能致者。而悉以畀臣。臣乃不以人臣之所當爲者。而效之於上。是尙得爲人類矣乎。臣於此時。誠道盡途窮。不知所出。故不得已而爲辭。俸守

制之請。又不得已而爲預訂歸葬之請。意欲暫遵諭旨。以慰皇上之心。而預陳惻誠。徐爲乞歸之計。誠萬萬不得已而爲之者也。旣荷聖慈矜允。又許以歸葬一節。候旨而行。臣竊以爲君親二念。庶可曲全而無害矣。乃今議者不達皇上所以懇切留臣之意。又不白臣所以委曲順命之忠。徒見三年之喪。古人所重。奪情之事。治世非宜。舉其經文之說。紛紛瀆擾。遂致上干天怒。雷霆洊驚。杖責編遣。曾不少貸。又特降宣諭。讓諸臣以欺藐君父。忌彈排擠。則旣虧國體。又傷聖心。而臣之微衷。尤有惕然不寧者矣。夫域中三大。君居其一。臣欺其上。罪不容誅。諸臣皆素知章句者。今方責臣以不能盡子道。乃敢先自蹈於不臣之罪乎。况皇上聰明聖智。曠世間出。臣往見大小臣工。一瞻天表。輒欣慶累日。每聞朝廷行一政。出一令。輒舉手吐舌。謂明見萬里。方傾心仰戴之不暇。而敢萌欺藐之念乎。如臣之愚。凡所注措。惟知求利國家。不能取諧流俗。以此致恨。理或有之。若謂欺藐君父。則臣固知其必無也。方今聖明在上。百工濟濟。臣每切慶幸。以爲雍熙太和之美。庶幾復見。今被二三狂童。無端生此一覺。使君父挾見欺之心以臨臣。

而臣下蒙欺上之罪以事主。臣主之間。猜懼互起。情悃隔闕。議論滋多。則安靜和平之福。必不克以終享。此臣所爲深惜也。今言者已詆臣爲不孝矣。斥臣爲貪位矣。訾臣爲禽獸矣。此天下之大辱也。然臣不以爲恥也。夫聖賢之學。有遯世不見是而無悶者。人臣殺其身有益於君則爲之。况區區訾議非毀之間乎。苟有以成臣之志。而行臣之忠。雖被惡名。不難受也。臣之所懼。獨恐因是而益傷皇上之心。大虧國體之重。鑿混沌未萌之竅。爲將來無窮之害耳。今諸臣已被譴斥。臣不敢又救解於事後。爲欺世盜名之事。前已奏稱。遵諭暫出。今亦不敢因人有言。又行請乞。以自背其初心。但連日觸事驚心。憂深慮切。故敢陳其縷縷之愚。伏願皇上恢宏天地之量。洞開日月之明。察兆心仰戴之誠。憫迂儒拘攣之見。卓然自信。盡揮羣疑。今後凡有言者。諒其無知。勿與較計。寧使愚臣受辱。毋致有傷聖心。仍乞鑒臣初請。俟大禮旣成。放臣歸葬。則紛紛之議。不俟禁諭。而羣喙自息矣。臣不勝震懼隕越懇切祈望之至。

奉聖旨。朕爲卿備加恩卹。曲全父子之情。卿爲朕抑情順命。實盡君臣之義。於綱常人

紀。何有一毫虧損。這廝每明係藐朕冲幼。朋興詆毀。欲動搖我君臣。傾危社稷。卿雖曲爲解說。於法決是難容。所奏朕已具悉。卿亦務勉遵諭旨。用成大忠大孝。以終顧託之重。勿以浮言介懷。欽此。

### 謝召見疏

昨該鴻臚寺少卿陳學曾等傳奉聖諭。以臣父喪七七期滿。召臣於初六日吉期入閣辦事。今日又蒙特差文書官孫斌宣臣入見於平臺。臣以比者臣父不幸。仰荷聖恩賜弔賜賻。又遣官治葬。卹典殊常。臣於國家未有尺寸之功。叨此隆恩。感洞心膂。致詞稱謝。伏奉上諭。先生孝情已盡了。朕爲社稷屈留先生。先生只想父皇付託的意思。成全始終。纔是大忠大孝。欽此。臣仰聆玉音。悲感哽塞。伏奉皇上前後諭旨。委曲懇切。臣愚敢不仰體。又昔承先帝執手顧託。誓當以死圖報。今日豈敢背違。但臣賦性愚直。凡事止知一心爲國。不能曲徇人情。以致叢集怨讎。久妨賢路。今日若得早賜放歸。不惟得



盡父子微情。亦可保全晚節。伏蒙上諭。先生精忠爲國的心。天地祖宗知道。聖母與朕心知道。那羣奸小人乘機排擠的。自有祖宗的法度處治他。先生不必介懷。欽此。又蒙諭。今日好日子。先生可就閣辦事。欽此。隨蒙頒賜銀五十兩。綵段四表裏。與酒飯喫。仍命文書官孫斌送臣到閣。臣當於禁門叩謝兩宮聖母恩賚。卽遵旨赴閣辦事。訖。念臣哀苦衷懷。難勝重任。摧殘形狀。有玷清班。揆諸情禮之宜。惟以縱歸爲當。乃蒙聖慈不加厭棄。曲賜慰留。起諸苦塊之中。還畀絲綸之寄。釋其苴杖。假以冠裳。預涓吉旦。以傳宣。特御內臺而接晉。恩光下濟。藹然家人父子之親。顧答頻煩。甯止魚水君臣之契。旣服訓辭之諄切。復蒙殊錫之駢蕃。至於聖念之勲倦。難以名言而頌述。臣於此際。更復何辭。惟當益竭衷丹。矢堅精白。今雖暫援而止。靖共之念。不敢少懈於斯須。儻終得請而歸。銜結之忱。尙欲勉圖於異日。臣下情無任激切感戴之至。

謝內府供給疏

先該臣奏乞辭俸。在京守制。已蒙聖明俞允。茲該內府各衙門傳奉聖旨。元輔張先生。俸薪都辭了。他平素清廉。恐用度不足。着光祿寺每日送酒飯一卓。各該衙門每月送米十石。香油二百斤。茶葉三十斤。鹽一百斤。黃白蠟燭一百枝。柴二十扛。炭三十包。服滿日止。欽此。臣仰荷恩施。愈深惶悚。竊惟頃者辭俸守制之舉。正欲別於居官食祿之臣。得奉俞音。始安微分。今乃叨此大賚。所入更爲加豐。月分內府之儲。日給大官之饌。是所辭者少。而所受者多。旣博虛名。而又獲實利。貪饜已甚。廉節奚存。不穫不耕。益重風人之刺。繼粟繼肉。謬叨賓禮之降。雖聖慈不靳於鴻施。在微臣實盈於鼪腹。將聚族而共食。豈一飯之敢忘。臣下情無任激切感戴之至。

### 謝免自陳疏

頃以星變示警。仰蒙聖明俯納言官所陳。飭舉考察之典。令京堂官皆自陳不職。以聽汰黜。臣雖已辭俸守制。然猶奉旨入閣辦事。日侍講讀。實與事故離任者不同。昨該同

官二臣爲臣題請。伏奉聖旨。元輔本朕再四勉留。又准辭俸守制。着不必自陳。吏部知道。欽此。臣聞三公爲大臣之首。策免宜先。中書乃政本之司。感召爲切。臣才品最下。學術尤疎。居台府已踰十年。總樞機。又且六載。上不能變調元化。佐明主以察璣衡。下不能振舉宏綱。率羣僚而修品式。諸所注措。每見乖違。積此釁愆。殆非朝夕。故元緯示掃除之象。在愚臣實罪戾之尤。謂宜亟賜汰除。庶以少懲瘵曠。豈意聖慈曲垂宏庇。旣道黜幽之典。復寬自劾之章。俾以墨纒。仍參密務。臣謬蒙恩宥。愈切凌競。退自省循。若爲消弭。謹當澡心自勵。克已知非。洗垢刮癢。雖莫追於旣往。拾遺補過。期有救於將來。臣下情無任激切感戴。省悔圖報之至。

請別遣大臣以重大禮疏

今日該文書官送本到閣。見有戶科給事中李涑一本。內稱大婚吉禮。臣有服制。不宜與執事。請乞改命等因。伏奉聖諭。昨李涑說大婚禮不宜命先生供事。這廝却不知出

自聖母面諭。朕說先生盡忠盡不的孝。重其事。纔命上公元輔執事行禮。先生豈敢以臣下私情。違誤朝廷大事。先朝奪情起復的。未聞不朝參居官食祿。今先生都辭了。乃這大禮亦不與可乎。看來今小人包藏禍心的。還有每遇一事。卽借言離間。朕今已鑒明了。本要重處他。因時下喜事將近。姑且記着。從容處他。先生只遵聖明慈命要緊。明日起。暫從吉服。勿得因此輒事陳辭。欽此。臣捧誦恩綸。不勝感激。不勝欽仰。卽宜遵奉。無事瀆辭。但其事之本末。外廷之臣或不及知。而以臣爲有所踰越。以干大禮。臣不得不一言以自明。先該禮部題大婚納采問名。請欽命大臣二員充正副使行禮。該文書官邱得用口傳聖旨。傳示聖母慈諭。這大禮還着元輔一行。以重其事。又說忠孝難以兩盡。先生一向青衣角帶辦事。固是盡孝。但如今吉期已近。先生還宜暫易吉服在閣辦事。以應吉典。出到私宅。任行服制。欽此。昨日又節奉聖諭。朕奉聖母慈諭。賜元輔坐蟒胸背蟒衣各一襲。該文書官邱得用口傳。又口傳聖旨。着于十九日起。俱吉服辦事。欽此。此臣被命充使奉諭從吉之由也。伏念臣前者具奏遵旨暫留。原以大禮期近。圖

効犬馬微勞。以終顧命之重。然亦自知服色不便。不可與執事。辱大典。乃蒙天語諄諄。傳示聖母慈諭。謂先朝舊典。凡大婚納采問名發冊奉迎。皆用班首勳臣。及內閣首臣將命。又委曲諭臣暫易吉服從事。蓋聖母與皇上以腹心手足待臣。實與羣臣不同。故凡國家大事。皆欲臣爲之管領。而臣亦妄信其愚。不敢以羣臣自處。凡可以據忠效勞者。皆不避形迹。不拘常禮。而冒然以承之。且士民之家。其父母有喜慶大事。爲之子孫者。亦不敢以己之私忌。而違父母之使命。况事關君父。而臣又臣子之最親信者乎。然此實非外臣之所能窺。衆人之所可喻也。但聞之古禮。吉凶異道。不得相干。變服從吉。委爲未妥。李涑所奏。其意雖不可知。而其言未嘗不是。伏望聖慈俯從所論。以禮使臣。奏上。聖母容臣仍以初服在閣辦事。凡一應典禮所當行者。謹當夙夜匪懈。悉心措畫。以贊襄嘉禮之成。不敢辭勞。惟是遣命充使一節。懇乞聖慈別遣大臣二員將事。免令臣與庶大典不致於溷辱。而臣之初心。亦得以少安矣。

奉聖旨。卿只遵奉慈命。勿以小人之言自阻。禮部知道。欽此。

## 謝皇太后慈諭疏

欽奉聖母慈聖皇太后慈諭。皇帝大婚禮在邇。我當還本宮。不得如前時常常守着看管。恐皇帝不似前向學勤政。有累聖德。爲此深慮。先生親受先帝付託。有師保之責。比別不同。今特申諭交與先生。務要朝夕納誨。以輔其德。用終先帝付託重義。庶社稷蒼生。永有賴焉。先生其敬承之。故諭外。賜坐蟒衣各一襲。綵緞八表裏。銀二百兩。用示惓惓懇切之意。欽此。該司禮監隨堂太監張鯨。慈寧官管事牌子太監謹柯。恭捧到臣私第。臣謹叩頭祇領。訖。臣捧誦恩綸。悲感交集。追念壬申之夏。先帝不豫。召臣等於御榻前。該司禮監太監馮保宣讀遺囑。以皇上付託。比時臣親聞我聖母在帷中口諭云。江山社稷要緊。先生每務盡忠爲國。臣伏地痛哭。至於失聲。自惟才微力小。不能勝此重任。又念聖齡方幼。睿質未充。臣等外臣。雖欲竭駑駘効犬馬。然燕見之時有限。開導之益蓋寡。九重天遠。高卑迥隔。豈能日侍左右。以調護起居。輔養德性。每念及此。心切

皇皇。仰賴我聖母天篤慈仁。躬親教育。居則同宮。寢則對榻。使非禮之言。不得一聞於耳。邪媒之事。不敢一陳於前。凡面命耳提。諄諄教戒。不曰親近賢輔。則曰聽納忠言。不曰懷保小民。則曰節省浮費。蓋我聖母之於皇上。恩則慈母也。義則嚴師也。至於臣之孤忠直道。屢被險邪。誣詆搖撼。亦惟我聖母深加鑒亮。曲賜保全。故臣得以益堅自信。盡展其愚。自皇上臨御以來。於茲七年。以聖躬則純真未鑿。天然完固。以聖學則精勤靡懈。日就光明。以內則道泰時清。民安物阜。以外則百蠻歸款。九塞塵清。揆厥所由。繫誰之力歟。仰惟我聖母陰功至德。豈獨慰我穆考憑几之託。其二祖列聖在天之靈。實默鑒之。今海內臣民歌誦聖德。推原本始者。亦惟祝願我聖母壽康福祉。等同天地。以保子孫黎民於億萬年也。茲奉誥諭。以慈駕還宮。慮看管之少疎。恐聖德之有累。委臣以師保之責。勉臣以匡弼之忠。寵錫駢蕃。開喻懇切。臣捧讀未竟。涕泗橫流。念臣昔承先帝顧託之重。旣矢以爲國忘家。捐軀殉主矣。其在今日。敢不益摠忠盡。圖報國恩。但內禁外廷。地勢自隔。臣謨母訓。聽納懸殊。自茲以後。尙冀我聖母念祖宗基業之重。天

位保守之難。凡所以擁護聖躬。開導聖學者。尤望時加訓迪。勿替夙恩。臣知皇上純孝性成。必能仰承慈意。服膺罔懈也。至於進盡忠言。弼成聖政。則臣分義所宜自盡者。雖微。慈諭猶當思勉。况奉教督諄諄。敢不罄竭愚衷。對揚休命。臣誠不勝感激祈望之至。奉聖旨。覽卿奏謝聖母。具悉忠愛。知道了。禮部知道。欽此。

### 乞遵守慈諭疏

伏蒙頒示聖母勸慈諭。說與皇帝知道。爾婚禮將成。我當還本宮。凡爾動靜食息。俱不得如前時聞見訓教。爲此憂思。爾一身爲天地神人之主。所係非輕。爾務要萬分涵養。節飲食。慎起居。依從老成人諫勸。不可溺愛衽席。任用匪人。以貽我憂。這個便可以祈天永命。雖虞舜大孝。不過如此。爾敬承之。勿違。欽此。臣等俯而捧讀。仰而嘆曰。大哉我聖母之訓子。龜鑑藥石。不足以喻其明切也。淵哉我聖母之德乎。明德宣仁。不足以爲之比倫也。竊聞父母愛子。必教之以義方。弗納於邪。乃爲真愛。子於父母。必服從其



教訓。不貽父母之憂。乃爲至孝。况我皇上一身。承祖宗基業之重。爲天地時人之主。比之士民之家。其所關係寧止萬倍。故我聖母諄諄教戒。皆發於天性至慈。根於心而不容自己者。蓋惟其愛之也深。故其訓之也切。惟其訓之也切。益見其愛之之深也。至於慎起居節飲食。毋溺衽席。毋用匪人。數語者。尤爲緊切。帝王所以養德養身之要。舉不外此。伏望皇上仰體慈心。服膺明訓。不徒聽從於面命。尤必允蹈於躬行。大婚禮成之後。視朝講學。比前更宜勤敏。至於晏息幸御。尤望萬分保愛。萬分撙節。心存競業。儼如聖母之在前。身服教言。恆若慈音之在耳。則聖壽可等於松喬。聖德可媲於堯舜。宗社億萬年無疆之慶。實在於此。此乃皇上之至孝。所以仰承聖母之真愛者也。臣等不勝  
欽仰祈望之至。

奉御批。聖母慈訓。朕當拳拳服膺。尙賴卿等朝夕納誨。左右匡弼。庶克有成。覽奏。知道了。該衙門知道。欽此。

# 張江陵全集卷七奏疏

## 遼東大捷辭免加恩疏

伏蒙發下遼東巡撫都御史張學顏報捷一本。欽奉聖諭。昨見遼東捷報非常。卽奏聞聖母。蒙面諭朕云。賴天地祖宗默佑。此時正爾行嘉禮之際。有此大捷。乃國家之慶。我心甚喜。元輔運籌廟謨。二輔同心協贊。纔得建此奇功。我勉留張先生。這是明效。朕恭對云。聖母慈諭的是。茲恭述以示先生等知。一應敍錄。宜從優厚。稱朕惓惓。仰體聖母至意。欽此。臣等捧讀恩綸。不勝欣躍。看得遼東一鎮。切鄰虜巢。數年以來。無歲無警。邊民苦於侵探。官軍疲於戰守。邇賴皇上聖明。留神邊備。軫念該鎮將士。比諸邊獨苦。加賑加賞。大霽殊恩。增餉增兵。數破常格。以故將士感奮。咸思樹立。以圖報稱。前擒王杲。斬馘一千有餘。繼戰平虜。獲級二百之上。至於今次建功。尤爲奇特。出邊二百餘里。斬獲四百三十。彼之精銳。咸就殲夷。我之損傷。止於一卒。使東人破膽。頓消窺

伺之謀。西虜驚心。益謹款關之約。誠該鎮百餘年間未有之奇勳也。且當嘉禮肇行之期。慈御移居之日。而捷音凱奏。千里飛傳。文德武功。一朝咸萃。臣等列職丞弼。恭逢盛事。欣慶踴躍。萬倍恆情。然其實上帝申庥。祖宗垂佑。我皇上天威遠震。諸將士戮力用命之所致也。臣等以章句腐儒。竊祿禁近。曾靡尺寸。仰贊廟謨。乃荷宸綸。謬加獎鑒。又恭述聖母惓惓倚眷至意。尤踰尋常。臣等內自省循。誠不知將何爲報也。夫有非常之功者。宜受非常之賞。今該鎮捷報。實爲非常。俟兵部題覆本上。臣等謹遵諭擬賞。悉從優厚。至於臣等則先已奉旨。不得侵冒邊功。臣居正又屢次奏辭。俱荷聖慈。俞允。今次若欲加恩。則萬萬不敢叨承著也。臣等不勝欣忭感切之至。

### 辭上巾恩賞疏

茲者伏蒙聖恩。以今日臣等恭視皇上整容上巾禮成。特賜臣居正銀一百兩。紵絲六表裏。臣調陽。臣四維。每銀八十兩。紵絲四表裏。及講官申時行等。正字馬繼文等。亦各

賚及。臣等被命之餘。愧汗沾背。仰惟天恩寵賚。豈敢抗違。奔走效勞。乃臣子常分。自舉行大禮以來。臣等節被恩施。不一而足。至於今次所賚。尤爲踰常。內自省循。實爲忝竊。卽講讀諸臣。亦每向臣等言。無勞叨賞。於心不安。伏乞聖慈俯鑑愚誠。容臣等將今次思賚辭免。仍送該衙門交收。庶橫恩不至於屢濫。愚心亦得以少安。臣等不勝愧悚懇切之至。

奉聖旨。朕上巾始謂成吉。奉聖母慈命賜賚。卽內監咸與。况輔相豈可獨後。不爲一待視。先生等宜欽承慈眷。并示講讀諸臣勿辭。欽此。

### 再辭遼東大捷加恩疏

伏蒙發下兵部覆遼東禦虜次本敍及臣等。該文書官邱得用口傳聖旨。前有諭先生每逆籌有功。該加恩敍錄。擬旨來行。欽此。天恩下逮。綸旨傳濫。臣等不勝感激。但決機奮勇。執銳披堅。本諸將士之力。卽該鎮督撫官親總戎行者。猶不可與之並論。况臣等

官列禁近。職在論思。仰賴皇上威德遠播。屢殲醜虜。邊境輯寧。臣等因緣遭際。霑被寵榮。已爲萬幸。豈敢又貪冒天功。妄希恩賚。况前已有明旨。不許敘及閣臣之功。臣等又曾屢辭恩命。今若因此復行叨冒。是明旨不信於人。而臣等前次具辭。皆出於矯飾耳。內自省循。事體欠妥。所有恩命。終不敢當。謹將兵部本遵奉前諭。俱從厚擬賞。其加恩臣等一節。必望聖慈俯鑑愚誠。特賜停寢。庶功賞不至於混濫。愚分亦得以少安。臣等抗違寵命。不勝戰慄惶悚之至。

奉聖旨。該鎮大捷。實卿等運籌之功。陞廕非濫。旣懇辭。朕勉從。賜元輔銀一百兩。彩段六表裏。次輔二各八十兩。四表裏。以示褒嘉。該衙門知道。欽此。

### 乞歸葬疏

臣於去年九月二十五日。聞臣父憂。屢疏乞請回籍守制。未蒙俞允。仰荷聖恩。特遣司禮監官爲臣父造葬。降諭慰留。至再至三。臣不得已。奏乞暫遵諭旨。辭俸在京守制。仍

候大婚禮成。再請歸葬。奉聖旨。卿爲朕勉出。朕心始慰。這所奏俱准歸葬一節。還候旨行。吏部知道。欽此。比時臣仰沐恩眷殊常。誠不忍一旦背而遠去。又知聖意堅定。若瀆擾不已。必獲重譴。且大婚期近。臣叨承先帝付託之重。若不於此一効微勞。卽歸伏草莽。心豈能安。故暫留以順上命。預請以訂歸期。誠萬萬不得已而爲之者也。旣荷聖慈。俞允許以候旨而行。則又自幸。烏微情。亦必得遂於今日矣。茲遇皇上嘉禮備成。又值兩宮聖母大慶。臣得以淺陋之識。討論故事。贊成盛典。犬馬圖報之忱。於是少効。乃敢復申前情。今賴聖明在上。中外事體帖然底定。儻蒙天恩垂憫。慨然允臣回籍終制。固爲萬幸矣。若皇上必欲留臣驅使。俾竭其駑駘之力。則願乞數月之假。候尊上聖母徽號禮成之後。星馳回籍。送臣父骨歸土。卽依限前來供職。以畢臣惓惓圖報之忠。臣得了此一念。剖心裂肝。死無所恨。臣干冒天威。不勝戰慄隕越之至。奉聖旨。卿受遺先帝輔朕冲年。殫忠宣勞。勳猷茂著。茲朕嘉禮初成。復奉聖母慈諭。惓惓以朕屬卿。養德保躬。倚毗方切。豈可朝夕離朕左右。况前已遣司禮官營葬。今又何

必親行。宜遵先後諭旨。勉留匡弼。用安朕與聖母之心。乃爲大忠至孝。所請不允。吏部知道。欽此。

### 大婚禮成辭免加恩疏

昨奉聖諭。朕大婚禮成。元輔張先生受先帝付託。殫忠竭力。左右朕躬。啓迪保護。功難名述。宜加殊恩。以表眷酬。二輔同心協贊。勞績茂著。並宜敘錄。擬勅來行。欽此。隨該臣具辭。止爲二臣擬勅加恩。今日該文書官孫斌口傳聖旨。張先生元功恩典當首加。如何通不敘及。着二輔另擬來看。欽此。仰惟皇上嘉禮備成。普天同慶。因而覃敷恩賚。首及閣臣。此明主逮下之仁。錄勞彰勸之典也。臣敢固爲抗違。以虛貺施。但臣於國家受恩較重。皇上待臣旣與諸臣不同。則臣之報禮。亦當與諸臣有異。人之所不能者而臣爲之。人之所可受者而臣辭之。庶於分義少盡耳。若大禮之成。臣不過討論故典。贊成盛事而已。是豈衆人之所不能爲。而降恩殊錫。又豈人臣之所當受者乎。况臣暫留於

此原欲一効微勞。旣已辭俸守制。則與見任有異。若因此冒叨恩典。則昔者願忠之惻。適爲希覲之圖。而外沽守制之名。實冒見任之體。初心旣已自違。事理亦爲欠當。故在諸臣可受。而臣決不可受也。伏望聖慈鑒臣微悃。免令二臣另擬。惟使臣愚志得伸。雖蔬食歿齒。榮幸多矣。臣不勝惶悚祈望之至。

奉勅諭吏部。朕大婚禮成。內閣輔臣。忠勞茂著。宜加特恩。元輔張居正受先帝付託。盡忠輔導。保護啓迪。勳猷獨茂。宜加殊禮。以答元功。但元輔以守制懇辭。暫從其請。候制滿之日。該部奏請加恩。次輔呂調陽加支尙書俸。進兼建極殿大學士。張四維加少保。進兼武英殿大學士。兼官俱照舊。仍各廕一子做巾書舍人。以示酬眷。如勅奉行。欽此。

### 再乞歸葬疏

茲者以臣父歸窆有日。疏乞回籍送葬。奉聖旨。卿受遺先帝。輔朕冲年。殫忠宣勞。勳猷茂著。茲朕嘉禮初成。復奉聖母慈諭。惓惓以朕屬卿。養德保躬。倚毗方切。豈可朝夕離



朕左右。况前已遣司禮官營葬。今又何必親行。宜遵先後諭旨。勉留匡弼。用安朕與聖母之心。乃爲大忠至孝。所請不允。吏部知道。欽此。臣伏誦宸綸。涕泗橫集。念臣雖賦質愚昧。然君臣大義。頗知向方。况昔承先帝顧託之重。茲又奉聖母申命之頒。耿耿孤忠。寧敢自負。但臣今日所祈。非欲長往遠引。忍於背違者也。痛念先臣生臣兄弟三人。愛臣尤篤。自違晨夕。十有九年。一旦訃聞。遂成永訣。生不得侍養焉。歿不得視含焉。每念及此。五內崩裂。一從聞訃。籲天號泣。恨不能朝被命而夕就道也。後屢奉溫諭。慰留諄切。義不敢抗。情不忍離。又念大禮期近。欲因此一効犬馬微勞。故暫留以俟後命。預請以訂歸期。此臣處君臣父子之變。不得已而委曲以求通者也。然抱此隱痛。神往形留。加以孤志不明。橫遭狂訕。內憂外侮。舉集於一身。數月以來。志意衰沮。形容顛頓。惟含慟飲泣。屈指計日。以俟嘉禮之成。冀以俯遂其初願耳。夫盡忠所以成孝。而死者不可復生。臣豈不知今日之歸。無益臣父之死。且重荷殊恩。特遣重臣爲之造葬。送終之禮。已爲極至。臣今雖去。亦復何加。但區區烏鳥私情。唯欲一見父棺。送之歸土。以了此一

念耳。若此念不遂。雖強留於此。而心懷蘊結。形神愈病。必不能專志一慮。以圖國家之事。公義私情。豈不兩失之乎。比得家信。言臣父葬期。擇於四月十六日。如蒙聖慈垂憐。早賜俞允。給臣數月之假。俟尊上兩宮聖母徽號禮成。卽星馳回籍。一視窀穸。因而省問臣母。以慰衰顏。儻荷聖母與皇上洪庇。臣母幸而康健無病。臣卽扶侍回來。臣私念旣遂。志意獲紓。自此以後。當一心一慮。服勤終身。死無所憾。是今雖暫曠於數月。而後乃畢力於終身。皇上亦何惜此數月之假。而不以作臣終身之忠乎。此臣之所以叩心泣血。呼天乞憐。而不能自己者也。若謂臣畏流俗之非議。忘顧託之重任。孤負國恩。欲求解脫。則九廟神靈。鑒臣之罪。必加誅殛。人亦皆不食其餘矣。臣情出迫切。冒瀆宸嚴。自干斧鉞。誠不勝戰慄惶悚之至。

奉聖旨。朕勉留卿。原爲社稷大計。倚毗深至。覽卿此奏。情詞益迫。朕不忍固違。准暫回籍襄事。還寫勅差文武官各一員護送。葬畢。就着前差太監魏朝敦趣上道。奉卿母同來。限五月中旬到京。往回都着馳驛。該省撫按官。仍將在籍起身日期。作速差人奏報。

該衙門知道。欽此。

### 謝假歸葬疏

茲者臣再疏懇給乞假歸葬。奉聖旨。朕勉留卿。原爲社稷大計。倚毗深至。覽卿此奏。情詞益迫。朕不忍固違。准暫回籍襄事。還寫勅差文武官各一員護送。葬畢。就着前差太監魏朝敦趣上道。奉卿母同來。限五月中旬到京。往回都着馳驛。該省撫按官。仍將在籍起身日期。作速差人奏報。該衙門知道。欽此。臣屢疏陳情。萬非得已。瀆擾天聽。方切惶悚。乃蒙聖慈。不加譴訶。特賜俞允。又遣官衛導。預定來期。臣憂苦之悰。一朝頓解。披洟雪涕。忽若更生。不惟臣父有知。啣感於地下。因以昭示天下。使知君父有兩重之恩。忠孝有曲全之道。凡爲人臣者。孰不思委質捐軀。以盡莫逃之分。爲人子者。孰不思竭誠致愼。以伸難解之情。聖朝懿舉。又不獨關係臣一身之進退而已。顧臣昔者急切求歸。祇欲遂烏鳥思親之念。今者違離有日。又不勝犬馬戀主之心。擬候兩宮聖母徽號。

禮成之後。伏乞特賜召見於便殿。一覩天顏。面陳微悃。以少伸瞻戀之忱。臣仰荷隆恩。不勝激切感戴之至。

奉聖旨。覽卿奏謝。朕知道了。待卿行有定日。朕於文華殿召卿面辭。禮部知道。欽此。

### 請簡用閣臣疏

照得閣臣列在禁近。以備顧問。代王言。其職務最爲繁重。必博求賢哲。廣集衆思。乃足以仰贊皇猷。弼成化理。今臣居正以題奉欽依。給假回籍。止臣調陽臣四維二人在閣。誠恐聞見有限。辦理不前。或致誤事。伏乞聖明俯察在廷諸臣。有心術端正才識優長者。特賜簡拔一二人。與臣等同辦閣務。庶共濟有賴。庶事可康。臣等又查得先朝簡用閣臣。多出特旨。間有下部會推者。又查得萬歷三年八月內。該臣等以閣臣員缺。題請簡用。奉聖旨。卿等舉堪任的來看。欽此。隨該臣等推舉詹事府掌府事吏部左侍郎兼翰林院學士張四維等三員。欽蒙御筆點用。臣四維合無今次仍請聖明特簡。或勅下

吏部會推。上請點用。臣等未敢擅便。謹題請旨。  
奉御批。卿等推堪是任的來看。欽此。

### 奉旨薦舉閣臣疏

昨該臣等題爲閣務繁重。懇乞聖明博簡本賢。以廣忠益事。乞增用閣臣協贊機務。請斷自宸衷。特賜簡用。或勅下吏部會官推舉等因。奉御批。卿等推報是任的來看。欽此。欽遵。查得萬歷三年八月內臣等題請簡用閣臣。亦奉御批。卿等舉堪任的來看。欽此。臣等隨舉得詹事府掌府事吏部左侍郎兼翰林院學士張四維。吏部左侍郎兼翰林院侍讀學士馬自強。詹事府少詹事兼翰林院侍讀學士掌院事申時行。三員堪任。奉御批。張四維陞禮部尙書兼東閣大學士。着隨元輔等在內閣辦事。吏部知道。欽此。其馬自強等二員。隨蒙聖明簡擢馬自強陞禮部尙書加太子少保。申時行歷陞吏部右侍郎。仍日侍講讀。是一臣之才品學識。固已簡在聖心矣。今臣等公同評品。堪任是職。

似亦無踰於二臣者。敢仍以二臣推上。伏乞聖明再加審酌於二臣之中。或簡用一員。或並用二員。令其與臣等同辦閣務。深爲便益。再照二臣才品雖同。年資稍異。馬自強任禮部尙書已及三年。近又恭遇大婚嘉禮。頗効勤勞。如用本官。似應量加一品官銜。仍以尙書兼閣學辦事。申時行年資稍淺。如用本官。似應量轉左侍兼閣學辦事。乃爲相應。臣等俱未敢擅便。謹題請旨。

奉聖旨。馬自強以本官加太子太保兼文淵閣大學士。申時行陞吏部左侍郎兼東閣大學士。俱着隨元輔等在內閣辦事。吏部知道。

### 請給勘合疏

茲者臣仰荷聖慈俯容。給假歸葬。違遠有期。不勝瞻戀。念臣謬膺 託。頂戴鴻恩。雖身遠闕庭。而國家之事。有不能一刻暫忘於心者。辭朝 後。或於四方事情有所聞見。或於朝廷政務有所獻替。卽欲不時奏聞。但途路遙遠。未能卽達。伏乞勅下兵部給與勘

合數道。以便差人齎奏。臣不勝惓惓願忠之至。奉聖旨。准給與兵部知道。

### 謝賜勅諭并銀記疏

茲者蒙准給假。辭行有日。仰荷天恩。特降手諭。朕大禮甫成。倚毗先生。方切。豈可一日相離。但先生情詞迫切。不得已。准暫給假。襄事。以盡先生孝情。長途保重。到家少要過勞。以朕爲念。方是大孝。五月中旬。就要先生同母到京。萬勿遲延。致朕懸望。又先生此行。雖非久別。然國事尙宜留心。今賜先生帝賚忠良銀記一顆。若聞朝政有闕。可卽實封奏聞。外奉聖母慈命。賜先生路費銀五百兩。紵絲六表裏。朕賜亦同。先生欽承之。故諭。欽此。并龍箋勅諭一道。帝賚忠良銀記一匣。銀池鎖鑰全。該司禮監太監王臻。恭捧到臣私寓。臣謹叩頭祇領。訖。又該本官口傳聖旨。着臣於十一日。詣文華殿面辭。欽此。念臣頃以微情。上千高聽。仰蒙矜憫。特賜允俞。犬馬之忠。旣少。伸于朝宁。烏鳥之願。兼

追盡於家園。戴此恩私。已難報答。茲復渙頒睿藻。曲軫微悰。愍其在道之勞。令加珍護。憂其憑棺。慟。俾順禮經。溫然家人父子之親。溢於口語文字之外。三薰三復。一涕一言。且鳳綉龍箋。輝煌映日。精鏤彩幣。炫爛充庭。至于圖章篆記之頒。雖先朝間有。若乃取義命詞之重。則往牒希聞。昔傳說之輔商宗。是稱帝賚。若魏徵之對唐帝。曾辯忠良。豈如一介孤蹤。兼備二臣盛美。遭逢若此。稱塞謂何。臣敢不俯仰哀思。仰紓慈念。望歸途之漸渺。瞻魏闕以長懸。天語春溫。時佩推心之愛。星言夙駕。日虔趨命之恭。尙勉圖有謀入告之忠。庶以見在遠不忘之義。臣感戴洪恩。無任瞻戀激切之至。奉聖旨。覽卿奏謝。具見忠愛。朕心嘉慰。卿未行。朕已懸望。宜早襄葬事。星馳赴京。吏部知道。欽此。

### 謝兩宮賜路費疏

今日伏蒙聖母慈聖宣文皇太后。以臣蒙准給假。特賜路費銀五百兩。紵絲四表裏。差



慈慶宮管事太監李用恭捧到臣私寓。臣謹叩頭祇領訖。慈恩下逮。行色增輝。寵錫非常。鏤肌切感。念欲仰酬夫高厚。唯有俯罄其忠丹。一心永肩。九死奚惜。臣不勝激切仰戴感恩思報之至。聖母仁慈懿安皇太后賜路費銀二百兩。紵絲六表裏。謝疏同。奉聖旨。覽卿奏謝。聖母知道了。禮部知道。欽此。

### 召辭紀事

先是有旨。令臣以十一日詣文華殿面辭。是日上御文華殿西室。召臣入。致辭云。臣仰荷天恩。准假歸葬。又特降手諭。賜路費銀兩表裏及銀記一顆。臣仰戴恩眷非常。捐軀難報。上云。先生近前來些。臣至御座前。上諭云。聖母與朕意。原不肯放先生回。只因先生情詞懇切。恐致傷懷。特此允行。先生到家事畢。卽望速來。國家事重。先生去了。朕何所倚託。臣叩頭謝。因奏言臣之此行。萬非得已。然臣身雖暫違。犬馬之心。實無時刻不在皇上下左右。伏望皇上保愛聖躬。今大婚之後。起居食息。尤宜謹慎。這一件是第一緊

要事。臣爲此日夜放心不下。伏望聖明萬分擢節保愛。又數年以來。事無大小。皇上悉以委之於臣。不復勞心。今後皇上却須自家留心。莫說臣數月之別。未必便有差誤。古語說。一日二日萬幾。一事不謹。或貽四海之憂。自今各衙門章奏。望皇上一一省覽。親自裁決。有關係者。召內閣諸臣與之商確停當而行。上說。先生忠愛。朕知道了。又奏臣屢荷聖母恩慈。以服色不便。不敢到宮門前叩謝。伏望皇上爲臣轉奏。上又說。知道了。長途保重。到家勿過哀。臣仰荷聖慈憫念。不勝感戀。伏地哭泣。不能致謝。上云。先生少要悲痛。然天語未畢。亦哽咽流涕。臣叩頭而退。上謂左右云。我有好些話。要與先生說。見他悲傷。我亦哽咽說不得了。隨着人奏知聖母。聖母亦感痛。差管事牌子李旺賜銀八寶六十兩。途中賞人。又口傳慈諭。先生旣舍不得皇帝。到家事畢。早早就來。不要待人催取。欽此。

## 謝召見面辭疏

今日伏蒙召臣於文華殿西室面辭。仰荷天語。慰諭諄諄。臣犬馬之情。不勝依戀。涕泗橫集。言不能宣。仰見聖慈垂憫。亦爲臣哽咽。隨蒙特遣文書官太監孫斌暖殿牌子李忠賜臣食品八盒。又蒙聖母差慈寧宮牌子李旺賜臣銀八寶豆葉六十兩。爲途中犒賞之需。又口傳慈諭。臣行之後。皇上無所倚託。到家事畢。卽宜早來。不必候人催取。臣謹俱叩頭祇領。訖。臣數年供奉。一旦違離。悵望天顏。心焉如割。歸家竣事。卽當仰遵慈賜。星夜前來。用畢。臣惓惓圖報之忠。不敢遲擯。以負重託。臣不勝感戴瞻戀之至。奉聖旨。覽卿奏謝。聖母知道了。禮部知道。

### 謝遣官郊餞疏

茲臣蒙准給假。先于十一日詣文華殿面辭。今日出城就道。伏蒙聖恩特遣司禮監太監張宏餞送于郊外。又賜臣甜食二盒。乾點心二盒。臣謹望闕叩頭祇領。卽時啓行去訖。重臣啣命。寵賜賓筵。尙食分珍。光生祖道。仰聖情之繾綣。荷帝賚之駢蕃。往昔所希。

冒叻愈深。徂途日遠。躬跋涉以星言。魏闕天高。望雲霄而雨涕。臣無任感戴瞻戀之至。奉聖旨。覽卿奏謝。朕知道了。禮部知道。

### 歸葬事畢謝恩疏

臣前乞恩給假。荷蒙俞允。於三月十三日辭行。一路感恩含痛。倍道遄征。至四月初四日抵家。拜臣父柩。一慟幾絕。孀母見臣歸來。猶訝夢中相見。臣因備誦聖母皇上慈恩。特許歸葬本末。母子相抱痛哭失聲。當是時。鄉老親戚故舊。環列柩前。靡不嘯唏感歎。仰頌恩遇者。乃以四月十六日。率子弟族人扶臣父柩。歸窆於勅賜太暉山之原。其日欽遣營葬。司禮監太監魏朝。工部主事徐應聘。諭祭禮部主事曹誥。護送臣回。尙寶司少卿鄭欽。錦衣衛指揮僉事史繼書。先任湖廣巡撫都御史今陞刑部右侍郎陳瑞。撫治鄭襄等處都御史徐學謨。及地方司道等官。畢來會葬。謹已安厝成禮。訖。臣於臣父菽水之養。雖有曠于生前。窀穸之禮。幸少盡於歿後。宿心獲遂。冥骨用安。斯實仰荷我

皇上至仁徧覆。大孝弘敷。故臣得以少釋終天之恨。曲全烏鳥之情。臣闔門百口。仰戴隆恩。無可報答。惟有竭誠盡力。爲臣死忠。爲子死孝。庶以少酬洪造之萬一耳。臣聞天雖高而聽則卑。人有求而願必遂。前者中外臣工。見聖母慈諭倚託之重。皇上溫旨勉留之懇。以爲臣之所請。必不得遂矣。豈意聖慈曲軫。幡然允俞。俾臣宿願獲伸。前言終踐。于以見皇上愛臣之篤。不強其心之所弗安。于以見微臣獲上之深。得行其道之所當盡。皆有出於羣情意料之外者。誠聖朝希曠之恩。教孝作忠之典也。臣不勝銘心鏤骨感激銜戴之至。奉聖旨。覽卿奏謝。朕知道了。禮部知道。

請寬限疏

臣於三月十三日蒙恩准辭行。至四月初四日抵家。十六日葬臣父訖。除另具奏謝恩外。先該臣奏乞給假葬父省母。伏奉聖旨。朕勉留卿原爲社稷大計。倚毗深至。覽卿

此奏情詞益迫。朕不忍固違。准暫回籍襄事。還寫勅差文武官各一員護送。葬畢。就着前差太監魏朝敦趣上道。奉卿母同來。限五月中旬到京。往迴都着馳驛。該省撫按官仍將在籍起身日期。作速差人奏報。該衙門知道。欽此。今葬事已竣。卽宜遵奉前旨。同臣母星馳赴闕。圖報國恩。臣母今年七十有三。一向多疲。去年痛臣父歿。舊疾轉增。今年正月間。伏枕數日。飲食頓減。此司禮監太監魏朝所親見。比因臣歸。母子相見。乃復易悲爲歡。眠食復舊。然氣體終是羸弱。不勝勞苦。臣因誦聖母慈諭皇上恩旨。欲令同臣赴京。臣母頂載鴻恩。卽當力疾就道。奈今天氣漸暑。道路阻修。高年多病之軀。豈能跋涉二千里之遠。爲此進退躊躇。誠難自強。臣欲欽遵嚴限。獨身前來。又恐有違將母同行之旨。不得已再瀝悃誠。仰干天聽。惟祈聖慈俯賜寬限。容臣暫停至八九月間。天氣涼爽。扶侍臣母一同赴京。其先差司禮監太監魏朝原以葬臣之父。取臣之母。今臣父旣葬。臣母未行。久稽使命。臣心不安。合無俯容先回復命。免令敦促。俾臣得扶侍老母從容赴闕。是今雖暫違數月之限。而私願旣遂。母身獲寧。內顧無虞。志專報主。

自茲以往。捐軀碎首。第無所憾矣。臣怙恃恩慈。屢行煩瀆。不勝惶悚。隕越之至。奉聖旨。朕日夜望卿至。如何却請寬限。着留先差太監魏朝。待秋涼伴送卿母北來。卿宜作速上道。務於五月終到京。以慰朕懷。方是大忠大孝。便寫勅差錦衣衛堂上官一員。星夜前去催來。勿再遲延。該衙門知道。欽此。

### 奉諭擬遼東賞功疏

臣於三月十三日蒙恩准假回籍。至四月初四日抵家。方經營臣父葬事。忽於本月十一日該兵部差官齋奉聖諭內閣。昨見遼東塘報大捷。比前次更多。朕心深喜。今早奏聞聖母歡悅殊甚。朕以冲年踐祚。恆念德不足格天。威不能懾虜。夙夜惕勵。而邊臣奮勇。屢立非常奇功。誠知聖母前諭。賴天地祖宗默佑。乃國家之慶。元輔平日加意運籌。卿等同心協贊之所致也。部疏上時。卿等一錄。封此諭內。着兵部馬上差人星夜前去與張先生看。將一應敍錄。比前再加優厚。用示朕惓惓獎酬之意。欽此。又該同官大學

士呂調陽等錄示閣中題稿。并該鎮塘報。傳奉聖意。欲臣議擬處分等因。臣在哀苦之中。忽聞該鎮有此奇捷。輒復轉戚爲欣。抃淚稱慶。又惟慶賞予奪。雖朝廷大政。然以我皇上之明聖。俟該部題覆。閣臣票擬之日。皇上秉離照以裁之。出乾斷以處之。自將應機立解。遊刃有餘。乃不遠數千里而詢及於臣。且俯念微勞。冲然讓美。誠聖不自聖。謙而又謙之心也。臣又曷勝欽仰。曷勝感激。竊照遼東一鎮。歲苦虜患。邇賴聖明加意鼓舞。屢奏膚功。乃今以裨將偏帥。出邊迻剿。斬馘至四百七十餘級。而我軍並無損失。功爲尤奇。况當嘉禮美成之會。兩月之間。捷報踵至。而今次所獲比前更多。此誠昊穹純祐。宗社垂庥。我皇上聖武布昭之所致也。所據該鎮文武諸臣。協心用命。功委可嘉。聖諭欲加厚賞。誠不爲過。雖其中有投降一節。臣未見該鎮覆勘詳悉。第據塘報所稱。如總兵李成梁素稱忠勇。屢立奇勳。前次劈山之捷。該部議加封爵。臣欲留此殊典。以待後功。故未敢擬。今次大捷。伊雖未嘗親歷戰陣。而號令調度。實由主將。論功行賞。仍宜首敘。似應量加流爵。以勸功能。副總兵陶承譽奪勇當先。決機取勝。副使翟繡裳守備



預嚴督察加慎。俱宜重加陞級。仍行厚賞。總督梁夢龍巡撫周詠履任雖俱未久。威令亦已大行。宜加陞俸級。或量與廕敘。本兵調度有功。尙書方逢時宜加陞敘。侍郎曾省吾部光先宜加俸級。或特與服色。其餘將士及文武臣工與有勞者。或陞或賞。該部議覆。自有舊例。臣不能一一敘擬。惟頒賞一節。本出特恩。今次似在可已。伏乞聖裁。再照近年各邊獲功。屢蒙聖恩敘及閣臣。欲加陞廕。臣自以職在論思。不敢攘奪將士之功。具疏辭免。不啻四五。俱荷聖明俞允。但同官諸臣。所處原自不同。乃以臣之故。竟未得一霑恩命。臣心恆以爲歉。今臣既不在任。而諸臣協贊廟略。發蹤指示。功自有歸。伏乞聖慈弘敷大賚。將大學士呂調陽張四維特加武廕。馬自强申時行量加文廕。以酬其勞。至於臣者。寵榮已極。涯分久踰。茲荷宸綸追獎。已逾華袞之袞。決不敢復有叨冒。以取覆餗。尤也。臣愚昧無知。誤蒙聖明俯詢。敢略陳其概。統俟聖明裁奪施行。

奉諭還朝疏

先該臣以父葬畢卽宜遵旨將母赴闕。緣臣母老。暑天不能遠涉。疏乞寬限。奉聖旨。朕日夜望卿至。如何却請寬限。着留先差太監魏朝。待秋涼伴送卿母北來。卿宜作速上道。務於五月終到京。以慰朕懷。方是大忠大孝。便寫勅差錦衣衛堂上官一員。星夜前去催來。勿再遲延。該衙門知道。欽此。本月十六日蒙差錦衣衛指揮僉事瞿汝敬齋奉勅諭一道到臣原籍。該地方官迎接至臣私第。開讀皇帝勅諭。少師兼太子太師吏部尙書中極殿大學士張居正。卿前奏請給假爲父封少師兼太子太師吏部尙書中極殿大學士張文明營葬。朕念卿孝心懇切。不忍固違。暫准回籍襄事。限五月中旬回京。實非得已。自卿行後。朕惓惓注念。朝夕計日待旋。茲覽來奏。復請寬假。欲待秋涼奉母同來。殊乖朕望。茲特命錦衣衛指揮僉事瞿汝敬馳驛星夜前去。守催起程。卿母旣高年畏熟。着先差太監魏朝留待秋涼伴送來京。卿可卽日兼程就道。務于五月末旬回閣辦事。用副先帝委託之重。以慰朕夙夜倚毗。延佇至意。欽哉。故諭。欽此。又特奉宸諭。諭元輔張先生。自先生辭行之後。朕心日夜懸念。朝廷大政。俱暫停以待。今葬事旣完。

卽宜遵旨早來。如何又欲寬限。茲特遣錦衣衛堂上官齎勅催取。勅到卽促裝就道。以慰惓惓。先生老母畏熱難行。還着太監魏朝將先生父墳未盡事宜。再行經理。便候秋涼護送先生老母同來。先生宜思皇考付託之重。聖母與朕眷倚之切。早來輔佐。以成太平之治。萬勿耽延。有孤懸望。先生其欽承之。欽此。臣謹焚香望闕叩頭祇領訖。天使臨門。雲緘咨札。聖心懸切。眷命重申。臣旣迫大義之難違。又念殊恩之未報。雖有私曲。違復爲圖。謹欽遵諭旨。留臣母託之司禮監太監魏朝。候秋涼徐行。臣已於本月二十一日更服墨縗。皇馳就道。伏念臣違遠闕庭。已踰兩月。今恨不能一蹴便至。仰覲天顏。但臣原籍去京師幾三千里。加以道途霖潦。每至連遭。哀毀餘生。難勝勞頓。今計五月終旬之限。已屬稽違。私心惶惶。不遑寧處。除候到京之日。伏藁待譴外。謹先奏知。以仰慰聖母。皇上懸念。尤冀聖慈曲垂矜憫。特寬斧鉞。少假便宜。俾孱弱之軀。獲免困仆。裂肝碎首。死不敢辭。臣無任惶悚瀆越之至。

奉聖旨。覽奏知卿已在途。朕心慰悅。炎天遠道。宜慎加調攝。用副眷懷。便從容些行不

妨。吏部知道。

### 謝遣官郊迎疏

臣於五月二十一日被召還朝。早夜疾趨。以六月十五日未刻到京城外。仰荷天恩。特遣司禮監太監何進賜宴於真空寺。該何進口傳天語。慰勞勲倦。又傳奉聖旨。若午時分進城。便着張先生在朝房稍候。朕卽召見於平臺。若未時分進城。着先生逕到宅安歇。次日早免朝召見。欽此。念臣昔者奔歸。已沐賓穆之遺餞。今茲趨命。又膺重使以勞迎。湛露重濡。需雲偏覆。光生俎豆。寵極章縫。顧以草野微賤之臣。辱此聖朝殊絕之典。捫心自懼。粉骨難酬。除今日遵奉恩諭於朝房齋戒沐浴。次早恭詣文華殿朝見外。臣不勝仰戴鴻恩。激切感奮之至。

奉聖旨。卿冒暑疾馳。忠勤茂著。朕心嘉悅。特遣使郊勞。用示眷酬。覽奏謝。知道了。禮部知道。欽此。

### 謝兩宮遣使郊勞疏

臣於五月二十一日被召還朝。早夜疾趨。以六月十五日到京。仰荷聖母慈聖宣文皇太后特遣慈甯宮管事太監李琦於城外真空寺口傳慈諭。慰勞勲倦。又特賜銀八寶二十兩。金錢川扇十柄。隨又遣管事太監李用頒賜上用乾點心二盒。熟餠四盒。果餅二盒。鮮果二盒。清酒一罈。臣謹俱叩頭祇領。伏念臣受國厚恩。矢當捐軀以報。聞君召命。豈敢俟駕而行。起居不遑。分義宜爾。乃荷慈恩曲軫。寵命重申。諄諄慰勞之辭。奔珍奇之貺。願以凡庸。沐此優眷。鏤肌切感。隕首奚辭。臣不勝感奮激切之至。仁聖懿安皇太后同。

奉聖旨。覽卿奏謝。聖母知道了。禮部知道。欽此。

### 謝召見疏

臣於本月十五日趨召到京。十六日仰承恩諭。賜見於文華殿西室。該臣以前者蒙恩准假葬父事竣。臣母老未能同行。又蒙聖恩特留司禮監太監魏朝。候秋涼伴行。臣一門存歿。仰戴天恩。不勝感切。叩頭稱謝。伏承天語。先生此行。忠孝兩全了。臣因奏臣一念烏鳥私情。若非聖慈曲體。何由得遂。感恩圖報之忱。言不能宣。惟有刻之肺腑而已。蒙諭云。暑天長路。先生遠來辛苦。臣叩頭謝。因請違限之罪。蒙諭云。朕見先生來甚喜。兩宮聖母亦喜。臣奏臣違遠闕庭。倏忽三月。然犬馬之心。未嘗一日不在皇上左右。不圖今日重覩天顏。又聞聖母慈躬萬福。臣不勝慶忭。蒙諭云。先生忠愛。朕知道了。又問云。先生沿途見稼穡何如。臣因備述往來經過畿輔河南地方。今春二麥全收。秋禾茂盛。實豐登之慶。又問黎民安否。臣奏各處撫按有司官來見。臣必仰誦皇上奉天保民至意。諄諄告戒。令其加意愛養百姓。凡事務實。勿事虛文。臣見各官兢兢奉法。委與先年不同。以是黎民感德。皆安生樂業。實有太平之象。又問今邊事何如。臣因奏昨在途中。見山西及陝西三邊督撫總兵官。俱有密報。說虜酋俺答西行。爲挨落達子所敗。損

傷甚多。俺答僅以身免。此事雖未否虛實。然以臣策之。虜酋真有取敗之道。夫夷狄相攻。中國之利。此皆皇上威德遠播。故邊境又安。四夷賓服。因叩頭稱賀。蒙諭云。此先生輔佐之功。臣又奏虜酋若果喪敗。其運從此當日衰矣。但在我不幸其敗而輕之。蓋聖王之制夷狄。惟論順逆。不論強弱。若其順也。彼勢雖弱。亦必撫之以恩。若其逆也。彼勢雖強。亦必震之以武。今後仍望皇上擴并包之量。廣覆育之仁。戒諭邊臣。益加恩義。彼既敗於西。將依中國以爲固。又恐乘其敝而圖之。若我撫之不改初意。則彼之感德益深。永爲藩籬。不敢背叛。此數十年之利也。仰見天顏喜甚。再三首肯云。先生說的是。又蒙諭。先生沿途辛苦。今日見後。且在家休息十日。了進閣。臣草芥微軀。仰荷聖慈垂念。叩頭稱謝。隨又蒙恩賜銀一百兩。紵絲六表裏。新鈔三千貫。羊二隻。酒二瓶。茶飯一卓。燒割一分。臣謹叩頭稱謝。又蒙遣司禮監太監張宏引至慈慶慈寧朝謁兩宮聖母。謝恩而出。竊念臣往據懇悃。仰冒恩私。得暫解於繁機。幸克寡乎大事。遠荷聖情之懸注。特塵勅使之敦催。爰望闕以遵途。遂脂牽而戒兩。顧星馳風駕。雖啓處之不遑。奈水

遠山長。恨奮飛之莫逮。致稽程限。已踰旬朝。自知不免於嚴訶。敢望獲從乎寬政。乃蒙我皇上洪慈宥假。優眷駢蕃。盤珍特出於尙方。迎勞更煩乎中責。禁扉宵啓。促文席以清言。天語春溫。霽宸嚴而俯慰。憂民艱而軫邊事。曲賜咨詢。修內治而計外攘。謬承鑒獎。禮隆晝日。侈三接以爲榮。澤溥雲天。擬百朋而非重。戴恩罔極。圖報奚由。惟誓捐狗馬之餘生。庶少答乾坤之大造。臣誠不勝踴躍欣慶。激切感戴之至。

奉聖旨。朕昨見卿喜甚。又聞歲豐民安。邊境寧謐。益用欣慰。覽奏謝。知道了。該部知道。欽此。



張江陵全集 卷七

# 張江陵全集卷八奏疏

## 乞鑒別忠邪以定國是疏

臣于本月十五日趨召到京。晚閱邸報。見戶部浙江司員外郎王用汲一本。爲乞察總憲大臣欺罔。以重正氣。以彰國是事。奉旨切責。革職爲民。臣不知所言何事。其時方急于赴命。企覩天顏。一切時事俱未暇諗問。次日朝見畢。會同官三。臣始知用汲以都察院左都御史陳炯參論湖廣巡按御史趙應元託病乞休。謂其有所阿附等情。妄行誣詆。然尙未見其全疏也。日來少暇。取其全抄讀之。始知用汲之言。陽爲論炯。實際以攻臣也。儉邪小人。已蒙聖斷處治。臣似可置之無論。但其所言有朝廷政體所關。天下治亂所係者。臣若隱忍不言。將使忠邪混淆。是非倒植。卒致國是不定。政本動搖。非細故也。劉向有言。讒邪之臣。將同心以害正臣。正臣進者。治之表也。邪臣進者。亂之機也。方今天下當五陽之會。處極辨之朝。一陰潛萌。其兆已見。羣邪害正。積慮自深。臣有社稷

之寄。心切憂之。故不容已于言也。臣請先析其疏中所借口者二事。而後發其機筭所在。惟聖明鑒察。臣看得用汲疏中。謂臣前葬父事畢。謝恩疏無御史趙應元名。謂臣有所憾于應元。而炆阿附臣意。遂因其稱病而糾之。此大誣也。臣前回籍數日。卽扶先人柩歸窆。此時都御史陳瑞以陞任赴京。道經臣里。其餘各官皆奉差有事。及本地方住劄者。適會臣父葬期。遂弔祭于邱隴。其時應元差滿。正與新任巡按御史郭思極交代于襄陽。相去數百里。勢自難及。彼向嘗有所失禮于臣。而臣憾之耶。夫弔喪送殯。人道之常。不但臣無所憾于應元。卽應元亦未嘗有持秉風裁。不爲私交之意。但偶不與耳。彼亦何所畏避。而遂以病乞休耶。若其稱病之有無虛詐。及憲職之果否修舉。在炆爲堂官。訪之必真。臣不知也。前者屢奉明旨。御史託病偷安。及差滿回道。俱着都察院着實糾劾考察。然掌院之臣。竟未聞有執法奉行者。今獨炆有此舉耳。而遂爲人所誣指脅制。則後之居是任者。必將以炆爲戒。寧背違明旨。而不敢結怨。臺臣相與務爲扶同欺蔽。以致紀綱陵替而不可收拾。豈朝廷所以屬任臺臣振揚風紀之意耶。又謂舊歲

之星變。考察其所懲抑者。半爲不附宰臣之人。此又大誣也。臣按舊規。每遇京官考察時。吏部都察院預行各衙門堂上官開列應黜官員事跡。送部院會同考察。比時兵部尙書方逢時奉命帶管吏部事。一日持各衙門所開。及本部司屬所訪姓名事跡告臣。言據所開則應黜者衆。奈何。臣卽語之曰。人才難得。况此乃非時考察。事起倉卒。恐一時廉訪未真。或有虧枉。但取其罪狀顯著。人所共知者。量行黜降足矣。故比時考察人數。比之往年獨少。臣何嘗屬意部院私黜一人。今逢時見在。皇上試一問之可知也。今日某某被黜。以某某故。則各衙門堂官所開部官所訪者。豈盡皆臣指使之耶。卽如禮部主事張程。乃今大學士馬自强原任禮部尙書時所首開者。豈自强亦阿附臣意而黜之耶。又如禮部郎中竟禮。乃臣子業師。亦在開中。臣亦不敢以私庇之。竟從降調。况其餘乎。今自强見在。皇上試一問之可知也。夫人之善惡。各以其類。兔狐死悲。情勢自然。若被死者一一求其所以得罪之故。捕風捉影。捏造流言。所擣齧當事之人。則將來司考察之柄者。將緘口斂臂而不敢輕動一人。祖宗考察公典幾于廢矣。又豈朝廷所

以屬任銓衡。振刷吏治之意耶。然此二端。皆借言也。至末後一段。謂皇上當獨攬乾綱。不宜委政于衆所阿附之元輔。此則其微意所在。乃陷臣之機筭也。唐貞觀時。有勸太宗攬權。不宜委政房元齡等者。太宗曰。此欲離間我君臣也。立命徙之。今用汲之意。實類于此。然此可以惑庸闇之君。不可以欺明哲之主也。夫自古惟明王聖主。乃能擇賢而屬任之。非庸君闇主所能也。三五之隆。不可殫舉。成湯聖君也。其于伊尹。乃學焉而後臣之。高宗良主也。拔傳說于胥靡。一旦命總百官而屬之。曰。汝爲舟楫。汝爲霖雨。其倚任之重如此。然成湯高宗。不以其故貶王。而功業之隆。照耀史冊。垂憲千古。蓋八柱高承。而天位始定。四時成歲。而大造乃成。明主勞于求賢。而逸于得人。故信任賢臣者。正所謂攬權也。豈必若秦始皇之衡石程書。剛愎自用。隋文帝之猜忌似察。讒害忠良。而後謂之有權耶。若夫庸君闇主。則明不足以知賢。而信不足以使下。雖奉之以太阿之柄。彼亦不能持也。以皇上之明聖。用汲乃不以成湯高宗之所以任其臣者。而導之爲秦皇隋帝。不亦謬哉。夫國之安危。在于所任。今但當論輔臣之賢不賢耳。使以臣

爲不賢耶。則當亟賜罷黜。別求賢者而任之。如以臣爲賢也。皇上以一身居于九重之上。視聽翼爲。不能獨運。不委之于臣而誰委耶。先帝臨終。親執臣手。以皇上見託。今日之事。臣不以天下之重自任而誰任耶。羈旅微賤之臣。一旦處百僚之上。據鼎鉉之任。若不得明主親信委用。又何以能肩鉅負重而得有所展布耶。况今各衙門章奏。無一不經聖覽而後發票。及臣等票擬上進。亦無一不請聖裁而後發行。間有特出宸斷。出于臣等智慮所不及者。今謂皇上謾不經意。一切委之于臣。何其敢于厚誣皇上耶。臣自受事以來。殫赤心以盡忠王室者。神明知之矣。賴我皇上神聖。臣得以少佐下風。數年之間。紀綱振舉。百司奉職。海內之治。庶幾大康。此市人田父所共歌頌而欣慶者也。今乃曰人人盡私。事事盡私。又何顛倒是非一至此耶。然用汲之言如此也。而意不在此也。其言出于用汲也。而謀不止于用汲也。緣臣賦性愚戇。不能委曲徇人。凡所措畫。惟施一概之平。法所當加。親故不宥。才有可用。疎遠不遺。又務綜覈名實。搜剔隱姦。推轂善良。摧抑浮競。以是大不便於小人。而傾危躁進之士。遊談失志之徒。又從而鼓煽。

其間相與從憑。攬喉冒險。鈞奇以覲幸於後。日爲攫取富貴之計。蓄意積慮。有間輒發。故向者劉臺爲專擅之論。今者用汲造阿附之言。夫專擅阿附者。人主之所深疑也。日浸月潤。鑠金銷骨。小則使臣冒大嫌而不自安。大則使臣中奇禍而不自保。明主左右。旣無親信重臣。孤立于上。然後呼朋引類。藉勢乘權。恣其所欲爲。紛更變亂。不至於傾覆國家不已。此孔子所以惡利口。大舜所以疾讒說也。臣日夜念之。憂心悄悄。故敢不避煩瀆。一控茲聖明之前。遂以明告於天下之人。臣是顧命大臣。義當以死報國。雖赴蹈湯火。皆所不避。况于毀譽得喪之間。皇上不用臣則已。必欲用臣。臣必不能枉己以徇人。必不能違道以干譽。臺省紀綱。必欲振肅。朝廷法令。必欲奉奉。姦宄之人。必不敢姑息以撓三尺之公。險躁之士。必不敢引進。以壞國家之事。如有捏造浮言。欲以熒惑上聽。紊亂朝政者。必舉祖宗之法。請於皇上。而明正其罪。此臣之所以報先帝。而忠於皇上之職分也。尤望皇上大奮乾斷。益普離明。大臣之中。有執法奉公如陳爌者。悉與主持裁斷。俾得以各守其職業。而無所畏忌。則國是不移。而治安永保矣。臣誠不勝懷

忠奮義憤發激切之至。

奉聖旨。朕踐祚之初。方在沖幼。賴卿受遺先帝。盡忠輔佐。以至於今。紀綱振肅。中外又寧。此實宗靈所共昭鑒。惟是姦邪小人。不得遂其徇私自使之計。假公伺隙。肆爲讒譖者。累累有之。覽奏。忠義奮激。朕心深切感動。今後如再有訛言譸張。撓亂國是的。朕必遵祖宗法度。置之重典不宥。卿其勿替初心。始終輔朕。俾臻於盛治。用副虛己倚毗至懷。吏部知道。

### 奉旨迎母就養謝遣官郊勞疏

臣母誥封一品夫人趙氏。伏蒙欽差司禮監太監魏朝伴護來京就養到京。又蒙聖恩特命司禮監太監李佑賜勞於郊外。隨送至臣私寓。臣扶侍臣母。焚香望闕叩頭安家。訖。伏念臣嚴親見背。已遭風木之悲。母氏幸存。亦逼桑榆之景。每欲就帝都而侍養。庶幾竊天祿以延齡。抱此縷情。憚於輻瀆。詎意區區之悃。上軫宸衷。蒼蒼之高。俯從人願。



曩荷恩綸之存注。特塵勅使以將迎。賜勞郊關。送歸里第。望慈容而動喜。旣以紓瞻雲陟屺之懷。奏甘臙以承歡。寧復憶饌鯉飲江之樂。候起居於八座。欣團聚於一家。昔李令伯之陳情。未登臙仕。在潘安仁之奉母。徒賦閒居。方之今日所遭。詎可同年而語。茲蓋恭遇我皇上孝隆錫類。愛立因親。推孝養兩宮之心。爲鞠育兆人之惠。故烏鳥獲伸其私願。螻蟻亦賴以曲成。臣不自知宿世於國家有何緣分。今生一草芥。冒此寵榮。仰而戴天。俯焉省己。方寸旣定。何牽繫之爲憂。七尺雖微。矢捐糜而罔惜。臣誠無任激切感戴銘心圖報之至。

奉聖旨。卿母已至京。朕心甚悅。覽奏謝知道了。聖母卽欲召卿母入見。今旣稱高年。遠來勞頓。且容就養。禮部知道。欽此。

### 謝兩宮聖母疏

臣母誥封一品夫人趙氏。伏蒙聖恩。差司禮監太監魏朝伴送來京。就養到京。仰荷聖

母慈聖宣文皇太后特遣慈寧宮管事太監李用賜勞於郊外。隨送至臣私第。臣卽扶母焚香望闕叩頭謝恩安家訖。臣母仰沐慈恩。至隆極渥。卽當匍匐入內。仰叩慈尊。以少伸頂戴之誠。奈臣母年高多病。加以長途跋涉。步履益艱。雖勉強扶行。恐不能成禮。謹令臣恭詣會極門叩頭代謝。臣誠不勝感切悚懼之至。聖母仁聖懿安皇太后同。俱奉聖旨。覽卿奏謝。聖母知道了。禮部知道。

### 謝賜母首飾等物疏

臣母伏蒙欽取來京就養。今日仰荷聖恩。差司禮監太監張鯨齋賜臣母金纍絲鑲嵌青紅寶石珍珠長春花頭面一副。銀八寶豆葉一百兩。紅紵絲蟒衣一疋。青紵絲蟒衣一疋。紅羅蟒衣一疋。青羅蟒衣一疋。裏絹四疋。甜食二盒。又蒙兩宮聖母俱有首飾八寶龍衣珍食之賜。臣謹於私寓扶持。臣母焚香望闕叩頭祇領訖。潘輿將母。方承愛日之歡。漢闕地恩。忽拜自天之貺。賁榮光於荆布。藉景色於桑榆。寶鬢莊嚴。巧出天宮之

樣。金精璀璨。寵頒玉府之藏。珍羞充溢于圓方。華綺煒煌于筐篚。驚傳閭巷。榮感簪紳。實臣子不敢覬之殊恩。亦載籍所未聞之盛事。欲酬高厚。惟當移孝以爲忠。苟利國家。敢惜捐軀而碎首。臣母子誠不勝頂戴感切之至。奉聖旨。覽卿奏謝。朕知道了。禮部知。欽此。

### 謝兩宮聖母疏

臣母伏蒙欽取到京就養。今日仰荷聖母慈聖宣文皇太后特賜金纍絲鑲嵌青紅寶石珍珠長春花頭面一副。珍珠寶石環一雙。紅羅蟒衣一疋。青紵絲蟒衣一疋。紅紵蟒衣襖兒綠膝欄裙一套。青紵絲蟒衣襖兒綠紵絲暗花裙一套。銀八寶豆葉三包。每包二十兩。葷素盒八副。該慈寧宮管事太監謹柯陳相恭捧到臣私第。謹叩頭祇領訖。慈光下被。天賚洪敷。凡在聽聞。舉深忻躍。矧身膺異數。獨被隆施。捐糜此軀。未足言報。臣母子誠不勝頂戴感切之至。聖母仁聖懿安皇太后賜金纍絲首飾一副。織金閃色綠

紵六表裏。葦素盒八副。謝疏同。俱奉聖旨。覽卿奏謝。聖母知道了。禮部知道。欽此。

### 爲故大學士高拱乞恩疏

伏蒙發下原任大學士已故高拱妻張氏陳乞卹典一本。該文書官田義口傳聖旨。高拱不忠。欺侮朕躬。今已死了。他妻還來乞恩典。不准他。欽此。臣等聞命震驚。罔知所措。看得高拱賦性愚戇。舉動周章。事每任情。果於自用。雖不敢蹈欺主之大惡。然實未有事君之小心。以此誤犯天威。死有餘戮。但伊昔事先帝於潛邸。九年有餘。犬馬微勞。似足以少贖罪戾之萬一。皇上永言孝思。凡先帝簪履之遺。猶不忍棄。况係舊臣。必垂軫念。且當其生前。旣已寬斧鉞之誅。今值歿後。豈復念宿昔之惡。其妻冒昧陳乞。實亦知皇仁天覆。聖度海涵。故敢以匹婦不獲之微情。仰干鴻造也。查得世宗肅皇帝時。原任大學士楊一清翟鑾。俱以得罪褫職。後以大慶覃恩。及其子陳乞。俱蒙賜復原職。給與卹典。今拱之事體。實與相同。夫保全舊臣恩禮不替者。國家之盛典也。山藏川納。記功

忘過者。明主之深仁也。故臣等不揣愚昧。妄爲代請。不獨欲俯存閣臣之體。實冀以仰成聖德。覃布鴻施。又以愧死者勸生者。使天上之爲臣子者。皆知竭忠盡力。以共戴堯舜之君也。仰惟聖慈。裁察。臣等不勝戰慄隕越之至。

奉聖旨。高拱負先帝委託。貌朕冲年。罪在不宥。卿等旣說他曾侍先帝潛邸講讀。朕推念舊恩。姑准復原職。給與祭葬。禮部知道。

### 請裁定宗藩事例疏

欽依重修大明會典。先該臣等題奉。節奉勅諭。卿等宜督率各官。悉心講究。以成一代畫一經常之典。照示無極。欽此。欽遵。隨開館纂修。尙。臣等看得各衙門事例。惟禮曹爲繁。國家典章。亦惟禮制爲重。乃屬纂修官。先將禮曹纂完。送副總裁官看改。然後呈送。臣等刪潤。近該副總裁禮部尙書潔晟等。將各官所纂禮曹事例。參互考訂。呈稿到閣。臣等仔細參詳。國家典禮如儀制秩祀等項。皆出祖宗列聖睿恩親定。至精極當。臣等

不敢妄議。但次其年月。刪其重複。分類編錄。足垂永久。惟宗藩一事。條例最繁。前後事體。參差不一。似皆因時立法。未能悉協于中。至嘉靖四十四年。該禮部題覆言官建議。始定爲宗藩條例一書。頒布天下。比時禮官亦自以稽考累朝典制。博采諸宗建白。斟酌損益。旣殫厥心矣。然以臣等愚見觀之。揆諸事理。尙多有未當者。推原其意。徒以天潢支派浩繁。祿糧匱乏。國家之財力已竭。宗室之冒濫滋多。不得不曲爲隄防。嚴加裁抑。顧集議之始。未暇精詳。中間彼此矛盾。前後牴牾。或減削太苛。有虧敦睦。或擬議不定。靡所適從。或一事而或予或奪。或一令以旋行旋止。或事與理舛。窒礙難行。或法與情乖。輕重失當。徒使奸猾得以滋弊。有司無所持循。略舉數端。可知其概。如親王樂工二十七戶。乃高皇帝所定。載在會典。蓋以藩王體尊。其燕饗皆得用樂。不獨迎接詔勅爲然。今乃概從裁革。此減削太苛。事例之未妥者也。又如親王故絕。旣許爲之繼封。以重大宗。又云親弟親姪。方許請繼。及查例行之後。亦有不由親弟親姪而繼封者。此議擬不定。亦事例之未妥者也。又如郡王初封者。爵秩雖同。然有帝孫王孫之異。亦時視

其親疎以爲差等。今房屋等項。一概停給。此親無隆殺。亦事例之未妥者也。又今文官三品以上。皆得給與祭葬。郡王體亞親藩。乃身後墳價概從停給。此恩卹太薄。亦事例之未妥者也。又如郡王故絕者。不准襲封。而以罪革奪者。反得襲封。將軍等未有子者。許選繼室。而親郡王未有子者。乃反不許選繼。擅婚。庶人名糧。止給五十石。而罪宗庶人。乃得七十餘石。又歷世不減。此恩紀失倫。亦事例之未妥者也。又如郡王與親王同城住居。故絕者。止以本等官職奉祀。而另城郡王故絕者。其子又得世授鎮國將軍。此事同例異。亦事例之未妥者也。又如擅婚子女。不定年限。概從查革。有一府而至數百位者。于法不可盡革。革則又廢法。此釐革無序。亦事例之未妥者也。又如郡王故絕。與以罪革降者。事體原自不同。其冊印亦當分別進繳。今乃概從繳奪。此混施無別。亦事例之未妥者也。又如濫妾及花生傳生子女。冒請名封。將保勘宗室。通行革奪。長史等官俱問發邊衛充軍。及流官寄籍奏請選婚者。革退另選。將被選之人發邊衛充軍。遇赦不宥。此立法太嚴。亦事例之未妥者也。諸如此類。尙不可以悉數。夫令所以布信。

數易則疑。法所以防奸。二三則玩。見今該部處置宗藩事情。悉用此爲準。因時救弊。似亦未爲大害。但欲勒成簡冊。昭示將來。則必考求國體。審察人情。上不虧展親睦族之仁。下不失酌盈濟虛之術。使情法允協。裒益適宜。乃足爲經常可久之規。垂萬世不刊之典。今觀其例議。實多未妥。臣等欲因仍紀載。則恐事理不順。有礙施行。欲徑從改易。則先皆題奉欽依。今不敢以臆見擅爲更定。照得萬歷四年六月內該禮部題爲名封事。奉聖旨。這宗室濫妾所生子女。于例已不許請名請封。乃至令改姓易籍。發爲編民。殊非情理之當。見今重修會典。此等條例都着議擬停當改正行。欽此。合無勅下禮部遵照前旨。將前項條例再加斟酌。并累朝見行事例。係關宗藩者。悉行哀集。分類編錄。仍會合多官議擬停當。上請聖裁。著爲憲令。然後開送。臣等纂入會典。庶法以畫一。而可守。令以堅信而不移。懸諸日月。萬世無弊矣。緣係纂修事理。臣等未敢擅便。謹題請旨。

奉聖旨。禮部看諭來說。



番夷求貢疏

臣近者接得巡撫甘肅兵部右侍郎兼都察院右僉都御史候東萊差人齎到烏思藏僧人番書一紙。譯稱釋迦摩尼比邱鎖南堅錯賢吉祥。合掌頂禮朝廷。欽封幹大國事閣下張。知道你的名。顯如日月。天下皆知。有你身體甚好。我保佑皇上。晝夜念經。有甘州二堂地方上。我到城中爲地方事。先與朝廷進本。馬匹物件到了。我和闡化王執事賞賜。乞照以前好例與我。我與皇上和大臣晝夜念經。祝讚天下太平。是我的好心。壓書禮物四臂觀世音一尊。璽璽二段。金剛結子一方。有閣上分付順義王早早回家。我就分付他回去。虎年十二月初頭寫等因。并虜酋順義王俺答亦有稟帖。爲本僧轉乞通貢。俱投到臣。臣看得烏思藏僧人鎖南堅錯。虜酋俺答所稱活佛者也。去年虜酋西行。以迎見活佛爲名。實欲西搶瓦剌。比時臣竊料虜酋此行。必致敗衄。待其既敗而後撫之。則彼之感德愈深。而款貢可以堅久。乃授策邊臣。使之隨宜操縱。因機勸誘。陰修

內治以待其變。今聞套虜連遭喪敗。俺答部下番夷悉皆離叛。勢甚窘蹙。遂託言活佛教以作善戒殺。阻其西掠。勸之回巢。又因而連合西僧。向風慕義。交臂請貢。獻琛來王。自此虜款必當益堅。邊患可以永息。此皆天地祖宗洪庇。皇上威德所及。而臣以淺薄。謬當軸樞。躬逢太平有道之盛。誠不勝欣慶。不勝仰戴。除求貢一事。已奉旨下禮兵二部議處。惟本僧所餽臣禮物。雖遠人向化之誠。難以峻拒。但臣係輔弼近臣。參預密勿。義不得與外夷相通。查得國初翰林學士宋濂。因朝鮮國王餽禮求文。却而不受。曰天朝之臣。豈可受小夷之禮。高皇帝聞而深喜之。其能守義自重如此。况臣列職帷幄。與詞臣不同。而通貢大事。又非來文之比。緣是不敢私受。謹略具其事本末。仰乞聖明俯賜裁奪。勅下臣愚遵行。庶不孤遠夷歸饗之誠。亦以見人臣不敢自專之義。爲此謹具題知。伏候勅旨。

奉聖旨。卿輔理勳猷。宣播遐邇。戎狄咸賓。朕得以垂拱受成。深用嘉悅。覽奏具見忠愼。宜勉納所餽。以慰遠人嚮風慕義之誠。禮部知道。欽此。

## 召見紀事

先是禮部以聖體大安。遵旨擇于初九日請皇上視朝。已奉俞充。至初八日遣文書官至內閣。諭臣居正。朕明日御朝。切欲與先生一見。奈先生前有旨不在朝參之列。明日未朝之時。先于平臺召見。說與先生知之。是日黎明。臣入見于平臺。致詞云。恭惟聖躬康豫。福壽無疆。臣犬馬微衷。不勝欣慶。叩頭稱賀。上說。朕久未視朝。國家事多勞先生費心。臣對言。臣久不覩天顏。朝夕仰念。今蒙特賜召見。下情無任歡忻。但聖體雖安。還宜保重。至于國家事務。臣當盡忠幹理。皇上免勞掛懷。上云。先生忠愛。朕知道了。隨賜銀五十兩。彩幣六表裏。燒割一分。酒飯一卓。臣叩頭稱謝。上又諭云。先生近前。看朕容色。臣承旨至御座前跪。上親執臣手。仰見天顏和粹。玉音清亮。不勝忻忭。上又說。朕日進膳四次。每次俱兩碗。但不用葷。臣對云。病後加飧。誠爲可喜。但元氣初復。亦宜節調。過多恐傷脾胃。然不但飲食宜節。臣前奏疹後最患風寒與房事。尤望聖明加慎。上云。

今聖母朝夕視朕起居。未嘗暫離。三宮俱未宣召。先生忠愛。朕悉知。上又說。十二日經筵。其日講且待五月初旬行。臣謹承旨叩頭而退。始鳴鐘。御門百官致詞稱賀云。

### 請更定時享祝文疏

據太常寺手本爲祭祀事。該本寺卿溫純等開稱。太廟時享。原設九帝后冠服。今祝文內稱。五廟皇祖考妣太皇太后、皇高祖考憲宗純皇帝、皇高祖妣孝貞純皇后、皇曾伯祖考孝宗敬皇帝、皇曾伯祖妣孝康敬皇后、皇曾祖考睿宗毅皇帝、皇曾祖妣慈孝獻皇后、皇伯祖考武宗毅皇帝、皇伯祖妣孝靜毅皇后、皇祖考世宗肅皇帝、皇祖妣孝潔肅皇后、皇考穆宗莊皇帝、皇妣孝懿莊皇后。職等照得憲廟而下。旣備列六帝后。乃又加以五廟。則不止于九矣。今查五廟內。實止太祖成祖宗英三廟設祭。而祝文則多稱二廟。于座位未合。似應改正。其歲暮大禘東壁下配享。設壽春王以下共十五位神牌。按帝系圖。壽春王子太祖爲伯。霍邱以下七王爲兄。寶應以下七王爲姪。自英宗以來。

相沿稱壽春及霍邱以下七王俱爲皇高伯祖。寶應以下七王爲皇曾伯祖。倫序旣紊。且世次已遠。不宜仍稱高曾伯祖。查親盡帝后。止稱徽號。今諸王似應改稱本爵。庶于名義爲協等因。到閣。據此。臣等恭照時享之制。止于九廟。太祖成祖百世不遷。其餘則以親序。而九廟不與焉。查得先朝祝文。弘治中自憲宗而上稱八廟。太皇太后。嘉靖初。自孝宗而上稱六廟。皇非考妣。太皇帝后。至孝烈皇后升祔。仁宗奉祧。始稱五廟。隆慶年間。因而不改。蓋其時世宗新升之主。卽孝烈舊祔之位。數名猶未增也。至我皇上嗣統。則世次異矣。乃時享祝文。自皇高祖憲宗皇帝。至皇考穆宗皇帝。已備六宗之數。而太祖成祖英宗三廟。猶仍五廟之稱。揆之世數名義。委屬未妥。臣等竊惟孝莫大于尊祖。禮莫嚴于假廟。當皇上躬親對越。項。正祖宗神靈陟降之時。帝后尊稱。不宜徑從簡略。廟祔世次。尤當序列令明。合無比照歲暮大禋禮。將時享祝文。通列九廟帝后聖號。以攷如在之誠。不必更稱五廟字樣。其大禋配享壽春等王。親屬已遠。稱謂未安。宜將諸王神牌。俱止稱本爵。其皇高伯祖等稱。盡行裁去。庶得情禮之當。合候命下。容臣

等另撰祝文。進呈御催。發下該寺并壽春等王神牌一體遵照改正施行。奉聖旨。是該衙門知道。欽此。

### 看詳戶部進呈揭帖疏

伏蒙發下票擬章奏內。有戶部進呈御覽揭帖一本。臣等看得國家財賦正供之數。總計一歲輸之太倉銀庫者。不過四百三十餘萬兩。而細至吏承納地僧道度牒等項。毫釐絲忽。皆在其中矣。嘉隆之間。海內虛耗。公私貯蓄。殊可寒心。自皇上臨御以來。躬行儉德。覈實考成。有司催征以時。逋負者少。姦貪犯贓之人。嚴治不貸。加以北虜款貢。邊費省減。又適有天幸。歲豐比登。故得倉庫積貯。稍有贏餘。然閭閻之間。已不勝其誅求之擾矣。臣等方欲俟國用少裕。請皇上特下蠲租之詔。以慰安元元之心。今查萬歷五年。歲入四百三十五萬九千八百餘兩。而六年所入。僅三百五十五萬九千八百餘兩。是比舊少造八十餘萬兩矣。五年歲出三百四十九萬四千二百餘兩。而六年所出乃

至三百八十八萬八千四百餘兩。是比舊多用四十萬餘兩。問之該部。云因各處奏留  
蠲免數多。及節年追贓。人犯財產已盡。無可完納。故人數頓少。又兩次奉旨取用。及奏  
補金花拖欠銀兩計三十餘萬。皆額外之需。故出數反多也。夫古者王制。以歲終制國  
用量入以爲出。計三年所入。必積有一年之餘。而後可以待非常之事。無匱乏之虞。乃  
今一歲所出。反多于所入。如此年復一年。舊積者日漸消磨。新收者日漸短少。目前支  
持。已覺費力。脫一旦有四方水旱之災。疆場意外之變。何以給之。此皆事之不可知。而  
勢之所必至者也。比時欲取之于官。則倉廩所在皆虛。無可措處。欲取之于民。則百姓  
膏血已竭。難以復支。而民窮勢蹙。計乃無聊。天下之患。有不可勝諱者。此臣等所深憂  
也。夫天地生財。止有此數。設法巧取。不能增多。惟加意樽節。則其用自足。伏望皇上將  
該部所進揭帖。置之座隅。時賜省覽。總計內外用度。一切無益之費。可省者省之。無功  
之賞。可罷者罷之。務使歲入之數。常多于所出。以漸復祖宗之舊。庶國用可裕。而民力  
亦賴以少寬也。鄙諺云。常將有日思無日。莫待無時想有時。此言雖小。可以喻大。伏惟

聖明留意。

### 論外戚封爵疏

今日該文書官邱得用口傳聖旨。皇親都督同知王偉着進封伯爵。擬旨來行。欽此。并將正德二年封慶陽伯夏儒、嘉靖二年封泰和伯陳萬言及各子男輩授官事例傳示。臣等恭照聖祖定制。公侯伯爵。非有軍功。不得濫封。國初如魏定兩公。自以佐命元勳。聯姻帝室。彭城惠安。雖託籍戚里。然亦半有軍力。胙土剖符。皆無容議。宣德中季。始有恩澤之封。弘治以來。遂爲故事。然實非高皇帝之舊制也。嘉靖八年。世宗皇帝曾詔廷臣會議外戚封拜事理。該府部等衙門議稱祖宗之制。非軍功不封。夫爵賞者。天下之爵賞。人主所恃以勵世之具也。今使椒房之屬與有大勳勞之人並享茅土。非所以昭有功勸有德也。今除已封見任者姑准終身外。此後凡皇親駙馬俱要查照祖宗舊制。不許夤緣請封。其有出自特恩。一時賞賚者。亦止照祖宗朝故事。量授指揮千百戶等



官。以榮終身。敢有違例。奏請希圖恩澤。妄引洪熙以後事例。比乞者。聽本部及科道官。即時舉劾。寘之重典。以爲貪冒不知止足者之戒等因。奉聖旨。卿等既會議停當。外戚封爵古未有。我皇祖亦未有制典。魏定二國公。雖爲戚里。實開國佐命。靖難元勳。難同其功。彭城惠安二伯。亦有軍功居半。都着照舊襲封。其餘以爲戚里濫膺重爵。名器旣輕。人不知勸。見任的都當查革。但其中有干先朝恩命及已封者。姑與終身。子孫不許承襲。欽此。此我世祖超世之見。同符二祖。非近代帝王所能彷彿。其萬一者。嗣後雖曾垂澤安平。許傳再世。則以孝烈皇后有剪逆保駕之功。特旨酬賞。非援例進封者也。臣等竊以爲我皇上當英妙之齡。事事皆祇適先猷。憲章烈祖。則太祖定制與世祖聖諭。正宜仰稽而效法者。但既有正德以後事例。王偉係中宮至親。臣等不敢抗違。謹擬傳帖上請聖裁。發下吏部施行。其皇親子男輩。姑且從容。俟後再有大喜慶事。然後加恩未晚也。臣等謹查嘉靖八年。世宗皇帝聖旨。及廷臣會議二本。進呈御覽。用見先朝恩封外戚始末。伏惟聖明垂覽。

## 請停止輸錢內庫供賞疏

昨該文書官姚秀口傳聖旨。內庫缺錢賞用。着臣等擬旨傳該部鑄造進用。欽此。臣等查得萬歷四年二月奉聖旨。萬歷通寶制錢着鑄二萬錠。與嘉靖隆慶等相兼行。使戶工二部知道。欽此。本月又該工部題鑄造事宜。節奉聖旨。錢式照嘉靖通寶鑄金背一萬四千錠。火漆六千錠。着以一千萬文進內庫應用。欽此。萬歷五年二月內該戶部進新鑄制錢。又奉聖旨。這錢錠還查原定二萬之數。以一半進內庫應用。一半收貯太倉。欽此。及查工部題議制錢二萬錠。該錢一萬萬文。用工本銀十四萬九千兩。大半取之太倉銀庫。此奉旨鑄錢之大略也。臣等看得先朝鑄造制錢。原以通幣便民。存一代之制。鑄成之後。量進少許呈樣。非以進供上用者也。萬歷二年鑄造之初。亦止進樣錢一千萬文。其後以一半進用。已非通幣便民之本意。今若以賞用缺錢。徑行鑄造進用。則是以外府之儲。取充內庫。大失舊制矣。且京師民間嘉靖錢最多。日鑄行萬曆制錢。

之後。愚民訛言便謂止行萬曆新錢。不行嘉靖舊錢。小民甚以爲苦。近該五城榜示曉諭。民情少定。今若又廣鑄新錢。則嘉靖等項舊錢。必致阻滯不行。于小民甚爲不便。又與原奉聖旨。與嘉靖隆慶等錢相兼行使之意相背。臣等揆度事體。似爲未便。伏望聖明裁審。暫停鑄造進用之旨。待二三年後。如果民間錢少。再行鑄造。亦未爲晚。仍乞皇上曲納臣等節次所陳狂愚之言。敦尙儉德。撙節財用。諸凡無益之費。無名之賞。一切裁省。庶國用可充。民生有賴。不然。以有限之財。供無窮之用。將來必有大可憂者。臣等備員輔導。敢不盡其愚。伏惟聖明亮察。

萬曆七年四月十九日。上次日奉諭。停鑄。

# 張江陵全集卷九奏疏

## 請罷織造內臣對

工部覈禮科左給事中顧九思工科都給事中王道成等疏請罷蘇松及應天織造。取回原差內臣。上遣文書官傳諭云。御用袍服。緊急織造。且未可罷。若如部議取回內臣。改屬撫按有司。則織造不精。誰任其責。且見有錢糧不必加派。先生每擬票來。臣與同官二臣持工部疏。入見上於便殿。奏云。近日蘇松等處水災重大。據撫按官奏報。及臣等所聞。百姓困苦流離。朝不謀夕。有羣聚劫奪者。地方錢糧。委難措處。且自前年星變時。親奉明旨。停止織造。着孫隆回京。至今尙未完報。是詔令不信。而德澤不宣也。臣等謂宜從該部所請。以彰皇上敬天恤民至意。民惟邦本。願少加聖心。上曰。朕未嘗不愛惜百姓。但彼處織造。不久當完。遠不過來春爾。臣對言。皇上德意。臣民無不欣仰。卽孫隆在彼。亦能仰體聖心。安靜行事。但地方多一事。則有一事之擾。寬一分。則受一分之

賜。今彼中織完。十未四五。物料錢糧。尙有未盡徵完者。災地疲民。不堪催督。願皇上且取回孫隆。其應天被災稍輕。許坤仍舊可也。上乃許之曰。近降去花樣。皆御前發出銀兩。並不加派擾民。此一件還着織完回京。其餘則皆停罷可也。臣等頓首曰。幸甚。蓋是時宮中自大婚以來。應受賜者皆籍記以待。又當供奉慈寧。歲幣益不足。盡仰東南織造。上心亦難之。乃從中發銀五千兩畀孫隆。約用盡更請。一不以煩百姓。外廷莫得知也。故上指此爲言。因以部疏授臣云。先生將去票來。又願臣等云。君臣一體。今有司通不奉行。百姓安得受惠。臣對言。誠如聖諭。臣等今日亦無非推廣皇上德意而已。願皇上重惜民生。保固邦本。則百萬生靈。仰載至仁。實社稷靈長之慶。因叩頭出。次日奉聖旨。蘇松地方災傷重大。孫隆着查近降花樣。御前發去銀兩。應織袍服。上緊湊織完日。卽便回京。其以前織完的。照數解進。未完的。都着停止。物料等項。准作歲造段正支用。撫按官還查數明白具奏。許坤且着照舊。

## 請酌減增造段疋疏

伏蒙發下工科都給事中王道成等請酌減織造段疋一本。臣等查得先該承運庫太監孔成等以賞賜夷人段疋缺乏。題請行南京蘇松浙江等處增織於內。又將上用袍服等項。併請織造。共該七萬三千疋。奉聖旨。工部知道。今科臣王道成等因見東南地方災傷重大。民力罷敝。恐加派擾民。故有此奏。臣等看得歲造段疋。原有定額。祖宗朝計一歲所造。實賚諸費。尙有贏餘。至嘉靖年間。賞賚無時。每稱缺乏。乃行文於該地方增織。謂之急缺段疋。然亦間一行之。非可爲常例者也。今查萬歷三年該庫已稱缺乏。請於歲造之外。添織九萬有餘。其時以大婚禮重。賞賜浩繁。該部不得已欽遵明旨。設法措處。然聞之各地方庫藏。搜括已盡。經今四年。方得織完。而添織之旨又下。計該庫所開數目。度其所費。非得銀四五十萬不能辦。此索之庫藏。則庫藏已竭。加派小民。則民力已疲。况今歲南直隸浙江一帶皆有水災。頃蒙特恩破格蠲賑。又取回織造太監。

罷困之民。方得更生。乃又重復加派。子惠之恩未洽。誅求之令卽施。非聖慈所以愛養元元。培植邦本之意也。民窮財盡。賦重役繁。將來隱憂。誠有不可勝諱者。科臣所奏。宜留聖心。臣等看得該庫偶因三衛夷人賞賜段疋。缺少虎豹一樣服色。及近年比虜俺答款貢。歲增賞賚。溢於舊數。故題請添織。以上二項。委不可已。至於上供御用等項。則近年南京太監許坤蘇杭太監孫隆織進御前者。已自足用。不必又取辦於歲造矣。臣等愚見。伏乞聖明再諭該庫。查北虜俺答一宗賞賜一歲約該幾何。及三衛夷人虎豹服色缺少幾何。照數行該地方添織。卽作歲造之數。其餘皆可停止。惟復俯從科臣之言。一概減半織造。其支費銀兩。勅下戶工二部酌處。免復加派小民。庶近日蠲恤之旨。不爲虛文。罷極之民。少得蘇息也。臣等職在帷幄。蒙皇上心膂之寄。豈不知國用浩繁。事在難已。敢故爲節省之言。以沽違拂之譽。但事關邦本。不得不爲深長之慮。伏望聖慈宥其愚昧。裁酌施行。

奉聖旨。東南地方既有災傷。這段疋等項。准減半織造。其支費銀兩。着戶工二部措處。

毋得加派小民。欽此。

### 服闋謝降勅召見賜衣帶金器疏

先准吏部咨。欽奉聖諭。問臣服制幾時滿。着吏部上本起復。該部回稱。臣服制扣至萬歷七年十二月二十四日期滿。禮當從吉等因。備咨到。臣遵候開至本月二十三日。仰荷天恩。特降手勅。諭元輔張少師先生在京守制。忠孝兩全。今當服滿。朕心忻慰。特賜玉帶一條。大紅坐蟒。蟒衣各一襲。金執壺一把。金臺蓋一副。用示眷知。念五日見朝。畢候朕御平臺召見。以後朝參經筵。俱照舊行。先生欽承之。故諭。該文書官太監孫斌恭捧到臣私寓。臣謹焚香望闕盟手捧讀叩頭祇領訖。伏念臣猥以庸虛。特蒙眷遇。曩違家嚴之變。將匍匐以言奔。顧惟慰勉之堅。屢籲號而莫遂。繼荷聖慈之曲軫。敢煩睿思以折衷。許臣謝常祿以在公。容臣襄大事而歸里。自違邱隴。趨覲闕廷。入則荷橐持籌。遵墨綬之往制。出乃寢苦枕塊。守苴絰之常經。既獲承聖主之倚毗。兼克盡匹夫之懇



惘。斯蓋我皇上乾坤轉載。父母愛憐。酌權宜於禮典之中。垂體恤於使令之外。鏤鑄識感。銜結難酬。惟茲隙駟之易馳。條爾祥琴之在御。先生之制不敢踰。雖勉循禫祔之文。人子之心不能忘。實倍切居諸之感。乃荷宸衷俯記。降清問於銓曹。復蒙綸札傳宣。接威顏於中禁。祇佩袞辭之藹郁。重永朋錫之駢蕃。奩出壺觴。驚鱗裹黃金之質。衣加鞶帶。羨紅光白璧之珍。更令旣毀之殘軀。還被斯皇之寵飾。捧而心醉。服以魂搖。昔名臣若榮溥。攷賢之輩。際盛世在永宣順化之間。固常變禮從時。並荷先朝之知遇。未聞殊恩異數。有如今日之遭逢者也。臣敢不益據丹悃。仰答隆施。倘筋力之未疲。遠道寧忘於驅策。如髮膚之可效。微生何愛於捐糜。謹欽遵聖諭。於二十五日廷見後。卽趨詣平臺。恭候召見。誠不勝激切感戴之至。

### 召見平臺記事

欽奉勅諭。召見於平臺。致詞云。臣前奉欽依在京守制。服滿朝見。奉面諭。先生全忠全

孝萬古留名。臣奏。臣蒙皇上天恩。委曲體悉。故得以少盡臣子之情。不勝感載。叩頭稱謝。又奏。昨蒙聖恩。特降手勅。恩賚殊常。尤不勝感載。叩頭謝畢。又奏。昨奉勅諭。着臣以後照舊朝參。臣卽常欽遵。但年前數日。尙在三年之內。餘哀未忘。仍望皇上俯容。再寬數日。免令朝參陪祀。候元旦慶賀後。照舊朝參供職。上說。先生元旦出來也罷。臣叩頭承旨。上又說。與先生酒飯喫。臣叩頭謝。又奏。臣在制中。屢荷兩宮聖母慈恩。賜賚稠疊。今服滿。欲詣各宮門外叩頭稱謝。未敢擅使。請旨。上說。是着張宏引進。臣叩頭退。隨詣慈慶宮外叩頭。蒙仁聖皇太后遣中使傳諭云。先生忠孝兩全了。宜益盡心輔佐。賜銀五十兩。紵絲四表裏。隨詣慈寧宮門外叩頭。蒙慈聖皇太后着引伴太監張宏傳諭云。皇帝冲年。凡事多賴先生輔佐。天下太平。今服制已滿。忠孝都全了。宜益盡心處置國事。特賜膳九品。金執壺一把。金臺盞一副。金鑲牙筋一雙。銀五十兩。彩段四表裏。葷素食八盒。甜食四盒。酒十瓶。命太監張宏遞酒三盃管待。

### 辭免恩命疏

准吏部咨。爲欽奉聖諭事。查得節奉勅諭。朕大婚禮成。內閣輔臣。忠勞茂著。宜加特恩。元輔張居正。受先帝仗託。盡忠輔導。保護啓迪。勲猷獨茂。宜加殊禮。以答元功。但元輔以守制懇辭。暫從其請。候制滿之日。該部奏請加恩。如勅行。今本官服制已滿。謹遵勅諭。題請加恩等因。奉聖旨。朕元輔社稷重臣。受先帝顧託。翊戴朕躬。以及大婚。弼成治理。勲績隆茂。着加太傅。歲加祿米一百石。原廕武職伊男陞一級世襲。着南鎮撫司僉書管事。用副朕酬獎元功至意。欽遵。備咨到臣。臣聞命驚惶。拊躬局促。仰惟皇上鴻仁下逮。駿惠旁敷。往因嘉禮之成。肆舉敍勞之典。以臣叨居首弼。加惠獨先。念臣方在宅憂。懸賞以待。茲允部臣之請。渙頒追錄之恩。三錫殊榮。一朝並至。旣已奉有成命。詎宜仰瀆宸嚴。但臣自揣疎庸。誤承眷遇。從受事以至於今。每自省循。諸所蒙被。豈獨近代臣人之所稀覯。抑亦在昔載記之所罕聞。卽如頃者服制未除。預垂清問。迄於祥禫甫

屈。遄降溫綸。袞辭塵十札之褒。珍貺踰百朋之重。黃金白璧。炫耀門庭。錦綺華章。充溢筐篚。臣伏思惟。盆盎之器。不啻盈矣。鼯鼠之腹。亦既飽矣。及今克自抑畏。庶幾獲免。傾危而浹旬之間。豐施荐及。越歲之後。異命重申。注之已盈。而不虞其將覆。噉之過飽。而不慮其難容。在輿論爲未孚。尤天道之所忌。此臣所以夙夜匪寧。凌兢罔措者也。伏望聖慈鑒臣素悃。俾仍舊貫。特寢新恩。庶愚分獲安。幸道顛躓之咎。微軀未隕。得紓啣結之忠。臣誠不勝戰兢踟躕懇切。埃命之至。奉朕旨。卿保迪朕躬。夙夜匪懈。輔宣化理。茂著成功。眷德酬勳。宜從優典。朕體卿謙讓至情。今次所頒恩數。欲卿安受。視先朝施及元臣故事。已自不同。朕心方以爲歎。卿豈可復行遜避。宜勉遵成命。以慰朕懷。所辭不允。吏部知道。

### 再辭恩命疏

昨臣以蒙恩殊常。具奏辭免。該文書官姚秀送本到閣。口傳天語。着同官二臣擬票溫

旨。勉臣遵奉。不必再辭。隨奉聖旨。卿保迪朕躬。夙夜匪懈。輔宣化理。茂著成功。眷德酬勳。宜從優典。朕解卿謙讓至情。今次所頒恩數。欲卿安受。視先朝施及元臣故事。自己不同。朕心方以爲歉。卿豈可復行遜避。宜勉遵成命。以慰朕懷。所辭不允。吏部知道。欽此。仰惟聖眷優崇。宸綸藹郁。敢不祇若。用彰寵榮。但臣自以蒙被過隆。難於報答。涯分久溢。恐致顛危。故屢次瀆陳。非敢矯飾。誠省躬揣分。有萬萬不能自安者也。今奉聖諭諄切。又該同官二臣咸導臣以將順。誠臣以抗違。臣竊伏思惟。俯自斟酌。因憶前年恭侍皇上日講。曾奉面諭。先生功大。朕無可爲酬。只是看顧先生子孫便了。臣每念及此。輒爲涕零。夫施及於己身者。其恩猶淺。施及於子孫者。其恩爲深。戴德於一時者。其報有盡。戴德於後世者。其報無窮。今蒙聖恩憐念臣男。擢之衛司。延以世賞。藐焉弱息。荷此殊榮。斯蓋前諭所謂看顧臣子孫惓惓之意也。臣不勝感激。不勝頂戴。謹拜手祇頌。仍囑臣後嗣世效犬馬。仰報生成。惟是三公崇階。以待耆碩。在本朝文職。咸不敢居。萬鍾厚祿。以賜勳親。臣昔已蒙恩。豈宜重冒。惟此二項殊典。揣已終不敢當。伏望聖慈俯

鑒臣愚。准臣量受。臣男陞廕。其太傅祿米之加。俯容辭免。庶橫恩不致於濫及。微分亦得以少安。履厚戴高。不戴忘報。臣冒天威。不勝戰慄隕越之至。奉聖旨。卿功在社稷。不惟朕所眷知。亦中外臣民所共聞見。進秩加恩。於禮匪過。乃又固辭不已。朕心益用弗寧。今諒卿惓誠。特准辭免太傅。以成卿勞謙廉讓之美。其餘宜勉遵成命。慎毋再辭。吏部知道。

### 辭考滿加恩疏

准吏部咨。題請稽考績以優輔臣事。內稱。臣於萬歷五年九月內。聞臣父憂。奏乞回籍守制。荷蒙皇上諭留。准假歸葬。旋詔還內閣。至萬歷七年十二月二十四日。服滿起復。通計前後歷任年分。除給假回籍不計外。其餘月日。皆實在內閣輔政。扣至萬歷七年十二月十七日止。一品九年。滿後又歷三年。例應考滿給由等因。奉聖旨。卿等說的是。元輔爲朕勉留。夙夜在公。忠勤匪懈。實與見任供職者不殊。你部裏便查考滿恩例。從

厚開擬來看。備咨到臣。臣伏誦綸音。不勝惶悚。竊惟該部所奏。乃課功常典。臣之所處。則值事之變。而酌禮之中。非可以常典概論者也。今且無論臣功之有無。與課之殿最。但以事理言之。追憶前年先臣不祿。臣聞訃之初。五內崩裂。瀝血陳情。惟乞一去而已。乃奉聖諭懇留。至於三四。此時臣雖在昏迷中。猶念先帝之顧託未終。聖母皇上之深恩未報。犬馬戀主。實切依依。而烏鳥私情。又有不能自釋者。乃不得已而爲在京守制之請。仰荷聖慈俯從。又特允歸葬。旋即召還。免其朝參。停止支俸。令以素服在閣辦事。臣出則綜理國事。盡在公之義。入則守其苴絰。執居喪之禮。是臣之不去者。報君恩也。守制者報親恩也。士大夫有識者。咸謂皇上之所以處臣。與臣之所以自處。於君臣父子之情。庶幾兩全而無害矣。然身雖屬於公家。事實殊於見任。今乃又計算前後月日。通作實歷。積日累勞。循例考滿。則事同見任。禮曠居喪。君臣之義雖全。父子之情則缺矣。皇上昔日之所以處臣。與臣之所以自處者。豈不兩失之乎。臣又查得前代典禮與本朝律令。凡奪情起復者。皆居官食祿。與見任不殊。故先年大學士楊溥李賢等皆從

服中陞官。考滿以事同見任故也。今臣乃辭俸守制。皇上原夫奪臣之情。臣亦未嘗於制中起復。比之諸臣事體。原自不同。况前年荷蒙聖恩。以大婚禮成。敍錄內閣諸臣。晉秩廕子。獨臣以服制未滿。特勅該部俟制滿而後題請。是皇上亦諒臣在服制之中。不可以加恩故也。夫既不可以加恩。又獨可以考滿乎。蓋事必揆諸天理之當。卽乎人心之安。乃無歉恨。所謂求仁而得仁者。今臣自審於理欠當。於心未安。故不得不仰控聖明。冀申情款。惟求協夫事理之中而已。非畏人之議已而故爲是喋喋也。伏望聖慈俯鑒愚誠。特停恩命。勅下吏部免臣給由。庶臣得以安心供職。而皇上曲全之仁。與微臣自處之義。終爲完善。無所虧缺矣。臣於此理。剖析已詳。皇上聖明。必垂洞鑒。萬望卽賜俞允。免致再三陳控。煩瀆宸嚴。臣不勝惶恐戰慄懇切祈望之至。

奉聖旨。卿昔爲朕勉留。夙夜在公。忠勤彌篤。殊勳茂績。中外所知。該部題請考滿加恩。委係彝典。茲覽卿奏。辭俸守制。與奪情起復不同。朕心更覺洞然。卿之所處。實爲恩義兩盡。足以垂範萬世。特允所辭。以全忠孝大節。至於卿之勳勞。簡在朕心。當別有酬眷。



吏部知道。

### 歸政乞休疏

臣一介草茅。行能淺薄。不自意遭際先皇拔之侍從之班。畀以論思之任。壬申之事。又親揚末命。以皇上爲託。臣受事以來。夙夜兢懼。恆恐付託不效。有累先帝之明。又不自意特荷聖慈眷禮優崇。信任專篤。臣亦遂忘其愚陋。畢智竭力。圖報國恩。嫌怨有所弗避。勞瘁有所弗辭。蓋九年於茲矣。每自思惟。高位不可以久竊。大權不可以久居。然不可遽爾乞身者。以時未可爾。今賴天地祖宗洪佑。中外安寧。大禮大婚。耕籍陵祀。鴻儀鉅典。一一修舉。聖志已定。聖德日新。朝廷之上。忠賢濟濟。以皇上之明聖。令諸臣得佐下風。以致昇平保鴻業無難也。臣於是乃敢拜手稽首而歸政焉。且臣稟賦素弱。比年又以任重力微。積勞過慮。形神頓憊。血氣早衰。踰五之齡。鬚髮變白。自茲以往。聰明智慮。當日就昏蒙。若不早自陳力。以致折足覆餗。將使王事不終。前功盡棄。此又臣之所

大恐也。伏望皇上特出睿斷。親綜萬幾。博簡忠賢。俾參化理。賜臣骸骨生還故鄉。庶臣節得以終全。駑力免於中蹶。臣未竭丹衷。當今後之子孫。世世爲犬馬。以圖報效也。奉聖旨。卿受遺先帝。爲朕元輔。忠勤匪懈。勳績日隆。朕垂拱受成。倚毗正切。豈得一日離朕。如何遽以歸政。乞休爲請。使朕惻然不寧。卿宜仰思先帝丁寧顧託之意。以社稷爲重。永圖襄贊。用慰朕懷。慎無再辭。吏部知道。

### 再乞休致疏

昨臣以大禮畢成。具疏乞休。伏奉聖旨。卿受遺先帝。爲朕元輔。忠勤匪懈。勳績日隆。朕垂拱受成。倚毗正切。豈得一日離朕。如何遽以歸政。乞休爲請。使朕惻然不寧。卿宜仰思先帝丁寧顧託之意。以社稷爲重。永圖襄贊。用慰朕懷。慎無再辭。吏部知道。臣聞命自天。不勝感悚。念臣發跡寒單。賦才譴劣。仰承先帝顧託之重。祇荷皇上眷遇之隆。分當捐跡。庶以仰酬高厚之萬一。豈敢輒求引退。圖遂私懷。但臣葵藿之志雖殷。而犬馬

之力已竭。一自壬申受事以至於今。惴惴之心。無一日不臨於淵谷。中遭家難。南北奔馳。神敝於思慮之煩。力疲於擔負之重。以至心血耗損。筋力虺隤。外若勉強支持。中實衰憊已甚。飧荼茹葶。苦自知之。恆恐一日顛仆。有負重託。欲乞身於聖明之前。非一日矣。獨念國事未定。大禮未完。口嚅嚅而不忍言。心依依而未能舍。今賴皇上神聖。臣得以少效愚衷。中外乂安。國家無事。諸大典禮。皆已完就。乃敢一言其私。蓋亦度其時可以去而後去耳。昔顏回有言。東野畢之馬將敗矣。步驟馳騁。朝禮畢矣。歷險致遠。馬力盡矣。而猶求馬不已。無何而東野之馬果敗。故舜不窮其民力。造父不窮其馬力。是以舜無失臣。造父無失馬。今臣之乞去。亦非敢爲決計長往也。但乞數年之間。暫停鞭策。少休足力。倘未卽填溝壑。國家或有大事。皇上幸而召臣。朝聞命而夕就道。雖執殳荷戈。效死疆場。亦所弗避。是臣之愛身。亦所以愛國也。伏惟聖慈矜允。臣無任悚懼竣命之至。

奉聖旨。連日不見卿出。朕心若有所失。如何又有此奏。今諸大典禮雖已舉行。不過禮

文之事。機務繁重。賴卿輔理更切。未便是卿閑逸之時。古之元老大臣。耄耋之年。在朝輔理者不少。卿方逾五十。豈得便自稱衰老。忍于言去。宜遵前旨。卽出。永肩一德。用成始終大忠。着鴻臚寺官往諭朕意。吏部知道。

### 謝聖諭疏

昨該臣再疏乞休。未蒙俞允。今日欽奉龍箋手勅一道。諭元輔少師張先生。朕面奉聖母慈諭云。與張先生說。各大典禮。雖是修舉。內外一應政務。爾尙未能裁決。邊事尤爲緊要。張先生親受先帝付託。豈忍言去。待輔爾到三十歲。那時再作商量。先生今後再不必興此念。朕恭錄以示先生。務仰體聖母與朕惓惓倚毗至意。以終先帝憑几顧命。方全臣節大義。先生其欽承之。故諭。該司禮監太監孫秀文書房官邱得用恭捧到臣私寓。臣叩頭捧讀。感切涕零。念臣受國厚恩。未能圖報。况身膺重託。敢遂私圖。但自審體力向衰。兼之寵祿踰分。萬不獲已。仰控宸嚴。茲蒙聖恩。親灑瓊翰。恭述聖母慈諭。責

臣以付託之未效。勉臣以臣節之當終。臣莊誦之餘。感懼兼抱。仰惟慈訓諄切。聖眷優隆。誠所謂義重身輕。威尊命賤。臣於此時若復固求私便。是爲自冒譴誅。但臣願忠之心無窮。而任事之力難強。仍乞皇上朝夕於聖母前。達臣微悃。曲賜矜涵。庶稅駕之祈。雖未遂於今日。首邱之願。猶有異於將來。又該鴻臚寺官奉旨諭臣早出。臣卽宜欽遵。赴閣辦事。但臣前以山陵扈駕。觸冒風寒。近又聞親弟訃音。感傷疾病。伏乞聖慈垂憫。俯容調理數日。少可卽出供職。臣不勝悚惶感激之至。奉聖旨。覽卿奏謝。知道了。調理數日卽出輔理。以慰朕心。禮部知道。

### 請專官纂修疏

先該臣等題奉欽依。重修大明會典。節奉勅諭。會典一書。我祖宗列聖典章法度。綱目具存。第簡編浩穰。精覈實難。我皇祖世宗肅皇帝嘗見其一二舛誤。申命儒臣重加較輯。比及進覽。迄未頒行。似於聖心猶有未當。今特命卿等校訂差訛。補輯缺漏。督率各

官悉心考究。務令諸司一體前後相貫。用成一代畫一經常之典。欽此。欽遵。已經開館纂修。去後。近該副總裁等官。將所編草稿。呈送臣等刪潤。止將舊會典并嘉靖二十九年續修進呈。未奉欽依。舊稿謄寫一遍。稍續以近年事例。中間體例尙有未當。紀載頗多缺漏。良由副總裁諸臣各有部事相妨。無暇討論講究。臣等欲另爲修削。苦閣務浩繁。力有弗給。欲因仍舊貫。聊取完事。則於愚心實有未妥者。竊以會典所。乃昭代致治之大經大法。我太祖高皇帝稽古定制。美善兼該。綱目畢舉。列聖相承。間有損益。歷世滋久。經畫愈詳。今旣彙爲一書。固當深究本原。備詳因革。酌古準今。以定一代之章程。垂萬年之典則。况欽承勅諭。令臣等校訂差訛。補輯缺漏。是於舊本或有未當者。亦許以愚瞽之見。上請聖裁矣。今若止將舊本謄寫。附以新例。則不過重錄續編而已。豈聖明所以屬託臣等之意乎。願事必專任。乃可責成。力不他分。乃能就緒。在者纂修兩朝實錄。亦皆專屬副總裁二員。臣等又月有程督。歲有稽考。乃克有成。今會典事理。又與實錄不同。考索講求。尤費心力。非有專責。決難奏功。臣等看得吏部左侍郎兼翰林

院侍讀學士余有丁詹事府詹事兼翰林院侍讀學士許國。文學素優。年力方富。屬以此事似可責成。如蒙聖明俯允。將余有丁暫解部事。以本官仍管詹事府事。許國協管府事。俱充副總裁。各暫停常轉。令其專在史館。遵照勅諭事理。將會典新舊原本細加考究。另具草稿。送臣等刪潤。其原題副總裁官。惟於部務有暇相與討論。不必限以章程。致令兩誤。庶幾事有專責。而汗青可期也。

奉聖旨。是。吏部知道。

### 請處治邪佞內臣疏

該文書官邱得用口傳聖諭。孫海客用。凡事引誘。無所不爲。着降作小火者。發去孝陵種菜。爾等司禮監并管事牌子。旣受朝廷爵祿。我一時昏迷。以致有錯。爾等就該力諫方可。爾等圖我一時歡喜不言。我今奉聖母聖諭。教誨我。我今改過。奸邪已去。今後但有奸邪的小人。爾等司禮監并管事牌子一同舉名來奏。該衙門知道。欽此。傳示到閣。

除欽奉旨諭臣等另行具題外。臣等看得孫海客用奸邪不忠。引誘蠱惑。以致虧損聖德。舉動差錯。上違聖母慈誨。下失臣民仰望之心。論祖宗法度。宜正典刑。罪在不赦。皇上心雖惱恨。猶不忍加刑。薄從降斥。燭奸之明。等於日月。宥罪之仁。同於天地矣。但臣等查得舊例。孝陵種菜。皆軍人爲之。二犯既發。令着役。不宜止降火者。須充做淨軍。乃爲正法。臣等謹擬票。上請聖裁施行。

奉聖旨。乾清宮管事牌子太監孫海客用。凡事引誘。無所不爲。降黜未盡其辜。着充淨軍。發去南京孝陵種菜。該衙門知道。

### 請清汰近習疏

伏蒙聖諭。昨朕有御筆帖子。先生看來未曾。孫海客用。朕越思越惱。這廝亂國壞法。朕今又降做小火者。發去南京孝陵種菜。先生等既爲輔臣。輔弼朕躬。宗廟社稷。所係非輕。焉忍坐視不言。先生等既知此事。就該諫朕。教朕爲堯舜之君。先生等也爲堯舜之



臣。朕今奉聖母聖諭教誨。朕悔過。迸去奸邪。先生等各要盡心輔朕。欽此。該文書官邱  
得用恭捧到閣。臣等恭誦綸音。不勝欽仰。不勝惶愧。仰惟皇上天挺聖資。幼而聰穎。自  
臨御以來。講學勤政。聖德日新。臣等每自慶幸。以爲親逢堯舜之主。庶幾復見唐虞之  
治矣。乃數月之間。仰窺聖意所向。稍不如前。微聞宮中起居。頗失常度。臣等心切憂惶。  
但身隔外庭。不知內事。卽有所聞。未敢輕信。而朝廷庶政。未見有闕。故不敢妄有所言。  
然前者恭侍日講。亦曾舉孔子益者三樂。損者三樂。并益者三友。損者三友兩章書。請  
皇上加意省覽。蓋亦陰寓諷諫之意。又數日前曾問文書官云。近臣聞皇上夜間遊行。  
左右近習。皆持短棍兵器。此何爲者。乃文書官回說並無此事。臣等亦遂以所聞爲妄。  
不敢復言。連日因覩御筆帖子。處治孫海客用兩人。因而詢訪。始知此兩人者。每日引  
誘皇上燕閒遊宴別宮。釋去法服。身着窄袖小衣。長街走馬。挾持刀仗。又數進奇巧戲  
玩之物。以蠱惑上心。希圖寵幸。臣等連日寢食不寧。神爽飛越。可惜天生聖王。被這幾  
個奸佞小人引誘蠱惑。一至於此。擬俟日講時。面奏諫勸。以盡愚忠。乃蒙聖母諄諄教

戒。皇上幡然改悔。逝去奸邪。引咎自責。又宣諭臣等盡心輔導。此蓋九廟列聖之靈。默啓我聖母之心。形之譴責。陰佑我皇上之心。自悔前非也。夫人孰無過。惟過而能改。則復於無過。自茲以往。皇上依然爲堯舜之主。臣等亦庶幾可勉爲堯舜之臣矣。宗社生靈。曷勝慶幸。但古語云。樹德務滋。除惡務盡。臣等竊聞近日引誘之人。在孫海客用固爲尤甚。而其中諂佞希寵放肆無忌者。尙不止此二人。如司禮監太監孫德秀。溫泰。兵仗局掌印周海者。皆不良之人。其罪亦不在孫海客用之下。今皇上旣將此二人寘之於法。以示悔過自新之意。則孫德秀等亦不宜姑容在內。以爲聖德之累。伏望皇上大奮乾斷。將孫德秀等一體降黜。以彰日月之明。其司禮監管事牌子等官。平日爲忠爲佞。諒莫逃於聖鑒。合無俱令自陳。請自聖斷。老成廉謹者。照舊管事。諂佞放肆者。悉加汰黜。且近日皇穹垂象。彗芒掃宦者之星。亦宜大行掃除。以應天變。以光盛德。此皇上修德改過之實政也。臣等又聞漢臣諸葛亮云。宮中府中。俱爲一體。陟罰臧否。不宜異同。臣等待罪輔弼。宮中之事。皆宜與聞。臣居正又親承先帝遺命。輔保聖躬。比之二臣。

責任尤重。今乃徒避內外之嫌。不行直言匡救。以致皇上有此過舉。孤負先帝付託之言。萬死不足以自贖。除痛自省。勵以圖報。稱外。既蒙皇上明發德音。昭示聖意。臣等此後亦不敢復以外臣自限。凡皇上起居。及宮壺內事。但有所聞。卽竭忠敷奏。及左右近習。有邪佞不忠。如孫海客用等者。亦不避嫌怨。必舉祖宗之法。奏請處治。仍望俯允施行。皇上亦宜仰遵聖母慈訓。痛自改悔。戒遊宴以重起居。專精神以廣允嗣。節賞賚以省浮費。卻珍玩以端好尚。親萬幾以明庶政。勤講學以資治理。庶今日之悔過不爲虛言。將來之聖德。愈爲光顯矣。臣等無任瀝血哀懇之至。伏惟聖慈鑒宥。

奉御批。覽卿所奏。具見忠愛。依擬行。又奉聖旨。司禮監太監孫德秀。溫泰。兵仗局掌印周海。都降三級。着外私家閒住。永不敘用。其司禮監及管事牌子等。都着自陳。該衙門知道。

請敷陳謨烈以裨聖學疏

先該臣等面奏皇上春秋鼎盛。宜省覽章奏。講究治理。于字書小學不必求工。以後日講請暫免進字。容臣等將諸司題奏緊要事情。至御前講解。面請裁決。伏奉俞旨。臣等欽遵舉行外。但數月以來。應奏事件。與日講之期。多不相值。或係常行細務。又不敢煩瀆聖聰。卽恭侍講讀。須臾而畢。拱默而退。不得供奉燕閒。從容陳說。雖欲竭悃款之愚效獻替之益。其道無絲。非臣等面請奏事之初意也。頃奉聖諭。責臣等以盡心輔導。臣等夙夜思惟。圖所以仰承德意。啓沃聖心者。竊以爲遠稽古訓。不若近事之可徵。上嘉先王。不如家法之易守。昔伊尹周公。矢謀作誥。撮其大指。不過兩言。曰明言烈祖之成德。曰覲揚文武之光烈。而以唐憲宗讀貞觀政要。竦慕不能釋卷。宋仁宗命侍臣讀三朝寶訓。及祖宗聖政錄。前史書之。皆爲盛事。良以羹牆如見。自不忘繼志之思。耳目旣真。又爲持循之地。守成業而致盛治。莫要於此。仰惟我二祖開創洪業。列聖纂紹丕圖。奎章睿謨。則載之寶訓。神功駿烈。則紀之寶錄。其意義精深。規模弘遠。樞機周慎。品式詳明。足以邁三五之登閔。垂萬億之統緒。此正近事之可徵。家法之易守者也。夫皇上

所踐者。祖宗之寶位。所臨者祖宗之臣民。所撫馭者。祖宗之輿圖。所憑藉者。祖宗之威德。則今日之保泰持盈。興化致理。豈必他有所慕稱上古久遠之事哉。惟在皇上監於成憲。能自得師而已矣。臣等謹屬儒臣。將累朝寶訓實錄副本。逐一檢閱。分類編摩。總計四十款。曰創業艱難。曰勵精圖治。曰勤學。曰敬天。曰法祖。曰保民。曰謹祭祀。曰崇孝敬。曰端好尚。曰慎起居。曰戒遊佚。曰正宮闈。曰教儲貳。曰睦宗藩。曰親賢臣。曰去奸邪。曰納諫。曰理財。曰守法。曰警戒。曰務實。曰正紀綱。曰審官。曰久任。曰重守令。曰馭近習。曰待外戚。曰重農。曰興教化。曰明賞罰。曰信詔令。曰謹名分。曰却貢獻。曰慎賞賚。曰敦節儉。曰慎刑獄。曰褒功德。曰屏異端。曰飭武備。曰御夷狄。雖管窺蠡測之見。未究高深。而修德致治之方。亦已略備矣。但簡冊浩繁。遽難卒業。容臣等次第纂輯。陸續進呈。擬俟明歲開講以後。每晨講既畢。臣等恭詣文華後殿。請解訓錄一二條。粗述大指。如皇上偶有疑難。卽望面賜諮詢。或臣等竊有見聞。亦得隨事獻納。其諸司章疏有緊覆者。卽於講後面奏請裁。多寡有無。不拘程限。但使工夫接續。時日從容。自可以開發聰明。

亦因以練習政事。伏望皇上留神聽覽。黽勉力行。視訓錄之在前。如祖宗之在上。念念警惕。事事率由。且誦法有常。緝熙無間。卽燕息深宮之日。猶出御講幄之時。則聖德愈進於高明。聖治益躋於光大。而臣等區區芹曝之忠。亦庶幾少效萬分之一矣。

奉御批。覽卿等所奏。具見忠愛。朕知道了。

### 請停止工程疏

該文書官田義傳奉聖諭。欲修理武英殿。欽此。臣等看得祖宗宮殿。如有損壞。自合修理。豈宜借費。但查本殿自宣德正統以後。久不臨御。迨世宗皇帝踐祚之初。卽將文華殿鼎新修建。易以黃瓦。凡齋居經筵。及召見大臣等項。俱臨御於此。今九五齋恭默室。皆世宗皇帝親題其額。輪奐巍然。堂構具在。益以東方發生喜神所向。故齋居聽政。講學冠讀。皆恆處於斯。其取義深益。今武英殿乃祖宗久不臨御之所。卽加修理。聖駕未必常到。而徒費十餘萬之貲。經營於不常到之地。似爲無益。且臣等亦曾至本殿。觀其

藻飾顏色。雖稍有剝落。而棟宇規制。未常少損。似亦無煩於改作也。臣等愚見。伏望皇上。繹思世宗皇帝臨御東朝之意。姑仍舊貫。暫停作工。以省勞費。或待皇儲誕降之後。仍以文華爲東宮講讀之所。却請聖駕臨幸武英。彼時鼎新修理。未爲晚也。臣等淺陋無識。仰蒙俯諭。不敢不盡其愚。伏望聖明曲垂鑒納。臣等不勝懇切願忠之至。奉聖旨。覽卿等所奏。朕知道了。

# 張江陵全集卷十奏疏

## 請用翰林官更番侍直疏

臣等伏觀皇上近日以來。留神翰墨。一切嬉遊無益之事。悉屏去不御。仰惟聖學賅洽。睿志清明。臣等不勝慶忭。夫人主一心。乃萬化從出之原。亦衆欲交攻之會。必使常有所繫。弗納于邪。然後縱逸之念不萌。而引誘之奸不入。故雖筆札小技。非君德治道所關。而燕閒游息之時。藉以調適性情。收斂心志。亦不悖于孔氏游藝博文之指。比之珍奇玩好。馳騁放佚之娛。則相去遠甚。未必非皇上遂德養心之一助也。但臣等竊見前代好文之主。皆有文學之臣。載筆操觚。奉侍清燕。如唐有天策瀛洲之選。供奉待詔之員。宋有祕閣待制二館著作。或承詔發答。或應制賡酬。皆于語言文字之中。微寓風勸箴規之益。卽今之翰林官是也。國朝建置翰林。於一榜進士中。拔其英雋特異者。除授此官。固欲儲養德望。以備啓沃。任樞機。然文史詞翰。撰述討論。亦其本等職務。皇上卽



有任使。不必他求。如日講諸臣。皆文學優瞻。臣等慎選以充。見今記注起居。遂日在館。供事外。其餘見任翰林各官。亦皆需次待用者。臣等擬令分番入直。每日輪該四員。與同日講官在館祇候。皇上萬幾之暇。如披閱古文。欲有所采錄。鑒賞名筆。欲有所題詠。卽以屬之諸臣。令其撰具草藁。送臣等省定。然後繕寫進呈聖覽。或不時召至御前。面賜質問。令其發摠蘊抱。各見所長。因以觀其才品之高下。他日量能擢才。自可斷于聖衷。且諸臣因此亦將自慶遭逢。益圖稱塞。爭相淬勵。以求見知于上。其于聖明辦材審官之道。亦默寓於中矣。臣等不勝惓惓願忠之誠。奉聖旨。是該衙門知道。

### 議外戚子弟恩蔭疏

昨該文書房官邱得用口傳聖旨。欲將皇親永年伯王偉弟男加恩授職。臣等謹欽遵擬傳帖。將王偉弟王俊男王棟各與做錦衣衛正千戶帶俸。頃又該邱得用傳示聖意。

說正德年間。皇親夏助等。俱授錦衣衛指揮使等官。世襲。今何止授千戶。又無世襲字樣。以臣等所擬爲薄。臣等不勝惶悚。仰惟皇上篤眷中宮。加恩外戚。此乃情禮之至。臣等敢不仰承。但查正德二年。雖有此例。至世宗皇帝登極之後。悉已釐革。凡皇親授官。無論大小。皆不得世襲。故秦和伯陳萬言。係元配孝潔皇后之父。伊男陳紹祖。原係監生出身。亦止授尙寶司丞。文官未嘗世襲也。又查得隆慶年間。今仁聖懿安皇太后之父固安伯陳景行。伊男陳昌言。初亦止授錦衣衛千戶。至皇上登極。因恭上兩宮尊號。方降勅將陳景行長男陳昌言。陞錦衣衛指揮僉事。次男陳嘉言。授錦衣衛副千戶。慈聖宣文皇太后父李偉。封武清伯。長男李文全。授錦衣衛指揮僉事。次男李文貴。授錦衣衛副千戶。俱無世襲字樣。臣等恭照祖宗定制。武職非有軍功。不得世襲。正德年間。政體紊亂。至世宗皇帝以聰明至聖。入繼大統。將以前敝政一切改正。以復我祖宗之舊。正今日所當遵守者。當先帝龍飛之日。與皇上嗣統之初。加恩陳李二家。例止於如此。今皇上雖欲優厚外戚。詎可諭於兩宮皇太后之家乎。是臣等所擬。乃三朝見行事。

例。非敢擅爲裁抑也。今奉聖諭。令臣等改擬。臣等謹欽遵斟酌近例。擬將王偉男王棟。授錦衣衛指揮僉事。弟王俊。授錦衣衛正千戶。比之兩宮皇太后之家。實爲相等。至於世襲一節。則祖宗舊制。決不敢違越也。臣等又惟皇上與中宮聖壽萬年。將來皇儲兆慶。繩繩振振。推恩戚里。固未可量。似亦不在此一時也。伏望聖明俯鑒。臣等愚誠。特賜俞允。不勝幸甚。

奉聖旨。皇親永年伯王偉男王棟。與做錦衣衛指揮僉事。弟王俊。錦衣衛正千戶。俱帶俸。兵部知道。

四月十八日

上御文華殿講讀有頃。臣居正等入至後殿。講訓錄畢。以南科給事中傅作舟疏進覽。臣因奏云。今江北淮鳳及江南蘇松等府。連被災傷。民多乏食。徐宿之間。至以樹皮充饑。或相聚爲盜。大有可憂。上曰。淮鳳頻年告災。何也。臣對云。此地從來多荒少熟。卽如訓錄中所載。元末之亂。亦起于此。今當大破常格。急發賑濟以安之。臣等擬令戶部議

處動支。各該州縣庫銀倉穀不足。則南京見貯銀米。儘有贏餘。可以協濟。民惟邦本。願特加聖心。上曰。依先生每議處。臣言皇上天性至仁。愛民如子。臣等每奏災傷。皇上卽惻然閔念。凡請蠲請賑。未嘗不慨然賜允。而臣等愚陋。亦仰體聖衷。無日不以憂民爲心。安民爲事。四方奏乞蠲貸。擬旨允行者。無月無之。而在外諸司。往往營私背公。剝民罔上。非惟不體皇上子惠困窮之德意。且不知臣等所以仰贊皇上之愚忠。殊可恨也。且人臣居官食祿者。皆有代君養民之責。故虞舜咨十有二牧。牧者養也。今有司坐視民瘼。痛癢不相關。如作舟疏云報災則日不敢報。此何不敢報之有。又云請賑則日不敢請。此何不敢請之有。不過推調支吾。歸怨君上。何嘗有憂民之心。卽如積穀一事。屢奉旨申飭。竟成虛文。彼互有自理贓贖。未嘗佐公家之急。則將焉往。臣等不勝憤懣。竊以爲此輩若遇聖祖。不知當以何法。上怒形於色曰。有司爲民害者。當着實重處。臣對云。今後有犯者。當如聖諭。臣復奏云。近年以來。正賦不加。府庫充實。互以考成法行。徵解如期之故。今大江南北荒歉如此。河南又有風災。畿輔之地。雨澤愆期。二麥將稿。將

來議蠲議賑。勢不容已。賦稅所入。必不能如往年。惟皇上量入爲出。加意撙節。如宮中一切用度。及服御之類。可減者減之。賞賚可裁者裁之。至如施捨一節。尤當禁止。與其惠緇黃之流。以求福利。孰若寬恤百姓。全活億兆之命。其功德爲尤大乎。上曰。然。今宮中用度。皆從節省。賞賜亦照常例。無所增加。臣云。皇上所謂常例者。亦近年相沿。如今年暫行。明年卽據爲例。非祖宗舊例也。臣不暇遠引。如嘉靖中世宗皇帝用度。最爲浩繁。然內庫銀兩尙有餘積。隆慶初年冬。餘庫尙餘百餘萬。今每歲金花銀百二十萬。每按季預進。隨取隨用。常稱缺乏。有限之財。安能當無窮之費乎。臣等職在輔導。爲國家長久之慮。不敢不盡言。惟皇上留神省察。

### 患病謝遣醫并乞假調理疏

臣自入夏以來。因體弱過勞。內傷氣血。外冒盛暑。以至積熱伏於腸胃。流爲下部熱症。又多服涼藥。反令脾胃受傷。飲食減少。四肢無力。立秋以後。轉更增劇。自以身當重任。

一向勉強支持。又恐驚動聖心。未敢具奏調理。乃蒙宸衷曲軫。特遣御醫診視。傳奉溫綸。飲以良劑。念臣狗馬微軀。不自愛慎。以上貽君父之憂。沐此鴻恩。捐糜難報。但臣自察病原。似非藥餌能療。惟澄心息慮。謝事靜攝。庶或可痊。仍乞聖慈垂憫。特賜旬月假限。再解閣務。俾得專意調理。倘獲就痊。臣卽勉赴供職。不敢久曠。臣不勝感激懇祈之至。

奉聖旨。覽卿謝。朕知道了。宜慎加調攝。不妨兼理閣務。痊可卽出。副朕眷懷。該部知道。

### 謝賜粥米食品疏

昨蒙聖恩。以臣患病。遣醫診視。該臣具奏陳謝。并請暫解閣務。賜假調理。奉聖旨。覽卿奏謝。朕知道了。宜慎加調攝。不妨兼理閣務。痊可卽出。副朕眷懷。該部知道。欽此。今日又蒙聖恩。特遣文書官太監孫斌。到臣私寓。臨視臣疾。頒賜鮮猪一口。鮮羊一腔。甜醬瓜茄一罇。白米二石。酒十瓶。臣謹力疾扶掖叩頭。祇領訖。念臣柳質易摧。鶩才旣竭。遘

此疾。痰益覺支離。方療曠之是虞。懼譴訶之意。道乃荷乾坤覆幬。父母愛憐。綸旨溫存。遣上醫而視診。寵頒稠疊。廬中使以光臨。切感難名。沉疴頓釋。九思未報。敢退託以求安。一息尙存。矢捐糜而罔惜。臣誠不勝感激圖報之至。奉聖旨。覽卿奏謝。朕知道了。禮部知道。

### 謝聖諭存問并賜銀兩等物疏

頃該臣以患病不能供職。具奏請假調理。仰戴天恩。特賜允俞。又遣醫診視。頒賜粥米食品等物。臣方銜感遵奉。間今日又蒙聖諭。張少師。朕數日不見先生。聞調理將痊。可茲賜銀八十兩。蟒衣一襲。用示眷念。先生其欽承。月初新涼。可進閣矣。欽此。外又頒賜甜食二盒。點心二盒。該司禮監太監張鯨恭捧到臣私寓。臣謹力疾扶掖叩頭。祇領訖。仰惟天光薦被。宸眷邛隆。非臣捐軀隕首所能報答。亦非敝楮殫毫所能宣謝。惟有鏤之肺腑。傳之子孫。期世爲犬馬圖效。驅馳而已。臣自奉俞音。得從休沐。屏居謝事。息

慮澄心。數日以來。始覺少減。願崇所由來已久。今祛之使去甚難。茲蒙溫諭。示以仲月之初。遂爲趨朝之候。帝星垂照。人間災崇當不讓而自除。天語定期。涼入秋中。必勿藥而有喜矣。臣誠不勝感泣頂戴之至。奉聖旨。覽卿奏謝。朕知道了。禮部知道。

### 謝遣中使趣召并賜銀八寶等物疏

臣以患病乞假調理。屢蒙聖慈軫念。賜資駢番。今日又蒙欽遣文書官太監邱得用到臣私寓。口傳天語視臣病痊之狀。趣其進見之期。又特賜銀八寶四十兩。甜食一盒。乾點心一盒。臣謹叩頭。祇領訖。臣養疴旅邸。條已再旬。雖遠天顏。曠離官守。而犬馬依戀之心。無時無刻不在皇上左右。數日以來。始覺痊可。再假五六日。俟氣體漸復。卽當欽遵聖諭。趨赴闕庭。臣仰荷殊錫。顛繫宸心。在念。雖父母之於愛子。有不能得者。臣誠不勝感泣圖報之忱。



張江陵全集 卷十

奉聖旨。覽卿奏謝。朕知道了。禮部知道。

# 張江陵全集卷十一 奏疏

## 考滿謝手勅賜賚疏

臣以一品歷俸十二年考滿。欽承聖恩。着臣復職。隨遣司禮監太監張誠恭捧手勅賜臣銀二百兩。坐蟒蟒衣各一襲。歲加祿米二百石。欽此。又蒙遣文書官吳忠頒例賞銀一百兩。紵絲四表裏。內大紅坐蟒一表裏。蟒衣一表裏。原封鈔一萬貫。茶飯卓五卓。羊十隻。酒五十瓶。各賚奉到臣私第。臣謹望闕叩頭祇領。訖伏念臣猥以凡庸。濫司鼎軸。夙荷先皇之末命。遂蒙聖主之深知。矢竭愚忠。用圖稱塞。顧涓流徒煩於注海。而寸石何望於補天。雖夜寐而夙興。自謂心力之已罄。苟日省而月試。終爲廩餼之虛糜。碌碌瘝官。又踰一紀。兢兢在事。尙抱百憂。吏職有一之未修。皆臣表率之無狀。民生有一之弗遂。皆臣調燮之多乖。屬茲考課之辰。宜正黜幽之典。詎意獲從寬政。因而復冒殊恩。謂臣備職有年。寵褒匡弼。察臣秉心不二。謬許精忠。雲漢章天。枉貴臣而宣播。篚筐載

道。拜珍貺之駢蕃。撫歲月以懷慙。戴榮光而增懼。敢不堅持晚節。益勵初忱。苟利國家。何髮膚之足惜。載銘肺腑。終啣結以爲期。奉聖旨。覽卿奏謝。朕知道了。禮部知道。

### 考滿滿恩命疏

臣以一品十二年考滿。該吏禮二部欽奉聖諭。議擬恩例。奉聖旨。卿等說的是。元輔受先帝遺命。輔朕十年。精忠大功。冠於先後。茲實歷一品已及十五年。恩數委當優異。着支伯爵祿。加上柱國太傅兼官。照舊給與。應得誥命。還寫勅獎勵。賜宴禮部。廕一子與做尙寶司司丞。用見朕崇獎元勳至意。欽此。臣聞命自天。措躬無地。竊念臣學術迂疎。行能謙劣。夙荷先皇顧託之重。誤蒙聖主倚任之專。待罪首弼。于茲十年。荏苒歲時。絲毫無補。今計歷俸一品。雖十有二年。自知無績可書。不敢妄干功令。特以三考黜陟。乃國家彝典。若有幽當黜。亦不得避。故不得已循例給由。以應明典。伏荷聖慈優容。准令

復職。尋親灑宸翰。降勅褒嘉。增祿賜金。迥出常數。篚筐牢醴。絡繹道途。臣頂載鴻恩。已不啻踰涯溢分矣。乃又特勅吏禮二部。將臣守制之年。俱作實歷月日。穹階勳祿。一朝并加。隆禮殊榮。冠絕前後。臣捫心自愧。何功何勞。可以堪此。夫人道所最忌者。非望之福。明主所深惜者。無功之賞。臣以駑下。謬當艱鉅。日夕兢兢。救過之不給。雖十年以來。四海乂安。百蠻賓服。皆皇上神威廣運。聖化旁敷。臣安敢貪天之功。以爲己力。而一旦獲此非望之福。冒此無功之賞。豈惟自速躋顛之咎。抑恐有累日月之明。此臣所以踟躕惶悚。而不能已於辭也。除誥命藉榮先世。勅獎風勵臣工。謹已祇領。其餘非分所安者。萬不敢當。伏望皇上俯鑒下誠。收回成命。俾仍舊次圖報將來。庶臣獲少安於陋庸。亦幸免於顛越矣。

奉聖旨。朕冲齡纘服。賴卿宏才亮節。竭誠匡輔。十年之間。政理修明。蠻夷率服。勳績顯著。簡在朕心。茲九年滿後。又經六載。方一舉疇庸之典。豈得仍執謙遜。宜勉遵成命。副朕眷懷。無復固辭。吏部知道。

## 再辭恩命疏

頃蒙皇上以臣一品十二年考滿。特加異恩。該臣具疏辭免。奉聖旨。朕冲齡繼服。賴卿宏才亮節。竭誠匡輔。十年之間。政理修明。蠻夷率服。勲績顯著。簡在朕心。茲九年滿後。又經六載。方一舉疇庸之典。豈得仍執謙遜。宜勉遵成命。副朕眷懷。無復固辭。吏部知道。欽此。臣恭誦宸綸。愈增惶悚。臣聞古卓犖奇偉之士。抱經綸匡濟之才者。恆以不逢明主。無所建立爲恨。伊尹曰。吾豈若使是君爲堯舜之君哉。吾豈若於吾身親見之哉。君不堯舜。其心愧恥。若撻於市。蓋感遇合之難也。臣閭巷韋布之士耳。非有碩德鴻才。可以庶幾古人之萬一。幸逢英主在上。臣得以讜劣佐下風。效啓沃。十年之間。志同道合。言聽計從。主德昭宣。聖化旁洽。伊尹之所願見者。臣親見之。其所愧恥者。臣幸無之。卽千萬世而下。頌我皇上聖德神功爲堯舜之主。臣亦得以竊附於堯舜之佐矣。此之榮遇。雖萬鍾之享。百朋之錫。豈足以擬之哉。故臣向者每被恩命。輒控辭而不可已者。良

以所慶幸者大。而爵祿非其所計也。乃若詔祿詔爵。雖朝廷馭臣之典。亦宜稍加節制。而不至橫益。乃足爲勸。三公穹階。五等厚祿。上柱崇勳。在先朝名德。咸不敢當。乃一朝悉舉而畀之於臣。所謂溢恩濫賞也。至於符節世賞。部宴大烹。臣前九年考滿。皆已冒叨。茲又豈可重領。反覆思惟。如墜淵谷。故不避煩瀆。再控於君父之前。伏望聖慈諒臣之衷。素無矯飾。矜其愚而俞允焉。碎首隕軀。不敢忘報。

奉聖旨。卿以古人自期。致君安國。不計爵祿。朕所深信。然豐功偉績。社稷利賴。朝廷自當有崇報之典。卿乃固執謙遜。控辭益切。朕心殊有未安。重違卿意。特准辭免。伯祿上柱國部宴。用成卿勞謙之美。其餘悉宜勉承。乃見我君臣相體篤誼。慎勿又辭。吏部知道。

### 奉諭整肅朝儀疏

伏奉聖諭。朕近來每視朝。見百官穿雜色衣服。繫雜色帶。都不按品級。又行禮之際。咳

嗽吐痰。孰爲敬也。孰爲不敬。與先生等說。傳與鴻臚寺傳示百官。今後再有這等的。着該科并鴻臚寺指名參奏。欽此。臣等當卽傳示該寺。訖。看得禮莫大於君臣之交。分莫嚴於上下之辨。况朝參之際。天顏咫尺。尤臣子所當致敬而不可忽者。孔子曰。事君盡禮。人以爲諂也。論語鄉黨一篇。記孔子見君之時。自入門以至於升堂。敬謹之心。不敢以一時少懈。人見其鞠躬踧踖。屏氣斂容。議其爲諂。而不知事君之禮當如是也。近日以來。朝參之禮。委覺少懈。百官衣帶。多有僭越。入班之時。吐唾在地。進退行走。舒徐搖擺。謝恩見辭。致詞不恪。禮官不行申明。御史不行糾奏。臣等亦屢加戒諭。而人情玩狎。積習難改。安知背非後議。不有以臣等爲諂者乎。今蒙天語申嚴。衆心始知所儆。後有犯者。着鴻臚寺及侍班御史指名參奏。必罪不宥。庶朝廷之禮尊。而上下之分明也。

請蠲積逋以安民生疏

竊聞致理之要。惟在於安民。安民之道。在察其疾苦而已。邇年以來。仰荷聖慈軫念元

元。加以周卹。查驛傳。減徭編。省冗員。懲貪墨。頃又特下明詔。清丈田糧。查革冒免。海內  
訢訴。如獲更生矣。然尙有一事爲民病者。帶徵錢糧是也。所謂帶徵者。將累年拖欠搭  
配分數。與同見年錢糧一併催徵也。夫百姓財力有限。卽年歲豐收。一年之所入。僅足  
以供當年之數。不幸遇荒歉之歲。父母凍餓。妻子流離。見年錢糧尙不能辦。豈復有餘  
力完累歲之積逋哉。有司規避罪責。往往將見年所徵。迅作帶徵之數。名爲完舊欠。實  
則減新收也。今歲之所減。卽爲明年之拖欠。見在之所欠。又是將來之帶徵。如此連年  
誅求無已。杼軸空而民不堪命矣。况頭緒繁多。年分混雜。徵票四出。胥役沓至。愚民竭  
脂膏以供輸。未知結新舊之課。里胥指交納以欺瞞。適足增谿壑之欲。甚至不才官吏。  
因而獵取侵漁者。亦往往有之。夫與其敲扑窮民。朘其膏血。以實奸貪之囊橐。孰若施  
曠蕩之恩。蠲與小民。而使其皆戴上之仁哉。昨查戶部。自隆慶元年起。至萬歷七年止。  
各省直未完帶徵錢糧一百餘萬。兵工二部馬價料價等項不與焉。而蘇松兩府拖欠  
至七十餘萬。蓋以彼處稅糧原重。故逋負獨多。其間固有豪右奸猾。恃頑不納者。然窮





## 進大閱圖頌卷疏

茲者恭遇皇上修舉曠儀。躬行大閱。益弘祖烈。丕振皇威。誠修內攘外之鴻猷。致治保邦之長策也。臣濫叨首輔。獲奉屬車。快覩之餘。不勝慶忭。謹撰頌詞一首。詩歌一章。并繪圖進獻。雖思淺詞蕪。未足鋪張盛美。然述真紀實。庶以傳示將來。伏乞聖慈俯垂睿覽。臣無任鼓舞欣躍之至。謹具大閱圖詠一卷。隨本恭進以聞。

## 給假治疾疏

臣自去秋患下部熱病。仰荷聖慈垂憫。賜假調理。雖標疽少減。而病根未除。纏綿至今。醫藥罔効。近訪得一醫人自家鄉來。自言能療此疾。屢經試驗。其術頗精。但須靜養半月二十日。乃得除根。臣伏自念年迫衰遲。久嬰疾患。比者恭侍講讀。皇上見臣肌體羸瘦。詢問左右。察臣所苦。是大馬賤軀。蓋未嘗不仰塵聖念也。今幸得此醫人專意治療。

竊冀痊復有日。足以仰慰君父綏念之懷。故敢不避煩瀆。仰祈聖慈俯賜寬假二旬一月。暫免朝參侍講。至於閣中事務。稟擬題奏等項。容臣於私寓辦理。免其出入趨走之勞。庶幾醫藥靜專。奏効可覩。痊可之日。卽趨赴闕庭供事。不敢久曠也。臣誠怙恃恩眷。仰瀆宸嚴。不勝惶悚戰慄之至。

### 請乞優禮耆碩以光聖治疏

臣等伏覩先年恩詔一款。大臣二品以上致仕在家。年及八十者。有司存問。九十以上者。遣官存問。此舊例也。至于輔弼重臣。齒德俱尊。勞績茂著者。又與他官不同。如嘉靖年間致仕大學士謝遷。王鏊。皆七十以上。毛紀。賈詠。皆八十。俱蒙特恩遣官存問。是先朝優崇輔弼。尊禮耆舊。亦有不拘常例者。臣等看得原任少師大學士徐階。當世宗時承嚴氏亂政之後。能矯枉以正。澄濁爲清。懲貪墨以安民生。定經制以核邊費。扶植公論。獎引才賢。一時朝政修明。官常振肅。海宇稱爲治平。皆其力也。是時先帝潛居藩邸。

世廟一日忽有疑於先帝命檢成祖之於仁宗故事。階爲之從容譬解。其疑乃釋。此一事則惟臣居正一人知之。諸臣皆不得聞也。及先帝嗣登大寶。階時爲翼戴首臣。皇上正位東宮。又嘗預冊立大議。先後勞績。皆不可泯。今致仕家居。年已八十。其年壽與毛紀等相同。而位望勳庸。抑又過之。所有存問一節。似應特從優厚。以彰盛典。如蒙皇上俯念階爲先朝元輔。當代舊人。特勅該部查照嘉靖年間事例。差行人一員。賚勅前去存問。仍量加賞賚。用示優崇。一以昭皇上尊禮耆宿。褒敘忠賢之美。一以見巖居之下有天壽平格之臣。皆太平之盛事也。

奉聖旨。卿等說的是。徐階輔佐皇祖。翼戴先帝。忠勤端亮。戎著勳勞。今年及八旬。足稱榮壽。准卿等奏。寫勅差官存問。仍賜銀五十兩。大紅紵絲蟒衣一襲。絲段四表裏。以示朕優禮耆碩之意。禮部知道。欽此。皇帝勅諭致仕少師兼太子太師吏部尙書建極殿大學士徐階。朕聞古者公孤在朝。則坐而論道。更老在學。則憲而乞言。惟尊賢尙齒之儀。實褒德勸功之典。矧言耆碩。著有勳庸。世咸仰爲達尊。朕豈靳于殊數。卿才優王佐。

學擅儒宗。早馳譽于清華。歷試功于盤錯。簡知皇祖。晉陟台司。履忠順以事一人。持廉靖而先百辟。當儉王之旣黜。更治化以維新。懲貪墨而仕路肅清。獎忠直而真才彙進。申明典制。多安邊裕國之籌。默運樞機。有尊主庇民之略。定邦本于危疑之際。宣上德于彌留之中。翼我先皇。嗣基圖而撫方夏。保予冲子。升儲貳以奉宗祧。方倚重于黃扉。遂乞閑于綠野。後先多績。朝廷資其典刑。終始完名。寰寓想其風采。自天純佑。俾爾壽康。屆年八旬。歛時五福。匪直先民之楷式。實惟盛世之禎祥。朕祇適先猷。追惟舊德。粵稽功載。申錫寵章。茲特遣行人塗時相。賚勅存問。仍賜銀五十兩。大紅紵絲蟒衣一襲。彩幣四表裏。以示朕眷。於戲。衛武雖在耄年。箴儆不忘于國。晉公已解幾務。安危獨係其身。惟我家臣。不殊前哲。其茂綏蕃祉。慎保修齡。尙謀黃髮之詢。用慰蒼生之望。欽哉。

給假謝恩疏

臣以患病給假調治。今日伏蒙天恩。賜銀一百兩。蟒衣一襲。甜食二盒。乾點心二盒。燒

割一分。特遣司禮監太監張鯨臨寓賜問。臣方用藥敷擦患處。不能行動。謹伏枕叩頭。令男臣翰林院編修張嗣修。修撰張懋修。錦衣衛指揮僉事張簡修。望闕叩頭代領訖。臣久嬰疾病。仰荷聖慈。賜假治療。數日以來。試用醫人。委覺有效。從此專意靜攝。庶幾痊可有期。但以狗馬微軀。屢動聖懷。注念慰問。繾綣錫予。駢蕃感極。涕零不知所報。

### 恭謝賜問疏

今日伏蒙聖恩。特遣文書官吳忠頒賜銀八寶四十兩。銀葉二十兩。甜食二盒。乾點心二盒。燒割一分。臨臣私寓。俯賜存問。臣以病尙不能起。謹伏枕望闕叩頭。祇領訖。緣臣宿患雖除。而血氣大損。數日以來。脾胃虛弱。不思飲食。四肢無力。寸步難移。須再假二十餘日。息靜休攝。庶可望痊。監文書官所親見。非敢託故也。

### 乞骸歸里疏

臣自患病以來。靜攝調治。日望平復。乃今三月。元氣愈覺虛弱。臥起皆賴人扶。肌體羸疲。僅存皮骨。傍人見之。亦皆爲臣悲悼。及今若不早求休退。必然不得生還。且古有災異。則策免三公。今廷臣之中。無居三公之位者。獨臣叨竊此官。頃者蒼筤出於西方。日食午陽之旦。伏思厥咎。惟在於臣。正宜罷免。以應天變。伏望慈聖垂憫。諒臣素無矯飾。知臣情弄獲已。早賜骸骨。生還鄉里。倘不卽填溝塗。猶可效用於將來。臣不勝哀鳴懇切戰慄隕越之至。

奉聖旨。朕久不見卿。朝夕殊念。方計日待出。如何遽有此奏。朕覽之。惕然不寧。仍准給假調理。卿宜安心靜攝。痊可卽出輔理。用慰朕懷。吏部知道。

### 恭謝手勅疏

今日伏蒙聖恩。特降手勅諭太師張太嶽。朕自冲齡登極。賴先生啓沃佐理。心無所不盡。迄今十載。四海昇平。朕垂拱受成。先生真足以光先帝顧命。朕方切倚賴。先生乃屢

以疾辭。忍離朕耶。朕知先生竭力國事。致此勞瘁。然不妨在京調理。閣務且總大綱。着次輔等辦理。先生專養精神。省思慮。自然康復。庶慰朕朝夕惓惓之意。欽賜元輔銀八寶四十兩。甜食二盒。乾點心二盒。燒割一分。該司禮監太監魏朝賚捧到臣私寓。臣謹伏枕叩頭。祇領訖。臣病困之餘。不能措辭。感謝之悰。言不能悉。

### 再懇生還疏

昨該臣具疏乞休。奉聖旨。朕久不見卿。朝夕殊念。方計日待出。如何遽有此奏。朕覺之。惕然不寧。准仍給假調理。卿宜安心靜攝。痊可卽出輔理。用慰朕懷。吏部知道。欽此。縷縷之衷。未回天聽。憂愁抑鬱。病勢轉增。竊謂人之欲有爲於世。全賴精神鼓舞。今日精力已竭。強留於此。不過行尸走肉耳。將焉用之。有如一且溘先朝露。將使臣有容死之痛。而皇上亦虧保終之仁。此臣之所以跼蹐哀鳴。而不能已於言也。伏望皇上憐臣十年拮据盡瘁之苦。早賜骸骨。生還鄉里。如不卽死。將來效用尙有日也。



奉聖旨。卿受皇考顧命。夙夜勤勞。弼成治理。朕方虛已。仰承眷倚。甚切。卿何忍遽欲捨朕而去。又有此奏。覽之動心。宜遵前旨。專心靜攝。以俟。痊日輔理。慎勿再有所陳。吏部知道。

### 送起居館講太寶箴記事

萬歷四年二月二十九日。上於文華殿背誦太寶箴。先是上以太寶箴爲書字影格。臣因奏此文甚切於君德治道。皇上勿徒書寫。須熟記其詞。又勿徒記誦。須通曉其義。乃爲有益。上以爲然。臣乃爲注解一篇以進。至是日上御文華殿。召臣至御座前。上起立。高舉太寶箴一冊。面授臣。臣受冊北面立。上高聲背誦一遍。一字不差。又玉音清圓。悠遠。餘響繞殿。誠萬壽之徵也。背畢。臣又進講。一一陳說大義。上皆洞其微旨。所引瓊宮瑤臺。糟邱酒池。開羅啓祝。援琴命詩等事。悉知其顛末。講至縱心乎湛然之域一條。上曰。此不過言人當虛心處事耳。臣因舉手賀曰。只虛心二字。足以蔽此條之義矣。夫人

之所以不虛者。私意混雜故耳。如水本至清。以泥沙溷之。則不清。鏡本至明。以塵垢蔽之。則不明。人主誠能涵養此心。除去私欲。如明鏡止水。則好惡刑賞無不公平。而萬事理矣。上曰然。是時左右侍臣聽之。無不欣躍稱慶者。次日特賜臣銀八寶二十兩。以酬昨日講讀之勞。

### 送起居館論邊情記事

先是薊遼總督梁夢龍塘報虜酋土蠻大舉寇遼東。輔臣張居正以警報封奏。上遣文書官命居正等擬旨諭兵部議驅勦之策。居正等入奏言九月初間有北虜俺答部下頭目恰合吉。差人於土蠻營中。偵知土蠻欲糾衆向遼講求貢市。臣卽馳語總督梁夢龍。令其再偵的實。多方設備。傳示遼東總兵李成梁。巡撫周詠。虜若糾大衆至。勿輕與戰。但堅壁清野。使之野無所掠。虜氣自挫。又使梁夢龍親率師東行。發勁兵二枝出山海關。爲遼東聲援。令薊鎮總兵戚繼光選精銳乘間出塞。或擣其巢。或邀其歸。以撓之。

今據報各官。具如臣指。梁夢龍已東駐山海。遣參將許汝繼楊栗出關截殺。戚繼光移駐一片石。伺間邀擊。遼東收保已畢。虜以十月初二日至寧前。向中所地方。此中地狹人稀。虜衆無所掠。勢不能久。旦夕必已退遁。今勅本兵姑議驅勦已後。相機別議。且彼中戒備頗嚴。諒無疎失。伏惟皇上少寬聖懷。上曰。先生費心處置。朕知道了。乃叩頭出。

# 張江陵全集卷十一奏疏

附表

## 論時政疏

臣聞明主不惡危切之言以立名。志士不避犯顏之誅以直諫。是以事無遺策。功流萬世。故嫠婦不恤其緯。而抱宗國之憂。臣雖卑陋。亦廁下庭之列。竊感當時之事。目擊心懷。夙夜念之熟矣。敢披肝胆。爲陛下陳之。伏惟聖明少留意焉。臣聞天下之勢。譬如一身。人之所恃以生者。血氣而已。血氣流通而不息。則薰蒸灌溉乎百肢。耳目聰明手足便利而無害。一或壅闕。則血氣不能升降。而臃腫痿痺之患生矣。臣乃推今之事勢。血氣壅闕之病一。而臃腫痿痺之病五。失今不治。後雖療之。恐不易爲力矣。臣敢昧死以聞。臣聞天地交而其道通。上下交而其志同爲泰。泰者通也。天地不交。其志不同爲否。否者塞也。故天地交而後能成化育之功。上下交而後能成和同之治。臣不敢以久遠喻。直以近事言之。昔者孝宗皇帝之急於求治也。早朝晏罷。親信大臣。大臣奏事。輒屏

左右近侍之人。或日昃不倦。臺諫有言。皆虛已納之。雖甚狂悖。不罪也。當此之時。百工奉職。官無留事。德澤旁洽。流於無窮。一時際會之盛。至今可想也。今陛下卽位以來。二十八年矣。自成祖以後。歷年之久。未有過於陛下者。功化之美。固宜上追唐虞。而近配烈祖。乃今陰陽不調。災異數見。四夷未賓。邊塵屢警。猶不能不勤宵旰之憂者。意奉職者未得其人。與抑上下之志。猶有所未通耳。今羣臣百寮。不得望陛下之清光。已八九年。雖陛下神聖獨運。萬幾之務。無有留滯。然天道下濟而光明。自古聖帝明王。未有不親近文學侍從之臣。而能獨治者也。今陛下所與居者。獨宦官宮妾耳。夫宦官宮妾。豈復有懷當時之憂。爲宗社之慮者乎。今大小臣工。雖有懷當時之憂。爲宗社之慮者。而遠隔於尊嚴之下。懸想於於穆之中。逡巡嚙口。而不敢盡其愚。異日以臺諫不言之故。常加譴責矣。是臣下不匡之刑也。而至今無一人舉當時之急務。以爲言者。無已。則毛舉數事以塞責。夫以刑罰驅之。而猶不敢言。若是者。何雷霆之威不可干。神明之尊不可測。陛下虛已好諫之誠。未盡暴著於臣下故也。是以大臣雖欲有所建明。而未易進。

小臣雖欲有所獻納。而未敢言。由此觀之。血氣可謂壅闕而不通矣。是以癰腫痿痺之病。乘間而生。其大者曰宗室驕曠。曰庶官濂廣。曰吏治因循。曰邊儲未修。曰財用大匱。其他爲聖明之累者。不可以悉舉。而五者乃其尤大較著者也。臣聞今之宗室。古之侯王。其所好尚。皆百姓之觀瞻。風俗之移易所係。臣伏觀祖訓。觀國朝之所以待宗室者。親禮甚隆。而防範亦密。乃令一二宗藩。不思師法祖訓。制節謹度。以承天休。而舍侯王之尊。競求真人之號。招集方術遁逃之人。惑民耳目。斯皆外求親媚於主上。以張其勢。而內實奸貪淫虐。陵轍有司。朘刻小民。以縱其欲。今河南撫臣。又見害矣。不早少創之。使屢得志。臣恐四方守臣。無復能行其志。而尾大之勢成。臣愚以爲非細故也。所謂宗室驕恣者此也。臣聞才者材也。養之貴素。使之貴器。養之素則不乏。使之器則得宜。古者一官。必有數人堪此任者。是以代匱承乏。不曠天工。今國家於人才。素未常留意以蓄養之。而使之又不當其器。一言議及。輒見逐去。及至缺乏。又不得已輪資逐格而敘進之。所進或頗不逮所去。今朝廷濟濟。雖不可謂無人。然亦豈無抱異才而隱伏者乎。

亦豈無懼微玷而永廢者乎。臣愚以爲諸非貪婪至無行者。盡可隨才任使。效一節之用。况又有卓卓可錄者。而皆使之槁項黃馘以終其身。甚可惜也。吏安得不乏。所謂庶官瘝曠者此也。守令者。親民之吏也。守令之賢否。監司廉之。監司之取舍。銓衡參之。國朝之制。不可謂不周悉矣。邇來考課不嚴。名實不覈。守令之於監司。奔走承順而已。簿書期會爲急務。承望風旨爲精敏。監司以是課其賢否。上之銓衡。銓衡又不深察。惟監司之爲據。至或舉劾參差。毀譽不定。賄多者階崇。巧宦者秩進。語曰。何以禮義爲。才多而光榮。何以謹慎爲。勇猛而臨官。以此成風。正直之道塞。勢利之俗成。民之利病。俗之污隆。孰有留意者乎。所謂吏治因循者此也。夷狄之患。雖自古有之。然守備素著。外侮不能侵也。今虜驕日久。邇來尤甚。或當宣大。或入內地。小入則小利。大入則大利。邊圉之臣皆務一切。幸而不爲大害。則欣然而喜。無復有爲萬世之慮。逮難勝之策者。頃者陛下赫然發奮。激厲將士。雲中之戰。遂大克捷。此振作之效也。然法曰。無恃其不來。恃吾有以待之。乘戰勝之氣。爲預防之圖。在此時矣。而迄於無聞。所謂邊備未修者此也。

天地生財。自有定數。取之有制。用之有節。則裕。取之無制。用之不節。則乏。今國賦所出。仰給東南。然民力有限。應辦無窮。而王朝之費。又數十倍於國初之時。大官之供。歲累巨萬。中貴徵索。谿壑難盈。司農屢屢告乏。夫以天下奉一人之身。雖至過費。何遂空乏乎。則所以耗之者。非一端故也。語曰。三寸之管。而無當。不可滿也。今天下非特三寸而已。所謂財用大匱者。此也。五者之弊。非一日矣。然臣以爲此特臃腫痿痺之病耳。非大患也。如使一身之中。血氣升降而流通。則此數者。可以一治而愈。夫惟有所壅閉而不通。則雖有鍼石藥物。無所用。伏願陛下。覽否泰之原。通上下之志。廣開獻納之門。親近輔弼之佐。使羣臣百寮。皆得一望清光。而通其思慮。君臣之際。曉然無所關格。然後以此五者分職而責成之。則人人思效其所長。而積弊除矣。何五者之足患乎。臣聞扁鵲見桓公曰。君有疾。不治將深。桓公不悅也。再見。又言之。三見。望之而走矣。人病未深。固宜早治。不然。臣恐扁鵲望之而走也。狂瞽愚臣。輒觸忌諱。惶悚無已。雖然。狂夫之言。而聖人擇焉。伏惟聖明少留意於此。天下幸甚。



代謝賜御製答輔臣賀雪吟疏

嘉靖三十年十二月某日。恭遇皇上躬祈雪澤。應期降瑞。臣等謹已奉表稱賀。某日伏蒙聖恩。遣某齋捧御製俯答賀雪吟七言詩一章。頒賜臣等者。誠懽誠忭。稽首頓首上言。伏以元殿延禧。已沐祥英之降澤。皇情興豫。驚看容藻之流光。湛恩隨靈滯以交流。奎翰與瑤華而繼曜。非天人之協應。詎動宸歡。顧翊贊以何功。謬承眷獎。榮逾華袞。寶重琬琰。俯愧荒蕪。仰瞻雲漢。茲蓋恭遇我皇上德邁始初。功登三五。日躋聖敬。至道合乎重冥。天授神靈。多能乃其餘事。茲者軫念窮民。躬祈明覲。勤誠潛運。渥澤隨敷。臣等仰格天之洪化。自知雀躍難勝。而皇上鑒翼聖之微勞。遽有鴻慈遍及。爰勤睿思。寵以宸章。欣甲子之應辰。驗化機之不爽。寶墨雲緘。宛降從於天上。瑤編日麗。忽光動於人間。且事本爲民歌。由發德。是宜擬君臣相說之樂。寧同黃竹之酣吟。尤爲被金石不朽之文。奚羨幽蘭之麗曲。顧臣等冒忝公孤。謬參密勿。龍光貴及。知宜和乎陽春。鰲負奚

堪。賴受持於玄力。競覩絲綸之煥。俱深犬馬之情。敢不益勵初心。祇承休命。事吾君如事天。忠敬敢忘於夙夜。捐微軀而殉國。涓埃期補於滄溟。

### 奏爲辭免恩命事

隆慶元年二月初九日。准吏部咨。節倖勅諭。原講官今禮部右侍郎兼翰林院學士張陞。吏部左侍郎兼東閣大學士。著入內閣。同徐階等辦事。如勅奉行。欽此。非常之命。特出宸衷。不次之恩。濫及庸品。臣不勝感激。不勝惶悚。竊以內閣之職。幾務是司。以代王言。以熙帝載。必有宏深奧衍之學。蘊經綸康濟之才。然後足以協贊皇猷。弼成聖化。臣學不足以造古人之微。識不足以通當世之務。既無才望。又鮮集勞。徒以東朝勸講之微勤。幸逢聖上龍飛之景運。因緣際遇。驟被恩慈。擢貳銓衡。晉參密勿。力微於蚊蟻。任重於邱山。退自省循。若爲堪受。昔唐李泌陸贄。遇代德二主於藩邸。先臣楊溥劉健。事仁孝兩廟於青宮。咸以舊勞。遂躋台席。然當時不以爲倖得。後世咸仰其休聲者。蓋以

四臣聞望素隆。勳庸茂著。故也。臣之譴劣。何足以遠企前賢。近希先哲。而一旦以後進之士。廁迹於老成耆舊之間。以庸衆之流。濫竽於俊乂英賢之列。將何以致物情之允協。昭天鑒之無私。卽微人言。能不自愧。况聖明臨御之始。正海內觀聽之時。倘舉措不愜於公評。則激勸有虧於國典。躋顛之咎。寧獨在臣。伏願皇上察臣惻誠。非由矯飾。特停成命。改授時賢。俾臣仍以舊官勉圖自効。庶程才量力。在微臣免餽覆之憂。爲官擇人。在國家有棟隆之吉。臣無任戰慄隕越待命之至。

### 奏爲遵詔自陳不職乞賜罷斥以光新政事

臣復覩詔書內一款。六部等衙門四品以上官并學士。俱著自陳去留。取自上裁。欽此。伏念臣以一介草茅。叨塵法從。粵從潛邸。獲侍講筵。雖葵藿之忱。向傾爲切。奈疲鷲之質。驅策難前。聞見空疎。無以備詢咨而裨聖學。文詞蹇拙。無以參著作而藻皇猷。退自省循。蔑聞一善。虛縻廩祿。已踰廿年。茲聖明蒞政之初。正人心願治之日。所宜汰除冗

曠。登進賢良。振興勵翼之風。大明黜陟之典。而臣猥以庸質。濫長詞林。徒積罪戾之多。豈稱清華之選。伏望皇上。普離明而察衆職。奮乾斷以警官邪。如臣庸愚。特賜罷斥。庶品流有別。非才不得以苟容。觀聽一新。賢者無妨於登用。其於初政。實爲有光。臣無任戰慄隕越。懇祈俟罪之至。

### 賀瑞雪表

伏以璇霄延貺。九重鑒昭格之誠。玉宇飄颻。率土霑濡之澤。先潤柔而灑潤。消災疹以回和。喜氣春融。歡聲雷動。恭惟皇上。道孚冥漠。功卽康田。凝神而五氣司辰。享帝而萬靈受職。艱難乃逸。淵衷每切於閭閻。惕勵無忘。精禱尤勤於夙夜。屬以歲事告成。玄冥節屆。慮食乃萬民之命。雪爲五穀之精。北風始勵。六花詎曜於彌空。東作將殷。三白更期於盈尺。爰啓殿壇而默叩。載瞻昊闕以虔祈。爐烟繚繞。飛爲天外之同雲。御氣氤氳。散作寰中之瑞靄。始入空而漠漠。繽紛乎散絮飛瓊。竟積野以皚皚。璀璨乎方珪圓

璧閣閭曉闢。月映彤墀。御苑春回。花飛綺樹。瞻山則千巖俱白。疑驅溟勃之層波。望野則萬頃同輝。寧羨瀛洲之九斛。根芟陪潤。知蠹賊之潛消。關塞凝寒。見狼烟之已熄。且玄律甫周乎三限。而皇穹已鑒於重施。天且不違。時如有待。斯誠一德感應之徵。萬科豐登之慶也。臣等生逢盛世。職忝清班。歌奕奕於梁園。愧乏揆天之思。誦穰穰於商頌。願揚治世之音。伏願景福日新。宸禧雲擁。握五帝之瑤圖而凝命。調兩間之玉燭以當天。求千斯箱。求萬斯倉。朝野咸歌乎帝力。如海之增。如山之阜。富壽永迓乎天休。

代徐相公賀瑞雪表

伏以玄宮延貺。皇仁潛達於重冥。昊闕承禧。靈澤遍沾於率土。迸百花而洒潤。幹一氣以回和。喜溢堯衢。歡騰禹甸。恭惟皇上。動合天心。功侔神宰。享帝而萬靈受職。山川鬼神畢寧。握圖而五氣司辰。雨暘寒燠。時若屬以陰氣方凝。盛德在水。欲兆盈箱之積。躬祈三白之祥。祇奉明禋。肅承冥感。爐烟騰靄。同雲將御氣俱浮。綸旨傳溫。玉屑與瑤華

並降。始自九重而漠漠。俄同萬頃以皚皚。曜色天池。不夜恍璇霄之月。飄囊禁樹。先春飛玉苑之花。且厚不封條。和能消沍。海宇春回。已迓寰中瑞靄。關山凍合。還清塞外烽烟。茲蓋聖德潛孚。無高而不格。故天心順應。有感而必通者。臣等幸際熙朝。屢逢釐事。恩暉藉被。慶澤沾濡。擬兔園興積雪之謠。敢謂抽毫能賦。續麟紀書有年之瑞。終期載筆以從。伏願景福茂臻。宸禧流演。得天人之佑助。萬年永迓乎玄庥。聽朝野之謳歌。四國咸忘乎帝力。

### 紫極殿成賀表

紫宮肇建。一人居北極之尊。玄貺申綏。萬壽叶南山之祝。保定孔固。式廓彌增。百辟雲從。萬方星拱。欽惟皇上居德廣淵。宅心恭穆。纘六七作賢聖之緒。若築室旣肯構堂。培億萬年高厚之基。迨未雨預綢繡戶。緝熙至道。聿嚴軒后之宮。恢廓弘圖。載考宣王之室。爰涓穀旦。特命共工。揆景屬定之方中。闢地據乾之正位。使民以悅。役未踰時。荷神

之休。成於不日。蘭橈桂棟。凌霄漢以高騫。繡栱朱欄。與烟霞而競麗。卓哉偉構。揭以鴻名。紫極巍崇。瓊榜煥微垣之象。壽清嚴邃。璇題快景曜之輝。際朱鳥之拱宸。撫翠華而時御。葆順百祿。綏純嘏於燕閒。賓禮萬靈。薦馨香於夙夜。棟隆斯吉。寢成孔安。離麗當陽。天德彌光乎日月。鼎新凝命。帝居益壯於山河。臣等幸際清時。叨塵法從。幘幪大廈。莫酬怙冒之恩。黼黻洪猷。敢上奐輪之頌。伏願宸釐丕熾。昊眷郅隆。作君作師。而寵綏四方。保金甌於有永。曰壽曰康。而斂時五福。綿寶祚於無疆。

### 紫宸宮賀表

伏以宸居鼎建。萬方拱帝坐之尊。天蹕賁臨。億載鞏皇圖之固。培隆基而益永。膺篤眷以維新。慶洽寰區。懽騰朝野。恭惟皇上心涵淵穆。道貫清寧。締造惟艱。光啓中興之業。構堂是肯。懋昭大有之功。奄四海以爲家。恆念綢繆於牖戶。控八荒而在闔。益堅壯麗之山河。茲承與宅之弘恩。載飭常居之偉制。使民以悅。役匪俟於淹時。荷神之庥。功遂

成於不日。聳千櫺而赫奕。疊萬拱以峻嶒。穹棟雲連。闔闔洞開於黃道。周廬星列。鈞陳環衛乎紫垣。帝樞臨北斗之高城。仙館闢西清之勝境。既以頤聖躬而綏豈樂。因之披玄職以發道真。法駕時乘。翠華至止。萬靈訶護。慶爰居爰處之宜。五位尊安。介俾熾俾昌之祉。迓瓊庥於有羨。凝寶命以無疆。臣等幸際熙明。夙叨怙冒。傾心黼座。不勝就望之忱。稽首瑤塔。敢上奐輪之頌。伏願紫禧繁錫。宸貺茂增。玉燭均調。坐軒后之合宮而延和納佑。金甌永保。受天皇之祕籙而久視長生。

### 賀瑞穀表一

嘉靖四十五年八月初七日。該苑田督職上瑞穀。三穗者四本。二穗者九十九本。仰惟仙誕屆期。玄禎疊現。而瑞穀之登。尤爲萬國和一之象。九重福壽之徵。臣等誠懼誠忭。謹稽首頓首稱賀者。伏以瑤穹篤眷。一人膺戩穀之庥。寶穡敷祥。萬寓洽豐登之慶。自天田而挺秀。先虹旦以申禱。舜畝懽騰。堯衢喜溢。恭惟皇上道參惟大。德並日生。艱難



每切乎人依。所其無逸。籲禱素孚乎帝鑒。享於克誠。風雨節而寒暑時。默順璣衡之運。府事修而民物阜。永培邦國之基。協氣交融。休聲旁達。惟玄化均調於玉燭。至歲功疊。奏於金穰。睠此嘉生。尤爲仁卉。儲精毓萃。夙含渥澤於仙疇。合穎連莖。特表殊禎於聖世。際五百載貞元之會。介億萬年富壽之祺。應時旣叶於幾先。取義尤彰於妙合。穗則隻歧而三秀。昭參天一地之功。幹則四億而九奇。符易象箕疇之數。蓋聖人得其位。斯得其祿。將享玉食於無窮。肆上帝降年永而降年康。丕顯珍圖於有赫。休哉靈貺。邈矣希聞。臣等幸際熙明。叨塵侍從。質同稊稗。栽培夙荷乎天工。心切芹葵。歌頌敢忘乎帝力。伏願宸釐茂集。睿算崇增。時常和而歲常豐。光撫盈成之寶祚。日之升而川之至。益綿鞏固之瑤齡。

賀瑞穀表二

嘉靖年八月。該鄭府廬江王奏進瑞穀。一莖五穗者一本。一莖三穗者二本。一莖二穗

者六十本。仰惟聖德格天。上玄敷祐。爰覩殊祥之應。適當聖誕之期。此誠萬壽無疆之徵。海宇大和。國家康庶之象也。臣等誠懼。謹稽首頓首稱賀者。伏以萬寶告成。四海協嘉生之瑞。五岐擢秀。九重徵明德之馨。二氣委和。實昭靈貺。臣等切惟種之美者曰穀。蒸民之富庶由此而臻。國之重者曰祀。上帝之粢盛於是乎出。故有年稱慶。振古如茲。而聚人曰財。莫斯爲切。苟順成於歲事。卽允協於休徵。况乎質本一莖。歧分數穗。均沾土脈。獨合幹而芘芘。共飫天倪。乃萃精而薿薿。玉粒表勻圓之美。金穰獲堅好之繁。瑞豈虛生。時因吉會。茲蓋伏遇皇上道合重玄。仁涵庶類。迪知王業。念稼穡之艱難。參贊化功。致雨暘之時若。明德上通於穹昊。洪恩誕布於多方。迺茲嘉瑞之生。正直昌熙之運。驗天庥之茲至。期地寶之聿呈。遠從河洛之墟。爰獻闕庭之上。廟宮薦享。馨香格祖考之靈。臣庶同觀。普率荷神明之貺。彼金芝競麗。未同合穎之嘉。雖朱草抽華。奚補盈箱之富。豐年爲瑞。有秋書太史之篇。和氣致祥。久道臻聖人之化。臣等叨承殊渥。雙調無補於天工。快覩奇禎。忻頌倍加於恆品。太平有象。豈徒見物阜民康。聖壽無疆。咸

共祝天長地久。

### 賀瑞鹿表

茲者永和王以白鹿上進。臣等仰惟天垂洪眷。帝介長生。昭厥有赫之純釐。錫此非常之上瑞。誠聖壽萬年無疆之顯兆也。臣等誠懼誠忭。稽首頓首稱賀者。伏以玉誕迎祥。際千載貞元之會。瑤光挺瑞。兆萬年壽祿之徵。化禎特應乎昌辰。駿德永綏乎渥眷。一人納祐。八表騰歡。仰惟皇上淵穆凝神。溥將受命。斂時五福。用敷錫於庶民。祇奉三無。以發育乎羣品。大順洽雍熙之化。至誠收悠久之功。協氣光盈。殊庥叢委。睠茲玉毳。載表瓊禧。曩屢見於名區。已荷駢蕃之貺。茲適逢於景旦。尤彰會合之奇。矧當金籙之祝釐。爰自庚方而薦祉。天惟純祐。將扶上壽以彌堅。物乃先知。不顯員符於有象。向仙階而騰倚。何殊虞獸之踰躑。託御苑以棲遊。長伴周禽之嚮嚮。素影分輝於南極。霜姿煥彩於西清。惟昔軒后乘圖。一啣環而獻壽。迨至玄君降李。再託駕以通靈。遂古爲希。

於今特盛。具曉帝命申庥之意。必非人力可致之符。臣等幸列邇聯。薦逢釐事。才慚善頌。言詞莫罄於揄揚。喜切微衷。手足不知其舞蹈。伏願蘿圖永御。芝歷洪延。如川至。如日升。如天長而地久。萬方拱辰極之尊。來鳳儀。來獸舞。來龍負與龜呈。億載鞏山河之固。

### 賀瑞兔表

茲者玉誕屆節。寶度迎禧。乃有太醫院官獻上瑞兔。體備五色。迥異恆品。此我皇上萬萬年長生久視之徵。臣等誠懼誠忭。稽首頓首稱賀者。伏以景曜騰輝。三祝初臨於寶度。衡精炳瑞。一人永介乎瑤齡。信聖德之不昭。致玄禧之薦錫。懽均萬宇。慶集九重。恭惟皇上帝素凝真。玄元合妙。至中和而育物。四海歸仁。秉精白以格天。萬靈綏祐。在宥溥淳。龐之化。既得道而忘跡。彙征登俊。乂之才。競乘時而擢穎。休聲旁達。協氣交流。凡緒希世之禎。咸萃一朝之盛。瞻茲神異。產自王畿。昔偶昌期。曾興四靈而並至。今逢大

慶。復偕百獸以來儀。愈出愈奇。載馴載擾。飲玉池而餐瑤草。養就仙姿。蔭月宇而息天庭。搗成聖藥。將證功於軒室。乃託跡於周宣。應景旦以呈祥。先虹辰而薦祉。來從萬壽。昭萬年鶴算之綿。色備五行。表五福龜疇之歛。非時不見。吉有叶於開先。厥類惟彰。機獨神於默應。蓋聖人大德得壽。必膺昌熾之祺。肆上帝申命用庥。特顯駢蕃之眷。休哉盛事。邈矣希聞。臣等幸際熙明。叨塵侍從。盡中山之管。詞莫罄於揄揚。聆虞殿之韶。情惟深於怵舞。伏願宸釐浩衍。帝貺崇增。握乾符而闡坤珍。國祚鞏山河之固。撫龍圖而操鴻寶。仙齡齊箕翼之長。

聖壽節賀表一

嘉靖四十五年八月初十日。恭遇皇上萬壽聖節。臣等誠懼誠怵。謹稽首頓首稱賀者。伏以聖主握乾符。億萬載蘿圖永御。皇穹申鼎命。六十年花甲初輪。純釐茂集於昌辰。繁祉聿新於景旦。赤虹紫電。玄開震夙之祥。玉檢金繩。增受泰元之筴。神人闔擇。裔夏

騰。懼。仰。惟。皇。上。纂。大。合。華。執。中。布。度。乘。漢。沔。龍。飛。之。運。膺。歷。數。而。恢。帝。紘。按。洛。河。龜。負。之。疇。敘。彝。倫。而。建。皇。極。文。經。武。緯。覲。揚。列。聖。之。耿。光。禮。備。樂。和。兼。總。百。王。之。述。作。囿。一。世。於。鈞。陶。之。內。躋。斯。民。於。仁。壽。之。鄉。二。儀。鬯。而。協。氣。交。流。岳。貢。川。輸。盡。發。無。前。之。祕。一。德。孚。而。治。馨。上。達。神。綏。祇。貺。適。昭。有。羨。之。庥。方。椿。齡。浩。衍。於。春。秋。乃。芝。歷。甫。週。於。甲。子。璿。杓。轉。握。載。符。誕。降。之。辰。寶。裘。開。編。俶。紀。延。長。之。算。帝。座。拱。北。辰。而。麗。正。瑤。光。映。南。極。以。騰。輝。百。祿。是。宜。四。方。來。賀。嘉。木。靈。毳。紛。呈。動。植。之。珍。貫。耳。雕。題。畢。集。梯。航。之。貢。佳。氣。藹。蓬。萊。之。闕。歡。聲。傳。閭。闔。之。雷。凡。在。照。臨。舉。同。慶。祝。仰。帝。德。配。天。爲。大。其。運。靡。窮。卜。仙。齡。如。日。之。升。自。今。伊。始。臣。等。班。聯。清。切。世。際。熙。明。葵。實。有。懷。競。傾。心。而。就。日。芹。悰。莫。罄。惟。拜。手。以。呼。嵩。伏。願。多。福。駢。臻。新。祺。茂。介。仙。甲。自。一。輪。而。載。衍。踰。千。盈。萬。常。同。箕。翼。之。明。帝。歷。由。四。紀。以。滋。綿。咸。五。登。三。永。奠。岡。陵。之。固。

## 聖壽節賀表二

千齡誕聖。鴻圖卜有道之長。萬壽齊天。太運衍無疆之慶。玉帛紛陳。乎禹服。蕭韶協奏。於虞廷。瑞靄煙浮。懽聲雷動。恭惟皇上。功參大始。道契重玄。丕顯應圖。備聰明睿智之德。嚴恭凝命。得名位祿壽之全。聖人之化成。以久於其道。王者之定命。既世而後仁。山川鬼神畢寧。風雨煥暘時若。宏開壽域。約兆庶以同躋。獨運廟謨。擢毡裘而遠遁。惟至誠無息。象帝之先。肆申命用休。受天之祐。如幾如式。俾熾俾昌。載當萬寶之成。恭遇一人之慶。金莖玉露。委滋潤以挹九霞。銀漢冰輪。並清光而被四表。式昭默眷。永錫遐齡。自昔河清。已兆龍飛之運。伊今川至。益綿鳳歷之休。臣等叨司雍教。幸際昌辰。偕百辟以祝堯年。悠久成物。率諸生。歌周雅。壽考作人。伏願茂膺純嘏。益介洪祺。如日之升。如月之恆。長作神人之主。極天所覆。極地所載。傳垂四海之安。

聖壽節賀表二

聖神天授。誕膺五百載之昌期。壽福日臻。茂衍億萬年之景運。節逢大慶。瑞擁元辰。闔

闔門開煥龍光於南極。蓬萊雲近。添鶴算於東瀛。華裔均懽。神人胥懌。恭惟皇上。道涵太始。德契重玄。受籙應圖。咸三皇而登五帝。握符御歷。紹二祖而遡七宗。百姓爲心。萬方在己。對時發育。至仁浹洽於羣生。舉世甄陶。大化滂流於庶類。文武並用。中外攸寧。禮樂孔修。述作兼備。允矣超千古而獨盛。巍乎參四大以常尊。茲者屬五德之在金。來萬邦之執玉。祥光焜耀。徵赤龍玄鳥之紛紛。協氣充盈。儼樞電渚虹之赫赫。仙砌莫開於十葉。瑤池桃熟於千年。屆日月之紀週。迓乾坤之錫羨。大德必壽。式孚有道之長。申命用休。允協無疆之慶。臣等叨依密勿。久荷寵恩。然激獨深。奚啻羣情之祝。班行同舞。敢先萬歲之呼。

### 聖壽節賀表四

昊天有命。賜永壽於一人。聖德在秋。啓昌辰於萬壽。屬電繞虹流之大慶。衍日升川至之藩禧。三靈之眷祐。允昭九有之懽忻。交暢恭惟皇上。應期時出。撫運中興。總覽政幾。



體乾行而不息。用知民隱。運離照以無疆。作之君。作之師。兼百王化理之盛。丕哉文。丕哉武。揚累朝謨烈之光。夫惟至治之馨香上聞。是以大德之名壽胥得。茲者風清玉宇。露湛金莖。瑞發堯蓂。應日初舒乎十葉。祥呈禹稼。書年普慶乎三登。矧中州之靈貺適來。而南極之星輝正現。冠裳造闕。混車書以來朝。璧馬充庭。歷梯航而入貢。誠聖壽之盛會。曠世之奇逢也。臣等位烈邇僚。身霑泥澤。莫酬恩遇。徒懷葵悃。以淩兢。虛祝仙齡。謹效嵩呼而忭舞。伏願聖壽與乾坤並久。皇圖同山嶽俱安。八千歲爲秋。永受四方之賀。億萬年在位。茂膺五福之疇。

### 聖壽節賀表五

天開壽域。九重凝元會之精。命協貞符。萬載仰長春之慶。臣工舞忭。中外謳歌。恭惟皇上化洽華夷。道同元始。建中和之極。重玄格而雷雨應時。撫享泰之期。瑞應昭而嘉禾呈秀。文章煥然可述。允卓冠於百王。功業巍乎有成。式增光於烈祖。篤生藩邸。已占虹

流電繞之祥。八統輿圖。爰致天保日中之治。茲逢初誕。幸際昌辰。塔衝隨寶曆以維新。玉律得金飆而薦爽。九秋湛露。澄敷庭朗之霄。五色卿雲。環擁光華之月。四譯效梯航而向闕。萬水朝宗。諸藩陳璧馬以充庭。衆星拱極。仙萼十葉。浮佳氣於彤墀。韶樂九成。奏歌聲於紫禁。嵩呼競祝。虎拜交羅。豈止五百年而王者興。殆將億萬歲爲天子壽也。臣等清光伊邇。弱翰無能。捧蓬島之瑤觴。冀少酬乎帝力。進芻蕘之金鑑。知莫補於天聰。伏願保合太利。靈承賁祝。隆禧有秩。歡康甯富壽而備於躬。歷數無疆。繼虞夏殷周而邁其盛。

### 聖壽節賀表六

伏以聖人久道成化。會君師之治教以綏民。王者得一爲貞。配天地之清甯而永壽。率土慶天長之景日。羣生欣物覩之昌期。南極開雲。燦祥光於紫清碧漢。東華授籙。標遐算於玉笈琅編。裔夏同歡。神人胥懌。恭惟皇上道契先天。心函妙有。紹二祖七宗之丕

緒綿景運以遐昌。含三元五德之玄精。延太和而保合。粵貞符降邸。已占虹流電繞之祥。爰及其寶受圖。益隆天保日中之治。玄武布昭。而孽夷盡殄。神機默運。而大化旁敷。昭事靡遑。對冲靈於咫尺。精誠潛格。儼肸蠶於玄冥。惟至治之馨香上聞。故大德之名壽胥得。茲逢初旦。適際昌辰。諸藩陳璧馬以充庭。四譯效林航而向闕。露凝雙掌。金莖霏五玉之膏。光燦九霞。璧月耀重輪之彩。佳氣氤氳乎昊闕。衆真翔集於高晨。九霄瑞鶴。鏘鏘焉偕鳳鈞。鸞唱以和鳴。五嶽仙芝。華華焉與瑤草瓊枝而並耀。茲爲大慶。况屬熙朝。蓋雖列聖之不紹鴻基。曾未登乎三紀。而我皇上之誕膺寶歷。乃獨邁乎前休。斯蓋天佑有明。欲永靈長之盛治。故日隆聖壽。用申定命之洪恩也。臣等久荷寵榮。叨依密勿。玄床仰庇。幸含生於壽域之中。帝德難名。徒忭舞於光天之下。伏願景福茂臻。宸禧益衍。玉治和調。億兆賴一人之有慶。金湯鞏固。雍熙永萬載以無疆。

# 張江陵全集卷十三表

## 賀靈雨應祈表一

茲者我皇上以夏令旣深。雨澤未足。乃躬叩於雷壇。爲民虔禱。聖誠膺至。天鑒孔昭。甘澍溥零。遠近霑洽。臣等誠懼誠忭。稽首頓首稱賀者。伏以聖主念民依之重。無歲不祈。皇穹鑒帝德之馨。有求輒應。驗感通之素妙。彰眷佑之彌中。喜溢堯衢。懼騰舜畝。恭惟皇上道參惟大。德並日生。鏡玉斗以調元。握璿樞而運化。知艱乃逸。晨功夙戒。於三時視民如傷。王政必先於四者。屬當夏暮。佇俟秋登。雖靈澤屢頒。已兆豐穰之慶。乃宸情遇軫。尙塵宵旰之憂。慮邪氛或盪於休和。致鴻化有乖於乖育。叩瞻昊極。虔修齋祓之儀。勅召風庭。赫布驅穰之令。果靈符應。立致嘉祥。決天漢之瓊波。注流四野。瀉玄池之玉液。沾溉羣生。澤汪濊以旁通。氣縕緗而交鬯。在原在隰。欣觀長畝之易禾。如京如坻。滿擬大田之多稼。詎止增滋而溢潤。尤能解劫以迎和。日月光華。乾坤清泰。卽炎帝之

曰雨則雨。未足稱神。信大人之先天後天。罔不合德。益顯參贊彌綸之用。永綏康寧富壽之禎。臣等久荷生成。叨塵侍從。衍龜疇而省歲。備紀休徵。續麟史以編年。特書大有。莫効滴涓之助。徒深忭躍之誠。伏願純嘏茂膺。洪禧丕衍。五風十雨。均調四序之利億載萬齡。永介一人之慶。

## 賀靈雨表二

聖主勤民。虔舉禱祈之典。皇穹眷德。丕昭康阜之符。景貺萃於一人。靈液覃于四表。懽騰禹甸。頌溢堯衢。恭惟皇上道合沖虛。神凝淵穆。心之所向。先天而弗違。澤之所敷。與海而同潤。頃者雨暘之未敘。深軫稼穡之多艱。躬啓齋壇。虔祈玄渥。綸音甫下。雷聲卽應於重霄。法限方申。電景弘宣于三極。惟聖誠久而不替。肆甘澍漬而遂流。宮廟百神。共彰靈于爲雨。山川郡祀。咸效職於出雲。初沾洒以霏微。繼淋漓而汪濊。祁祁入夜。妙潤物于無聲。滴滴崇朝。顯農時于有象。青回壠麥。開兩歧漢代之祥。綠靄郊禾。肇連穎

周家之瑞。和氣布而乾坤澄泰。靈氛滌而日月元華。蓋至聖格天。保佑益降於駿命。而惟皇斂福。豐穰茂衍於鴻禧。所謂參贊之極功。幹旋之妙用也。臣等幸逢明盛。忻覩禎嘉。沐德龍池。夙戴涵濡之化。承恩鳳沼。彌懷漸被之仁。伏願慶祉天甲。休徵日集。洗兵紫塞。神功廓一統之謨。齊政玉衡。聖治永萬年之業。

### 賀靈雨表三

聖主對時。因切民天之恤。帝宮肇祀。用昭方社之祈。惟天心助順而弗違。故雨澤應期而捷降。公私霑足。遐邇懽呼。恭惟皇上聖德作新。靈忱默運。願惟邦本。恆致重於農時。對越昊穹。屢昭受于帝貺。茲值積陽少沍。僅旬月雖不爲災。但當南畝載耘。恐嘆焚而遂將成魃。時過不雨。民失有秋。齋滌秉心。致神祇之陟格。惕孚渙汗。勉臣庶以靖恭。方嚴宸蹕于璇階。情殷露禱。旋布滄雲於寶壇。歌協兩公。膏液垂蘇。旱氛清滌。始見飛甘灑潤。祁祁偏沲于堯衢。繼看沃槁回焦。浥浥均沾於舜畝。匪直寰中之瑞。亦清塞外之

塵。蓋一德格天。勅時幾以調化。斯百神受職。均福賜以佑民。可謂協位育之全功。參彌綸之妙用者也。臣等叨聯侍從。久荷洪私。均動植以濡恩。莫效涓流之助。霈乾坤而受澤。徒承沐浴之光。伏願雨暘時若。災害弭消。大田多稼。而百谷用登。不獨慰十千之望。歲。蒸民乃粒。而萬邦作乂。將併億兆以樂年。

### 賀靈雨表四

甘霖應禱。神昭庥洽。乎兩間。勤念爲民。聖德貫通乎三極。百靈效職。萬姓騰歡。恭惟皇。上極建中。和曠古今。而獨盛。化隆參贊。合上下以同流。精誠默契於蒼穹。膏澤久覃于。黎庶。無思不服。有感必通。曩惟瑞雪冬盈。預啓百昌之兆。邇者洊雷夏震。幸清九塞之。塵。蓋宵旰每軫乎憂防。而造化實歸其掌握。茲當朱明屆候。赤悃申祈。思稼穡之艱難。下民所賴。謂雨暘之時若。上帝攸司。秉一念以告虔。肅羣工而省過。皇情肫至。帝鑒昭。孚。月離畢以示期。山出雲而布靄。風霆迅發。溝澮交流。頓回普化之玄功。大慰有秋之。

渴望。忻忻草木。盡懷沾溉之榮。靡靡郊廂。均沐涵濡之說。臣等瞻依鴻在。贊襄無補於天工。沐浴太和。歌頌敢忘於帝力。伏願歛五福以錫庶民。致太平於有象。敍九疇而御皇極。綏景福於無疆。瀚海龍城。實協洗兵之慶。太山滌甫。嗣修檢玉之篇。

### 賀靈雨表五

皇穹眷德。昭感應於休徵。聖主祈玄。妙幹旋於大造。滋百嘉而允遂。滌諸沴以咸清。慶洽家邦。歡均朝野。恭惟皇上仁義立極。宣哲敷猷。軫念民生。治府事而九功敍。欽崇天道。在璣衡而七政齊。玄冥獻瑞于瑤囊。大暉流利於玉樹。隸弊盡熟。旣瞻率育之貽。耒耜竝興。復兆屢豐之祉。顧羣吏不克修其職。致三霖亦間愆其期。以耔以耘。在畎畝猶未病農時之役。淮宵惟旰。乃朝廷則深憂穡事之艱。將旱而惕焉恐。其爲災。旣雨而欲然以爲未足。齋壇肅啓。叩法界以戴冲儀。御墨煥頒。戒祠曹而舉舊典。宸衷所向。天用弗違。聖敬攸躋。神是具格。旨甫出而雷電交作。限向終而雨澤遂盈。和氣宜通。廓化機



于長養。靈滋浹洽。普帝力于栽培。內以登稼。舜田。外以洗兵。漢塞。富強之業。自是以彌光。太平之區。由茲而益固。誠彌綸之妙用。而位育之極功也。臣等濫叨祿秩。久荷生成。仰聖心之勤勞。無能贊助。覩玄恩之優渥。惟倍懽呼。伏願暘雨常調。乾坤永泰。得天人之應。合萬福以駢臻。納川岳之珍。會千祥而畢集。大振皇威於有赫。茂延聖壽於無疆。

### 賀靈雨表六

天垂玄貺。歷一人昭假之誠。民頌豐年。衍四海昇平之治。仰休徵之嚮應。信精意之潛孚。福溢堯封。懽均禹甸。恭惟皇上。剛健中正。濬哲文明。大德格天。至仁育物。政惟歲功之敘。時若雨暘。心存民食之依。知先稼穡。功侔元宰。撫連而五氣司辰。道際貞符。握紀而百靈受職。頃困時暵。卽軫淵衷。嚴所可以偏叩。羣神。肅齋壇而躬籲上帝。誠無幽而弗逮。邁周宣雲漢之思。神有感而卽通。遇成湯桑林之禱。遂蒙赫鑒。允答虔忱。合四海以垂陰。浹三朝而流澤。潤回枯槁。助兩儀發育之功。滋洽根莖。若萬類生成之性。山川

增色。草木含輝。忻雨露之霑濡。識化工之斡運。矧去冬之瑞雪。已受明賜於來辭。卽今日之甘霖。定獲康年於黍稷。郊廟之黍盛備矣。烝黎之粒食盈焉。帝德難名。民生何幸。三農鼓舞。慶樂歲之有徵。萬姓謳歌。載洪恩之不冒。臣等叨依禁從。快睹嘉禎。愧無涓滴之酬。喜有優渥之霈。伏願功光旻帝。道貫重玄。斂五福以錫庶民。囿羣生而躋壽域。日升川至。介遐福於無疆。雨施雲行。保太和於有象。

### 賀瑞雪表一

玄穹錫祐。鑒一人昭格之誠。靈澤敷祥。啓萬宇豐登之慶。贊神明而闡祕。斡造化以成能。喜溢堯衢。懽騰舜畝。恭惟皇上心涵太始。德合混元。兼覆轉持載之功。草木昆虫咸若。盡裁成輔相之道。雨暘寒燠維時。每惟稼穡之孔艱。無俾蒸黎之失所。茲者一冬已少。三白猶慳。雖玄工未至於愆違。乃宸慮預虞其旱暵。竭精衷而默籲上帝。有赫鑒觀。渙綸命而申勅有司。無遺禋祀。純誠所積。感若郵傳。眷祐素隆。應如響答。二儀之蒸。條

醞釀以回和。五穀之精。遂繽紛而薦祉。兆豐穰于嗣歲。啓農扈于先春。寫曜九重。漾瑤殿瓊堦之素彩。霏華千里。蕩玉關紫塞之塵氛。況節屆乎履長。而災消沴弭。功旣妙于扶陽。且慶當夫首度。而迎祉集禧。瑞允徵于增算。益顯參贊彌綸之用。永綏康寧富壽之庥。臣等幸際熙朝。樂觀釐事。衍龜疇而省歲。備紀休徵。續麟紀以編年。特書大有。伏願仙祺茂介。景福崇臻。先天弗違。後天不老。萬年調玉燭之和。極天所載。應地無疆。四海鞏金甌之固。

賀瑞雪表二

誠格高穹。誕應九重之禱。功回造化。卽占三白之祥。喜溢臣工。懽騰朝野。恭惟皇上仁涵庶類。道契重玄。當制作之期。履豐亨之會。內安寰宇。藹協氣之旁流。外撫要荒。快妖氛之頓息。茂膺介福。永錫休徵。維茲季冬。未霑雪澤。仰勞宸念。虔禱雩壇。惟昊天昭鑒於一人。肆同雲遂布于四野。六花絢彩。俄驚上苑之同春。萬戶凝華。似覩崑岡之照夜。

况積地則皆盈尺。雖委潤而不封條。允爲豐歲之徵。用表太平之象。若彼禽鳥之瑞。徒飾耳目之觀。至於草木之祥。何補衣食之用。試探往籍。莫盛今時。此皆皇心昭合乎天心。故玄澤同符於聖澤者也。臣等叨司雍教。幸際熙朝。率多士以趨蹌。豈勝雀躍。同萬民而歌頌。莫罄豫鳴。伏願帝眷昭垂。神庥滋至。十日雨。五日風。盛治長調。玉燭九年耕。三年積。洪圖永固。金甌。

### 賀瑞雪表三

聖主惠民。夙致精禋之禱。皇天眷德。宏敷大有之徵。澤溢堯封。懽騰禹甸。恭惟皇上祈報達雍熙之妙。中和成位育之功。明德惟馨。典秩百神之祀。艱難乃逸。念切小民之依。頃以時澤之愆。上廛淵衷之慮。吉蠲對越。屢躬叩於皇穹。昭格感孚。遂仰承乎帝貺。一誠之潛通無間。百靈之祐相有徵。八荒同雲。千里一色。瓊英皎潔。散五穀之精華。玉質霏霏。獻六花之嘉瑞。消沴而已占盈尺。應時而不必封條。山嶽增高。根菱倍潤。三農鼓

舞。歌帝力于康衢。萬彙滋榮。益春和于化國。願滋雨暘之時。若實爲庥眷之駢臻。天澤偕聖澤以同施。人情與物情而交暢。臣等叨居侍從。幸際昌時。仰帝道之昭明。荷天心之悅懌。殊深忻忭。莫罄揄揚。伏願彌綸成天地之能。久大崇明簡之德。休徵備至。錫五福于庶民。道化益隆。衍萬年之盛治。

### 賀瑞雪表四

洪化難名。臚瑞應九重之禱。太平有象。玄靈呈六出之奇。天雖高而聽則卑。聖惟誠而禱必應。仰宸情而悅豫。溥臣庶以懽呼。恭惟皇上德並兩儀。治隆千古。留神宵旰。恆懷稽事之憂。加志閭閻。每切民天之重。茲者玄冬邁序。皓雪愆期。特軫淵衷。虔修日禱。竭誠將事。明德上契乎天心。申命用休。渥澤允符于臚候。百神效職。三白呈祥。琪樹繽紛。式現六花之瑞。瓊田璀璨。實爲五穀之精。綏綏不至于封條。佇見來麩之罕育。皜皜漸成于盈尺。已知螟螣之深藏。是蓋聖主敬天以保民。感孚有素。故穹昊應祈而錫貺。昭

假孔神。誠天祐之無前。而真符之夢見也。臣等叨參密勿。無補燮調。歌帝力于不識不知。與億兆同其懽戴。荷神功于至廣至大。感天地莫克形容。伏願玄祐彌隆。休徵茂集。卜萬年而御歷。益臻穰穀之祥。斂五福以錫民。永保豐年之治。

### 賀瑞雪表五

靈雪應祈。允兆昇平之象。皇穹眷聖。式昭感極之誠。喜氣春融。懽聲雷動。恭惟皇上堯仁丕冒。舜德好生。臻中和位育之功。極參贊裁成之道。祁寒暑雨。洞悉小民之艱。黍稷稻粱。恆切有秋之望。屬冬時之既屆。偶雪澤之猶愆。爰軫宸衷。恐妨農務。齋心內殿。惟翼翼以欽。躬禱雩壇。儼洋洋其陟降。至誠必饗。克敬惟親。六合同雲。遂作輕盈之絮。九天飛霰。旋開頃刻之花。岡原皓若堆瓊。衢路紛如連璧。既霑既足。永無螟螣之虞。以耘以耜。豫卜茨梁之積。農歌于野。忻玄澤之兆豐。士慶于朝。仰聖心之允洽。是皆皇上功侔造化。用能粒我蒸民者也。臣等覩茲靈貺。曷旣名言。懽呼敢效。乎蟲鳴。踊躍豈殊

于獸舞。伏願道超無外。德契重玄。敬記魯年。輿萬國于春臺玉燭。肆歌周雅。祝一人如山阜岡陵。

### 賀瑞雪表六

天澤覃敷。用地晁瓊瑤之積。皇誠感格。玄冬啓稼穡之徵。禹甸懽騰。堯封慶洽。恭惟皇  
上道參太始。運撫中興。昭事九玄。靈承列聖。昇平有象。至仁已遍于寰區。惕勵無忘。祕  
禱猶勤于夙夜。念食爲萬民所賴。而雪乃五谷之精。氣和則歲斯豐。土潤而農始利。仲  
冬小雪。六花已灑于彌空。季月大寒。三白未盈于竟野。庭壇齋祓。知聖躬之獨勞。簡籙  
敬陳。荷天心之點檢。是以宮謝再虔之日。帝降初駕之辰。同雲布而微霰零。北風淒而  
密雪下。由寸盈尺。自旦及昏。棲閣繁樓。疑崇臺之卸壁。飄花落絮。似上苑之逢春。應水  
腹之堅。陰凝愈固。迎土脉之動。液滲潛通。豈惟使牟麥之青榮。用觀罇錕。且能令虜氛  
之滅沒。塞寢戈矛。此誠至德之素孚。而靈貺之上瑞也。臣等才非曾史。叨聯北闕之班。

學謝鄒枚。敢獻梁園之賦。惟深雀躍。益戴鴻私。伏願彌綸成天地之能。久大昭易簡之善。神禧雪擁。帝祉日新。七政齊而太階平。永田功于九扈。三靈衛而多祐集。綿聖壽于億齡。

### 謝瑞雪表七

伏以法嗣冲玄。靈貺應一人之禱。陽回霄壤。祥霏霏五穀之華。三時可卜其順成。率土盡融于和暢。仰宸情之悅豫。喜溢龍顏。沐聖澤之沾濡。歡騰黎首。恭惟皇上道孚冥漠。功卽康田。裁成輔相以成能。參贊彌綸而建極。覃仁慈于宇內。民已安而軫念如傷。運造化于掌中。天不違而欽崇愈邛。是以豐年屢慶。邦孚至治以無虞。協氣嘉生。瑞應太平之有象。茲以玄冬臨季。雪澤未均。日以燠之。天意殆相工倕而布暖。歲云暮矣。聖心欲啓農扈於先春。乃渙綸音。爰塵露禱。惟至誠之昭格。斯冥感之潛通。內壇肇啓。同雲已布於璇空。齋宮纔臨。密霰遂敷於瑤甸。始繽紛乎散絮。俄皎潔以堆瓊。靄靄浮浮。每



卽形而賦象。麤麤突突。愛潤物之無聲。忽驚鶴翥之翩翩。倏見花開於頃刻。自此而澤來。麤根。茲倍潤。從茲而消厲。殺關塞無塵。彼珍禽異卉。徒瑰奇於耳目。顧何裨衣食之源。卽和璞隋珠。雖充溢於圓方。未必立蒸黎之命。唯茲上瑞。實曰休楨。臣等調燮無功。恩暉藉被。殿廬宵值。疑臨不夜之仙城。宮闕曉瞻。驚入長春之福苑。慶倍尋常于萬萬。心同品彙。以忻忻。伏願景福茂臻。玄庥滋至。握五帝之瑤圖。而凝命。調兩間之玉燭。以當天。百禮告成。歲歲享周田之利。三農不害。人人庶堯壤之歌。

### 賀冬至表一

玉律迎陽。萬國際天開之運。璇穹篤祐。一人凝日至之禧。乾元肇啓于鴻鈞。聖壽崇增于鳳紀。慶綿宗社。喜溢寰區。恭惟皇上。體道冲和。頤神淵默。建中建極。動靜合天地之心。饗帝饗親。齋戒通神明之德。協虞璣而齊七政。敝箕範以備庶徵。維茲極辨之熙朝。載履值長之令節。斗杓旋子。月當三統之先。昴宿殷宵。序屬六陽之始。淑氣漸滋於玄

籥。元聲默應於黃鍾。魯史書占。睹雲容之表瑞。周圭測景。喜日馭之延暉。兩塔騰肆樂之歡。四海慶寢兵之候。纓綵畢集。玉帛交陳。肅五夜而叩露壇。祇荷重玄之鑒。踰十辰而逢景旦。預開首度之祥。湧祉流禧。沛若水泉之初動。益齡增算。晉如陽德之方亨。歲運維新。宸釐有羨。臣等叨陪近列。幸際昌辰。才謝八能。莫叶鈞天之奏。情深三祝。惟同嵩嶽之呼。伏願純嘏緝熙。太和保合。立天地人之極。而垂衣五位。永綏皇極之洪圖。培壽福祿之元。而御歷萬年。茂衍泰元之神策。

## 賀冬至表二

殷昴升辰。式協仲冬之候。履長迎福。載陳亞歲之儀。喜聖主之當陽。見天心之來復。紀貞元而應度。按時令以承禧。海宇交懽。臣工洽慶。恭惟皇上道涵泰始。識洞玄微。謨烈冠乎百王。功德超乎千古。撫五辰而順序。齊七政以明時。得天統之攸長。世數周而復始。荷神明之眷祐。國祚永而益昌。茲者序屬殷冬。時逢周正。黃鍾啓律。感緹室之璇和。

玄籥生春。適融風之始暢。珠星璧月。燦穹極以呈暉。舜日堯年。迓天庥而迪吉。望魯臺。書雲物之慶。測漢表。識陰陽之和。休矣祥開。昭茲貺施。禮方嚴於大報。時允謂之昌辰。臣等叨列清班。忻逢盛會。吹噓有藉。幸同六瑄飛灰。裨補無能。愧比五紋弱綫。但深忭躍。倍切瞻依。伏願聖歷丕延。治運乘陽而並進。皇圖孔赫。壽源與時而俱增。申錫無疆。肇億萬千年之鼎盛。思皇多祐。迓二十一載之泰來。

### 賀冬至表三

黃鍾協律。一元涵發育之仁。紫極迎長。萬國仰亨嘉之會。淑氣充盈於禹甸。歡聲偏溢于堯衢。百祿是適。四方來賀。恭惟皇上。道侔覆載。德冠古今。神聖登樞。化孚而金甌永固。中和建極。玄機運而玉燭均調。政順旋衡。配歲時而成序。恩加寰宇。茂品物以偕春。茲當履至之辰。正值陽生之候。瑄灰浮煖。識六氣之潛萌。圭景延暉。知七日之來復。宮線初添乎弱綫。臺雲已驗夫書祥。臣等幸際昌期。叨塵近列。望龍光于咫尺。實切瞻

依。罄雀躍以颺言。倍增忻怵。伏願靈承帝貺。保合太和。天地位而上下鬼神以甯。臻蕩蕩巍巍之治。太階平而麟鳳龜龍畢至。成熙熙皞皞之功。

### 賀冬至表四

天開於子。一陽肇資始之功。自至於南。五位納履長之慶。儀陳亞歲。瑞集熙朝。恭惟皇上明聖當天。大君御極。對時弘化。踰三紀而仁洽兆民。圖治保邦。纂列聖而德超千古。頤神淵默。獨觀萬化之原。體道冲和。忻復一元之會。撫五辰而凝績。政在扶陽。開二儀以爲功。恩昭育物。禮明樂備。成聖人制作之能。文治武功。見王者經綸之迹。四時合序。九域同風。茲載啓乎昌辰。益茂承乎景貺。天宮警動。聲元已應乎黃鍾。緹室灰飛。晷影漸舒於繼線。覩熒星之正昴。物類昭蘇。應周月之授時。神人闔懌。協氣光盈于紫極。穹陰退謝于玄枵。窮塞寢兵。喜邊氛之靖息。清臺觀象。書雲物之新嘉。臣等叨陪文石之班。敬效華封之祝。伏願宸承帝貺。保合太和。一之日以體元。遠過夏時之歷數。萬斯年

而御運。長歌舜日之光華。一人膺祐命之純。四海樂昇平之盛。

### 賀冬至表五

六琯吹葭。緹室迓一陽之來復。三垣正斗。璇霄睹萬象之維新。弘開發育之機。茂著栽培之績。暖回寒谷。人樂熙臺。恭惟皇上帝智先天。至仁徧物。剛健體乾行而不息。文明煥離照以無疆。盡制盡倫。兼千聖百王作述之盛。丕承丕顯。增二祖七宗謨烈之光。禮序樂和。德化徵于有象。民安物阜。惠澤浹於無垠。夏霖冬雪。皆應祈而歲功已就。北狄東夷。俱效順而邊警不聞。茲逢南至之辰。益進大來之吉。午中立表。圭日布影於初長。子半迎陽。璧月流輝于既望。推元紀歷。數符周統之得天。觀氣書雲。瑞協軒轅之獲鼎。黃輿責祉。玄象昭麻。景運當三十年。周而復始。聖壽綿億萬載。久而彌昌。臣等襪線才微。愧無裨于龍袞。涓埃念切。期仰答乎鴻鈞。對時陳獻履之衷。叩闕致呼嵩之祝。伏願道同陽長。由臨入泰以享隆。治與日升。咸五登三而炳耀。乾坤高厚。永固弈世之金甌。

日月光華。恆映太階之玉燭。

### 賀元旦表一

律鍾太簇。青陽布六合之和。斗正孟陬。黃道呈五雲之瑞。兩儀交太。萬國朝宗。慶洽神人。灌懽遐邇。恭惟皇上。握符凝命。應運紹基。敬一接羣聖之傳。中和建四方之極。神威一震。逆醜自芟。聖武方昭。夷氛悉蕩。治功超乎前古。乾清坤寧。仁澤徧于寰區。民康物阜。茲屆三陽之令節。實逢千載之昌期。堯歷載頒。祭璣衡于三百六旬之始。夏正允協。調玉燭于七十二候之初。迓淑氣于鵬霄。垂憲章於象闕。紫殿納萬邦之圖籍。彤庭會四海之衣冠。化日舒長。太平有象。玄庥昌熾。申錫無彊。臣等久荷生成。並叨祿秩。際新元于端月。祝獻南山。慶首節于清朝。心馳北極。伏願撫三辰以凝績。斂五福而錫民。獨運乾剛。君德益亨于九五。靈承天眷。帝壽永綿於億千。

端月紀辰。蒼極布始和之象。王春司令。紫宸臻首祚之祥。麗曉色於金鋪。動韶年於玉律。鳳歷越三旬而再啓。龍圖際九葉以益昌。邦國乂寧。地天交泰。恭惟皇上德象帝先。道同乾運。撫五辰而凝績。與日偕新。齊七政以授時。體天行健。和氣召四靈之瑞。玄威靖九塞之塵。是以上帝居歆。瑞雪應明禋之禱。天心助順。神武收不戰之功。忻至治之無虞。徵太平之有象。茲者當二陽開泰之候。正萬物出震之時。氣轉鴻鈞。共樂堯天之化日。春回鄒黍。已消燕谷之陰寒。彤庭藹瑞雪之繽紛。閭闔現卿雲之燦爛。應條風而送暖。人與物皆在春臺。獻椒頌以迎祥。君育民同登壽域。璣衡正而黃道關。玉燭調而太階平。普天仰陽德之方亨。率土賀乾元之正始。是誠天啓維新之運。而神執永命之基也。臣等秩首堯行。恩深眷遇。涵濡德澤。同萬物以生輝。拜舞衣冠。仰九天而稱賀。懼忻倍切。感激難名。伏願茂介陽禧。誕膺玄祐。聖法天。天法道。聖壽齊天地以無疆。國保

治。治保民。國祚鞏山河而永固。

### 賀元旦表三

三陽啓泰。乾坤昭化育之仁。萬類回春。海宇際亨嘉之會。歲月更新于鳳歷。氣機初轉于鴻鈞。遐邇騰懽。臣民胥悅。惟皇上神功撫運。至德統天。正位居貞。仁義幹陰陽之用。對時育物。弛張綜闔關之機。齊七政以勤民。撫五辰而凝績。聖敬上孚于穹昊。皇風覃被于遐荒。外順內安。九有戴堯天之浩蕩。時豐歲美。兆民忻舜日之光華。聖人極裁成輔相之能。世道躋雍熙太和之盛。茲者元正首祚。上日發春。明堂宏啓於青陽。闔闔煥開於黃道。農祥晨正。爰回萬井之暉。椒觞日臨。光映千門之曙。誕布始和之令。聿修獻歲之儀。玉帛來同。仰一人之有慶。冠裳萃止。祝聖壽於無彊。彤庭凝祥藹之氤氳。紫禁迓玄麻之駢疊。嘉時伊始。景命益隆。卽今之三十一年。茂膺寶籙。後此而千億萬歲。永握瑤圖。協氣薰蒸。囿羣生於壽域。條風鼓舞。躋品彙於春臺。



### 賀元旦表四

日啓三陽。仰昌時之茂對。陽回六合。忻大運之維新。喜溢臣王。權騰夷夏。恭惟皇上心。涵太始。德邁古初。欽若昊天。百神歆而受職。懋昭皇極。四海暢以同風。粲然禮備樂和。久矣治隆化洽。惟茲正旦。載啓佳辰。誕陳元會之儀。茂衍履端之慶。天臨紫極。瞻瑞靄之氤氳。氣轉洪鈞。覺玄風之清穆。蓋惟體元居正。是宜申命用休。慶集一人。祥開萬物。肇寶歷三十一年之首祚。綿瑤圖億千萬載之丕基。臣等職忝成均。躬逢明盛。菁莪樂育。咸仰賴於生成。柏葉稱觴。庶少伸於頌禱。伏願保泰以臨天下。處豐而宜日中。新之又新。同戴堯天之浩蕩。旦而復旦。永瞻舜日之光華。

### 賀元旦表五

四始履端。萬寓啓維新之運。三元首祚。兩儀協交泰之期。青陽乘震以發生。紫極應乾

而納佑。神人胥慶。朝野騰懽。恭惟皇上道邁羲軒。德隆堯舜。凝神清穆。玄同象帝之先。建極中和。敬授夏時之正。撫五辰而熙績。齊七政以當天。雨暘燠寒。育物功昭於茂對。禮樂刑政。禮元化備於裁成。國常泰。年屢豐。玄機默運。外威嚴。內順治。神武丕揚。祿位名壽之兼全。信巍巍而莫及。功業文章之特盛。有蕩蕩而難名。茲者序正孟陬。儀陳元會。祥開鳳歷。屆三十二載之元。懽動龍墀。祝億萬千年之永。仙萼十葉。擁瑞靄於穹階。鈞樂九成。度頌聲於合殿。皇仁隨陽澤而汪濊。韶光協和氣以昭流。是誠天眷之益隆。大慰民心之仰戴。臣等叨塵密勿。夙荷生成。念歲月之旣。感寵恩之愈厚。舞同鰲怵。頌益嵩呼。伏願寶算天齊。瑤圖地廣。備箕疇之五福。永登萬物於春臺。正泰階之六符。長納八荒於壽域。

## 賀元旦表六

乾坤交泰。覩聖治之維新。海宇同春。仰天休之滋至。臣工胥悅。遐邇交懽。恭惟皇上受

命溥將。凝神清穆。德合四時之運。學闡千聖之傳。禮樂興。刑罰中。政教畢張。寒暑節。風雨。陰陽無忒。納庶民。皇極。升斯世于大猷。蓋道久而化成。故風行而俗美。茲維端日。三朝肇臨。爰啓昌辰。百祥萃至。禮陳元會。適當肄覲之期。慶洽寰區。咸切朝宗之念。瞻威顏於咫尺。肅環珮以趨跄。柏酒稱觴。椒花獻頌。氤氳五色。雲光遙擁乎蓬萊。裊娜千枝。春意先得於柳。忻和風之布暖。見化日之舒長。道與時亨。儼嬉遊于舜日。人同春育。惟敬視乎堯年。臣等幸際熙朝。恭逢令節。恩荷陽和之被。報懷葵藿之私。伏願乾元發育。離照重明。國泰民安。宗社享萬年之慶。內甯外謐。華夷同一統之春。

### 賀元旦表七

律宣太簇。陽回六合之春。星紀孟陬。氣轉三朝之日。皇運與天行共泰。歲華偕師載咸熙。慶洽含生。懽騰率土。恭惟皇上道符冲漠。治邁古初。育物對時。四海普霑乎兌澤。體元居正。萬幾獨斷於乾剛。禮樂備而聲教彰。府事治而詠歌作。風塵息警。神功允奠乎

瑤圖。雨雪應祈。聖政屢書於玉版。仁協唐堯之大。蕩蕩乎難名。德同周文之純。疊疊焉  
不已。屬化成於久道。適節屆於履端。肇七十二候之庠徵。衍億千萬年之景貺。推神筭  
而統天握紀。啓象魏而布令憲和。紫殿爐烟。暖合條風之習習。彤庭燎火。光迎旭日之  
輝輝。洪禧茂介於維新。戩穀丕昭乎更始。衣冠萬國。拱北極以來王。閭闔千官。稱南山  
而上壽。昔華封之祝。事僅見於一方。而塗山之朝。時非值乎元會。乃今承九葉重熙之  
運。當二儀交泰之辰。得遐邇之懽心。戴元正之盛典。誠考諸傳紀而未之前聞者也。臣  
等恭趨丹禁。喜覩青陽。仰六龍之時乘。隨百獸以率舞。伏願玄靈篤貺。黃輿薦祥。納宇  
宙於同仁。綏華夷於一統。三十年而又爲世永。司撫世之模。八千歲而始爲春。益進長  
春之算。

張江陵全集 卷十三

# 張江陵全集卷十四書牘

## 答列卿毛介川

今之士大夫冠纓相摩。踵足相接。一時號爲交游者。蓋不少矣。然而未必皆可與之言也。可與之言矣。猶未可與之微言也。可與之微言矣。猶未可與之不言也。若夫目擊而道存。無心而冥解者。若僕與翁。蓋庶幾焉。僕每一相見。卽頽然嗒然。若遊太虛而涉廣漠者。不知翁之洗我以德耶。豈亦僕之鄙樸任率。有當於翁之心。相薰相忘。莫知所以然而然耶。旌麾漸遠。悵望爲勞。惟此一段精神。相期於形神之外者。則固非地所能限耳。承翰教。瞻戀彌增。南中會楚侗丈。幸言僕與翁所以相與者如此。

## 答南中提學御史耿楚侗

去冬賀道長至。得翰教。會有大行之事。哀悰卒卒。不及裁答。進香使至。伏承訊及感慰。

別諭云。俱盡事理。其間有未入舉行者。推公之意。次第行之。僕以淺。驟冒非分。日夕惶惶。罔知攸措。思所以酬主恩而慰知己者。惟虛平此心。不敢向人間作好惡耳。至於轉旋之機。未免有迹。非心是之判。士大夫責望素深。或不能盡如其意。然亦不暇顧矣。高明以爲何如。

答中承洪芳洲

鄙人辱公之愛有年矣。頃者因緣際會。驟涉崇階。聖主念甘盤之故。不棄簪履。元翁垂接引之慈。無遺菅蒯。深惟謙薄。任過其才。夙夜念之。若爲稱塞。惟當堅平生硜硜之節。竭一念縷縷之忠。期不愧於名教。不負於知己耳。然切劘之益。實在同心。將伯助予。幸毋遐棄。態廉憲旣。草草附謝。厚惠概不敢當。謹用納璧。知公素諒其狂直不罪也。

答總督魏確菴

承示邊圖。旣詳且覈。勳勳之略於此亦微見其緒矣。敬服敬服。近聞虜欲西犯。今士馬之方萃於薊矣。如不得志。必將東逞。願公嚴備之。

### 答宗伯董潯陽

僕以讜薄。獲衣日月之末光。猥從末階。驟躋三事。束攄作柱。用荷爲梁。庸愚之人。猶將嗤之。况高明當碩如翁者乎。乃辱不鄙。遠賜問賀。獎借過情。重增其愧。全勉僕以作者之事。尤不敢當。古人以行誼文章兼顯於時者。世不多見。明興二百餘年。名世之輔。專門之彥。凡幾作矣。而一代文章。猶未能追踪古昔。乃欲責之於椎魯人。詎能耶。若使其硜硜小人之守。惓惓納誨之心。朝夕俟衰職有缺時。用一縷補之。以仰答隆遇。而免於罪戾。或庶幾耳。冉氏云。如其禮樂。以俟君子。惟翁學綜墳典。冠絕等倫。海內士孰不望之以爲宗主。誦之以爲軌範。今天子誠不欲興禮樂則已。如欲稽古禮文之事。以潤色鴻業。發揮典籍。則舍翁將何之焉。願努力自愛。弓旌之賁。當有日也。令郎奇才久屈。



誠有遺珠之嘆。茲旋草草附謝。辱惠過腆。愧不敢當。謹領綾絹二事。餘璧上。別具侑柬。統惟鑒原。

### 答雲南巡撫陳見吾

沐國公者。素不相知。自去年以來。屢次寄書。俱有重禮。僕屢竣却之。并其書亦未敢拆。恐此等事皆其從人所爲。其主不知也。丈會間。語次煩爲道鄙意。其諸未受禮儀。亦宜稽查。毋爲乾歿。再惟世臣之道。但能守法安靖。自可長保爵祿。廣交行賂。徒爲驅騙者之資耳。况今朝廷清明。倖途斷絕。如有遠犯。雖親不宥。天威赫赫。敢誰干之。以貨求全。恐不能也。渠若有知。亦可以此警之。亦誘人爲善之一端也。伏惟留意。餘無言。

### 答兩廣督撫張元洲

廣事不意披猖至此。諸將所領兵船。亦不甚少。乃見賊不一交鋒。輒望風奔北何耶。將

不得人。軍令不振。雖有兵食。成功亦難。故繫四敗將於闕下。不重懲之。無以示警。諸凡調處兵食事宜。似宜少破常格。乃克有濟。公若有高見。宜亟陳本兵。當爲議處也。元老去。百務助勳。冗不多及。

### 答少司馬楊二山

比來士習人情。漸落晚宋窠臼中。有識者雖心憂之。而不敢言。僕不揣淺陋。妄有所陳。猥辱高明。特垂鑒獎。感謝感謝。賈生有言。使管子而愚人也則可。使管子而少知治體。則豈不爲之寒心哉。今遇清明之朝。當改絃之會。而不相與勵翼協力。共圖實事。猶欲守故。輒驚虛詞。則是天下之事終無可爲之時矣。來教謂自今祇論事功以爲黜陟。凡稱清。稱高。談玄。及議論無實者。一切斥之不顧。旨哉旨哉言乎。

### 與中丞孫淮海

比者冒昧妄有論建。辱獎譽過情。深以爲愧。大廈之成。非一木之幹。僕旣已唱之矣。尙賴一時賢士同心和之。庶克有濟。奈何人心玩愒已久。溺於故常。蔽於私意。雖心知其當然。而終不能踴躍以趨赴也。今惟積此真意。漸次薰蒸。假以一二年。庶可少變。但僕以病軀久欲棄人間事。恐不能從容以需之耳。辱道誼知已。輪盡其愚。

### 與參議高廉泉

前有小柬托趙太府人將致。諒登記室。張文簡公繼夫人祭葬。已經該科參駁。僕懇之於禮曹。始得題覆如例。蓋其中亦稍有未順故耳。張使回。附此。諸惟鑒原。

### 答張中翰仰峰

感文至。始知有太夫人之變。悽感悽感。卹典該科以例欠合參駁。區區懇於部中始得之。使旋附復。厚惠概不敢領。輒用歸璧。統惟亮原。

## 答司馬楊二山

今秋邊烽無警。亭障完固。公之功當爲諸鎮之冠矣。徐君條議馬政。鑿鑿可行。而公止據原議。輒與轉聞。略無增損。祝人之善如己之善。此尤見公之襟度恢濶。非世之沾沾有己者可比也。敬服敬服。

## 答廣西熊巡撫

辱翰教。知廣事已有次第。山賊多所斬獲。公之威望已著。盪定可預睹矣。但聞該省軍儲甚乏。昨與部議。量發帑銀以濟之。往年剿閩。冠發銀二十萬。今廣中應解錢糧已奏留。而川浙又可責償原貸。今擬半閩中之數。似宜足用。期使炎荒之民。知朝廷軫念之殷。不以遐遠而或遺也。頃科中建論。欲更置督府。代者尙未定。先此復。

答中丞梁鳴泉

恭喜令望益隆。崇階伊邇。欣慰之悰。良不可喻。近來士習人情。似覺稍異於昔。浮議漸省。實意漸孚。鄙人疏發其端。太宰公力助之。太平之休。庶幾可望。但不知後來何如耳。

答御史顧公曰唯

辱揭示領悉。惟公端亮之。冠於臺表。比者一二注措。尤協輿情。太阿發劓。虛以運之。遊刃有餘地矣。近來士習人情。似覺稍異於昔。李石翁寬和沈靜。翰握機衝。僕亦竭其鰲鈍。以共相疏附。詩所謂伯氏吹塤。仲氏吹箎者。或庶幾焉。

答馬總兵

今歲秋防無警。貴鎮又有此奇功。足下赤心報國。功冠諸邊。於僕亦有光矣。幸努力功名。朝廷自有大爵賞。一切事體。不必過慮。如有難處之事。一一說來。僕自有處。

### 答薊撫劉北川

今歲秋防無警。雖國家之福。然亦督撫諸公先聲之所震疊也。欣慰欣慰。承示易將請兵數事。皆於邊備有裨。容與本兵卽爲議處。薊鎮有沈痼之疾。非旦夕可療者。惟本之以實心。鎮之以沈靜。審處機宜。弛張並用。需以歲月。庶可成功。顧前此浮議所眩。使當事者不得展其所長。私心每憤恨之。數月以來。覺士習人情。少異於昔。實意潛孚。言漸熄。來教所謂牽制譏讒者。自今可毋慮矣。努望立功名。以慰注想。臧師才略。在今諸將中。誠爲希有。幸公以道眼觀之。

### 答河道巡撫翁見海

僕不肖切抱敬賢之心。如公之高節弘猷。則尤私心所嚮慕者。理漕特借以爲簡畀之地。不久勞也。辱示疏沁道衛分堵上源。誠爲急務。但渠初成。應難再舉。俟休養生息二三年後。物力稍舒。當卽計之。若此圖獲就。實國家萬世之利也。

答廣西熊巡撫

往者冒昧。妄有所陳。誠激於時弊不得已也。公不以爲狂且愚。而辱賞許之。感甚感甚。詩不云乎。唱予和汝。僕旣唱之矣。尙賴中外諸賢同心共和。庶克有濟。不然。將並鄙言亦屬之議論矣。海賊據閩中。報謂已盪盡。恐未必實。然妄之其勢已敗。殄滅有期矣。

答南祭酒姜鳳阿

聞公振鐸南雍。教先行實。卽大疏所陳。亦可見其梗概。而推轂處士。尤於風教有裨。已下部議覆矣。

## 與薊遼總督譚一華

前道聞體小違相。無任懸念。今想勿藥矣。近日處分戚帥。誠出下策。然非得已也。頃會霍司馬云。公本欲論郭琥。則屬者之舉。似亦與高見懸符。且事權歸一。法令易行。兵不遠索。浮議自省。假之以便宜。需之以歲月。薊鎮之事。亦未必不可振也。但以總理體面。比之鎮守爲優。今既易銜。則上下承接。自有常分。用之雖重。而禮則少損矣。本兵題覆。慮不及此。不知公議疏中。亦可爲一處否。如不可處。則於常禮之外。少加優借。以鼓舞之。又本兵疏。以巡關御史監軍。此言大誤。蓋戚帥之請監軍。謂於本鎮之外。別練兵五萬也。今既爲鎮守。有地方之責。則巡關御史。何事不可督察。又何必更爲監軍名色。以撓之哉。公於議疎中。幸婉詞以破其說。至於射打一事。極爲虛文。其中情弊。可笑可恨。今但以訓練之實責之。戚帥如有不効。巡關御史得論劾之。固不必襲此故套。虛文爲也。又鄙意謂南兵。既不可取。鎮兵或足數。必須聽其招募。庶可充伍。且訓練若成。則



老弱可以漸汰。援兵可以漸減。又不苦於供億之繁矣。兵不貴多而貴精。李抱真在澤潞。以二萬人雄視山東。豈在衆哉。

又

戚帥以總理改總兵。誠爲貶損。緣渠當僕以書相問之時。不急以此意告我。而本兵又倉卒題覆。故處之未盡其宜。然及今尙可爲也。望公於議疏中委曲爲言。不但體面降抑爲下所輕。且督撫標兵皆欲付之訓練。若不兼總理。何以行。便乞特致一書於閣中。二公及虞坡思齋。僕得從中贊之。更易爲力也。倘得如意。當於勅書中增之。其關防當改鑄矣。昨議增築敵臺。實設險守要之長策。本兵卽擬覆行。但據大疏謂一臺須五十人守之。則千臺當五萬人矣。不知此五萬人者。卽以擺守者聚而守之乎。抑別有增益乎。聚則乘垣者無人。增則見兵止有此數。不知又當何處也。又四面周廣才一丈二尺。雖是收項之式。度其根脚當亦不過倍此數耳。以五十人周旋於內。一切守禦之具。與士卒衣糧薪水之類。充牣其中。無乃太狹乎。便中仍望見教萬萬。山東民兵徒有征戍

之勞。而無戰守之益。若折解工食銀兩。則一歲中卽可得十餘萬。以此十餘萬之貲。召募士著精壯之人。便可得勝兵五六千。比之千里遣戍成功相萬矣。僕久懷此意。未有以發。公熟計其便。再疏言之何如。凡僕所白。皆密要語。故不敢令人代書。極知草草。

### 答某巡撫

辱示大疏。俱於邊屯切要。已下所司次第題覆。公以正氣直道。董正官邪。緣此見嫉。亦誠有之。幸太宰知公最深。三至不惑。萬無足慮。

### 答閩中巡撫

廣賊猖狂。蔓延閩地。當事者張皇奏捷。本兵據揭題覆。遽行賞賚。俱爲大謬。辱示大疏。讀之使人憤恨。頃該科亦以爲言。回後當別有處分也。差人旋草草附復外。新刻文苑英華。有便幸惠寄一都。冗不多及。

### 答湖廣李布政

遠辱華翰。感荷厚情。大惠。概不敢領。輒附差人壁上。趙守自處慎抑。不敢遽抗禮於諸公。昨銓部訪知其未履任。而卽繳憑。故行查耳。今聞兩院已有定論。上下相安。實地方之幸也。承諭及。并此以復。餘惟鑒原。

### 答奉常羅月岩

往令弟春元。及鎮山公差人。茲因洞岩至。三辱華翰之及。感悉垂念至意。近來士習人情。紀綱法度。似覺稍異於昔。實自小疏發之。然忌我者亦自此始矣。念旣已身荷重任。義當直道正言。期上不負天子。下不負所學。遑恤其他。執事久困流言。今公論稍定。賜環有期矣。

## 答憲長宋陽山

自丈從閩中解歸。久不聞問。然此心實不能一日忘也。比者激於時弊。不得已妄有所陳。近來士習人情。紀綱法度。似覺有異於昔。實自小疏發之。然以公之亮節宏才。久困流言。僕不能刷而振之。蔽賢之咎。必不能道矣。別楮所云。往亦略聞其概。行當與李石老圖解之。譜帙實已遺失。有便再寄一通。當踐宿諾也。

## 與薊遼總督

薊中事公所措畫。咸極精當。本兵一一題覆。初亦有一二異同之論。僕據事理譬解之。今皆帖然矣。戚帥復總理。不載議中。諒公有難言者。已具部疏。擬特旨行之。卽有言者。無足慮矣。但乞諭意戚帥。努力功名。答以羣望。僕亦與有光焉。

### 與兩廣總督

賊起已有端。公不待其潰裂而早圖之。策之得者也。此中是非甚明。無煩自白。今南方之事。一以託公。幸益殫忠猷。以慰輿望。乞身之舉。非所敢聞。

### 與廣西巡撫

惠州之變。傳聞甚駭。廣事猖披至此。日夕懷憂。帶川至。幸與之熟計。積弊之餘。非破格整頓。恐不能濟。有當言者。宜卽疏聞。僕當從中力贊之也。新任陳憲長名瑞者。頗練。南中事。公試與籌之。何如。

### 寄太宰吳望湖

知賢而不能薦。去而不能留。孔子所謂竊位者也。公雖欲遂其高志。僕輩將何以道竊

位之譏哉。其懇留公者。不獨以爲國家。亦以自爲也。

### 與薊遼督撫

薊事仗公雄略。有漸振之勢。慰甚。人衛之師。疲於奔命。人人以爲不便。然而終不可裁者。勢誠不能也。大疏已明。無容復議。戚帥不知近日舉動何如。折節以下士夫。省文以期實效。坦懷以合睽貳。正己以振威稜。乃渠今日最切務也。相見。幸一勉之。

### 與兩廣熊督撫

惠州之變。或言城已陷矣。遊聲噂嗜。至不何聞。僕日夕以此爲憂。頃得捷音。無任欣慰。至以不自爲功。而歸之虔鎮。尤見無我至公。然公之功亦自不容掩也。陸寇旣除。自此可專意海上。帶川至。幸與之熟計。事有當言者。宜卽疏聞。僕當從中力贊之也。新任陳憲長名瑞者。頗練。南中事試與籌之。何如。

### 答奉常劉小魯

辱翰。刁知道從。至。都。慰慰。公雅致高懷。僕。深諒。昨曾身臺。歸。打書有缺。銓司欲擬公調補。僕再三力止之。蓋知公之不樂驟徙。用成高致焉。有便可致書於選君。謝且止焉可也。區區淺薄。無補於時。欲去不能。欲留不可。又值老母南歸。情懷愈惡。人旋附此。

### 答雲南巡撫陳見吾

滇辱翰。感荷厚情。滇事部覆。具如尊指。祖通道馬湖。蜀中士大夫咸以爲未便。俟其論定。當不處也。

### 與薊遼督撫

承示虜賊聚及兵三路入犯。恐屬未的。何者。虜若大舉。必不止於八千一萬。審欲大舉。亦必匿形斂翼。豈以二路之說。明告於人。且今天氣減熱。虜馬已弱。零騎往來。難保必。若欲深入。恐非其。雖。不可不過爲之防也。已告於本兵。俟有的報。卽行調遣。僕近訪得薊。軍糧有開支於一二百里之外者。士卒甚以爲苦。夫以數口之家。仰給於一石之粟。支放不時。斗斛不足。而又使之候支於數百里之外。往返道路。雇倩負載。費將誰出。名。一石。其實不過八九斗止矣。况近日又有撫賞採柴等項。名色頗出。其中如。欲士皆飽食。折衝禦侮。能乎。聞舊制各區。隨在皆有倉口。該官守支。今各倉。廠或頗圯壞。而其制猶有。其官猶在。獨不可併廠修理。就近坐派乎。此事不必疏請。但與管糧郎中一計處可也。

### 與蘄遼督撫

向有人告僕云。戚帥求望大過。志意太侈。雖公亦甚苦之。故僕以爲問。今奉來教。知昔



之所快快者。徒以削其總理舊銜耳。今既力爲光復。更將何求。近屢得渠稟帖。極爲感奮。頗務收拾人心。漸圖實事。仍望公時時教督之。雖然。僕何私於戚哉。獨以此輩國之瓜牙。不少優假。無以待其死力。今西北諸將如趙馬輩。僕亦曲意厚撫之。凡皆以爲國家耳。縷縷之忠。惟天可鑒。若此輩不爲國家盡力。是負天矣。郭琥之賢。誠如來教。卽召至面諭。以公相知之意。嗟乎。人誠難知。知人亦未易也。

### 與應天龐巡撫

辱示條議。鑿鑿可行。敬服敬服。國用出納之數。計部每季具題。歲終又總報。雖未會計成錄。而其數亦明。但朝廷未嘗加之意耳。今邊費日增。計每歲所入之數。尙少銀百四十餘萬兩。民力已竭。費出無由。日夜憂之。不知所出。奈何奈何。公竣節清望。冠冕一時。項大察雖有一二欲肆流言。而竟無間可入。精鏐在冶。百鍊愈光。願公自信益堅。勿起疑障也。

## 與湖廣巡撫

屢辱翰示。已一一具復。近聞施州兵備決當裁革。乃李僉憲亦自以爲當裁。則輿論可知矣。部中已停缺不補。幸早具議。以便題覆。

## 答湖廣雷巡按

辱翰示。知道從已臨楚地。無任欣慰。茲有一事請教。施州兵備。舊無此官。偶以隣境小寇。謾爾增設。今地方事寧。此爲剩員矣。夫官多民擾。供億費煩。姑未敢論。且分巡荆南道。原控制蜀之瞿塘。如得其人。何事不舉。乃舍其專職而另設官。於事體便乎否也。今李僉憲已陞銓部。停缺未補。俟兩院具題卽議省矣。惟裁之幸甚。

## 與薊鎮督撫

西北邊患無大於板升者。朝宵廷盱西顧。屢塵論問。僕輩謬膺重寄。主憂臣辱。不敢不以爲慮。但審彼量已。圖之甚艱。又前奉翰教。謂道遠隔河。難於進取。妙算蓋籌之已熟。卽趙帥亦自謂難圖。故不敢復言取之之計。獨招降一節。元年詔書如李自馨等。明許其歸順。又本兵題准賞格。及近日見行事例。皆布之遐邇。使之虜中。非所謂始禍而開釁也。昨偶因趙帥以李自馨手帖見寄。竊以爲自馨等來歸之意。其誠僞固未可知。但朝廷有詔招降。則又不可謾然不爲之所。故面付趙帥使密圖之。且戒之曰。受降如受敵。不可輕忽。蓋正恐其輕舉妄動。而墮奸人之計也。茲奉來教。無任惶悚。闕外之事。書生不敢妄談。亦不敢遙制。惟公熟計之。若果出於至誠。以其來歸而撫之。惟命。審其不誠而閉關以謝之。亦惟命。惟求以便於國家而已。

### 與司成胡劍西

別來不覺再稔。眼前世局。凡幾變矣。平生膠漆。或化爲戈矛。大道康莊。皆鞠爲榛莽。其

中情態。難以盡言。數月以來。委曲斡旋。乃得寧帖。然其爲力也勞。而其心亦甚苦矣。知已遠逝。誰與晤言。悵悵。丈遠避流言。淹棲林壑。大察之後。公論昭然。諒非久必有旋當爲丈圖之。

### 答歐少卿

辱翰示。領悉。時屬休明。衆賢勵翼。方欲蒐遺佚於巖穴。以共圖治理。况高節雅望如公者。可使之淹留林壑耶。大疏部已案候。雅志終不能遂。幸惠然肯來。以慰鄙念。

### 答涂巡撫

閩中捷報。在蔣伯清失事之先。言者不察。遂爲訾詆。比來公議甚明。朝廷方精覈名實。以勸有功。卽謗書盈篋。終不爲動也。願公自信。毋慮。

### 答王巡撫

辱翰示。領悉。紀功之差。鄙意甚不欲之。乃貴院堂公持之必行。而同事者主其說。又卽以畀公。皆非事體非公心也。待地方稍寧。生當獨奏省之。

### 答凌參政

辱示條議。鑿可底行。容與當事者酌處之。戚之聲名雖著於南土。然觀其才智。似亦非泥於一局而不知變者。且旣已被鎮守之命。有封疆之責。豈宜別有注畫乎。今人方以此窺戚之釁。恐不知者又將以爲口實也。公如愛戚。惟調適衆情。消弭浮議。使之得少展布。卽有裨於國家多矣。

### 答施兵憲

辱示江漢地圖。公軫念民患。加惠荆人。甚厚甚厚。堤工告成。地方百世之利也。僕爲邑子。誼當紀述。重以汝泉公之命。豈敢以不文辭。時下薄冗。稍俟從容。卽勉成請教。

### 與薊鎮巡撫

近來邊臣。人思奮勵。而宣大二鎮督撫將領。尤爲得人。僕以淺薄。謬膺重寄。其於該鎮之事。苦心積慮。雖寢食未嘗忘也。奈何人心不同。議論不一。如馬趙二帥。去歲出塞之功。實數年僅見。卽破格優賚。豈足爲過。而人猶有議其功微賞厚者。本兵遂愾縮疑畏。而不敢爲之主。其掩春防之功。抑王公之請。咸以是耳。一二年來。言者率云責實責實矣。而又不明賞罰以勵之。則人孰肯冒死犯難。爲國家用哉。辱教容與本兵議之。督撫寬洪持重。王公明達敏練。馬之沈勇。趙之才氣。皆僕素所敬信者。文武輯睦。事乃克濟。不知雲中事體得如宣鎮否也。

### 與魏巡撫

邊虜之功。大於斬獲。往者本兵。淆於羣議。功賞不明。乃僕輩亦有過焉。惶愧惶愧。茲者斬馘至百數十級。近年以來所僅見者。文吏又可以法繩之耶。俟覈勘至當。請旨優錄。茲先行薄賚耳。

### 與兩廣督撫

惠州之戰。非贛兵往援。則廣事不知今作何狀矣。自公鎮黔之後。巢賊喙兌。懾伏不敢動。乃隣封亦藉其威望。用成大功。嗟乎。圖治之要。豈不在用人哉。聞捷。不勝喜慰。

### 答薊撫朱龍岡

雲中開府。近鮮其人。借公之重。移而鎮之。實出於李石翁與僕之意。方欲爲國家討才。

故未遑爲交游擇地也。願益展弘猷。以副羣望。趙帥才勇。公所素知。重鎮大將。關係不小。望公之垂盼也。

### 與荊州趙知府汝泉

前老母舍弟回。及西石家人去。兩啓馳候。諒俱入覽。頑奴不知已擒獲。追併否。望速爲處分。翹俟翹俟。新任劉尹。志行甚佳。且老成有幹局。必堪厥職。但縣事廢弛已久。釐振似當以漸。望公曲賜教掖。假以歲月。俾得從容料理。庶可責其治効也。

### 答朱巡撫

辱示條議。皆鑿可底行。至於罪人就近發戍事。尤足兵良策。此不獨貴治。卽近邊諸省。皆可行也。



### 與薊遼督撫王鑑川

承諭失事官軍不必提問。徑付軍門處治。知公微意欲借此以申軍令也。卽諭意本兵必如所請。近巡關訪拏南兵。聞其事已往。且經臧帥重治。何又爲苛求如此。聞該道誤信一二屬官之譖。多方羅織。務在挫辱之。使不得有爲。果爾。薊事終無可振之日矣。望公與撫臺曲爲一處。庶關外之事得少展布也。

### 答兩廣總督劉帶川

伏讀大疏。賊已在目中矣。但廣中情人多變。將領利於養寇。奸民樂於從賊。此逋寇所以得遊魂海上也。願公留意焉。所請已如命。借發南部銀五萬兩。計先後奏留。及內帑所發。各省所償。不下四十餘萬。仗公雄略。似亦足以辦此矣。如再不敷。又當措處。羣情喁喁。佇聞凱捷。以舒宵旰之憂。

## 答浙撫谷近滄

兩承翰示。領悉。武備弛而財用乏。文武將吏虛文塞責。此不獨浙中爲然。朝廷方欲綜覈名實。以興太平。奈何積習成風。因循難振。此在司風紀者一加之意耳。頃聞粵驟騷。患將及浙。預防之策。兵餉爲急。乃往者撫臺每一人至。卽奏請蠲貸。徒爲節省之名。不思幹濟之實。脫一旦有急。帑藏空匱。當其時能不徵派於民乎。此務虛名而貽實禍者也。昨敝鄉周道長者。亦曾以此告之。須兩院同心籌畫。事乃克濟也。

## 答督學曾確巷

承示大閱事。誠爲要論。今武備廢弛如此。不及今圖之。則衰宋之禍。殆將不遠。僕於此事。頗殫心力。乃昨南科有疏。又以此非急務。今朝野喁喁。方謂朝廷舉希曠之典。九邊將士。亦莫不扼腕而思奮。而此君乃獨持異議。人之識見。相去豈不遠哉。選貢事不知

各郡已徧試否。此與歲貢不同。但求得儁。不必取盈。近例甚嚴。昨楚中已黜四人矣。若諸郡尙有未起送者。幸嚴加甄別。合諸郡之士而試之。優劣乃見。惟其人。不惟其地可也。

### 答陝撫王鑑川

關西三獻捷音。斬馘逾百。實數年所僅見者。仗公雄略。分陝得人。朝廷無復西顧之憂。今誠欲興文武之業。豈不在擇任賢儁哉。功高而賚薄。尙當有待也。

### 與楚學憲胡廬山

敝省文宗借重高賢。命下之日。輿論稱允。惟公遵養已久。亦宜及時效用。幸早戒行。以慰羣望。昔也倦翼知還。今也無心出岫。時行時止。無意必焉可也。

## 與憲使羅月岩

令舅翁轉示華翰。雅愛至情。藹然盈楮。僕以寡昧。謬膺重寄。一念惓惓。許國之忱。實不敢上負明時。下負所學。昨者疏陳。萬不得已。然知者以我爲忠。不知者將爲炫已而先人也。其苦心處。惟鎮山公知之。難以盡言。比者之議。雖爲極狂。然宿嫌舊怨。亦借此而宣泄。比已借重東省驂駟。屬路從此。皆康莊矣。願早戒行。以慰鄙望。

## 答福建涂巡撫

顧監丞至。得所惠文苑英華一部。感悉厚情。閩船聞已出洋。廣中亦漸有次第。計海醜不日盪定矣。夾剿雖事關兩省。而公之勞動爲多。佇聽捷音。以慰輿望。

## 答南太宰吳望湖

大疏簡切溫厚。深得大臣告君之體。而召對一節。尤爲當今急務。此事僕輩亦屢次入告。未荷允行。若此關不啓。治平未可望也。奈何奈何。

### 答魏巡撫

往與李選郎談當今人物。語及於公。謾有云云。誠望公之切。爲慮之深。故不覺其言之過耳。乃公不以爲罪。辱垂虛納。惶愧惶愧。鹹場之捷。本屬奇功。本兵守文。復欲行勸。俟勘至。當另議優擢。往者薄賚。豈足酬哉。

### 答吳操江

比見浙中亦有警報。吳越接壤。桑土之防。不得不預。大疏本兵已卽具覆。又借重暫行撫院事。東南有賴矣。

## 答薊遼劉督撫

辱示麾下暫駐廣慶。俟兵船俱集而後乘之。所謂始如處女。敵入開戶者也。賊雖未破。吾已見勝徵矣。選調浙兵。卽具覆允行。但浙中議論。苦於調發召募之擾。倘五千人足辦此事。似不必復求更代也。兵難遙度。惟公裁之。

## 答司知縣

兩辱華翰。俱悉。但九江胡兵。憲原未入京。區區素不識其人。實亦未嘗託之。不敢市德於執事。恐爲人所誑也。近來外間盜竊名字者甚多。後有此等事。宜細加審覈。

## 答荊洲趙知府

頑奴犯法。致煩尊慮。惶愧不可言。據招承之詞。似已明實。今欲正法。必申呈兩院轉達。

乃事體也。但當時發覺此事。止令錦衣衛緝拏各棍。原未送法司問理。蓋以所騙之人。乃一士夫之子。以愚被欺。若欲送問。則受財與請求之人。於例俱當發遣。已既不能禁戢其下。又因而連累他人。父子前程。心有所不安耳。今止二棍監在錦衣衛。待此歸結。竊意謂不必申呈兩院。但求一印信揭帖。并招詞原贓。差人徑送與僕。卽將來文贓發與該衛立案。歸結二棍。亦就衛中處治。免送法司也。此既不傷潘氏父子前程。亦不經由許多官司。留此形迹也。僕以淺薄。謬膺重任。日夕檢點此身。思以率先百辟。而頑奴乃敢故犯憲條。孽本自作。死不爲枉。幸爲速除之。以警其餘。揭帖中明開已監故可也。其贓銀必解來者。蓋以二棍見其口詞贓物。乃肯輸服。且僕之心迹亦俟此而後明耳。今各省撫院兩司印信關防揭帖論公事者甚多。固不拘於公移體式也。鄙事煩瑣。屢瀆尊嚴。愧悚無已。

### 與分宜尹

聞故相嚴公已葬。公陰德及於枯骨矣。使死而知也。當何如其爲報哉。

### 與劉進士禹謨

別後一辱記問。感荷厚情。兒輩得奉教於門下。幸甚。比來頗知奮勵。不敢廢業。謝君選期當在八月。度其名次當輸內除。但其授職。則自有官守之責。不輸專精於教矣。督竊思執事大事既襄。讀禮有暇。且憶前別時亦曾有接館之約。不知終愛否。使中專懇。幸惟亮之。

### 答凌參政洋山

惟公宿望宏猷。久淹藩服。旦夕且當有大畀於左右。雅志高懷。決不能遂也。辱示薊事。咸中機宜。譚公戚帥。殫忠効實。人罕知者。賴公委曲調護。裨益宏多。節得西報。虜酋尙未回巢。東虜勢孤。或亦不能大舉。若隘要處墩臺已就。秋防諒保無虞。需以一二年。守



備漸修。士氣稍振。即可議戰矣。奈何人心不同。好生異議。阻壞成事。殊可恨耳。

### 答閩撫涂任齋

海賊挾倭奴爲患。閩中之訊。欲牽我師。仗公雄略。咸就殲夷。從此併力海上。盪定之期。匪朝伊夕矣。慰甚。慰甚。懋賞酌功。朝廷自有異典。孰得而掩之哉。

### 答中丞孫淮海

辱惠佳刻。略讀數種。皆入玄造奧。含菁咀華。且其議論不詭於聖人。向也吾見公之貌而已。今乃得窺其深矣。蘇氏有言。千金之富。卿相之貴。苟非天之所與。求一言之幾乎道。不可得也。公以涉壯之年。早窺道域。天所與也。願勉旃自愛。歸見令叔。慮吾證以提中所得何如。恐當遠遜阿戎矣。

## 答中丞李沾渠

辱華翰。諭應從已。臨節鎮。慰慰。雲中迫鄰虜境。比年主將非人。邊備久弛。近得趙帥。稍覺改觀。公資其雄略。授以勝算。虜不足慮矣。

## 答漕河督撫

淮徐困敝已極。豈堪重罹大災。惟幸新渠安流。漕艘無恙。然吾元元之衆與苦甚矣。賴公經畫有方。勞來安集。得以少舒朝廷南顧之憂。慰甚慰甚。大疏一一覆行。

## 答中丞谷近滄

近來考課不精。吏治日敝。去歲曾一疏陳之。而人皆溺於故常。務爲姑息。以慌下。今實行者。惟見公之論先尹而已。方今幹蠱之時。非加意綜覈。不足以振敝維風。公之此舉。

其有裨於治道不淺。敬服敬服。前所控者。不知其人已獲否。便中附及。

### 答總督譚二華論任事籌邊

築臺守險。可以遠哨望。運矢石。勢有建瓴之便。士無露宿之虞。以逸待勞。爲不可勝。乃策之最得者。其利害長短。亦不待智者以後知。奈後世間一種幸災樂禍之人。妬人有功。阻人成事。好爲異說。以淆亂國是。又幸天下之有事。而欲以信其言。闇者不察。從而和之。數月紛紛盈耳。僕隨事破妄。因機解惑。舌幾欲敝。而唇幾欲焦矣。近來稍稍寧帖。昨巡關出。亦曾與之極言其利害。又故以他事獎之。而使之知所嚮往。自此之後。異議者諒無以鼓其喙矣。公之忠赤勞勩。人雖不盡知。我祖宗在天之靈。必陰鑒之。願堅持此心。保無他虞。僕在此一日。必爲國家肩一日之事。今人心不同。趨向靡定。百爾委曲調御。僅得少濟。終無能大有建明。其苦心極力處。有不敢爲公告者。亦惟仰祈我祖宗在天之靈。鑒此款款耳。西邊屢有偵報虜西未回。目前或無可事。再做一春寧謐。則緊

要墩臺。皆已竣役。即可議減客兵一枝。然此須自公發之爲妙。且看明春事勢何如。再作商量也。大疏所陳。計慮深遠。規模閎闊。非爭逐於刀錐者可望。已下部議覆。但人情玩愒已久。雖有良法美意。不肯着實舉行。一切皆成故紙。殊可恨也。當此幹蠱之時。不少行總覈之政。惡能振之哉。戚帥久不聞問。不知比來何如。辱翰示之。及謾爾具復。不悉欲言。

### 答兩廣總督熊近湖論廣寇

數年劇賊。一旦就擒。仗公雄略。收此奇績。斯朝廷付託得人之效也。功高賞懋。國家自有彝典。本兵方按故事。奏凱論功。嗣容專賀。竊以爲滅賊固難。善後尤難。蓋廣之動蕩。非一日矣。數年以來。憂在曾賊耳。未遑他圖也。今鯨醜雖已就戮。而奸民反側者。尙懷觀望。山寇陸染者。伺我疲勞。海防久廢。法紀未張。吏不恤民。驅而爲盜。此皆釀禍之根。未可遂謂寧帖也。且張璉擒而吳平繼之。吳平殲而曾一本繼之。往事失策。可爲炯鑒。

爲今之計。似宜乘戰勝之餘威。藉兵餉之少裕。急將海防事宜。嚴加整飭。如林道乾輩。旣爲良民。便當遵吾約束。渙其羣黨。釐其宿弊。如懷疑貳。卽可名之爲賊。因而除之。仍當於沿海一帶。分區設寨。修飭兵船。嚴申海禁。又廣中原題設六水寨。今宜選諳習舟師。分任責成。至於山寇。乃坐守虜耳。勝兵往加。勢如破竹。亦宜殲其渠魁。後乃可議招撫。區畫已定。然後簡汰有司。一意拊輯。所謂乘威之後。以行惠。則惠尊而民悅。此數世之利。若狃於一勝。遂謂無事。而姑息以求安。竊恐亂本不除。餘毒再作。終當復勞尊慮耳。萬里之外。事難遙度。第以管闕質之左右。公其採而行之。幸甚。

### 答楊兵憲

近邊兵憲待次撫臺。比者借重。實遴選也。願益展猷爲。以養崇簡。薊事不振久矣。頃雖加意整飭。蔑聞實效。弊在人心不一。論議煩多。將令不行。士氣難作。此雖督將領之責。然司道實分任其事。幸公留意焉。

## 答薊鎮戚總兵

廣事自區區力主夾剿之議。及請發帑銀。先治海賊諸事。人皆未以爲然。今偶得成功。幸也。但善後之圖。全在督撫。頃所示者。悉中機宜。已卽授之於熊巡撫矣。

## 與漕河督撫

敝省改折漕糧三萬石。原因荊州左衛移調顯陵。該衛運船灑派江西。無軍無船。其勢不得不行改折。非暫因災傷蠲免者比也。昨該部不查緣由。議復本色。竊以爲欲復本色。必先造船。又議撥軍。今湖廣一省軍衛。除邊方守禦外。大抵皆爲運卒矣。今欲增撥。將何所出。造船旣費不貲。撥軍重行勞擾。而所復本色不過三萬石。况京軍月糧。近亦本折兼支。則改折事體。亦爲兩便。又何必拘拘以復本色爲哉。今當下貴衙門查議。惟公留意熟計之。幸甚。

### 答兩廣總督熊近湖

前承差去。妄有所陳。管闕之見。聊以助公一籌耳。茲辱翰示。欲以貴恙引去。大失鄙望。炎荒勸勸。使公獨勞。僕輩亦何嘗不以爲念。但善作貴於善成。克終乃爲有始。萬一代公者不得其人。致墮前功。則公之盛美。毋乃亦有缺乎。大疏部已案候。願勉思國家大計。慎醫藥。厚自持。以副羣望。幸甚。

### 答司空林退齋

近見南中駱掌科疏。始知公所以屢疏求去之意。雖然。世之所望於大人君子者。固以其能引濟於艱難也。古人迂身善君。不潔其名。願勉抑高懷。以副羣望。

### 答閩中涂巡撫

廣寇遇閩師而奔。勢窮力憊。折腰之免。虞者得而置之。論其功閥。自不可同日而語。但以兩省事體。不得不均處耳。功高賞薄。卽鄙心亦深歎焉。

### 答廣中督撫

翰華辱領悉。不用斗粟片甲。而使積年逋。皆束手歸降。買犢賣刀之化。不足以媲美矣。慰甚慰甚。贛兵援廣。聊以拯一時之急耳。向此中有欲議留蔡將者。僕力止之。今廣寇漸平。不容再借矣。

### 答方巡撫金湖

惟丈雅望雄才。久困鹽駟。茲者諸公之舉。實出輿議之允。正人登顯。國家之幸也。賊入應州。據報四萬。實不過一二萬。兩鎮之兵。併力蹙之。諒不敢深入。但虜居塞外者尙多。宣鎮空虛。殊爲可慮。丈宜與繼津公熟計。嚴爲之備。



## 答施兵憲

辱別教。領悉。往者部擬推陞。稍有一二間言。後訪之郡中士民。咸切傾戴。其議卽息。公更勿以此介意。但委心任理。仗大公。履至正。至於道之通塞。有命存焉。決非人所能爲也。今人心叵測。時事艱難。遇事則委難以責人。事平則抑人以揚己。誠有如來諭者。至於居上位者。一有爲國家任事之心。尤不免於人之相議。捧誦至此。再三興慨。嗟乎。此正僕之茹苦而不以告人者也。然僕之所以自處。則亦唯委心任理。仗大公。履至正。而以通塞付之於命耳。將奈何哉。辱以僕爲知己。故敢盡其區區。

## 答南司徒馬鍾陽

惟公昔在司農。僕忝冑監。以官曹之伊邇。幸得時時瞻儀範。奉清論。蓋傾向者久矣。比者主上留心國計。召公留京。委以重任。輿情顛顛。方以得人爲慶。公乃獨眷念慈闈。浩

然長往。既違鄙願。又孤衆心。詢知來使言太夫人福履倍增。公亦靜攝愈勝。不知承歡之暇。亦嘗以主恩士望爲念否乎。僕因緣際會。謬參重寄。深惟寡昧無補於時。惟有薦賢一念。庶可以報塞於萬一。而今海內名流適於當世之用。實未有踰於公者。此惓惓之愚。所以結注於左右而不能已也。李帥功名著於閩中。既與地方相安。何必又爲更罟。辱諭俱領悉矣。

### 答張廬山

往銓部問可爲督學者。僕妄以已見列足下及海內名士十餘人以應之。今皆次第登敘。獨足下尙滯簿書之任。然或又以足下之才器。卽亦畀以重且大者。不必更煩於文墨間也。幸努力自愛。僕寡昧。竊抱敬賢之心。居常以推轂天下士甚衆。然而皆不欲人知。敢以口惠市德於足下哉。致煩遺謝。深以爲媿。人蔭草草附復。厚惠概不敢領。輒用歸璧。統惟鑒原。

答督撫魏確菴

公之情悰苦切。西石已備言之。願以疆事孔棘。不能從命耳。茲奉來教。卽白之太宰。徐當爲公處。

答督撫壬鑑川

諸鎮斬捕首虜幾二百級。自來出塞之功。未有如是之奇者。宜破格錄敘。以風諸將。而人之所見。乃有大不然者。其時僕偶以病出沐。不獲與議。徑從薄賚。然公論皆以爲未允。俟勘疏至。尙當有處也。

浙南司徒張華峯

僕以孤直。不能徇俗取容。謬當鼎軸。爲衆所忌。聞公以令親陳道。長在南中。密爲護持。

感戢洞於心腎。然知公此心。非獨私於僕。爲世道慮也。今歲南北俱水。閭閻嗷嗷。此中隱憂伏禍。又有不可勝言者。僕以寡昧。秋毫無補於時。而拙直之性。又不能浮沈和光。以保榮祿。惟當引去。庶可道責耳。

### 答憲長揚晴川

辱示城守保甲事宜。皆地方切務。但患有司不能着實奉行耳。須屢省詳覈之。庶不徒爲文具。近來薊事視昔何如。當事諸公經略亦有次第否。今歲雖幸寧謐。來年尙有可慮。諸公爲備。果足恃否。便中更望密示。

### 答薊遼總督魏確菴

遼左重鎮。正仗雄才。乃西石道公申款懇至。不得已勉從所請。然區區之愚。於交情雖篤。而爲地方計則踈矣。行矣。強食自愛。墨子之突。恐不及黔也。

答中翰張後湖

辱揭示。領悉。疏當案候。春初戒行可也。令先翁之諡。不稱其行。公評咸以爲歉。昨已致書雷院。求爲具題請改矣。茲有一事敬問掌記。先年張文簡公曾得內閣所藏冊府元龜一部。其後文簡公卒於京邸。其僕卽將此書於部前貨賣。令先翁識其爲閣本也。贖而藏之於家。嘗語區區曰。吾欲將此書仍送內閣。以完先代之寶。何如。僕時起賀曰。幸甚。此義舉也。無何。而令先翁亦逝。竟弗克踐其言。今憶此書必無恙也。僕欲倍價奉贖。仍歸閣中。以卒成先公之志。惟執事其幸許之。夫此一書也。文簡得之。令先翁贖之。至僕而還之。三更張氏皆楚人也。將以媿於古之左史倚相。能讀墳典邱索。不亦美乎。

按文簡公石首張璧中翰先  
公茶陵張治也初諡文隱

答遼東巡撫方金湖

遼左重鎮。仰仗雄才。簡命自天。允孚輿論。在僕私衷。尤爲欣忭。雲中賴公。秉持公議。聞燕院近亦洞豁無苛責。皆公調停之力也。

### 答山西按院饒成山

遠辱華翰。知旌節已臨三晉。慰慰。別論云云。深感至愛。太宰爲人所傾。殊可歎憤。喜高老起用。素在同心。世事尙可爲也。

### 答湖廣按院雷信菴

屢辱華翰。深荷遠情。龍湖老先生改謚事。卽辱允俞。存沒衛感。聞榮滿屆期。代者擬是遵化陳君。此君沈毅敏達。可繼公後。敝府太守代趙者王君。亦佳士也。地方有賴矣。

### 答遼撫方金湖

辱教。知旌節已東。無任欣慰。遼左虜警。多在春間。防禦之策。所宜預圖。一帥更換。原非鄙意。但議者以彼中鎮巡。頗不相能。欲借曲處之耳。議尙未定。辱示。俱見留辱邊鎮至意。

又

適借東藩。又移西鎮。諸老之意。僕不能違。所喜馬帥素辱知遇。文武輯睦。邊方之幸也。初春已聞有小警。願遣發征旂。以慰將士之望。

### 答湖廣撫院劉唐岩

承差至。辱華翰。領悉。監利賊首。既已首服。自宜宣布威信。許其自新。土司仇殺。雖其恆態。但至於劫質衛官。則事體重大。必須會題。惟不宜輕調兵動衆矣。從容以計取之。幸責成該道兵備。於軍衛有司中。選有智略知兵機者。專任其事。或計誘相近。上司伺便圖之可也。去歲敵縣逋欠漕糧甚多。荷臺下曲處。其有德於地方甚厚。但借過藩司糧

銀亦宜補還也。

### 答荆守徐太室

辱華翰。感戢厚情。惟公卓行宏才。久淹外服。屬者楚中學憲缺。擬借重。而銓曹以公資望既深。旦夕且將畀以重且大者。不欲更以文墨相煩。而不知公之標格蘊蓄。於此更爲宜也。老親家居。深荷垂念。銜感無任。施州土官事。前已具復。頃科中以爲言。生譬之金崗事情與四川都蠻不同。故部覆亦甚圓活。大抵需以歲月計處之自定。

### 答閩撫熊北潭

北聞山海餘孽。尙爾縱橫。知公籌畫爲勞。乃其用兵次第。則宜以海寇爲先。浙兵旣到。宜及其鋒而用之。若屯聚坐食。無他奇道以取勝。使山賊得乘吾之懈。非善計也。



答楚按院雷信菴

比者旌節按行荆南。辱枉顧敝廬。兼承厚貺。感荷感荷。辱教江堤經始。羣盜解散。在僕得免鄉里之憂。黎民咸獲安恬之利。公之造福於楚人。所宜世世而俎豆之者也。差人旋草草附謝。感仰之私。萬不悉一。統惟亮存。

# 張江陵全集卷十五書牘

## 答應天巡撫海剛峯

三尺法不行於吳久矣。公驟而矯以繩墨。宜其不能堪也。訛言沸騰。聽者惶惑。僕謬忝鈞軸。得與參廟堂之末議。而不能爲朝廷獎奉法之臣。擢浮淫之議。有深愧焉。

## 答薊鎮巡撫

虜馬弱矣。乃敢驀入塞內。遊騎往來。乍進乍退。此必誘我也。馬帥堅壁威平。遏其東犯。甚爲得策。致之平川。出其不意。以夜取之。必獲志焉。但恐我力少備多。不敢輕動耳。計此時當已退遁。卽無斬獲馬帥之功。仍當優錄。幸與察院一計之。

## 答薊鎮撫院王鑑川

辱翰示。知己得代。東征有日。無任欣慰。虜馬南牧。自春涉夏。誘誘逋逃。擾我穡事。彼能多方以誤我。而我竟不能出奇以制之。邊將可謂無人矣。今秋之事。深爲可虞。望早發征。磨預緝雄策。以副明主倚重之意。大疏所陳。事事據實。皆可旋至而有效者。卽寄語西石公。經略既定。惟當遵行約束。守而勿失可也。

### 答藩伯施恆齋

聲容盛而武備衰。議論多而成功少。宋之所以不競也。不圖今日復見此事。僕不度德量力。欲一起而振之。而力不從心。動見齟齬。茹葦懷冰。有難以言控者。唯當鞠躬盡瘁。以達主知而已。其濟與否。誠不可逆覩也。辱華翰。勞問勤渠。深荷道誼真愛。

### 答楚學道胡廬山論學

承教虛寂之說。大而無當。誠爲可厭。然僕以爲近時學者。皆不務實得於己。而獨於言

語名色中求之。故其說屢變而愈淆。夫虛故能應。寂故能感。易曰。君子以虛受人。寂然不動。感而遂通。天下之故。誠虛誠寂。何不可者。惟不務實得於己。不知事理之如一。同出之異名。而徒兀然嗒然以求所謂虛寂者。宜其大而無當。窒而不通矣。審如此。豈惟虛寂之爲病。苟不務實得於己。而獨於言語名色中求之。則曰致曲曰求仁。亦豈得爲無弊哉。願與同志共勗之也。

### 答薊鎮督撫計邊鎮臺工

臺工之議。始終以爲可行。確然而不搖者。惟區區一人而已。辱示云云。近來會士大夫。未嘗不一一爲譬曉。但今人任事者少。識事者尤少。任事者真見其事理之當爲。而置是非毀譽於不顧。不識事者。未覩利害之所在。而喜爲款言臆說以眩名。兩者相與。宜其說之曉曉而不可止也。世事如此。可嘆可慮。昨部覆兵科疏。尙欲下督撫議。區區再三曉以頃總督疏臺工限已寬矣。賞已併矣。大工垂成。奈何終止。旣不可止。又何議爲。

徒使任事者疑畏而自阻耳。部中因予言而止覈詞。頗亦分曉。會軍門。可達此意。勿生退悔。今年虜情可虞。聞鎮中哨夜亦有得至虜帳中者。想得其耗。幸密以告我。當祕之不泄也。

答薊鎮撫院王鑑川論薊邊五患

辱華翰。知己建牙誓衆矣。欣慰。臨淮一至軍而旌旗服色。皆爲改觀。豈獨其法嚴哉。蓋亦威望素著故也。但此中事情。與關西稍異。虜強一也。雲中北直虜庭。板升叛逆。倚虜爲患。二也。士無鬪志。惟務賄免。三也。卒惰而玩。將令不行。四也。密邇畿甸。畏避情深。小入則大虜勢。以爲解脫之地。小勝則張虛聲。以邀式遏之功。積習故套。牢不可破。五也。夫世必有非常之人。然後有非常之事。有非常之事。然後有非常之功。公所謂非常之人也。五者之患。庶其有瘳乎。願熟計而審圖焉。

## 答北邊撫院孟豐麓

往時總督當秋防之時。卽移駐懷來。雲中三關。聲援遼絕。議者每以爲言。然南山一帶。逼近陵京。今復舊制。令督撫仍駐陽和。居中調度。東西應援可也。乃欲盡撤入衛之兵。棄南山而不守。則失策矣。且防守數年。虜中亦知有此徑路。一旦棄而弗守。假令虜乘吾之間。以一軍綴上谷守將。而以勅卒掩吾不備。當其時誰任其咎乎。善謀國者必不如是之疎也。大疏請兵。亦爲得策。但以京師驕脆之卒。使之乘障遠戍。恐不堪用耳。容與本兵計之。

## 答薊鎮總督譚一華言邊事

卽月三日。得大同密報。言把都兒於月中旬。領三十騎來俺酋營。約搶京薊。俺酋遂率衆於二十等日。徙營威寧海之東。調集諸部。日漸東行云云。據此與公所遣偵探相符。

則虜之東犯必矣。聞虜中荒旱。饑疲馬弱。諸部東西相牽。心不齊一。或未能深入。然不可不爲之備。今議者咸謂薊人疲於工作。決不能戰。公誠督勵諸將。鼓率士氣。併力一決。則嗷嗷之口。不攻自息。其南兵三千。宜置之前行當虜。卽有損失。人能諒之。若令北卒居前。而已擇利便。則憤怨愈不可解也。年來困於薊議。心焉如擣。苦廟堂不能担当。視聽疑惑。奈何奈何。京兵已促之赴鎮。本兵懦弱。甚可慮也。

答薊鎮撫院劉北川言分將當虜

頃得譚公書。言各路措畫已定。戒備甚嚴。諒保無虞。但聞虜欲分道入犯。則我之勢力自分。曹牆古石。譚公已自任之。馬大付之戚帥。燕河以東。願公當之。胡守仁南人。恐威力不足以制諸將。須公親駐邊隘。督勵將士。乃能有功。拒之不入。此爲上策。卽不幸而入。亦望思爲可戰之具。因地合營。懸賞勸士。乘間覷擊。彼亦安能狂逞哉。薊事經營數年。視此一舉。望公留意。導示某生所著書。皆根極理奧。匆匆不暇細讀。聊取其一二策。

觀之。蓋篤志好學君子也。惜其齒暮。無以自見。得公爲之表章。亦足以償其平生矣。

### 與薊鎮巡撫

虜情叵測。無恃其不來。恃吾有以待之。昨已申告薊人。務以整暇。毋勞擾。毋忘備。但得西警少緩。專意東防。虜雖入。吾據灤河以東。無足憂者。觀公措畫。不俟遇敵。已見勝徵矣。老酋若果不東。則上谷雲中。恐不得安枕。公宜戒諸帥。嚴爲之備。板升大饑。聞日有南歸者。亦可因其饑而招諭之。

### 與薊遼總督謀俺答板升之始

賊聚而西。患在雲中晉陽矣。既有餉耗。公自不得不西應之。但南山一帶。尙爲可慮。幸留標下一二枝。以東事託之趙帥。乃可專意西防也。近聞土虜亦未動。薊中或可無虞。卽有事。薊人自足當之。無煩西援矣。外板升一事。望公密切圖之。去歲謀之。業已六七



分就矣。而爲大同守所壞。殊爲可恨。今之視昔。則又不同。俺酋老矣。其子台吉嘗切齒此輩。欲盡屠之。乘其危懼之時。招之易耳。此一機也。彼中荒旱饑窘。人思南歸。此又一機也。故願留意熟計之。今東患在屬夷。西患在板升。二患不除。我終無安枕之日。然西事稍易。宜先圖也。人旋。附此。以備採擇。

### 答宣大巡撫劉白川

頃據東西報。虜謀皆已解散。過望後無警。則薊永之間。以安枕矣。此雖朝廷有福。夷運將衰。然先聲伐謀。屈兵不戰。在督撫諸公之功。尤當與殺敵者同論也。

### 與薊遼總督譚一華論遏虜爭功

宣大之說。妄誕狂肆。見者無不笑之。其意不過妬薊人之戒備却虜。欲邀以爲功。不知疆場甯謐。國家無事。人臣并受其福。奚必功之自己出耶。其疏不復下部。徑批量賞。蓋

恐部覆又滋口說也。公於此但宜付之不知。置之勿論。若與之辯析。則又一某矣。事甯之後。可上一疏。言今秋虜情據宣大。初報十分重大。邊臣恐懼無措。躬履戎行。晝夜戒備。賴天威遠讐。廟堂指畫。西鎮之強兵猛將。既有以振其先聲。內地之足餉守要。又有以破其陰計。是以醜虜畏阻。自行解散。在我無亡矢遺鏃之費。而在彼有奔走約會之勞。臣等待罪邊疆。幸勉愆戾云云。不惟不與之爭功。而反推以與之。彼當嚼舌愧死矣。恐公聞之。或不免動意。特以走告。統惟鑒裁。

### 答兩廣督撫

頃廣中士人力詆俞帥。科中亦以爲言。該部議欲易之。僕聞此人老將知兵。第數年以來。志頗驍怠。意其功名已極。亦欲善刀而藏之。論者之言。適中其意。前聞公以十月進剿。臨敵易將。兵家所忌。代者或未必勝之。且撫按俱未嘗有所論劾。乃獨用鄉官之言而罷之。亦非事體。故止於戒飭。然不知其人畢竟何如。公與同事必知之。真若果不可

用亦宜明示以便易置也。

### 答兩廣李督峯

各處有司當易者多。但甲科今已除盡。須俟新科。然僕以爲良吏不專在甲科。甲科未必皆良吏。若廉其已試有效者。就近更調可。他途亦可也。容卽與太宰公議之。大抵論廣中諸吏官。以操守爲先。廉且能上也。卽不能兼。且先取廉者。蓋數年以來。廣盜之起。始皆貪吏利其賄。以致滋蔓。故唐人有送南海尉詩云。此鄉多寶玉。慎勿厭清貧。蓋自古以爲難也。俞大猷者。畢竟爲人何如。便示。

### 與撫院王鑑川訪俺答爲後來入貢之始

昨有人自雲中來。言虜酋有孫率十餘騎來降。不知的否。俺答之子見存者獨黃台吉一人耳。其孫豈卽黃台吉之子耶。彼何故率爾來降。公何不以聞。若果有此。於邊事大

有關係。公宜審處之。望卽密示。以信所聞。

### 答鑑川策俺答之始

虜種來降。雖朝廷有道。能使遠人向化。亦公威德所及也。慶幸慶幸。顧此事關係至重。制虜之機。實在於此。往年桃松寨事。廟堂處置失宜。人笑之。至今齒冷。今日之事。又非昔比。不宜草草。頃據報俺酋臨邊索要。僕正恐彼棄而不取。則我抱空質而結怨於虜。今其來索。我之利也。公第戒勵將士。堅壁清野。扼險守要。以待之。使人以好語款之曰。吾非誘汝孫來降。彼自慕吾之化。醜彼之俗。故來耳。中國之法。得虜酋若子孫首者。賞萬金。爵通候。吾非不能斷汝孫之首。以請賞。但以彼慕義而來。又汝親孫也。不忍殺之。且給賜衣服飲食甚厚。汝欲得之。自當卑詞效款。或斬吾叛逆趙全等之首。盟誓於天。約以數年。騎不入吾塞。乃可奉聞天朝。以禮遣歸。今乃肆其凶逆。稱兵挾取。吾豈畏汝者。今宣大人馬。豈復往年之比。汝來則來。吾有以待之。且問汝子辛愛。怨汝之愛少妾。

溺幼子。誘納吾中國叛人。疎其種類。旦夕且將殺汝。汝肘腋之患不虞。而何以汝孫爲哉。彼聞此言。未必不動。又聞那吉之來。皆其奶公主之。其人必有智計。可使人密誘之。曰。我太師知那吉之降。皆是汝意。汝誠識事體。知順逆者。今太師已奏聞朝廷。大大與汝官職。以賞汝功。但今老酋臨邊索要。願進羊馬數千。贖取汝等。得卽寸斬汝矣。我太師念汝等慕義而來。不忍利賄而殺汝。任其索取。斷不與之。然今有何計可取老酋之首。除汝等之害者。殺得老酋。卽封那吉爲王。遣兵送汝等歸故地。永爲中國藩籬。長享富貴。渠聞此言。亦未必不動。吾得因其計而圖之。亦一策也。虜之人犯。乃其常事。卽其孫不降。彼亦必入。我亦必防。公宜堅持初意。審定計謀。毋爲衆言所淆。今冬節已深。塞外草枯。彼亦不能遲久。且虜中今歲饑荒。頭畜多死。東犯不遂。西搶不成。力罷於奔命。計阻於多岐。衆叛親離。內難將作。此亦天亡之時也。向者僕固謂世必有非常之人。然後有非常之事。有非常之事。然後有非常之功。此所謂非常之事。非公孰能了之。但那吉數人置之鎮城。宜加防範。毋令與外人相通。厚其給賜。毋使復萌歸念。續降之人。真

虜分配將士華人。各與甯家。亦不宜聚於一處。恐生他虞。書生之見。聊備採擇。給惟鑒裁。

### 再答王鑑川策俺答

降虜事一如公所議。旨云。且與做去。候旨另用。皆含蓄未盡。後來操縱自有餘地。在相機行之。但聞老酋臨邊不搶。又不明言索取某孫。此必趙全等教之。誘吾邊將而挑之。以爲質。伺吾間隙。而掩其所不備。願公戒勵諸將。但併堡堅守。勿輕與戰。卽彼示弱見短。亦勿乘之。多行間諜。以疑其心。或遣精騎出他道。擣其巢穴。使之野無所掠。不出十日。勢將自遁。固不必以斬獲爲功也。薊鎮援兵。已有旨掣回西防。冗中草草。統爲鑒裁。

### 與王鑑川言制俺酋款貢事

降虜事情。廷臣初意紛紛。然廟堂論定。前已獨聞於上。然後擬旨處分。閩外之事。一切

付之於公矣。乃昨承翰教。似與初指少異。聞者疑之。異議稍起。僕竊計公發書時。尙未見近日之旨也。承教謂宜乘老酋欲孫之急。因與爲市。誠然。但朝廷納降和戎。須自有體。今旣與之以官。卽爲吾人。若謾然而納之。率然而與之。事屬挾取。迹同兒戲。損威傷重。取輕外夷。非計之得者也。據巡撫差人鮑崇德親見老酋云云。回時又令自揀好馬。其言雖未必皆實。然老酋舐犢之情。似亦近真。其不以諸逆易其孫者。蓋恥以輕博重。非不忍於諸逆也。乳犬驚駒。蓄之何用。但欲挾之爲重。以規利於虜耳。今宜遣人先布朝廷厚待其孫之意。以安老酋之心。却令那吉衣其賜服。緋袍金帶。以誇示虜使。彼見吾之寵異之也。則欲得之心愈急。而左券在我。然後重與爲市。而求吾所欲。必可得也。僕料老酋此來。決不敢捨。東賊之入。非其本心。昨已密授方略於方公趙帥。計此時想已出邊。若諸將肯併力一挫之。則黃酋不敢復入。而老酋之勢自孤。計利圖便。陰陽開闔。在我自有勝算矣。或慮虜久住不退。兵連財費者。此不揣於利害者也。今日之事。幸而成。卽可以紓數年邊患。其所省豈直數十百萬而已哉。而又何惜於目前之少費哉。

恐公爲衆議所格。措畫少失。遂棄前功。故敢陳其愚。

又

頃有妄言者。已奉宸斷黜之。此中更無異議。但此事關係重大。須處置得宜。操縱在我。上不失朝廷之體。下可獲柔服之利。乃爲勝算也。來教有授使口詞。及虜中來語。發緘無之。想忘付來使也。虜使以二十日發去。計今想已得其要領。必如初意。執送趙全等首惡數人。納款效貢。索其番文信使。乃可奏聞朝廷。爲之哀懇。仍加那吉一職銜。賚以衣幣禮而遣之。則老酋旣感不殺之恩。小酋亦受中國之命。自可以銷其惡毒。懷我好音。邊境之利也。處分有緒。望先期密示。或更有商量。乃可題請虜酋賜衣。差人於內庫揀鮮好者付去使賚致。幸卽命製予之。大疏已下部。當先行優賚。徐議陞復耳。

### 與方金湖言制俺酋款貢事

間諜一行。虜卽喙吮。賴天之靈。愚計幸而屢中。慶甚慶甚。小酋定許其歸。但須少留難



之。務令執送諸逆。誓永不犯。乃可奏聞朝廷。禮而歸之。小小結局。僕之始謀。固不止此。然亦數年之利也。今錄去寄鑑川前後二書奉覽。鮑崇德返自虜中。倘有定議。幸星夜密以見教。以便措畫。鑑川謂馬帥賊在門庭。按兵不赴。意甚銜之。僕再三爲之營解。謂老酋方駐在近邊。渠豈敢輕身東援。乃得免於重參。公須爲調獲於中可也。今秋邊事。公功最多。須先行薄賚。徐當議處。

### 寄太史吳後菴

念昔與公役分非淺。中更離隔。可爲惋嘆。茲當聖明之隆。方欲招隱遺於邁軸。賁束帛於邱園。而公以青年儁才。竟爲例格。一蹶而不振。豈非命哉。然人能抑公之官職。而不能抑公之人品。能使其事業不顯於當時。而不能使其文章不傳於後世。其所能者。則既無可奈何矣。其所不能者。則願公勉焉。

## 與王鑑川謀取板升制虜

降虜事前已悉。若彼果能執送諸逆。則當以禮遣還那吉。厚其賞賚。以結其心。却責令奉表稱臣。謝朝廷不殺之恩。賜賚之厚。因求講和納款效貢。俟其誠心向化。誓永不犯。乃可議其封爵貢額耳。但僕猶有意外之防。不敢不告。趙全諸人。背華卽夷。爲日久矣。彼豈不預結於俺酋之左右。邊墩之人。亦豈無爲之耳目者。今我明以此要求。彼亦慨然允許。此輩豈得全不知覺。若知之。彼亦安肯坐而待縛如雞狗乎。萬一語泄。彼得而謀。或聊以脅從數人塞責。而朝廷明旨一出。不可復返。輕棄重質。但獲其毛賊數人。則於國家威重豈不大損。此其可慮者一也。據鮑崇德所傳俺酋之言。雖若哀懇。然猶身駐近邊。擁兵自強。平虜城外。遊騎不絕。轉餉哨探。俱屬艱難。名雖哀求。事同強挾。未見其爲誠款也。今必責令將有名逆犯。盡數先送入境。返其巢穴。掣回遊騎。然後我差官以禮遣歸其孫。則彼之誠款旣伸。我之懷柔有體。若擁兵要質。兩相交易。則夷狄無親。

事或中變。唐時吐蕃劫盟之事。取笑強胡。此其可虞者二也。今之議者。皆以小酋爲禍媒。急欲遣之。圖眼前無事耳。至於封爵貢市二事。皆在可否之間。若鄙意則以爲今邊防利害。不在於那吉之與不與。而在彼求和之誠與不誠。若彼出果於至誠。假以封爵。許其貢市。我得以間修戰守之具。興屯田之利。邊鄙不聳。稽人成功。彼若尋盟。則我示羈縻之義。彼若背盟。則興問罪之師。勝算在我。數世之利也。但恐其孫一歸。彼願已遂。求和之意。必乖本圖。或請乞多端。難於聽許。明年當復來侵。雖獲趙全等數人。恐於彼無大損益。此可慮者三也。大疏早晚卽復。其中委曲。難以一一指授。望公與金湖兢兢圖之。公亦須移駐鎮城。庶便措畫。又阿力哥本導那吉來降。與之必至糜爛。今彼旣留周元二人。則此人亦可質之以相當。統惟留意。

### 與王鑑川計送歸那吉事

向者奉書。誠爲過防。辱來教。事事有備。可坐而收功矣。慰甚慰甚。初擬老酋賞賚。那吉

加官。後思今虜所急者。在於得其孫。且了此一事。待封貢事成。則其部下酋長皆授官爵。而老酋例有蟒服之賜。向後統之。未爲晚也。旨中不重執叛。而重輸誠哀懇。盡朝廷懷柔外夷之體。幣布已於內庫索出。星夜賚上。到卽行事。毋使虜久候心變。小酋旣去。宜厚撫之。傳與方金湖。凡那吉所用諸物。可悉與之。宴賚皆宜從厚。彼亦人也。能不懷惑。他日有事。卒相遇於疆場。知軍中有王太師。亦必避公三舍矣。此在公可以便宜行事。不必一一以聞也。諸逆旣入境。可卽執送闕下。獻俘正法。傳首於邊。使叛人知畏。先將那吉移駐近邊。叛人先入。那吉後行。彼若刼質。卽斬那吉首示之。閉城與戰。彼用我直。戰無不克矣。阿力哥斷不可與之。留得此人。將來大有用處。望公密圖之。姚子之言甚妄。恐金湖聞之。意或灰阻。願公曲加慰勉。此事關係甚重。倘處置少失。雖離地方。責亦難誘。况未必得去乎。事機所在。間不容髮。尊見旣定。斷而行之。勿自掣肘。彼雖有言。廟議已決。無足恤也。

### 答徐太室憲長

處中之轉。已乖輿論。全乃橫被口語。形之論列。則是非倒置之矣。疏中所云。絕無影響。卽欲擬旨徑留。又思衆不可違。蓋公論未伸。將謂僕有私於公。則公之卓行貞操。終無以白於天下矣。故不得已而行勘。已曾達意代者。令其虛心體察。毋入先言。諒人心之公。自不容泯。近訪之敵鄉人云。公以志行高潔。爲衆所忌。似不宜獨答一人以白樹敵也。

### 答王鑑川

虜酋內附。逆賊伏誅。邊境敕寧。神人胥慶。此不世之功也。加秩廢賚。未足以酬。尙當有待。封賞事既與虜約。豈宜先背。奈本兵畏縮異常。庸夫尙多異議。將來若欲收功。未免復排衆論。但僕昨於慮降執叛一事。心力已竭。今未知復能任此事否。時難得而易失。

功難成而易壞。奈何奈何。

### 與王鑑川議堅封貢之事

僕竊祿無補。濫被恩私。夙夜省循。顛躋是懼。乃辱華翰遺賀。益增其愧耳。感甚感甚。封貢事乃制虜安邊大機大略。時人以媚嫉之心。持庸衆之議。計目前之害。忘久遠之利。遂欲搖亂而阻壞之。國家以高爵厚祿畜養此輩。真犬馬之不如也。僕受國厚恩。死無以報。况處降納叛。既以身任之。今日之事。敢復他諉。待大疏至。仍當極力贊成。但許貢之後。當更有一番措畫。金湖既去。代者恐未必相成。須借公威望。屈留數月。庶可免事後之慮耳。

### 答王鑑川計貢市利害

今之議者。皆謂講和示弱。馬市起釁。爲此言者。不惟不忠。蓋亦不智甚矣。夫所謂和者。

謂兩敵相角。智醜力均。自度未足以勝之。故不得已而求和。如漢之和親。宋之獻納。是制和者在夷狄。而不在中國。故賈誼以爲倒懸。寇公不肯主議。今則彼稱臣納款。效順乞封。制和者在中國。而不在夷狄。比之漢宋之事。萬萬不侔。獨可謂之通貢。而不可謂之講和也。至於昔年奏開馬市。官給馬價。市易胡馬。彼擁兵壓境。恃強求市。以款段驚罷。索我數倍之利。市易未終。遂行搶掠。故先帝禁不復行。今則因其入貢之便。官爲開集市場。使與邊民貿易。有無稍爲之約束。毋得闌出中國財物及應禁者。其期或三日或二日而止。如遼開原事例耳。又豈馬市可同語乎。且此事有五利焉。虜旣通貢。邏騎自稀。邊鄙不聳。稽人成功。一利也。防守有暇。可以修復屯田。蓄吾士馬之力。歲無調援。可省行糧數十百萬。二利也。土蠻吉能每借俺酋以爲聲勢。俺酋旣服。則二虜不敢輕動。東可以制土蠻。西可以服吉能。三利也。趙全等旣戮。板升衆心已離。吾因與虜約。有願還者。必勿阻之。彼旣無勾引之利。而又知虜之不足恃。則數萬之衆。皆可漸次招來。曹州之地。可虛矣。四利也。彼父子祖孫。情乖意阻。虜運將衰。其兆已見。老酋死。家族必

分不死。必有冒頓呼韓之變。我得因其機而行吾之計。五利也。凡此五利。皆古之謀臣策士所爲禱祀而求者也。而今之議者。獨以邊將不得擣巢。家丁不得趕馬。計私家之害。忘公室之利。遂失此機會。不爲國家審圖。故僕以爲爲此言者。不惟不忠。蓋亦不智甚矣。至於桑土之防。戒備之慮。此自吾之常事。不容一日少懈者。豈以虜之貢不貢而有加損乎。今吾中國親父子兄弟相約也。而猶不能保其不背。况夷狄乎。但在我制御之策。自合如是耳。豈能必虜之不吾背乎。數十年無歲不掠。無地不入。豈皆以背盟之故乎。卽將來背盟之禍。又豈有加於此者乎。利害之歸。較若黑白。而議者猶嗷嗷以此爲言。故僕又以爲不智甚矣。劉院旣知此事顛末。又與公同心。必能共襄大事。幸採取其議。及鎮守兵備以下所呈。折以高見。并圖上貢額。貢期市易事宜。僕與玄老當備聞於上。請旨行之。浮議雖多。不足恤也。

## 答南御史張懷川



使至辱華翰。深荷雅情。比來南中諸疏。皆愜輿論。臺諫公議所出。朝廷耳目攸係。願諸君勉旃。毋以言爲諱也。

### 寄陳松谷相公

都門解袂。與玄老相對哽咽者久之。不惟感德傷離。蓋亦惜大賢之去國。嗟善類之無依也。別後邊聲四起。羽檄交馳。幸內外羸備。虜亦旋遁。有問卽有虜孫來降之事。主上用愚計。幸而時中。板升賊首纍纍。生致於闕庭。誠宗社之福。邊疆之幸。但外寧內憂。聖人所戒。未知向後何如耳。此必台念所切。敢以奉聞。餘惟若時珍攝。以需寵召。辱長公惠書。冗不及裁答。師翁旣去。不宜復奪上左右簪筆之臣也。幸卽命北發。以慰惓惓。

### 與王鑑川計四事四要

封貢議起。發言盈庭。類皆以媢嫉之心。而持其庸衆之見。本兵錯愕惶惑。莫展一籌。不

得已乃於文華殿面奏請旨行之。又將成祖封和寧太平賢義三王故事。揀付本兵。然  
嗷嗷之喙。雖已暫息。而睚眦之讒。伺釁而動。彼既不能爲。而妬人之有爲。必且幸其人  
之無功。而求中其說。此僕所以日夜兢兢不遑寧處者也。昨旨乃僕所擬。其中蓋有二  
意。一則欲公悉心經畫。務極穩妥。一則欲公教督諸臣。比常倍加防守。今就二意之中  
所當經畫者有四。互市初開。邊氓畏慮。不敢貿易。虜人不市。釁怨易生。今歲且宜官爲  
處置。使邊氓睹利。則人人樂從。一也。鐵鍋乃虜所急者。頃部議禁不與市。將來必求索  
無已。今聞廣鍋毀則不可復爲兵。宜稍稍出官錢市之。來歲責令如數更換。二也。虜使  
既不許入朝。須安置得所。鎮城之中。民物殷阜。易啓戎行。昔年豪宗獻城之事。可爲殷  
鑒。頃者流議皆起於鎮城之人。虜使一入。人人惴恐。宜嚴加防範。以杜奸萌。倘邊堡可  
容。無令得入鎮城。三也。馬趙久爲邊帥。趙雖喜事而近忠。可馴伏也。馬故多端。素與虜  
通。其部下多真虜。而又有內主封貢之議。渠最不願聞。公近日以法繩之。頗不能堪。以  
其含憤蓄愁之私。而行其幸災樂禍之計。何所不至。雲中人情。公所素知。今既不能去。

亦宜以計用之。毋令積恨生變。四也。其所當修備者。亦有四要。城堡及時修併。邊境之險。漸次可復。一也。募招沿邊之氓。開墾荒屯。充實行伍。鍛礪戈矛。演習火器。訓練勇敢。嘗若敵來。二也。趙全等妻子黨與尙在虜中。宜於互市之時。陰察賊情。知其主名。可招則招之。不可則擒之。庶逆黨可消。後患可弭。三也。擣巢趕馬。在邊士雖借以邀功冒賞。而虜中亦頗畏之。今旣禁不出塞。則虜人寡畏。而邊士袖手無所覲幸。他日渝盟之事。不在虜而在邊人矣。此宜預處以杜釁端者。四也。前四事不急圖之。則貢市之事不成。必流讒妬之口。後四要不預畫之。則貢市雖成無益。反貽他日之憂。僕與公委心爲國。休戚相關。故敢縷縷罄其愚悃。惟公採而行之。幸甚幸甚。

答荆關水部金省吾

遠辱翰貺。深荷雅情。客有荆南來者。道公權政清肅。誠近年罕觀。濟時大業大受根基。於此可窺其概矣。敬仰敬仰。厚惠不敢當。附使歸璧外。小錄奉覽。諸惟鑒存。

# 張江陵全集卷十六書牘

## 與薊鎮楊巡撫

虜已東行。不知遼左有備否。貴鎮清查虛餉。萬有餘人。數十年宿蠹。一朝剔去。司國計者方且嘖嘖稱羨。乃聞近日又欲募卒補伍。是以弊易弊也。且南兵工食。在常恆之外。方患無以給之。賴此補數。似不必更招浮淫。以滋冗濫也。又聞百川公有示令軍士。有能告言將官虛冒軍餉者。賞銀五十兩。恐啓陵上之漸。然其中必各有謂不如所聞。幸密以見教。東事無日不在鄙懷。故喋喋如此。統惟原亮。

## 答三邊總督郜文川

辱華翰。知已建牙視事矣。無任欣慰。北虜乞貢。頃於文華面奏。奉宸斷行之。惟三邊事體稍異。須兩督撫會議耳。響水極當虜衝。急宜修繕。昨何君請馬價。原與督府會行。乃

太僕遂加醜詆。過矣。神木兵備查盤道長有疏。意欲照舊。似宜從之。其參守兵馬亦不必更兌矣。

### 答貴州撫院阮沙城

辱示。知安酋事已有次第。別時所云。今一一具獲實效。審爾則差官可不必行矣。此事不煩一兵。不費斗粟。而凶狡服罪。地方敕寧。公建此大功。宜膺上賞。俟大疏至。當有以之處。

### 答督撫鑑川

封虜使者。本兵依違久之。不能決。竟遣一參將行。其人年少輕率。恐不可使之見虜酋。第令捧勅至幕府。另選邊吏充使可也。副之者鴻臚署丞王勳。頗諳夷語。能辯番文。可備驅使。惟裁而用之。偶患泄瀉。伏枕占授。不悉欲言。

## 答廣西撫院李蟠峯

古田積寇盪平。地方寧敕。公威德所及遠矣。頃本兵奏績。薄行陞賚。聞廣左又以大捷。隆恩懋賞。當有待也。聖德光被。南北寢兵。僕伴食無功。陰受其福。

## 答兩廣殷石汀論平古田事

積寇盪平。黎庶安堵。此不世之功也。乃嗷嗷者猶有事後之議。雖聖明遠矚。功罪不淆。然亦足亂人意。聞其說皆柳州士夫倡之。以此見丈之暫留數月。不獨爲地方計。亦所以爲丈計也。近來人心不古。好生異議。以其媚嫉之心而持其庸衆之見。惟欲徇己私。不顧國家便否。卽如去年虜孫之降。舉朝駭懼。以爲不可納。僕曰。納之而索吾叛人。可盡得也。貴州之事。撫臣請兵請餉。衆皆曰可許。僕曰。此渠叔姪間爭殺耳。不足以煩朝廷。古田密邇會省。叢爾小醜。敢戮天子之命吏。不容不討。衆皆曰劇賊據險。兵力所

不能加。卽欲除之。非集數省之兵費五六十萬不可。僕曰。不然。吾知殷公必能辦此。諸君但觀其破之。此三策者。皆大違羣議。而僕獨以身任此事。主上用僕之策。幸而時中矣。乃異議者猶欲搜求破綻。阻毀成功。以快私指。嗟呼。人臣爲國家忠計。可如是乎。若僕則誠愚矣。前承教廣鹽議。鑿鑿可行。然必得丈處置有緒。後人乃可持循。恐終爲異說所壞也。南明磊落偉奇之士。昨卽欲引寘部堂。以其夙蒙訾議。今初召起。聲實未著。故暫借敝省撫臺。旋當與丈先後登進耳。同年在仕籍可用者無幾。他日爲國家柱石。在丈與南明公。新安一郡。產此連壁。敬羨敬羨。先後領華翰。或不能盡復。大都具此。統惟鑒原。

### 答楚按院陳燕野

楚中連歲災饑。人不聊生。公精覈吏治。脩舉實政。百方省節。加意拊循。楚氓所宜世世而頌祝者也。去歲秋闈。流言倏起。旋滅。今則惟聞頌聲休譽而已。徐憲副昔守敝郡。甚

有政策。而恃其才守。屢憎於人。雷院之論。蓋誤聽人言。非有私惡也。襄漢士民。自有公論。願公博訪而審聽之。如事有實跡。則亦非僕所能庇也。

### 答松谷陳相公

別後樞衡之地。屢致慙慙。機辟盈野。鳳翔九霄。以翁之出處。視今人之去就。豈得並日而談哉。欣慕欣慕。蕪錄向欲呈覽。以無便翼。茲撫臺承差去。敬附二冊。內學論。二義論。及策之一二三。實出拙搆。知已傳笑於蜀中久矣。倉卒不敢脩起居之敬。尙容專候。統冀台原。

### 答三邊總督戴晉菴

頃五月二十一日。已封拜虜酋俺答爲王。諸小酋俱授以官職。入貢互市。次第舉行。獨西虜未靖。兩督府會議。部中遲疑。近有人云。公謂僕以舍親西石之言。變其初說。此傳



者非也。西石之意。原與鄙見相左。僕初未嘗因其言少有疑阻。但以西事與宣大微有不同。所慮者撫賞之費。無從措處。故行兩督府虛心計議。務求停妥。今東事既已就緒。在西勢不能獨異。幸早決大計。以便題覆。

### 與楚撫院汪南明

辱惠不敢例辭。登領感謝。承教云云。今日籌邊第一計。僕已慮之久矣。但譚戚二君數年間大忤時宰意。幾欲殺之。僕委曲保全。今始脫諸水火。一旦驟用之。恐不可成。徒益衆忌。且以九邊萬里之遠。馳驅經略。而責效於三載之間。卽二君高才。亦未能辦也。當取公策祕之錦囊中。酌而行之。大疏封還。未敢宣泄。惟冀台原。

### 答兩廣殷石汀

前有小柬。言近事頗悉。不審徹記室否。紛紛之議。聞皆起於柳人。聽者不察。率爾奏牘。

其中自相牴牾。茫無的據。幸聖明遠矚。公論昭然。公亦不必以此疑阻。要令餘毒盡銷。士民安堵。則忌吻浮談。不摧自破矣。人旋附此。諸惟鑒存。

### 答河道按院胡玉吾

新河之議。原爲國計耳。今旣灼見其不可。則亦何必罄有用之財。爲無益之費。持固必之見。期難圖之功哉。幸早以疏聞。亟從寢閣。始者建議之人。意蓋甚美。其說雖不售。固亦無罪也。

### 又

始慮新河水泉難濟。憶度之見。不意偶中。辱別揭所云。剴切洞達。深切事理。自勝國以來二百餘年。紛紛之議。今日始決。非執事之卓見高識。不能剖此大疑。了此公案。後之好事者。可以息喙矣。書至。卽過玄翁。言其不可成之狀。玄翁亦慨然請罷。蓋其初意但

憂運道艱阻。爲國家久遠計耳。今既有不可。自難膠執成心。蓋天下事非一人一家之事。以爲可行而行之。固所以利國家。以爲不可行而止之。亦所以利國家也。此翁之高爽虛豁。可與同心共濟。正在於此。誠社稷之福也。海運一策。亦不得已而思其次者。尙須淮南直達天津。風洋無阻。乃可圖之。僕猶慮海禁一弛。他日更有可憂者耳。大疏會同巡撫梁鳴泉。不必另疏。

### 答河南巡撫梁鳴泉

膠萊新河。始卽測知其難成。然以其意出於玄翁。未敢遽行阻閣。故借胡掌科一勸。蓋以胡固玄翁所親信。又其人有識見。不隨衆以爲是非。且躬履其地。又非臆料遙度者。取信尤易也。昨觀胡掌科揭呈。明白洞切。玄翁見之。亦慨然請停。不必阻之而自罷。以是知執事向者之言。雖極痛切。未免預發其機也。區區今處天下事。大率類此。雖竭盡心力。不過小補而已。終無能有所建明。此易所謂屯其膏。施未光者也。王敬所在齊中。

政事何如。兩司及諸郡長吏孰爲可用。統希見教不悉。

### 答閩中憲使李義河

使至辱教。知道從已入關。良慰鄙懷。以丈素所蘊蓄。豈欲專一邱一壑以終老者哉。古人云。得時無怠。裹糧躍馬。猶恐失時。今主上虛已以任宰相百執事。師師濟濟。咸欲有所表見。周道甯夷。倖門壅塞。以時言之。似亦可矣。願丈急乘之。毋怠。又喜榮轉近關。旦夕且將有大畀焉。

### 答南宗伯秦華峯

惟公昔以無妄蒙議。私心嘗爲不平。會在位者有不悅於公。未敢昌言之也。茲幸玄翁掌銓。又雅敬重。故得以贊其區區。願留曹清問。尙未足以展據宏蓄耳。徐判屢有書來。道公相念厚情。感切感切。

### 答薊遼總督王鑑川

前得饒君書。虜王已憤怒北還。秋間糾衆來市。計虜帳旣歸。豈能驟返。商民一散。難以復集。當秋高馬肥之時。值新虜再至之銳。求索必多。釁端易起。故欲延至冬間。徐爲措處耳。茲奉教知虜尙未去。市期近在此月。則便當以速了爲妙。何必又改期再約乎。饒疏已寢不上。一切惟公所裁。但至期。仍望公提一旅。稍稍西行。以彈壓之。虜王聞公之來。必堅奉約束。且大軍在近。三晉之文吏懦將。亦有所恃而無恐。知公爲疆場撻慮。不憚一行也。承教謂虜酋動以封爵誇示其衆。公亦使人屈禮以歆豔之。甚善甚善。僕嘗恐虜不慕官爵之榮。不貪中國之利。但以戎馬與吾相角於疆場。則真無可奈何。今誠有慕於我。我因其機而制之。不過出吾什一之富。則數萬之衆。皆可折箠而使之。顧今時人皆不足以語此。反以爲狂且悖耳。昨上谷二市。甚得其利。黃酋彌耳帖伏。皆仗公威望遠懾。但水泉事完。則大功克就矣。頃慶禮告成。中外胥悅。在僕私心。尤爲欣忭。

## 答貴州撫院阮沙城

坐鎮在雲貴土司。原有故事。但須擇廉慎有謀者遣之。不然。反足以納侮啓釁。前見水西衆頭目有疏。言安國亨子幼。不能統衆。此必安酋使之。但其中委曲。亦宜審處。貴竹土司與雲衛鎮守不同。難以例論。或省諭安酋。令其安插阿傀停當。及各犯盡數執出。錢糧抵補俱完。許與乞恩。盡赦前罪。照舊管事。則坐鎮亦不必遣矣。阿傀既出省城。禍根已絕。向後家事。亦豈盡卵翼而乳哺之乎。在公心知此意。審計之耳。然事機遼遠。不能遙度。不敢中制。幸與鄭道詳計之。

## 答憲長施恆齋

雷道長誤聽人言。論劾徐君。徐君又妄自猜疑。謂公揭之。輾轉相疑。竟成蕉鹿。受病之根。必有所在。久當自知之。昨徐君亦有書言此事。僕已再三譬曉之。渠必開悟。其事已

屬之陳道長勸處。諒爲昭雪。徐君平日心行。僕固未能深知。若在荆襄。則誠未可議也。

答河南巡撫梁鳴泉

膠河罷議。不惟寬東土萬姓財力。且使數百年謬計一朝開豁。不致復誤後人。誠一快也。胡掌科之勘議詳明。玄翁之心無意必。皆足以爲後來處事之法。區區何知焉。誤辱獎借。深以爲愧。別楮所云。一一領悉。

答郝巡撫

西事處置略備。部中方議覆行。但未貢先市。恐非事體。至於家丁增餉數款。乃調停撫馭之策。恐不宜與貢市同題。已屬本兵酌處之。戴公計惑於主斷。氣奪於嚴旨。故倉皇失措如此。人旋草草附復。西鎮遼遠。事機不能悉知。望不時密示。以便措畫。

## 答河南巡撫梁鳴泉

今歲徐邳河患更劇。將來漕事。深有可虞。得通此一線以備。不然。誠預防至計。但事關海防。理須慎重。一應造船設官。皆計慮周悉。庶可無虞。昨所遣商販。須換來面訊之。明歲且姑少載試行。若果通利。逐漸加之可也。統惟審圖。冗不多及。

## 答宗伯高南宇

辱教。知東山情切。高駕夷猶。殊失朝野之望。茲溫綍再頒。敦勸愈篤。恐上命不可屢抗。物望不可終孤。區區鄙衷。曾與陸儀制略言其概。想亦以轉達矣。如僕輩薄劣。不足以致天下賢者。然公平生自負。謂何可終老林壑乎。

## 答河道潘印州



頃報運舟漂覆近百。正糧虧失四萬有餘。數年損耗。未有如此之甚者。國計所關。日夕懸切。今海道旣已報罷。河患又無寧時。不得已復尋泐口之議。頃已奉旨。煩公與張道長勘議。幸熟計其便。且將從事焉。

### 答關中憲使李義河述時政

侂至奉書。知道從已抵關。甚慰鄙懷。勅書爲管文書內監所持。茲卽查付奉勅行事。可不須文憑也。邊事近稍次第。賈誼欲以三表五餌制單于。蓋古之謀臣策士所勞心籌慮。敞口遊談。冀望而不可得者。正在於此。今我不煩一士。不役一兵。坐而得之。此天贊我也。奈何今人爲宋儒之說。沁人心脾。與之語此。如嚼烏附。異議紛紛。幾至顛躓。賴主上納用愚計。幸而時中。然爲國家謀則忠。自爲謀則愚矣。計然三策。今始售一。向後未卜利鈍何如。辱教云云。固知豪傑所見。自與凡人殊也。試錄小技。不足入目。且意丈久已見之。故未敢寄覽。茲奉命付去二冊。其中文字。大抵皆僕所削。若學論。二義論。及策

之一二三。則全出拙筆也。麻姑擲豆。猶作狡獪變態。可笑可笑。丈瑣闢宿望。久困藩服。鄙心未嘗敢忘。有待有待。相去伊邇。此中動靜。想得具聞。有可以助我者。望不時直教。幸勿以秦越相視也。

### 答邊鎮巡撫

辱密示。言虜情邊事。一一俱中肯綮。西事以總督持議不決。以致驕虜怨憤。及奉旨詰責。則又倉皇失措。未貢先市。殊非事體也。威正恰者。不知前已授官否。渠既能制吉能。即可用此人以行吾之策。切盡黃台吉通佛經。識義理。昨在宣大調伏俺答。老把都二酋。甚有功於中華。故特賜勅賞賚。此二人者。一宜以計用之。一宜以禮處之。俟延寧貢市事完。疏中可略敘此二人另行量賞。若疏已發行。不及敘錄。公可在以已意陰厚之。以結其心。蓋制馭機宜自合如此。延甯勢異。馬價平給。委爲失宜。昨喻意本兵。此後尙有劑量也。

### 答總督方金湖

邊事近來處置。幸已就緒。今秋三陟晏然。一矢不驚。誠宗社生靈莫大之慶。但外寧內憂。聖人所戒。封疆之臣。未可一日而忘備也。昨具疏請勅。飭戒諸邊。仰荷聖明允行。世必有非常之人。然後有非常之事。有非常之事。然後有非常之功。今邊政久弛。誠欲及時整理。興建鴻業。非常人所能也。如虞坡二華故事。借丈以墨。經臨戎。使旋。輒附鄙意外。小疏寄覽。

### 答薊鎮巡撫劉百川

調取南兵事。俱如高議。本兵已覆行矣。永東小警。雖聲在遼左。然亦不可不多爲之備。公但駐適中地方。以便調度。似未可便東行也。聞公與撫按諸君。方議調兵行糧事。薊永事勢與他鎮不同。若俟賊已見形。而後調兵支糧。則無及矣。事有權宜。不宜膠柱。惟

公裁之。

### 答南學院周乾明

書稱敬敷五教在寬。所謂寬者。始以人之才質。有昏明強弱之不同。須涵育薰陶。從容引接。使賢者俯而就焉。不肖者企而及焉。如是而已。今人不解寬義。一切務爲姑息弛縱。賈譽於衆。以致士習驕侈。風俗日壞。間有一二力欲挽之。則又崇飾虛談。自開邪徑。所謂以肉驅蠅。負薪救火也。本朝監規及臥碑所載。凜若冰霜。督學使者俱用憲臣爲之。皆有深意。南都首善之地。惟公留意焉。

### 答奉常陸五台

僕雖無似。夙抱敬賢之心。今幸備位台省。其所振舉甄拔。不可勝數矣。乃平生敬慕如丈者。顧不能一引手焉。君相造命。豈其然哉。雖然。中心藏之。不敢藏也。令弟回。草草附

候。聞以華嚴合論梓行。此希有功德也。刻成。幸惠寄一部。別具潞紬二端。侑柬。統惟鑒存。

### 答石麓李相公

弟平生孤子寡與。獨受知於門下。及同居政府。一心協德。庶幾有丙魏同心之誼。中外士民。亦靡不懽悅和合。各適其意。不啻坐春風而飲醇醪也。豈意風雲倏起。陰晴頓殊。昔爲比目魚。今作分飛鳥。人生聚散離合。可勝嘆哉。愴然愴然。綠野開尊。庭闈絢彩。且用慰心自娛而已。他何足論。盛使回草。草附此。諸惟台亮不宣。

### 答楚按院陳燕野辭表閤

辱示敝省錢糧查刷。已有次第。易知單冊。正月可完。知公爲楚民計慮深遠。仰戴仰戴。孫方伯前已言其仰承德意。悉心措畫。此外如溫大參。劉糧儲。亦誠一時之選也。楚人

何幸何幸。頃得家信。言公表闔之命。堅不可回。方切愧悚。乃又垂念先世。再辱嘉貺。是重僕之不德也。昔念先曾祖平生急難振乏。嘗願以其身爲蓐薦。而使人寢處其上。使其有知。決不忍困吾鄉中父老。以自炫其閭里。且今歲楚中重苦墊溺。少省一分。則小民亦受一分之賜。在寒門少此。無損纖毫。而哀多益寡。在鄉人則有大惠焉。萬望俯諒鄙心。出於誠悃。並價之命。一切停寢。則信我之深。比之惠我之厚。又萬萬不侔矣。敢布腹心。惟公裁許焉。

### 答宣大巡撫吳環洲策黃酋

黃酋書昨鑑川公亦曾抄寄本兵。此酋貪縱寡謀。終當歸吾羈縲。觀其書詞。已非昔時之倔強。可用其幾而制之。多行間諜以疑其心。時用利餌以中其欲。諒彼無能爲也。其妻家在三衛者。卽傳與薊人量加優恤。亦制馭之一機也。史大官去歲侵盜二酋馬近千。故二酋恨之已甚。其欲尋殺。不獨爲其近邊。蓋亦思以報之矣。然此雖小僮。其技與

虜同。且倚山爲險。料二酋亦無如之何。宜撫而用之。以爲宣鎮外藩。時時戒諭以各守分地。住牧爲業。毋妄肆侵盜。使二酋得借以爲口實。但此輩撫賞之資。半出軍士月糧。割肉充腹。乃自困之道。宜有以處。吳兵憲道南感公同心之契。思以自効。其志甚銳。不知畢竟能成否。辱示今所宜措畫者。一一中的。但願審度時宜。慮定而動。天下無不可爲之事。况今時則易然耳。

### 答蘄鎮總督王鑑川言邊屯

日來屢辱翰教。差人皆不索報。坐是失候。承示大疏八事。公圖之皆已有緒。要在邊吏着實奉行。期有成效可也。然八事之中。屯政爲要。今之議者皆患兵冗。一切務爲清汰節縮。僕竊以爲過矣。天生五財。民並用之。誰能去兵。孔子稱必不得已而去。今之時非有甚不得已也。乃不務爲足兵。而務爲去兵。則唐之季世是矣。然足食乃足兵之本。如欲足食。則舍屯種莫繇焉。誠使邊政之地。萬畝皆興。三時不害。但令野無曠土。毋與小

民爭利。則遠方失業之人。皆將襁負而至。家自爲戰。人自爲守。不求政而兵足矣。此言似迂。然在往時誠不暇。今則其時矣。故願公留意焉。黃酋邇來聞漸就羈縻。觀其書詞可見。此酋雖狼戾無親。然貪縱無謀。翻爲易制。第無使老把都與之合執。此孤虜無能爲也。疆場小釁。或不能無。在因其機而御之。期不害吾大計耳。使旋草草附候。屢失裁復。并此謝過。統惟鑒原。

### 答吳環洲策黃酋

辱手書。及麻參將揭帖。具悉黃酋沉迷酒色。憚於西搶。祇欲近邊謀生。故屢次需索。又威脅屬夷爲之納進。其情不過如此。未敢卽踰盟也。史大官服屬已久。昨又已嚴行約束。令其各守分區。無相侵盜足矣。乃必欲勒之親赴虜帳。何爲哉。鑑川之意不過以今歲貢市甫完。恐以疆場小釁棄其大功。不知成祖封三虜王。使命方回。冠騎已至。許襄毅在大同東邊聞市。西邊搶掠。夷狄之性。豈有常哉。願吾制御機宜何如耳。犬搖尾乞



憐。固可投之以骨。如其狂噬。則小杖加焉。且渠戰兵不滿萬人。其父叔諸部。俱已臣順。獨此孤虜。如其跋扈。以上谷全鎮之兵。益以史大官之衆。令雲中以勁卒擣其巢穴。彼何能爲。渠曾占卜當死南朝。觀其狂躁不常。殆天將亡之矣。公幸與趙師密計。如可柔服。以計飴之。如不可處。卽宜以大義責之。明與之絕。毋但始息養虎以自貽患也。聞已遣人好諭之。倘得其要領。幸卽以寄示。萬萬。冗不多及。

### 答雲南撫院阮沙城

得十月二日書。知公前後處置安酋事。已竭盡心力。功高賞薄。深以爲歉。然公之勳名著於此矣。疏窮奏事人。卽貴州承差。昨已擒獲重治。向來土酋構釁。皆此輩爲之。倘解回發遣。更加重處。毋令得脫。復爲他日之害也。

### 答總憲凌洋山言邊地種樹設險

辱教種樹事。邊臣博美虛套。大率類此。僕起家畎畝。頗知樹藝之理。昔謝病山居。手植榆柳。今已鬱然參天。若以官法爲之。積歲累月。竟成虛謬矣。初時人建此議。僕卽與同事者曰。種樹設險。亦守邊要務也。但只如議者之言。決無成效。同事者頗不以爲然。今已數年。迄未見有一株成者。卽如臺工一事。當時若非僕力排羣議。以身任之。二華與公。殫力運思。躬親督理。則今亦當爲烏有矣。天下事豈有不從實幹而能有濟者哉。昨聞中小疏。已曾懇切言之。自後積習。或當少變。國家欲興起事功。非有重賞必罰。終不可振。來歲擬遣大臣閱視。大行賞罰。如猶玩愒難振。則僕自請如先朝故事。杖鉞巡邊。人臣受國厚恩。坐享利祿。不思一報。非義也。何如何如。

### 答棠川殷相公

使至。知台從已返僊里。深慰鄙念。宋人有一聯云。山中宰相無官府。天下神仙有子孫。前一句公已得之。後一句願公勉焉。使旋迫節。草草附復。別具侑柬。幸惟鑒存。

### 答宣大巡撫言虜求佛經

虜王求經求僧。此悔惡歸善之一機也。南北數百萬生靈之命。皆係於此。天祐中華。故使虎狼梟獍。皆知淨脩善業。皈依三寶。我聖祖謂佛氏之教。陰翊全度。不虛哉。禮曹准公咨。即可題請。不必另疏。但今在京番僧。皆溷濁淫穢之流。不通釋典。遣去。恐爲虜人所輕耳。所求佛經。須有我聖祖御製序文者。乃可與之。公可特作一書諭虜王。嘉其善念。曲爲開導。示之以三塗六道之苦。誘之以人天福果之說。及念珠坐具之類。亦可稍裁與。俾益其向化之心。則亦調伏凶人一大機括也。聖人之道。苟可以利濟生民。隨俗因其教可也。何必先王之禮樂法度而後爲哉。

### 答臺長蕭兌岫

辱華翰。獎許過情。使人愧悚。猥以譴陋。謬膺重寄。頃又特奉綸音。勉以同心。望以夾輔。

日夕兢兢。懼無以仰承德意。所望海內道誼知契。匡助其所不及。幸公有以教我。近見督府察院論牧地事不相下。其言皆過激。天下事非一人一家之事。自宜虛心觀理。務求其當。奈何忿爭如此。竊意此事非公不能解之。頃已屬意本兵議復。牧軍驕悍。論久不決。或有他虞。非細故也。

### 答翰學張鳳盤

別後得途中所寄二書。情款備至。慰諭諄切。觸事感懷。不覺慨然興嘆。念知己之遼闊。晤話語之無從也。邱園之賁。初擬秋期。既復思之。得時毋怠。况既奉特旨召用。自應以趨命爲恭。可勿事夷猶矣。賚咨人去。草草附復。別悰萬種。統俟面陳。幸惟鑒亮。

張江陵全集 卷十六

# 張江陵全集卷十七書牘

## 答總憲孫華山

僕數年圖畫邊事。苦心積慮。冒險涉嫌。惟公知之。他人不能盡諒也。茲賴祖宗之靈。主上威德所及。東師奏凱。西虜款關。區區一念報國赤忠。庶幾得以少見矣。實未敢有一毫計功謀利之心。昨三疏辭賞。由中非矯。重違上意。暫且祇領。終當懇辭。以明愚志焉。辱華翰厚貺。重增其媿。佳綢登受。餘輒璧附使者。草草附謝。統惟鑒原。

## 答兩廣殷石汀計剿廣寇

廣事披猖已久。一旦乘其後。遂欲責效。雖管葛猶難。昨電白報至。僕恐好事者不察事機。妄生譁議。故卽擬旨分割其事。假公便宜。俾得以自展焉。治亂國用重典。廣固亂國也。其勢非用兵威以震盪之。奸宄不畏。良民無依。所慮者費用不給。將師乏才。公何有

妙算。幸一一見教。僕無魏相坐測之能。然以愚忠不量力。每事輒欲以身任之。或可爲公一助焉。願公安志審畫。毋自退阻。

### 答荊州道府辭兩院建坊

往者察院建坊。僕屢書止之。竟不獲命。僕竊以爲未爲知我者。今聞汪凌二公又有此舉。使僕疾首蹙額。跼蹐無措。敝郡連年水患。民不聊生。乃又重之以工役。使萬姓睚眦。口咀呪而心咨怨。將使僕爲榮乎辱乎。若欲給與折價。尤不敢當。家有薄田數畝。足爲俯仰之資。僕又時時以其祿入奉上老親給鮮。爲賓客費。家不患貧。而諸公所餽銖兩。皆民膏也。僕何功以堪之。何德以享之。頃已有書懇控。二公恐未見諒。願公再以鄙意固請。必望停寢。乃見真愛。若不可止。如向者面瀆云云。准作廢府納價貯庫作數。僕亦受惠多矣。僕雖無德於鄉人。而亦懼叢怨以重吾過。諸公誠愛我者。宜視其所無者而與之。奈何益其所有。以滋毒於僕。恃公道誼骨肉之愛。故敢瀝竭肝膽。直露其愚。若謂

僕心或欲之。而姑飾辭以沽名。則所謂穿窬之徒。不可以列於君子之林矣。義激心違。語無倫次。統惟鑒原。

### 答楚撫院汪南明辭建坊

疊承厚貺。深荷雅情。辱教欲爲僕建坊表閭。往固知公必有此舉。已預陳悃愾。不謂臺符已下郡。且媿且感。敝郡連年水旱。民不聊生。僕方欲拯之而未能。而敢爲大役以賈衆怨。且僕前已有二坊。省此不爲缺典。而益之。乃足以重其過。詩云。人之好我。示我周行。公誠愛我。則幸與以所無者。若公旣不欲煩有司。而又私值以自利。是委公惠於草莽也。反覆思惟。二者俱未得。故敢再控諸臺下。愚戇不能順承嘉命。以速大戾。幸惟鑒原。

### 答奉常陸五臺論禪



沈吉士來辱華翰領謝。向曾誦華嚴。祇見莽宕寥廓。使人心澁神搖。後於友人處見合論抄本。借讀一過。始於此中稍有入處。佛所說法。隨順諸根。義無深淺。然廣大舍攝解脫無礙。則是經爲長而論。又入法之大導師也。僕以宿昔頗種善根。今得聞無上甚深妙義。歡喜無量。聞公將鏤梓以行。大有利益。謹以俸金二錠。少助工費。雖塵露之微。無裨山海。聊以表信心云耳。若諸時事世情。非高蹈者所樂聞。故不具論。統惟鑒原。

### 答南司寇謝泰東論刑獄

前得西石書。言丈不嫌岑寂。樂就西曹。敢爾推轂。若僕私衷。固有待也。南中人情狡僞。詔獄繁興。擬議失中。致傷和氣。誠如尊教。丈留意於此。卽澤流寰宇矣。處天下事。非至虛至平。不得其理。而詔獄民之司命所繫尤重。頃見今之持法者。類以三尺行己意耳。嗟夫。天子猶不敢以己意生殺人。况人臣乎。包子尙未到。渠初聞山東之卽。轉掉臂而歸。還是舊時情態。今得此報。當欣然就道矣。

## 答宣大巡撫計處黃把一虜

辱示虜所乞討。後六事之不可從。公已籌之熟矣。卽前六者。亦宜再加審處而後可以。愚計之。封爵於國體本尊。且可分虜之勢。未爲不可。但聞把都病已危篤。封之而死。其子必援例襲替。而黃酋吉能輩。皆紛紛求王矣。今且以言款之。徐觀其勢而爲之處。增加撫賞。所費不多。但不可聽其開報人數。作爲常例。此例一定。彼卽視爲當得。與之不足爲恩。滅之彼卽生怨。但可於經費之中。少從寬假。以每年所積客餉。動支什一。以充撫賞。隨其所乞者。裁酌與之。縱量給珍異。亦不爲過。如此。庶幾操縱之權。嘗在於我。彼欲乞活。不得不仰給於我。而我亦得以制其死命矣。然亦須題請奉旨。乃可。其貢使入朝。向已議定。恐難擅開。且彼雖暫時馴伏。終與三衛不同。待數年之後。乃可議也。大抵今日虜勢。惟當外示羈縻。內脩戰守。使虜爲我制。不可受制於虜。返見鑑川措畫東事。頗覺窘迫曲徇。恐將來不可收拾。則爲虜制之道也。專衷去留。何足爲中國重輕。前曾

奉告。謂但可以此詰責之。使屈嘗在彼。不必苦苦索還。若索之太急。則彼又持左券而要我。聞軍門通事楊亮乃遂許以五百人糧賞。而其二比妓遂相隨住。牧於龍門教場。夫盡車夷之衆。糧食不過數百人。乃無故額外又增五百之數。不知何以給之。且其婦既在此住。則黃酋又因而往來近地。二史皆將服屬之矣。此所謂引賊入家。養虎貽患。是何等計策乎。且楊亮何人。安得擅許以五百人糧賞。先年也先入貢。亦只因通事誘虜。言中國欲與結婚也。先貢馬納聘。而朝廷實不知也。却其聘。遂生釁隙。致有己巳之變。此前事之可鑒者。豺狼虎豹。亦有豢養於苑囿之時。然畢竟籠檻之。鎖繫之。時給與肉食而已。非可効鷄豚犬馬可擾而狎也。今其婦卽以至此。似宜厚其賞而勒其歸。不爾。將來必爲患。公當思余言。且上谷事體。與雲中不同。而公之所處。與鑑川亦異。僕請得悉言之。蓋求貢之議。本起於俺答。而我之生還其孫。彼亦知感。故其臣服獨爲誠懇。若黃把二酋。原出牽復。非其本心。故每每設爲難從之請。而肆其無厭之求。何者。彼其心非俺酋之心也。夫彼旣非俺酋之心。而我乃以處俺酋者處之。不亦過乎。此二虜形

勢之不同也。鑑川自建此議。朝廷恩賴頗隆。渠亦自知非久於此。但欲及身無事。常恐少有破綻。虧損前功。故雖知此不可。亦每每曲徇之。公初開府。責望甚重。二虜爲剝膚之災。且非旦夕可脫者。若不及今定一規模以爲經久。將自絆其足。望實俱喪矣。此又鑑川與公所處之不同也。雖然。僕料此虜無能爲也。二年之間。邊鄙寧謐。首議之人。功效已見。卽有小失。無損大計。向者小疏亦已明言之矣。况今西鄙諸部。皆已帖伏。獨此二醜。亦何能爲。以上谷全鎮之兵。益以二史之衆。不能當狂醜乎。公試與有識者計之。近得吳少參書。言閩守中事有主之者。其意似疑趙帥。不知渠與趙平日何如。若果有此。望公一一調處之。

### 答邊道吳道南

辱華翰具悉。貢市伊邇。諸凡惟留神審畫之切。盡欲支俸。則順義亦當給以王祿耶。人之無識。一至於此。可笑可笑。督撫膺闔外重寄。操縱可否。宜自有成算。奈何獨窺廟堂。

以爲重輕乎。

### 答兩廣殷石汀

調募浙兵。俱如公所議。頃又疏請於上。特發馬價銀十萬以助軍費。此二事近皆有建議停止。然以廣中之事急。故不敢徇衆議而誤大計。許瑞若果傾心效用。則以賊攻賊。策之最妙者。萬里之外。事難遙度。用兵之機。忌從中制。惟公熟計而審圖之。

### 答松谷陳相公

長公至。拜領台翰。嘉覲深荷不遺。伏諗道履佳勝。尤切慰仰。希文後樂。翁誠獨際其盛。然忠臣雖在畎畝。憂國之念。未能遂忘。不肖譴劣。追陪元宰。賴朝廷之福。外內寧謐。目前景象。庶幾小康。可以縻祿而守拙。但揣時度勢。每抱隱憂。將來又不知孰爲收拾耳。盛使回。草草附候起居。外具不腆。少伸微悃。統惟鑒原。

## 答宮端吳澤峯

惟公昔在詞林。素持高節。乃爲緇塵所點。私心極爲不平。方欲爲公昭雪。致之亨衢。而大疏適至。故特破例爲請於上。然公之心迹雖明。而車已懸矣。厚蓄宏猷。未得一展。安能不爲世道惜哉。辱華翰使旋。草草附復。諸惟鑒原。

## 答憲長徐大室

知賢不敢蔽。是非不敢枉。公非有求於僕。僕非市德於公。行吾直道而已。乃辱遣謝。深以爲愧。訊之來使。聞公北上無期。雅有終焉之意。僕竊以爲過矣。方今周道寧夷。賢良彙進。以公素所蘊蓄。古人事業。豈足爲哉。願勉抑高懷。以副鄙望。

## 答應天撫院

安慶之事。其變雖不甚大。然朝廷紀綱所繫。不容不盡法一處。往時振武之事。姑息太過。人敢效尤。今借此一振國威。亦彌亂之一機也。然府官始則措置乖方。致人怨忿。終則擅離職守。逃住留都。亦不得無罪。今當先正倡亂之法。後究致變之由。低昂輕重之間。貴得其當而已。

### 答河漕王敬所

辱示大疏。海運事宜。處畫周悉。今歲果利涉無虞。此後即可漸增其數。裨益國計。誠不淺也。頃聞運船過淮甚早。橫決之患。庶幾可免。萬公已至河上。河漕事體。如左右手。同心併力。乃克有濟。惟公留意焉。

### 答楚按院陳燕野

承示賦役提綱冊。已周覽一過。井然有條。大抵財用經費。惟條貫精詳。出納明覈。則節

用之意自寓其中。若代公者。肯再加申飭。諸司長吏。遵奉惟謹。則規格永定。雖有姦民猾吏。無所措手足矣。監利大盜。久嬰鄙懷。以有司不能任其事。不敢易言之。茲聞首惡已盡。擒獲餘黨。稍稍解散。數十年巨憝。一朝剷除。非公沉機定算。安能辦此。喜躍之懷。良不可任。監利李尹。不費兵力。收此奇功。允宜破格優錄。或暫加服俸。仍管縣事。他日以兵備憲。僉處之。何如。郡中人來言。各處江堤俱已報完。諸吏仰承德意。惠洽閭閻。公造福楚民。誠有卑荆衡而狹江漢者。感德之私。不知當何用爲報也。

### 答總督王鑑川計處黃酋

把酋死。上谷以東。可以安枕。黃酋孤虜。勞將益弱。近報吉能。亦於三日月三病故。俺答東哭其弟。西傷其子。氣志蕭索。恐亦不久。天將亡之。於此可見矣。但在處之以恩信。其子但堪負荷。卽令控告俺。答奏請襲職。管束其部落。不必擇賢。撫賞之典。亦如其父。不可有減。頭目中有少知禮義。能用其衆者。亦宜陰厚之。使之歸心中國。則盟好永堅。邊



塵息警矣。把酋之子不知何如。僕料黃酋必思東併。今當扶植青把都使之力抗黃酋。黃酋若有東併之志。只可責之以大義。亦不必力禁之。待其兩敵而歸命於我。俺酋老矣。必不能東略。此皆中國之利。但在知者審圖之耳。聞黃酋二妾皆已返其故巢。幸甚幸甚。僕常有狂志。謂黃酋可擒。今惟公可以語此。暇時與吳少參哲密計。若彼誠馴伏。則亦不必爲此奇事矣。趙帥吾撫之甚厚。乃其心儉狠如此。可惡可惡。昨對其使。面加叱責。彼亦知懼。然少參素履端潔。誰不知之。公又爲之疏聞。部中又已紀錄。則彼不能揭之。適以益彰其賢耳。會少參幸加慰藉。武人不足介意。今方欲任之。用其長而略其過可也。

### 答王鑑川論東運之衰

把都吉能一時俱殞。黃酋亦且病發。天之亡彼。於茲見矣。但在我處之。須以恩信。其子但能管束其部落。卽令告於順義。奏請襲職。不必擇賢。要令其勢分而釁搆。則我可因

其機而制之。數十年之利也。辱示措畫虜情。及往來書諭。一一俱中機宜。所與言佛氏因果之說。妙甚妙甚。雖然此雖一時應變之言。其實則佛氏所謂如實語也。不誑語也。大雄之教。慈悲廣大。豈不知哉。令甥既有此浮言。又當具一疏。得旨乃可戒行。夏撫本無大過。翁以其經論不可留之。蔡兵備引去。以劉調代。俱如尊諭。目下虜情有何變態。但望見教。

### 答奉常周少泉

疊辱翰教。深荷雅情。今同鄉諸賢。皆聚於留都冗散。雖僕之不肖。不能相引。而諸公之處心無競。自甘沉寂。其賢益彰矣。

### 與王鑑川計虜情

虜酋之死。可喜也。亦可慮也。喜者。卜東運之將衰。慮者。恐諸部之無主。今歲賈市愆期。

是其明驗。頃見公措畫彼中事宜。極爲得策。恤死立生。以永固盟約。遲速之間。惟公相機以行耳。比探得虜情一紙。錄似公覽。今俺酋無恙。目前諒不至乖張。但在我備禦之策。貴在急圖。誠有其備。豈惟無患。卽大功可成也。適有所感。懷抱欠佳。草草附復。緒惟亮存。

### 答臺長蕭兌喁

辱示牧地議增馬額。以事歸之司馬。則事權歸一。而馬政亦因是可舉。甚善甚善。但開墾之數。不止於五十萬。而議徵銀不過十萬。似爲太少。大抵察院之議。不欲以餉入督府。今若就與察院虛心議處。亦與渠職掌有裨也。

### 答宗伯潘水簾

辱別諭。一一領悉。白首相知。猶按劍也。况他人乎。然義命之學。竊嘗聞之矣。自檢平生。

不敢有一事負國家。不敢有一念負於天下賢士大夫。至於去就。有命存焉。惟靜以俟之而已。猥辱至愛。中心藏之。

### 答兩廣郭華溪計劃廣寇

兩江寇盜。爲患久矣。異時居官者。皆畏首事。莫敢發。故其患滋甚。今乘古田之餘。用足下之妙算。殲此狐鼠。諒不爲難。但炎荒瘴癘之區。屯數萬之衆。役不宜淹久。貴在臨機速斷。沉謀遠發。先併力以破其一巢。則餘賊自然破膽。次第可平。若以三萬之餉與之。相持於嶽岑之間。使賊踰伏溪洞。以逸待勞。非計之得者也。兵機不敢遙制。特獻其瞽見如此。惟高明採擇焉。

### 答藩伯陳壘山

昔從鄴下。得望下風。繼會舍親王司馬。稱公遼左事。益喁喁嚮慕之。然實未嘗有所推

穀也。三十年科第。今猶淹在藩服。如僕安得謂之知人能薦上哉。而又敢以市德於公哉。猥辱遣謝。深以爲愧。三復華翰。文藻璀璨。歎羨彌襟。差人旋草。草附謝厚惠。概不敢領。輒附使者歸璧。統惟鑒原。

### 答宣大巡撫吳環洲

節間承蒲觴之寄。深荷雅情。謝謝。酋婦素悍。右其少子。情似爲真。彼若請封乞貢。宜令順義爲之代請。如其執迷不反。則宜姑置之度外。不必苦要之。量此孤虜。亦何能爲。况其母子異心。亦終當歸吾羈縻也。

### 答三邊總督戴晉菴

吉酋既歿。其子得如三衛例。襲替請貢。大疏甚善。但鄙意謂宜令順義爲之代請。蓋昔之乞封貢馬。皆出俺答意。今以此委之。則西部有所約束。而中國之體益尊。且其子尙

未回。亦未可不俟其求而遽與之也。鄙見如斯。不知可否。惟公熟計其便。

### 答楚撫院汪南溟

十年之諾。至今未踐。茲奉新命。再督前逋。無任悚仄。比嬰俗務。文事曠廢。毛公楮氏幾成絕交矣。且屬有公私之冗。願少假旬月。稍理舊業。勉圖報命。

### 答邊鎮督撫

辱示虜乞四事。本兵方行議處。諒在必從。亦未見有異議者。獨該科有一疏耳。比奉公書。責讓僕於宣帥有所私庇。僕不識其人也。弟見前任督撫諸君。咸稱其才勇可用。比之雲中尤爲近實。故時有獎借之詞。要能感奮爲國家用命。如其狡飾倚借。罔上行私。國典具存。孰敢庇之。近訪知其誣玷司道事。即使人傳語。深加叱責。此足以明僕無之所私庇於人也。正功罪。明賞罰。懲奸覈實。此督撫事也。僕輩何敢屈撓焉。區區一念奉

公守法之誠。幸垂諒察。

### 答應天撫院張崐崕

安慶之事。朝廷欲借此以振舉紀綱。折伏奸宄。乃本意也。查守並逮。萬不得已。其中委曲。難以盡言。昨逮至之日。卽令該衛姑緩其行。又徑送司不復考問究竟。不過送部調用耳。逆弁俱擬寘之重辟。法司方奏當未上。決不少加姑息。黃判實始禍之人。法當重治。細觀大疏。則其事之顛末。昭然可睹矣。

### 答王鑑川

主少國疑。艱難之會。正宜內積惻誠。調和宮壺。外事延接。收攬物情。乃可以扶危定傾。而玄老一切。皆易其道。又旋比讒佞。棄絕石交。語之忠告。不惟不納。反致疑怒。竟至於此。豈非天哉。當其時人情洶洶。禍且不測。僕猶冒死爲之營訴。爲之請釋。謹得解脫。然

國體士氣。所損多矣。嗟乎。自古讒人亂國。可勝痛哉。幸新皇聰穎異常。雖幼冲。已具大有爲之度。區區愚忠。幸蒙俯鑒。方今宮府一體。上下一心。內外事情。幸已大定。但邊事虜情。日夕在念。腹心雖安。四肢豈可忽哉。萬望留神。以慰宵旰。辱教云云。誠高見淵識。碩畫鴻謀。非公愛我之深。曷得聞此。三復三嘆。敬佩良箴。昨本兵虛席。公論咸歸公與西石。乃太宰謂渠復銓之始。嫌於首用其親。且貢市方殷。猶借重望以鎮之。計非久當別有簡命也。

### 答棠川殷相公

伏惟先帝恭己守文。澤被寰宇。臨御六載。天下晏如。遽爾龍馭上賓。攀處莫及。此臣子之大痛也。所幸新皇天縱睿資。雖在冲年。已具有爲之度。此又宗社之大慶也。獨媿菲薄。謬膺重寄。方將敷求於賢哲。借助同心。望公珍重。以需召命。辱翰貺。使旋草草附謝。別具薄輜。統惟鑒原。



### 答宣大巡撫劉平川

辱翰不領悉。西邊貢市已報完。獨宣大事體向在遼迥。鄙意謂不必候齊。卽有一二枝不在。且置之度外可也。

### 答薊遼總督

辱教撫鎮相與。旣外合中離。勢自難久。但目前非易帥之時。俟秋防後圖之耳。西邊貢市已報完。上谷雲中。反覺乖阻。鄙意謂此事當以俺酋爲主。永把二枝。且當置之度外耳。

### 答三邊總督郜文川

西邊貢市告完。榆鎮事體。尤爲寧妥。皆公經畫之力也。欣慰欣慰。上谷虜情。少覺搖兀。

然鄙意謂此一二枝不足爲輕重。來則勿拒。去則勿追。在我自有餘力。而鑑川必欲羈致以求完美。則去來之機在彼矣。目前喜朝廷穆清。宮府寧謐。宗社之慶。遐邇惟均。

### 答鄖陽巡撫凌洋山

屢辱翰教。深荷雅情。僕以寡昧。謬當重寄。別無他長。但性耐煩耳。今喜朝政穆清。內外寧謐。可無煩尊慮。敝鄉水災。特蒙軫念。諸所蠲恤。該部一如所擬。疲瘵之氓。幸獲甦生。公之德澤。卑衡巫而淺江濟矣。感仰感仰。

### 答兩廣殷總督

廣事之壞。已非一日。今欲振之。必寬文法假便宜乃可。近來議者紛紛。然朝廷旣以闔外託公任。公自擇便宜行之。期於地方安寧而已。雖彈章盈公車。終不爲搖也。汪南溟又挂南議。已擬旨留用。使去冗甚草草。

### 答司馬劉清渠

惟公昔在計曹。以守正不悅於時宰。致忤於中貴。士論每爲惋惜。茲當朝政更新。首蒙簡用。從人望也。願遄發征麾。以慰惓惓。

### 答司馬戴育菴

屢承翰示。已具覆如別楮。聞套虜西掠失利。彼方構禍於番夷。則在我可因間益脩守禦。以備不虞。東虜骨肉乖離。俺酋衰老。偷欲求安。皆中國之利。但願諸公努力勲名。毋失此機會。主上雖幼。實具大有爲之資。亦不欲苟爲旦夕之慮而已。貢市事所司一一具覆。

### 答薊鎮巡撫楊晴川

頃報虜警。雖在遼左。然彼垂涎灤東數年矣。于鄰之震。所宜慎防。山陵不必西赴。但保疆場無虞。卽所以効忠也。撫賞用馬事。已下部看處。

### 答孫巡按

辱示虜情。具悉。黃酋素黠。必不肯樂附土蠻。骨肉乖離。天亡有日。但靜以待之。俺酋聞已就得勝事。不知能堅守約束否。事後再望見教。

### 答孫兵備

虜聲在遼左。實窺灤東。干鄰之震。所宜慎防。今方有事山陵。務期疆場寧謐。燧烽不警。庶道宵旰之慮。望諸君留意焉。

### 答薊鎮巡撫吳環洲

辱翰示。具悉。細察虜情。昆婦貢市。似無來期。永邵雖爲所牽。然貪漢財可。物招而至。然皆無足爲輕重。第常以不貢責之時。出小利一誘之。毋令東合土蠻爲薊鎮害耳。順義表貢已封進。今歲所貢鞍轡弓矢。視舊爲佳。亦足以驗其無他也。

### 與王鑑川言虜王貢市

前後奉翰教。情款備至。不勝感念。虜王表貢。該部已題請封進。今歲所貢鞍轡弓矢。視舊精美。亦足以驗其誠悃無他也。昆婦愚悍。似無來期。永邵卜雖爲所牽。終貪嗜關市財物。可招而致。然皆無足爲輕重。第常以大義責之。時出小利誘之。毋令東合土蠻爲薊鎮害足矣。辱示撫賞冊據。三鎮二歲之中。所費不過萬餘。而所省已百餘萬。若所全活邊氓老穉。又不啻數十百萬矣。唐代宗親叩首於葉護馬前。爲百姓請命。父老觀者皆爲流涕。曰。廣平王真華夷主也。今所與虜者。國家不啻若九牛一毛。而所獲茲如此。若公與僕。所爲國謀者。忠乎否耶。而嗷嗷者猶爲以言。是其識反出長安父老下矣。幸

主上雖在冲年。已具有爲之度。近又日御便殿講讀。因而商確政事。從容造膝。動息必咨。僕亦得以罄竭忠悃。知無不言。言無不信。擬於表貢後。當以邊事虜情細細陳奏。且以明公任事之忠。塞嗷嗷之口。俟山陵畢後。乃得暇耳。公幸自信自堅。勿以浮言爲介。令甥鳳盤人去。草草附此。

### 答劉總督

尅糧充賞。邊軍困憊已極。薊事之不振。則職此之由。今戶兵二部已議爲曲處。但此數一增。後來遂爲歲例。帑藏之入有限。犬羊之欲無窮。歲復增加。曷有紀極。此其弊源必有所在。不塞其源而徒徇其欲。將不知其所終矣。薊門事體。與他鎮不同。僕日夜念之。未嘗少釋。凡有所求。所司未嘗不頻感而語。屈意而從也。僕亦坐是往往見惡於人。若僕有所私庇於薊者。然司農所藏。委爲匱乏。固亦無怪其頻感也。幸僕今謬司國柄。俟邊警少暇。望公與鎮巡諸君虛心商量。思一長策。着實整頓一番。庶爲經久之計。若但

折東補西。支持目前。費日增而無已。兵復弱而莫支。將來必有以爲口實者。恐僕與諸公皆不能道其咎也。僕將有山陵之役。若樂東轍警。期至陵上一會。罄所欲言。有警則已。

### 答王鑑川

前啓附令甥人轉致。諒邀記室。虜貢已進。賜賚有加。順義誠款。與公忠勳。主上皆已具悉。有書與順義。爲言天子生而神靈。十歲卽能信任輔臣。親決大政。渠當益堅忠悃。使華夷常享太平之福。如昆婦一枝愚悍不順天道者。天必絕之。將來自可見也。田世威回。草草附此。

### 答總憲李石塘

近來時事。想俱有邸報。公所具。不及一一奉聞。數月以來。人心稍覺歸正。士大夫始知

有名節行檢之可貴。自茲以往。日慎一日。庶幾昇平可致。但自媿綿薄。不堪重負耳。公正直清亮。人倫冠冕。淹處節鎮。未允物情。且夕當別有處分。人旋草草附此。

### 答荊守王古林

賈奏官來。辱華翰具悉。劉江陵尙未至。至當以諫議處之。昨九月十一日梓宮發引。十九日掩玄宮。大事已畢。朝野清晏。主上日御便殿。講學親政。昇平之效。庶幾可睹矣。

### 答二邊總督郜文川

套虜西掠失利。必思報復。彼之禍結於西。則邊增可以安枕矣。年例及鹽引銀已告計部給發。人旋此復。

### 答杜晴江



惟公以直節見忤於時。經綸久卷。茲膺簡擢。允協輿情。况屬清明之朝。尤君子彙征之日。望益展宏猷。以副鄙願。僕受國厚恩。死無以報。惟當旁求賢哲。共熙帝載而已。

### 答南刑部謝太東

僕自當事以來。日夕競業。惟恐蹈於矯枉之過。顧有不容不釐剔者。要亦順人心之所共欲者。因而行之。不敢措一毫枉意於其間也。頃案掌故。請主上御便殿。召見府部大臣。諮詢之端。於此已見。目前景象。似爲穆清。此後唯當恪循軌轍。按轡徐行耳。但人苦不自知。非得道誼知己。時時提覺。不能濟也。幸必有以教之。

### 答湖廣巡撫趙汝泉

惟公去楚數年。楚人思公不啻赤子之戀慈母也。茲得再借。萬姓同欣。豈直僕一人私慶哉。比來楚土。凋瘵視昔更甚。連年澇墊。民罕攸居。目前諸務。水利爲至。望公留意焉。

## 答參議吳道南

辱教。滿紙皆藥石之言。但謂僕驕抗。輕棄天下士。則實未敢。然因此而益加警惕。無不可也。吳堯山奉命閱視宣大。僕數年以來。經營此地。頗費心力。今以託之。屬望匪淺。不知肯爲國家措一臂否也。

## 與南宗伯秦華峯

頃者浮議之起。實緣公入賀一行。然公論可終。泯乎悠悠之談。或謂僕有不悅於公。此大誤也。公之起用。僕與有力。援之於久鬱之餘。而薄之於嚮用之日。揆之情理。殆不其然。恐公意有所疑。故敢直披拙曲。惟公鑒而安焉。

## 答兩廣殷石汀

辱教滿紙。誼同金石。至如攻四海而漸進。納百川以有容。許以同心。作其鼓舞踴躍之氣。教思無替。銷其跳號拂鬱之私。尤見公沉機超識。中才以下所未易窺測者。僕雖淺薄。敢不夙夜以奉良箴。所幸主上年雖冲幼。聰睿異常。又純心見任。既專且篤。卽成王之於周公。恐亦未能如是也。但自媿菲劣。不足以堪之。目前景象似覺穆清。自今而往。惟當益積惻誠。恆存兢業。恪循軌轍。按轡徐行耳。嶺表之事。一以託公。必無敢搖撓之者。願懋建奇功。以副輿望。廣右府江聞已舉事。度郭君才力足以辦此。不意懷遠又爾。虺虺撫新附之衆。不宜持法大急。此亦有司之過也。但古田反側之人。將視此以爲嚮背。幸留神速處之。

### 答河漕總督王敬所

今方內又安。所可慮者。河漕爲最。茲賴公之力。經理什七。江淮之粟。方舟而至。來歲新運。又已戒期。計三年之後。京師之粟。將不可勝食矣。欣慰欣慰。大疏所陳。一一有裨國

計已下所司議行。敝省連年墊溺。近得鄉人書。皆以打造海舟爲苦。望公留神一酌處之。則疲氓更生之幸也。

### 與郭總憲

懷遠之事。雖有司不善撫御。有以激之。然至於戕天子之命使。則亦王法所必誅也。且新復諸邑。將視此以爲向背。決當討之。聞兩江已進兵。冬盡可得奏凱。如乘戰勝之威。還師以襲之。固易易耳。但不可預露此機。恐聞風鼠竄。難以蒐獲。姑聲言撫之。乃可成也。然此乃兵機。不敢遙度。惟高明裁之。

### 答巡漕張懷洲

轉漕以河道爲正。海運備不虞。此誠確論。昨已告之計部。每歲一十二萬之外。升合不得有加。王君銳意任事。而頗有好功之病。海運初開。小有失損。無害大計。何必諱言處

補乎。然其才足倚。未可深責也。

### 與戚總兵

汪司馬和足下素深。相待之禮。必從優厚。頃已面囑之。然渠亦自不俟囑也。但足下自處。又且務崇謙抑。毋自啓侮。昔李愬屬橐鞭。謁裴度於道。唐史美之。蓋重命使所以尊朝廷也。司馬此行。於薊事甚有關係。幸留意焉。

### 答巡撫吳環洲

永邵卜今歲貢市。誠款頗堅。且其所領衆盛。蓋亦東郡之雄也。昨陞秩加賞事。一如鑑川所請。青把都爲其母所制。旣無別情。寬至來春亦可。原額馬數不責補矣。

### 答孫巡撫

辱示一一具悉。青把都母子既有款貢之漸。俟至來春入貢亦可。黃酋窮蹙無賴。構釁於屬夷。撫臺委曲調處。目前定無他虞。然不能保其終不變也。然此酋將來必不良死。公試觀之。

### 答劉總督

合練之法。不獨勤兵習戰。又可以預伐虜謀。守邊之策。無急於此矣。此中已預知之。幸勿爲慮。冒餉水運。具如大議。已屬計部覆行。

### 答王督漕

敝省造船擾民之說。果出於劉參議。前曾以稟揭寄覽。而楚中士民亦卽有爲此言者。大抵皆有司不善奉行之弊也。今業以將完。勢難中止。但望調停善處之。若河運則事親理明。歲歲可期。望全鄙懷。不勝欣慰。公以全力用於河漕。而以海道爲不虞之備。可

也。頃者南議已卽奏主上。言公任事忠勸。轉輸有託。悠悠之談。於重望初無所損。

### 與河道萬巡撫論河漕兼及時政

頃者南議之起。有識者皆爲不平。非僕私懷有所獨厚。今則譽言日至。浮談漸盡矣。夫人臣能具誠擔任。國之寶也。使僕苟可以薦達之。保護之。卽蒙嫌樹怨。亦所不避。但願天下士大夫共體此懷。無負朝廷耳。承教務頭年預爲次年之計。甚善甚善。果若公言。豈惟目前賴之。雖萬曆千百年亦無恙也。然公能使河渠安流。往來利涉。而不能使兌運之期依限過發。此責在漕臣矣。近來朝政愈覺清泰。宮闈之內。藹然如春。肅然如冬。主上銳意學問。隆寒不輟。造膝諮訪。史不殫書。簪紳濟濟。各勤職業。庶幾協和之風。自茲以往。唯當範我馳驅。按轡徐行耳。辱道誼知契。敢謾以聞。

### 答王鑑川

比者奉翰教。薄冗未能隨答。然諸所請者。一一具如尊指。屬所司覆行矣。堯山少司馬行時。已屢囑之。云宜大事體。與他鎮不同。北門有寇公。諸無足慮者。歸來但可告成事耳。無煩刻覈。徒亂人意。然此公爽朗闊大。必能成也。晨下聞邊圍救寧。內外咸慶。羽書稍暇。惟公強食自愛。

### 答總憲朱龍崗

僕以淺薄。謬肩重任。日夕悚惕。辱華翰獎譽過情。深以爲愧。西土寧謐。真慰朝廷宵旰之懷。昔人謂自古疆場之患。非盡由夷狄。亦多邊吏擾而致之。僕嘗以爲名言。惟預脩戰守。常存儆備。則不容頃刻少忽耳。惟公留意焉。

### 答督撫王鑑計處黃昆川虜

辱示昆都力黃台吉二酋事情。先已有人言之。黃酋驕悍誠爲難馴。然剛躁寡謀。部下



多怨。且其子父不和。勢難獨逞。將來疆場小釁。或不能無。然使處置有方。亦終當歸吾羈縲也。昆都老而謫。數年以來。東糾土蠻。西合俺酋。皆此人爲之。比之黃酋反爲難制。然俺答旣已帖服。黃酋素不附之。昨已令薊人散布流言於邊外。云昆都與吾有約。將合兵以擊土蠻。虜性多疑。必相猜忌。則此酋亦孤立無能爲也。如再言封王事。可以好語款之。云俺答汝兄。倫序爲長。且首發歸順之端。又執吾叛人。奉吾約束。朝廷嘉其惻誠。故厚賴而王之。汝頗年爲患於中國。未有尺寸功。何得遂與汝兄等。我皇上併包兼容。何惜一王號而不汝畀。但于事體有未順耳。汝若能依汝兄之言。遵奉約束。堅守盟誓。二三年後。當與汝奏聞朝廷。一體封王加賚。若欲借此事以啓釁。則我惟有一戰耳。渠聞此言。必不敢動。量此孤虜。以上谷一鎮之兵當之。東連雲朔。彼雖入。亦不足畏也。文臣事虛文而無實用。武將狃小利而無遠圖。此二語最中邊吏之膏肓。今若不破此套。而徒爲整理云云。終成畫餅耳。趙帥前有人來。甚感公禮遇。必爲盡力。草草附此。諸惟鑒存。

# 張江陵全集卷十八書牘

## 答李中溪有道尊師

件至。拜去年六月翰貺。萬里遣使。踰年始通。感戢至情。非言可喻。正少而學道。每懷出世之想。中爲時所羈縲。遂料理人間事。前年冬。偶閱華嚴悲智偈。忽覺有省。卽時發一弘願。願以深心奉塵刹。不於自身求利益。去年當主少國疑之時。以藐然之軀。橫當天。下之變。比時唯知辦此深心。不復計身爲己有。幸而念成緣熟。上格下孚。官府穆清。內外寧謐。而正以退食之餘。猶得默坐澄心。寄意方外。如火聚得清涼門。以是知山寺幽棲。風塵寓跡。雖趨舍不同。靜躁殊塗。其致一也。三塔古蹟一詩。不足以紀勝。當爲翁作一記。以垂永久。願今冗甚。且未遑有便。幸寄開山重造顛末。正二三年後。卽欲乞身歸政。尙當與翁期於太和衡湘之間。一盡平生。使旋草草附謝。外飯僧銀二十兩。禪衣

一具。內色紵二端。少見遠意。並近日奏對稿奉覽。統惟鑒存。

### 答潘總憲笠翁

昔年奉教門下。辱翁於後輩中獨蒙鑒許。僕嘗感其意。懼未有以當也。茲英君御極。百度維新。僕以淺薄。謬當重任。方將弋冥鴻於江海。拔碩人於蘊軸。乃聞翁絕意風塵。厭棄人間事。白駒過隙。祇用悵然。諸公子咸有濟時之才。而明允篤誠。不忝龍圖之子。深羨深羨。廣事近以屬之殷司馬。此君才略。足以辦此。又假以便宜兵食。期一二年。當得盪定。辱翁垂教。當奉周旋。

### 答趙汝泉

薄賀媿不成享。乃蒙厚酬。彌切慚歎。改折所請。已下部見行。堤工須委任得人。乃可就功。若一處有瑕。則千丈之堅。俱屬無用矣。近來吏治頗爲清肅。唯司牧者不以民事爲

重。好爲虛文相誑。計日待遷。此習竟不可易。惟公與監司留意焉。

### 答汪司馬南溟

辱示餉議。精覈委悉。敷奏明切。文辭粹美。讀之再過。歎挹彌襟。獨計部謂支剩之數。與徵發相抵。幸再加查核。乃可以聞也。比來一夫作崇。幾至燎原。幸主上明聖。而左右近習。亦皆素諒。僕之惻誠。得以潛折禍萌。導迎善氣。二三子以言亂政。實朝廷紀綱所係。所謂芝蘭當路。不得不鋤者。知我罪我。其在是乎。若儀諸仲山甫之德。則曷克舉焉。猥辱鑒獎。彌以無懼。

### 答司馬吳堯山

備邊大疏。已下部議覆。乃督撫二公之見。與公議相抵。而撫臺尤爲矛盾何耶。設險守要。乃邊政之大者。况此係脩復頽廢。非創有更建。但邊長費鉅。須漸次行之耳。馬帥旣

被重劾。必當罷之。第苦代者之難。奈何。

### 與蜀撫曾確菴計劃都蠻之始

都蠻爲害多年。不容不除。聞之譚司馬云。蜀中兵餉。取之存留。儘可措辦。俟兵食已足。方略已定。可一鼓平之。但用兵之道。全在將得其人。前承教謂劉顯足辦此事。昨科中用閩事論之。鄙意以蜀征方始。不宜輒易大將。而司馬又不敢獨當。故咨之於公也。若其人果可用。不妨特疏留之。立功贖罪。如不可用。則當別授能者。公宜以此意明示劉顯。俾鼓舞奮勵。如玩寇無功。必將前罪併論誅之。不敢庇也。地方大事。唯公熟計之。

### 與廣東按院唐公

府江盪平。懷遠計當不日就戮。可遣九重南顧之憂矣。欣慰欣慰。主上以天縱英資。勤勤學問。比來一二大事。羣情所洵懼而莫必其所止者。須臾之間。咸底敕定。自非明主

信任勿貳。僕得效其赤忠。誠宗社無疆之慶也。忝在知契。附此以慰懸念。

### 與楚中撫臺辭建第助工

項聞台從至荆。親詢民瘼。惓惓以江隄爲慮。幸甚幸甚。新構蝸居。三院會計。欲有所助。諸公厚意。豈不知感。但僕本心原不敢以一椽一瓦。勞費有司。故雖督造錦衣。亦止借便差用。誠恐驚擾地方也。今堤工方興。疲民無措。公私嗷嗷。困敝至此。豈復有餘羨爲僕營私第乎。僕雖無德於鄉人。實不敢貽累以賈怨。且去歲諸公所賜坊價。已卽給付工匠。卽有不足。以後逐年賜賴。及俸入田租。陸續湊辦。需以二三年。可得苟完矣。若諸公創行此意。則官於楚者必慕爲之。是僕營私第以開賄門。其罪愈重。萬望俯諒鄙衷。亟停前命。俾僕無惡於鄉人。無累於清議。則百朋不爲重。廣廈不爲安也。人旋。附此。諸惟鑒原。

答保定巡撫孫立亭

公以鴻漸之翼。困於燕雀。茲膺特簡。允愜輿情。恆臺外控。三關內制。畿輔安攘之略。惟公是賴。近來吏治頗爲清肅。惟司牧者不以民事爲急。崇尚虛文。計日待遷。終鮮實效。夫均徭賦役里甲驛遞。乃有司第一議。餘皆非其所急也。四事舉則百姓安。百姓安則邦本固。外侮可無患矣。惟公留意焉。

答文宗謝道長

疊辱華翰。具悉雅情。近來俗尙澆漓。士鮮實學。南畿多士之區。首化之地。惟公加意一振之。陽明先生從祀事。以宗伯病不能會議。久稽題覆。好事者遂乘間而詆之。其言粗淺可哂。然何傷於日月乎。

## 答宣大孫巡撫

黃酋車夷事。前吳環洲撫臺疏甚善。卽與本兵議從其策矣。乃督撫之意。又與不同。而撫臺之疏。亦爲中止。今本兵姑先覆。大疏行督撫議處。要之撫臺之策爲長也。

## 答巡撫吳環洲

黃酋事本兵候大疏未至。據獨先題。適督撫亦有疏至。並行咨議。幸熟計之。趙帥病果痊。若尙可驅策。宜明告本兵。今代者誠難其人也。華翰云云。具悉。

## 答閱視司馬吳堯山

頃先後大疏。所司已先後覆行閱視事竣。可歸報主上矣。馬帥褫職。國法已彰。僕以淺薄。謬肩重任。雖不足以當天下事。然一念公虛平直。則可以告於天地祖宗之靈。不敢



措一毫私意於其間也。乃昨吳少參有書。甚爲公不平。其辭怨憤。使人難堪。今九邊之事。宣大爲重。不以付之他人而託公者。以公爲心知故也。又面請於上。特賜命服。以寵其行。公視僕此心爲何如哉。渠乃以僕爲厚。猶帥而薄。故舊。豈不厚誣我哉。區區之心。惟公垂鑒焉。

### 與操江巡撫院言棍徒假借

近訪得清江騷騙奸徒。乃夷陵州人。不知其的名。曾在敝鄉馮午山公處代班壞事。隆慶四年。在儀真地方附一油客船來京。沿途卽詐稱僕家人。差送酒米船上。擅挂內閣牌面。詐寫僕拜帖。見翁見海。見海之明亦爲所誑。給與照身批文。一路免抽稅打過關。直至張家灣。幸僕知之。差廠衛人拏送法司問。發邊衛充軍。至戍所又詐稱僕家人。誑惑宣府總兵。縱令脫伍。不意今又發於清江。其言徐寅生張壽童及買潞綢銀遞回原藉云云。悉妄也。竊思僕素重名檢。雖親子弟。無敢以毫厘干於官府。三年前曾有一家

奴指稱小兒名目。誣人銀三兩。當卽送本府杖死。可恨此棍。無故隨處打網。污人名節。今幸臺下覺其詐。所望爲僕重治。以除禍本。奈何又輕縱之。渠之罪不止膝哨。今得漏網。將來又不知作何狀矣。若尙在配所。幸爲僕盡法處之。如已逃脫。幸密與邏者并逃奴朝吉俱多方捕訪。務令得獲。忝公知己。必同其好惡。乃見真愛。兀中草草。餘容續裁。不悉。

### 答閱視汪司馬南溟

額餉儀本久與督撫會計。乃疏聞後。又有一二異同。不得不再行審覈。亦以違衆不可。蓋事貴慎始故也。議定卽斷而行之。無所復疑。遼警方殷。借公威重震懾。計已喙兌矣。增築墩臺及別楮所云。俱如議次第行之。

### 答司馬萬兩溪

昨會舍親西石公言頃者內獄之起。衆情洶洶。獨公以爲朝有人焉。無足慮者。此足以見公知我之深也。今士大夫親見僕行事。無一人知及於此者。而公乃在外得之。人之識見相去。豈不遠哉。諸所議畫。已下所司覆行。

### 答兩廣總督殷石汀

惠賊斬馘至萬。諸賊當已破膽。可次第就戮矣。大功克就。嶺表輯寧。朝士大夫始服公之雄略。而信僕知人之明。昔充國之策。惟魏相一人主之。僕雖不逮相。而公之功烈則過充國遠矣。欣慰。諸邑令旣便於民。何必更調。已告銓司。悉如尊議。

### 答保定巡撫孫立亭

兵憲之薦。今歲不妨暫已。三關事體。與薊門稍異。以分閱爲便。俱如尊教。近來畿輔之地。盜賊橫行。京師百里之內。一月而二三發。似非治平景象。今內當責之巡捕。外當責

之兵備。惟公留意督察之。幸甚。

### 答河漕劉總督

水道業有成議。昨計曹因楊郎一人之言。遽欲改陸。僕使人廉得河道疏通。轉運無阻。故請旨仍依原議。計曹又言牛欄山河道雖通。船隻未造。請加詰責。僕亦未從。今不知已造船幾何。并望留神速處。毋致以小事防大計也。

### 答巡撫郭華溪

懷遠之兵。既未得天時地利之便。暫宜解歸。以俟大舉。若有他巧可取之。尤妙矣。此事若非縣令苛急。賊亦未必遽叛。事之未形。一夫制之有餘。禍端已搆。數萬人取之不克。至兵連禍結。師老財費。使朝廷塵南顧之憂。疆場有不討之賊。彼激亂啓釁者。死何足恤哉。以是知天下之事。惟知幾識微者。可與圖成。而輕躁鋒銳者。適足以僨事階亂而

已。

### 答荆守王古林

奏最使至。辱翰貺感戢。公在郡治理。實冠一時。爲政不近名。故郡人來者。雖無毀辭。亦鮮揚譽。然僕之所以重公者。正在於此。非流俗人所知也。本圖借寇。恐致久淹。昨已屬銓部優敘矣。

### 答吳堯山言弘願濟世

吳子感公相知之素。故爲公不平。然不思渠昔因僕而後見知於公。今若此。所謂食其粒而棄其本者矣。僕平生所厚士大夫甚多。見背者亦不少。然終不以是而易其好賢之心。卽今日內獄之事。可以觀矣。二十年前曾有一弘願。願以其身爲薦。使人寢處其上。溲溺之。垢穢之。吾無間焉。此亦吳子所知。有欲割取吾耳鼻。我亦歡喜施與。况詆

毀而已乎。願公勉慰之。相見非遠。諸容面悉。

### 答吳參議道南

前承華翰。以冗不及答。頃有寄堯山公一書。會間亦可索觀也。

### 答總憲張岨峽言公用舍

自公在郎署時。僕已知公。頻年引薦。實出鄙意。不知者乃謂僕因前宰之推用爲介。誤矣。天下之賢。與天下用之。何必出於己。且僕於前宰素厚。頃者不恤百口爲之昭雪。區區用舍之間。又何足爲嫌哉。蔡人卽吾人。况前宰非蔡人。而公又吾人也。何嫌何疑之有。願努力勲名。以副素望。

### 答督撫王鑑川

辱示番書。殆亦華人導之以要我。公諭阻之爲當。大抵今日虜情。惟視公爲向背。故僕前面奏主上。長城鎖鑰。專倚於公。一切操縱之機。諒公自有定算矣。黃酋孤虜。必無能爲。然順義亦挾此以爲重。屬夷若還。其所求乞。可量許之。而示之以不得已。恐其常用此套爲求索之資也。屯田事。公若熟計其便。不妨再題。宣師被劾。諒難復留。幸公自擇可代者。咨部用之。頃聞虜中旱甚。京師亦少雨。塵霾累日不解。僕日夜惟邊事爲憂。願公留意焉。令甥近日相聞否。

### 答劉總督

撫賞市馬之事。前承教屬之計曹。本兵一一俱如尊指議處矣。聞近日司道俱不肯著實奉行。仍蹈前轍。扣月糧以備閱視之費。又夷人闖關。有遷延數十日不去者。啓覺胎禍。實在於此。公何不督責之。不從。則亦宜明告於上。裁之以法可也。比聞虜中甚旱。內地雨澤亦少。塵霾累日不解。僕日夜以邊事爲憂。而屬意於薊。尤甚望公督率文武諸

大吏。及今加意經理。常若大敵在前。庶保無虞。昨已面奏皇上。言邊將不得便宜。每中制於司道。他日脫有債事。當與將吏同罪。決不少貸。近來朝廷舉動。非復昔比。僕受國厚恩。身肩重任。死且不避。何怨謗之足恤哉。敢布區區。惟公垂諒。

### 答薊鎮巡撫言優假將官

辱翰示。領悉。崔鏞與趙奇仇隙甚深。昨調處善地。實兩全之。乃因督撫之怒。而飛揭中傷。以逞其毒。非良士也。昨部覆科疏。鄙意本欲留用之。恐督撫以僕爲有所私庇於此輩。故擬罷之。然朝廷自此頗疑文臣矣。僕與馬趙。素不識面。異時當國者之家奴。率與邊將結拜。鮮不受其啗者。自僕任事以來。內外隔絕。倖門盡瑾。朝房接受公謁。門巷間可張羅。亦無敢有以間語譖言入於僕之耳者。又何所私庇於人。卽此兩人之狡猾無狀。僕豈不知。第以其俱夤暗宿將。部下又多獷少。代者未必能馭。卽有癡類。猶可驅策而用之。貢市羈虜。本難久恃。猝有緩急。無可使者。故不得已曲爲保全。徒以爲國家耳。



士大夫乃獨不諒僕心。奈之何哉。公爲觀察。當自有公論。如以僕言爲非者。幸直賜批駁。以爲後來用人之鑒。

### 答河漕王敬所言漕運

四百萬軍儲。江海並運。洪濤飛越。若涉平津。自僕有知以來。實未見有如是之盛者。一日侍上。語及今歲漕事。天顏喜悅。殿上侍臣。咸呼萬歲。僕因推言此皆督臣之功也。宜加懋賞。重任之。上深以爲然。茲覽圖冊。又以見公儆戒無虞。因事納誨之忠也。敬服敬服。觸瑟之逆。幾成大獄。賴天地宗廟之靈。鑒僕赤悃。開發聖明。得以道喜同和。雪誣正法。滔天之勢。驀然頓已。然賤質則因是致病。今顛毛種種。相見恐不相識矣。華翰謬及。敢陳其概。潘君才猷弘達。意思深長。他日必不負公。此舉然朝廷方有重託於公。舉代恐未能也。

## 答吳環洲

頃吳司馬復命。覈三鎮脩守之功。以公爲舉首。誠爲確論。二帥並逐。家丁四散。今歲邊事殊可憂。當事者苟欲快意。不爲後圖。非便計也。主上旣以鎖鑰付之諸公。一切更置。不從中撓。然任之愈重。望之愈殷矣。

## 答宗伯董幼海

南宮清峻。允屬高流。以公居之。可謂置瓊枝於玉案矣。當聖皇御極之時。正名僞彙登之日。區區何力之有焉。華翰歸功。深以爲媿。

## 答兩廣殷石汀

嶺表盜藪。雖在可封之時。不無姦宄之警。頃仗公雄略。天戈所指。電掃風驅。凱聲騰於

遐陬。餘威震乎殊俗。粵中縉紳亦自謂有知以來。用兵制勝。未有如今日之盛者也。喜而爲之折屐。功高賞薄。尙當有待。頃侍上燕間。從容語及嶺表事。公之鴻猷峻烈。已簡在帝心矣。願益懋勳庸。以需大畀。

### 答崇王

先年肅皇帝使僕捧冊立殿下爲干。得一望清光。後聞殿下止生長殿下位不得封。心竊慮主器者或乏。又以汝泉趙都憲之意。遂屬意禮曹爲之題請。僕一念公心。非敢望報于左右。乃蒙遣使致謝。寵頒厚惠。非僕所以存國繼世之心也。謹卽付來使璧歸。草草付謝。統惟亮原。

### 答問卿李漸菴論用人才

辱翰示。具悉雅情。天生一世之才。自足一世之用。顧持衡者每雜之以私意。持之以偏

見。遂致品流混雜。措置違宜。乃委咎云乏才。誤矣。僕之淺薄。雖不足以與知人。然一念爲國之公。實無所怍。故自當事以來。諄諄以此意告於銓曹。無問是誰親故鄉黨。無計從來所作。皆過。但能辦國家事。有禮于君者。卽舉而錄之。用三驅以顯比。懸一鏡以虛照。故一時羣才咸有帝臣之願。今部對已定。以後仍當綜覈名實。一一而吹之。第恐人樂混同。必有以爲刻核者。然非是無以考成績而亮天工也。

### 答藩參高廉泉親家

平至。辱華翰。深荷雅情。今連屬休明。衆賢彙進。淹抑幽習。咸得耀乎陽春。可使驂騑久困櫪下乎。頃薦書已上。弓旌之招。諒在不遠矣。冗中草復。厚惠概不敢當。輒以璧諸使者。圖說奉覽外。拙室所寄。令愛薄儀。統希照存。

### 答河漕王敬所

圖說之陳。實僕一念赤忠所發。因事納誨。早辨防微。實有人不及知。而愚心所獨苦者。非公之高識遠見。不能得之於意表也。世所稱爲知己者。謂能知其心也。今知我者非公其誰。倘以執事者之有間。綴之以瓊玖。俾永其傳。則覆瓿之誚。庶可免矣。非所敢望。聊布區區。聞河淺澀。艦行甚艱。比來稍覺通利。諒亦不出夏杪可盡抵灣矣。山澤之氣。鬱而未暢。皆僕奉職無狀所致。惶恐惶恐。

### 答劉總督

界嶺之捷。誠足以伐虜謀。挫驕氣。然賊從此懷憤。必當又出於他道。當事者未可以小勝狎視也。至於撫賞一事。幸公留神一處。薊門邊計。與他鎮不同。若能就此一事處置得宜。俾各夷皆畏威懷惠。則制虜之策。已得其半矣。况又日夜圖吾戰守之備。先立於不敗以求勝。何事不可爲乎。願公與在事諸君熟計之。

## 答兩廣殷石汀

辱示。知林賊勢孤。遠遁求活。計當不日可擒。迅雷震空。妖魅自當褫魄矣。慰甚慰甚。公爲國家戡定大亂。功在旂常。僕以參與廟畫。借被光寵。爲幸多矣。筐幣之及。非所敢當。輒付使者歸璧。統惟亮原。

## 答總憲張嶠峽

惟公儁才厚蓄。又富於春秋。不以此時取旂常。勒鍾鼎。乃顧戀庭闈。忘在公之義。非所望也。茲屬休明之會。方將招遺佚於邁軸。寧肯縱鸞鶴於雲林。大疏已屬部覆。而雅志必不得遂。願勉奉簡書。以徇國事。

## 答王鑑川

辱示先後二書。俱一一領悉。以公勲業宜膺殊賞。然忠簡帝心。絲綸賞寵。則其榮重。又近時所僅見也。去年僕力辭四恩。亦荷敕獎。僕於心感戴。竊謂九遷百朋。無以喻之。諒公感恩思報之忠。亦當與鄙衷懸符也。敕辭乃僕手撰。早晚當贖上。屯田事。已屬計部改行。

### 答汪南溟

辱教。迫冗不能一一詳答。謹以原札逐款竊附數字於後。疏中亦僭省數句。統俟尊裁。此行惟公舉動合宜。鑒裁精允。敬服敬服。

### 與王敬所

今年閘河水溢。轉餉甚艱。然終以發運之早。雖遭中梗。比之往歲。猶爲駛利。皆公之功也。海運今歲微有損失。議者遂紛紛言其不便。此衆庶之見。固不足憑。但僕鄙意竊以

爲今欲海河並運。則當著實料理。歲歲加增。若止欲嘗之。則二年之間。道路已熟。何歲以十二萬石嘗險哉。近潘大參有復遮洋總議。似爲穩使。不審高明以爲何如。僕昨因羣言。稍有淆惑。但以國家大計。須虛心商量耳。

### 與蜀撫曾確菴計勦都蠻

凌霄旣破。我師據險。此天亡小醜之時也。宜乘破竹之勢。早收盪定之功。計蠻衆不過數千。我師當數倍之。無不克者。攻險之道。必以奇勝。今可徵兵積餉。爲坐困之形。而募死士從間道以擣其虛。先年破香鑪。取洮岷。皆用此道。若不奮死出奇。欲以歲月取勝。此自困之計。兵聞拙速。非覩巧之久也。惟公熟計之。劉功帥名著於西蜀。取功贖過。保全威名。在此一舉。其一切攻圍之計。宜聽其自爲便利。勿中制之。唯與之措處。軍前賞功募士之費。計軍中一月之費幾何。與其曠日遲久。不若暫費速罷之爲愈也。凡此皆書生之見。謾寄以備採擇。



## 答荆南道施華江

辱翰教。深荷雅情。聞楚中水患。視往年稍平。而敝府諸堤俱無恙。皆撫臺趙公之功也。書稱六府養民之政。以水爲首。水政舉。然後五事可從而理。辱教惓惓留意於此。楚民庶其有瘳乎。

## 與王敬所論大政

月中漕艘已盡抵灣。萬庾豐溢。繫誰之力歟。可慶可慶。圖說訓蒙語耳。何足以辱大製。僕平生拙于文辭。頗與懶性相成。間有強作者。亦輒以不得意棄去。存錄者甚尠。俟他日乞骸有暇。料檢故囊中。或有一二呈教。辱示嶺表善後事宜。誠經世之訃猷。顧事涉更置。旦夕未可遽圖。僕今事幼主。務兢兢守法。愛養小民。與天下休息。諸大擘畫。必俟聖齡稍長。睿明益開。乃可從容敷奏。上請宸斷行之。卽如宗室祿糧。及西北邊用書生

爲將。與處置屬夷之策。皆國家大事。急宜經理者。目前亦未敢言。又未知他日可言之時。僕尙得立朝否耳。嘗謂世廟以大有爲之君。而當時諸臣不能佐下風。徒取儀文制度。紛更一番。末以脩玄結局。至經國遠猷。太平鴻業。固置而不講。至今令人怏怏也。辱教。謹藏之篋中。以俟乘機入告。

### 答南學院謝虬峯

疊辱華翰。深荷雅情。陽明先生從祀。禮官方欲定議。而南疏復至。極其醜詆。至欲并褫其封爵。則亦過矣。

### 答殷石汀計剿海寇

林賊旣失巢穴。飄泊海上。必不能久。宜與閩中約會圖之。閩撫劉君有智計。勇於任事。必能助公共擒此賊也。近有陳廣事者。其措置頗大。不知於地方便利否。謾寄上一覽。

幸惟裁教。前承厚惠。不敢當。卽託使者歸璧。更不煩差人於寒家問遺。蓋僕近日曾將此事奏知主上。千萬體諒。乃見至愛。

### 與河漕萬兩溪論協和克讓

近有人言公與督漕不協。兩家賓客遂因而鼓煽其間。僕聞之。深以爲憂。甚於憂洪水也。夫河漕皆朝廷所軫念者也。二公皆朝廷所委任者也。河政舉。漕運乃通。漕運通。河功斯顯。譬之左右手。皆以衛腹心者也。同舟而遇風。櫓師見帆之將墜。釋其櫓而爲之正帆。帆者不以爲侵官。櫓師亦未嘗有德色。但欲舟行而已。二公今日之事。何以異此。唐虞人才非獨異於後世也。良由舜禹以克讓之道。昌於上。合九官十二牧爲一人。以共熙帝載。故治功獨隆。禹之功地。平天成。萬世永賴。及將受攝。舉天下之重而讓之皋陶。叮寧反覆。惟恐皋陶之不已先也。然禹以是而益聖。而頌其功者至今不衰。故曰。旣以爲人。已愈有。旣以與人。已愈多。近時士大夫有才者不少。惜哉。不講於此道。故治亦

不古。若夫大道之行也。與三代之英。僕未之逮也。而有志焉。僕願二公之留意也。朋友之誼所宜切磋。故敢獻其愚。唯公垂聽焉。

### 答郭華溪

懷遠之事。初謂成於有激。故往者奉書云云。意或可以分北治之。不謂其怙終不悛。敢行稱亂如此。則天討所必加。雖費財動衆。亦難中止矣。一切剽處事宜。公所畫俱當。惟公自裁便宜行之。不敢中制。

### 答張總憲

頃侍上於便殿。從容語及公所陳二疏。歎賞者久之。且謬以僕爲薦拔得人。僕因說上以詢事考言。綜覈名實之道。後蒙天語嘉納。嗟乎。以孤特無侶之士。立志於邊關萬里之外。而能上徹九重。獨蒙眷獎。非至誠而能若是乎。有君如此。何忍負之。此公報國之

秋也。願樹勳庸。以酬知遇。

### 與王鑑川言兢業邊事

頃侍上於便殿。以言及邊事。上因問宣大重鎮。王總督何故取回。僕對言朝廷用人。不宜竭其忠力。王在邊久。且少休之。他日不妨再用。上問誰可代者。僕遂以方金湖對。無何。而臺諫之疏至。僕竟以對上語擬旨行之。然公之出入。實係虜之向背。邊鎮重輕。今東貢未完。金湖未至。僕於此兢兢。臥未能安枕也。古人去之日如始至。惟公留意焉。

### 答司馬王繼津

頃者處分。實出鄙意。竊以公資望自可徑長六曹。不必又出開府。乃所以相厚也。僕自當事以來。閉門却掃。士大夫公言之外。不交一談。舊時讒譖之風。庶幾丕變。茲以公之雄略。不獲及時展布。則蔽賢之罪。當在於僕。未可歸咎他人也。幸遵新命。共佐明時。勿

復致疑。乃見高雅。

### 與王繼津論君臣之義

蓋聞君臣大義。分無所逃。時乎時乎。難以再得。孔子大聖。以時仕止。然猶七十說不遇而不止。豈好爲是栖栖者與。誠達於君臣之分也。唐虞之世。九官十二牧。師帥濟濟。各效其能。豈必人爲禹稷。位皆百揆。而後愜於心哉。誠欣於時世之遇也。方今堯舜在上。屬任忠賢。僕躬履貫魚之行。寤寐孜孜。用天下賢者。效之于上。士生於今。義無所逃。以其時則可矣。公乃獨傲然遠引。慨慕巢由。嘲哂禹高。欲自越乎不逃之分。而背乎不易得之時。此愚蒙之所未譬也。雖然。人各有志。何可相強。聊爲道其區區如此。惟高明裁之。大疏部覆休致。旨允調理。仕己之途。尙未定決。惟公審圖之。

### 與殷石汀論吏治

爲國之法似理身。元氣欲固。神氣欲揚。廣中患不在盜賊。而患吏治之不清。紀綱之不振。故元氣日耗。神氣日索。數年之前。論者謂朝廷已無廣東矣。自公一振之。而傾者安。黠者戮。炎州以寧。豈易地易民哉。元氣漸固。神氣始暢耳。今主上天縱英明。僕日斤斤焉。以振紀綱。察吏治。安民生爲事。願公持而行之。毋渝其初心。毋畏於羣議。則元元之幸也。公先後三書俱至。冗中匆匆附復。諸惟鑒原。

答蜀撫曾確菴

十月十四日聞九絲捷音。不覺屣齒之折。殄此巨寇。不惟蜀民安枕。且國家神氣藉此一振。四方有逆志干紀之人。亦將破膽而不敢恣睢矣。喜甚喜甚。此地險要。屯兵設官以鎮之。其有功有罪人員。及一切善後事宜。當次第俱奏區處。

與廣東督撫

向者奉書。言懷遠云云。深有感於始事者處置之失宜。謂可不煩兵而服。念旣怙終稔惡。又天討之所必加。今以數月。未聞捷報。日夕懸懸。且古田餘孽。亦將視此以爲向背。南夷頑梗。德義所不能化。唯懼於威強耳。公其審圖之。

### 與閩中巡撫劉凝齋

閩中數年無警。當事者務沽節省虛名。以致緩急無措。誤事非小。公所請者已屬該部。一一覆行。俞帥老奸。志意已墜。難以復用。非新壯將軍不能辦此。胡君舊在閩中。頗著戰功。銳於功名。惟公結以誠信。激以忠義。必能有所建立也。用兵機宜。難以遙度。甌嶺以東。一付於公。

### 答督撫吳環洲

頃者柔服青把都一事。俱見公之雄略。慰甚。議者咸謂今日虜情。尙可數年無事。然朝



廷建安攘長策。非苟圖旦夕之安而已。此意惟公可語。亦惟公能辦之。

### 答工部郎中劉公伯燮言用人毀譽

僕近來用人處事。一秉公心。謬持愚見。旁人無所關其說。士大夫公見之外。不延一客。公談之外。不交一語。卽有一二親故。間一過從。不過相與道故舊。遣客懷而已。無一語及於時政。乃今蒙德者謂有人譽之失。意者輒謂人毀之。皆非知僕之心者也。戴公之舉。實主上體念邊臣至意。在僕猶不敢借此以市恩。况其他乎。義河云云。殆不其然。

### 答大司馬萬兩溪

老父幸登七褒。辱書問舍弟小兒。又承扁額之賜。感荷厚情。言不能悉。但近來交際禮廢。曾謂中外相知者。不煩遣使問遺。此意主上亦察知之。僕不敢自背其言。以欺朝廷。忝在心知。尤願體諒可也。

## 答王鑑川

虜酋款服。邊鄙輯寧。始終皆公之功。僕雖曾借前箸。少効區區。所謂文墨議論者耳。公乃讓美推能。謬爲引重。捧讀大疏。背汗心惶。故不敢擬廷議之旨。誠以蒙恩而後辭。不若先自寢閣之爲省事也。本兵方欲題覆。公之勲勞。自宜首敘。若諸文武將吏。因人成事者。已經屢錄。恐難以盡優也。

## 答冏卿陶五臺

愚子弟僥倖。凡在交知。賜賀者。俱不敢領承。盛儀謹璧諸使者。幸惟原亮。承別楮。祇畏云云。深荷道誼同心之愛。僕自受事以來。日夕兢惕。凡事關宗社生靈。必齋心默告於上帝二祖而後行。不敢告者不敢爲也。誠以人臣之義。靖共匪懈。况僕今處多懼之地。當至重之任。敢不畏乎。再拜稽首。師公昌言。

### 與李大僕漸菴論治體

明興二百餘年矣。人樂於因循。事趨於苦窳。又近年以來。習尙尤靡。至使是非毀譽。紛紜無所歸究。牛驥以並駕而俱疲。工拙以混吹而莫辨。議論蠶興。實績罔效。所謂怠則張而相之之時也。况僕以草茅孤介。擁十齡幼主。立於天下臣民之上。國威未振。人有侮心。若不稍加淬勵。舉祖宗故事。以覺寤迷蒙。針砭沉痾。則庶事日隳。奸宄窺間。後欲振之。不可得矣。故自僕受事以來。一切付之於大公。虛心鑒物。正己肅下。法所宜加。貴近不宥。才有可用。孤遠不遺。務在強公室。杜私門。省議論。覈名實。以尊主庇民。率作興事。亦知繩墨不便於曲木。明鏡見憎於醜婦。然審時度勢。政固宜爾。且受恩深重。義當死報。雖怨誹有所弗恤也。乃朝夕進說於上前。則又惓惓以恭儉仁厚培植純一未鑿之良。卽帝鑑所載及近日何宮允云云。可見其梗概。期以數年之後。主德旣成。治具畢張。乃收管鑰。舉綱維。而歸之於上。稽首明辟。乞骨還山。此區區之微志也。而庸衆喜於

委狗奸宄。尙其精覈。又有一種腐儒。動引末季事。以搖亂國。是。不知本朝立國規模。與前代不同。本朝之威德並施。綱目兼舉。無論唐宋。卽三代盛王。猶將遠讓焉。而宋時宰相卑主立名。違道干譽之事。直僕之所薄而不爲者。頃辱華翰。深合鄙心。至於舉劾失實。及獎率科貢云云。俱於實政大有裨益。乃知庸衆之人。難與論尋常之外。識時務者。謂之俊傑。今人旦夕見僕行事者。猶不相知。而公乃冥契於千里之外。人之識見相越。豈不遠哉。人旋敢布區區。

### 答吳環洲

大疏已上。銓部且議題覆。公此後但宜默付之公論而已。爲國任事之臣。僕當與之同去就者。公等安心勿慮。

### 答吳道南

邊屯俱興。得士宿飽。公之功獨冠諸道。承以餘粒見遺。卽令家人炊之。爲益一餐焉。

### 與殷石汀經略廣賊

諸良寶必死之寇。而各官乃易視之。其敗固宜。一撮許殘賊不能克。則諸山海逃伏之盜。必將乘勢再起。將來廣事不可便謂無虞。大抵南賊譬之蔓草。剗盡還生。從古以來。經略南方者。皆未能以一舉而收盪平之功。其勢然也。今當申嚴將令。調益生兵。大事芟除。見賊卽殺。勿復問其向背。諸文武將吏有不用命者。宜照敕書悉以軍法從事。斬首以徇。了此。則諸不逞之人。皆破膽而不敢旁睨矣。不惜一朝之費。而貽永世之安。惟公留意焉。初擬將屯事責之陳奎。今廣中士大夫皆云渠敗衄之餘。氣阻力挫。恐難展布。姑從降調。已屬銓部另擇能者代之。然此雖該道之事。而督率驅策。則惟仗於公。非該道所能辦也。

## 答王敬所

圖說訓蒙語耳。乃辱公渙發佳思。冠以雄文。驚馬而先之以珙璧。魚目而盛之以華楨。不乃爲忝乎。若其文辭之粹嫩。意義之淵奧。則非淺陋所能揄揚也。仰感仰感。近報漕艘過淮已千餘。則今歲糧運又當速達矣。深慰深慰。

## 與楚撫趙汝泉言嚴家範禁請託

小宅原擬賜金搆一書舍耳。不意錦衣龐君遂摹京師第宅。大事興作。費至不貲。屢塵垂念。給與頻蕃。旣乖本圖。復益罪過。赧忤之衷。口不能悉。此後更無煩存注。以重不肖之罪。老父高年。素懷坦率。家人僕輩。頗聞有憑勢凌爍鄉里。溷擾有司者。皆不能制。藉公之威。明示兩司及敝處守令諸君。但有如前所云者。幸卽爲擒治。其所請囑。無問於理可否。悉從停閣。有強梗不法者。解來。僕面鞠之。欲得而甘心焉。僕今待罪政府。兢兢

自守門戶舉動。皆諸差人所睹見。嚴之於官守。而縱之於家鄉。人其謂何。卽諸君愛我。亦不宜用世俗相處也。僕平生恥爲矯飾。其所云者。悉出赤悃。萬惟垂亮。

### 與曾確菴計平都蠻善後事

都蠻自擅。不討之日久矣。豈知王師動於九天。從衽席上攫而取之乎。自冲聖嗣位以來。方內乂安。四夷嚮風。旃裘之君。厥角稽首獻見。恐後海陬跋扈之儔。山徼陸梁之輩。天戈所向。殲殄無遺。此往籍所希聞。間代而一覲者也。僕以譴劣。謬司鼎軸。際茲盛會。竊爲以榮。可不謂大幸歟。功高賞薄。尙當有待。所示善後事宜。便屬所司覆行。更無異議。

### 答薊遼總督方金湖言任事

初鑑川內轉。主上曾面詢誰可代者。僕卽以公對。公之秉鉞。上所簡也。明興以來。國有

艱鉅之事。衆所懼慄。觀望而不敢承者。率楚人當之。願公勉旃。酬恩報國。蜚英騰茂。在此行矣。

### 答殷石汀

前賚奏人回。已具啓復。頃巡按所奏林賊事情。與公所報不同。僕甚訝之。已卽示意部科。言此事當一屬之於公。不宜輕有指授。其撫剿便宜。願公詳計之。兵機在呼吸之間。便有變態。安可預度。然大率盜賊奸宄。惟當攝吾之威。罕能懷吾之德。如機有可乘。一鼓而殲之。雖被虜坐鎮之人。亦不足惜也。撫賊聲不可傳遠。宜以密用。前喻嶺賊。如蔓艸難以盡拔。唯旋生旋除之耳。

### 答趙汝泉

辱華翰。知道從年餘尙未回省。大禹勤勞民事。召伯周行阡陌。不是過矣。江漢之民。庶



其有瘳乎。感仰感仰。僕自爲童子時。見撫臺守巡行縣邑。荒僻咸至。而供億節約。民不告勞。故上無不究之澤。下無不達之情。今則不然。上官憚於巡行。而百姓苦於供費。失其職矣。君在爲政。固在先勞。然先之而不從。則亦不免繩之以法。不然。徒以一身勞之。無益也。今天子軫念元元。精覈吏治。諸守令回任。當別是一番作用。唯公加意振策之。水利次第脩舉。必有成效。

### 答總憲吳太恆

趙陵豎旗事。殆妖人以此惑衆耳。但宜以鎮靜之。不必紛紛搜索。保甲之法行。則奸人自無所容。第須著實嚴行。乃爲有益。毋徒取其彌文可也。中州重鎮。密邇畿輔。務農講武。足食足兵。乃今日所最急者。餘皆迂談也。唯公留意焉。

### 答太常殷秋溟

僕少耽沉寂。每有出世之想。不意中道爲時所羈縲。遂至於此。且欲暫了人間事。以酬俗緣。然於四方高流靜侶。未嘗不神交而冥契也。生平所聞士大夫稱公之高韻。恨不得一披晤焉。茲者暫借留寺。終期愜此素心。

### 答王敬所

近報漕艘過淮者多。計當不後於去歲。若中道更有阻滯。則責在河道矣。

### 答吳環洲

近事已有旨處分。朝廷用賢。三至而信之愈篤。公亦如何爲報耶。頃督撫方公聞有南疏。急使人來留公甚懇。公亦宜作一書謝之。吳王二君。俱如所擬。加秩管事。

又

前以公大意傳與督撫。方公昨有書來。言事有宜釐正者。當亟處之。其未能驟變者。次第措畫。要令毋失制虜之初而已。當局之人。責任艱重。幸公委心維助之。頃於蹇公處見來翰。謂功不必出於己。至哉斯言。非有道者孰能之。

答廣西撫院郭華溪

聞懷遠奏凱。無任浣慰。兵已深入。須盡殲之。毋使易種於斯土。又煩再舉也。

答翰學余同麓

辱華翰。知文從已至留都。無任欣慰。小兒昔荷陶鑄。叨舉鄉薦。終以寡陋。點額龍門。唯垂念夙誼。時惠教督。是望。

答宗伯董潯陽

僕昔在詞林。隨公之後。淺薄碌碌。公所知也。不自意蹈躡鼎鉉。遂膺顧託之重。又不自量強而肩之。日夕惴惴。惟虞顛仆。比辱翰示。獎許過情。譬彼孱夫。負千鈞之重。上太行之坂。旁有力者不憐而借之。更爲邪許獎借。將令孱者不至絕臚。委頓不已也。惶媿惶媿。乃若主上之明聖。虛已純心。能使官府穆清。宦戚斤斤奉法。則誠書傳所希聞。當與海內簪紳同心慶戴者也。

### 與王敬所言關防棍徒假借

近苦河路奸人動稱寒家費送米物。誑騙騷擾。屢懲不止。僕今在旅寓。朝夕饔飧之費。悉以薄俸易之。旅易旅用。不能爲終歲之計。况家素貧困。老父母在堂。尙須微祿寄養。豈復有餘積給充宦資乎。凡言此者悉妄也。顧不知者難以戶曉。今僭刻一信牌。給付各往過緊要官司收執。以便詰驗。假公威重。照別紙所開諸處。分給禁約。取具收結繳查。如有犯者。仍望卽置之重法。以全僕曲廉小節。恃愛瑣瑣。統惟垂亮。

張江陵全集 卷十八

# 張江陵全集卷十九書牘

## 答河漕王敬所

辱示。知運艘已於三月十一日盡數過淮。無任忻慰。聞度江遇風。諒無大損。若前途通利。則額賦可以畢達。國儲日裕矣。今計太倉之粟一千三百餘萬石。可支五六年。鄙意欲俟十年之上。當別有處分。今固未敢言也。

## 答蜀撫曾確菴

先後承翰示。俱一一具復。昨孫院有疏。言殘蠻未靖。不知其意所出。大剿之後。竄伏林谷者。豈能盡殲。要在從容綏定之耳。譬之人積病雖除。餘毒尙在。良醫當此時正宜消息。緩之則孽孽復萌。急之則重傷元氣。不可不慎也。

答藩伯吳小江

頃者主上特發淵衷。舉行曠典。而公以卓行清望。爲天下舉首。自此海內多良吏矣。幸甚。今賴天地宗社之靈。中外頗稱甯謐。惟是黎元窮困。賦重差繁。邦本之虞。日夕在念。頃蒙天語叮嚀。亦以愛養百姓爲急。願公思所以奉宣德意。加意元元是望。

答銓部李石塘

惟公往在西臺。屢聞讜論。比奉翰札。率多溢美之詞。豈僕德衰於昔。不足以來天下之善耶。抑公欲卑論儕俗。以取通顯耶。考功之缺。已屬銓曹調補。其人則太宰所自擇者也。

答總憲廖春泉

別諭三件。領悉。靖州土兵。在廣右甚無紀律。入楚境。震公之威。又處置得宜。故歛手屏跡耳。此輩如毒藥猛虎。誠不宜輕用。敝族家人。雖頗知奉法。然小小擾溷。未必盡無。銜勒鈐制。不敢一日釋也。公知我之深者。幸惟留意。考成一事。前奉明旨督責甚嚴。幸一一如期完報。有勢不能完者。不妨明奏改限。

### 答廣西巡按郭華溪

得報知懷遠已定。旁有干紀者。皆殄滅無遺。欣慰。但兩廣之人。好爲議論。臺諫無識者。往往誤聽之。訛言屢興。賴聖明遠矚。三至不疑。若如昔時之政。則風波滿海內矣。粵地所患。不在盜賊。而在人心不公。是非不定。紀綱不振。法度不行。可恨。人旋草草。

### 答督撫劉百川

前有人言公躬履河上。見沙淺難行。頗悔爲張僉憲所誤。欲罷其役。而嫌於自改。故以



爲問。今計算久遠。果便於人。則曹子之言。固可從也。已屬計部覆行。張齊賢云。自古疆場之患。非盡由夷狄。亦多邊吏擾而致之。頃墩軍襲殺屬夷。情甚可惡。宜卽梟首以洩屬夷之忿。杜將來之患。今人口語嘖嘖。咸云南兵無紀律。專肆貪縱。今有此。又好事者之資也。其同惡之人。亦宜以軍法處之。烽火爲軍中耳目。最宜嚴謹。古之爲將者。鼓一鳴。卽前有湯火。不敢不赴。金一奏。卽見利可趨。不敢不退。今平時自爲出入。而管軍者不知。臨陣何以號令之乎。戚總理聞平日馭軍甚嚴。今安得有此。

### 答保定巡撫孫立亭

導河事已下部議處。上議務在安靜。不擾四方。言利病者非萬不得已。率皆報罷。故擬旨云云。辱示小牌。俱已給發。深荷體諒厚意。

### 與荆南道府二公

承示三款。深於地方有裨。但近請權稅者。該部皆執不肯允。况先年議有廢府州課銀。近日兩院又奏留存積祿糧銀。目前尙可支措。俟明歲再議未晚。且僕於此亦有小嫌。今方修建賜第。不知者毋謂公欲借公費以助私營乎。若後二款。則皆利民急務。僕卽明屬所司行之。無不可者。又昨王太常言府中有一淤洲公。欲令家人領。極知公厚意。但利之所在。人爭欲之。擅衆所利。則怨必叢積。家有薄田數畝。可免饑寒。老親高年。子弟驚劣。誠不願廣地積財。以益其過也。縷縷之誠。惟公亮之。

### 答兩廣殷石汀

頃得閩臺劉凝齋書。言林賊遁出海洋。爲西南風阻泊廣中。向僕固患其出海難制。今若此。殆天亡之矣。閩帥旣過境。計今想已成擒。了此。則廣中可望寧定。忌者亦無所容其喙矣。

### 答巡撫張公守約

前承翰貺。去人竟未索書。謹謝。賤日有惠。概不敢當。輒用歸璧。極知公厚意。中心藏之。此後幸無煩差人於寒舍問遺。恐涉形跡。石汀督廣數年。勞苦而功高。然廣中士夫亦有不悅者。頃曾面奏主上。專任而責成之。聞公與之素雅。尤望同心共濟。計安地方。以逭朝廷南顧之憂。

### 答薊遼總督方金湖計處板升逆種

板升諸逆悉除。固爲可喜。但公此時只宜付之不知。不必通意老酋。恐獻以爲功。又費一番濫賞。且使反側者益堅事虜之心矣。此輩正宜置之虜中。他日有用他處。不必招之來歸。歸亦無用。第時傳諭以銷兵務農爲中國藩蔽。勿生歹心。若有歹心。卽傳語順義縛汝獻功矣。然對虜使却又云。此輩背叛中華。我已置之度外。只著他耕田種穀。以

供虜食。有犯法生反心。任汝殺之。不必來告。以示無足輕重之意。此中大有計策。公宜默喻之。不可令那吉知也。

### 答中溪李尊師論禪

正昔在童年。獲奉教於門下。今不意遂已五旬。霜華飛滿鬚鬢。比之賢嗣上年所見。又不侔矣。意生分段之身。刹那移易遷變。人烏得而知之。可慨可慨。正以淺薄。謬肩重任。目前幸得方內乂安。四夷嚮風。實賴主上聖哲。百官奉職所致。非正之寡昧所能仰佐。其萬一。過承翰獎。彌以爲媿。向者奉書。有衡湘太和之約。非復空言。正昔有一私願。今所作未辦。且受先皇顧託之重。忍弗能去。期以二三年後。必當乘此可得仰叩毗盧閣。究竟大事矣。三塔圖說。披覽一過。不覺神馳。冗甚未能記。俟從容呈上。

### 答總憲李漸菴

方今言理財者。其說紛紛。皆未知設法以督完正。供之爲便也。馬政大疏。已下部議覆。誠如實行之。不惟便民。且大裨於國計也。

### 答殷石汀

辱示林賊分蹤遠遁。廣兵西追。閩兵東扼。計當爲釜魚矣。乃近報閩師已收還西防。則夾剿之功。又恐難必。然賊覘知閩師退。必走閩。閩人見賊入境。勢不容不急救。廣兵因而尾之。亦成擒之勢也。諒此時已盪定。姑縷縷及此。

### 答薊遼督撫吳環洲言虜情

修邊之議。舊督撫甚不以爲然。謂邊人連年修築。勞瘁已甚。宜少體之。乃方公則又銳意欲舉。揆之二議。方爲優焉。已下本兵議覆。近日虜情。大略可見。彼之心離勢渙。偷活苟安。我則政事修明。內外輯睦。盛衰之機。昭然可覩。故向者奉書。謂後不當議守。且當

議戰。良有爲也。辱示云云。深慰鄙念。誠得敢戰之士二萬人。足辦吾事矣。然不宜輕示機緘。令人窺測。昨養廉地土事。已喻意陳道長。以古人不問市租之意。頃疏至。處之甚優。爲將者亦宜戴恩圖報可也。

### 答殷石汀言宜終功名答知遇

先後奉手教。皆有釘封。捧讀數回。不勝於邑。竊謂古人居官。有解組棄印。浩然求去。咸以不獲知於主。志不得行。或其主雖知之。而爲當時執政者所排忌。或有碩畫妙算。而當事者不爲之主持。使其忠謀不售。則其去宜矣。僕自去歲曾面奏主上曰。今南北督撫諸臣。皆臣所選用。能爲國家盡忠任事者。主上宜加信任。勿聽浮言苛求。使不得展布。主上深以爲然。且獎諭云。先生公忠。爲國用人。豈有不當者。故自公當事以來。一切許以便宜從事。雖毀言日至。而屬任日堅。然僕所以敢冒嫌違衆而不顧者。亦恃主上之見信耳。主上信僕。敢亦信公。則公今之求去者。爲不獲于上乎。爲不合於執政乎。二

者無之。而獨以浮忌之口。卽欲引去。是忍於背君相之知。而重於犯庸衆之口也。願公勿復以爲言。了此殘寇。爲地方計慮久遠。悉力以圖之。彼中人此時雖不能盡諧。他日必有尸祝之。此大丈夫不朽之鴻業也。他何足惜。俟廣事大定。亦必移公他處。以休曠足。決不以嶺表爲公玉門也。鳳賊西遁不遂。又欲東奔。力屈智窮。情勢已見。但雲海茫茫。邀之何所。必須以計誘之。驅入羅網。乃可成擒。萬里指授。恐緩不及事。在公審圖之耳。僕料此賊若不獲。必走閩中。爲閩人所得。若爾。公卽宜歸功閩人。使之趨利而協力。乃勝算也。林賊事若有確耗。幸惟密示。以慰懸懸。撫民願焚械歸籍。此卽古人賣劍買犢之化也。公威德遠洽。敬仰敬仰。所示善後諸款。皆大着數。容與本兵計處行之。人旋先此附復。餘容續裁。

### 與操江宋陽山

南畿根本重地。江洋盜賊縱橫。近來湖廣江西已屢發矣。元末之事。可爲殷鑒。比來處

分。實不得已。惟公亮之。天下之事。以爲無足慮。則必有大可慮者。故古人詰戎治兵。當太平之世。尤兢兢焉。公有經國遠慮者。幸惟留意。

### 答方金湖

聞西市將完。欣慰欣慰。虜表宜與改定合式。乃可其所請。乞亦酌量與之。大抵虜有求。在彼不必其盡從。而在我尙求爲可繼。操縱之機在公審之而已。刺麻僧來。曾備問彼中事。其板升諸逆。倡爲流言。殊爲可惡。公可因此機省諭順義。言此輩甚不樂貢市。利在搶掠。如有流言。宜以法處之。庶得永遠和好。邱昌原係叛賊。其子不可使爲頭目。恐致壞事。彼雖能卽廢之。然亦少設難從之請。使彼彎曲而我常直。彼或負約而我常守信。則亦制馭之一機也。山西撫臺病勢如此。豈可久留。嚴君遠在萬里。未能卒至。已改推鄭君洛代之。當令星馳赴任。此君在上谷久。素諳邊事。亦可爲公同心之助也。



### 答宣府吳撫宅

近督撫方公亦報土蠻使之糾誘順義。而順義不從。具見其忠順之堅。青把都之說。決出於薊人之虛誑。蓋因渠今詰婚東虜。故屬夷遂吠影虛傳。以邀賞耳。然因此省諭一番。亦足以發東虜之謀。而孤其勢。薊人陰受其利。咸公之功也。今歲貢市。愈爲安靖。所求鐵鍋。已屬所司允之。但須官給爲使。仍責令來歲以所壞抵換。蓋以塞書生之說。謂資寇兵也。近方公有書。亟稱公之忠猷。冠於三鎮。誠爲確論。鄙悖不勝幸甚。

### 答應天巡撫宋陽山論均糧足民

來翰謂蘇松田賦不均。侵欺拖欠云云。讀之使人扼腕。公以大智大勇。誠心任事。當英主綜覈之始。不於此時剔刷宿敝。爲國家建經久之策。更待何人。諸凡謗議。皆所不恤。卽僕近日舉措。亦有議其操切者。然僕籌之審矣。孔子爲政。先言足食。管子霸佐。亦言

禮義生于富足。自嘉靖以來。當國者政以賄成。吏媵民膏。以媚權門。而繼秉國者。又務一切姑息之政。爲逋負淵藪。以成兼并之私。私家日富。公室日貧。國匱民窮。病實在此。僕竊以爲賄政之弊。易治也。姑息之弊。難治也。何也。政之賄。惟懲貪而已。至于姑息之政。倚法爲私。割上肥己。卽如公言。豪家田至七萬頃。糧至二萬。又不以時納。夫古者大國公田三萬畝。而今且百倍於古。大國之數。能幾萬頃。而國不貧。故僕今約已敦素。杜絕賄門。痛懲貪墨。所以救賄政之弊也。查刷宿弊。清理逋欠。嚴治侵漁攬納之奸。所以砥姑息之政也。上損則下益。私門閉則公室強。故懲貪吏者。所以足民也。理逋負者。所以足國也。官民兩足。上下俱益。所以壯根本之圖。建安攘之策。倡節儉之風。興禮義之教。明天子垂拱而御之。假令仲尼爲相。由求佐之。恐亦無以踰此矣。今議者率曰。吹求太急。民且逃亡爲亂。凡此皆奸人鼓說以搖上。可以惑愚闇之人。不可以欺明達之士也。夫民之亡且亂者。咸以貪吏剝下。而上不加恤。豪強兼并。而民貧失所故也。今爲侵欺隱占者。權豪也。非細民也。而吾法之所施者。奸人也。非良民也。清隱占則小民免包。

賂之累。而得守其本業。懲貪墨則閭閻無剝削之擾。而得以安其田里。如是民且將尸而祝之。何以逃亡爲。公博綜載籍。究觀古今治亂興亡之故。曾有官清民安。田賦均平。而致亂者乎。故凡爲此言者。皆奸人鼓說以搖上者也。願公堅持初意。毋惑流言。異時宰相不爲國家忠慮。徇情容私。甚者輦千萬金入其室。卽爲人穿鼻矣。今主上幼冲。僕以一身當天上之重。不難破家以利國。隕首以求濟。豈區區浮議可得而搖奪者乎。公第任法行之。有敢撓公法傷任事之臣者。國典具存。必不容貸。所不江海條件。俱當事理。疏至。卽屬所司覆行。懋修曰如此言語急公而招怨耳

### 答薊鎮吳環洲料虜虛報誑賞

薊鎮之報。竟成烏有。皆屬夷誑賞之言。但彼中任事者利害切身。一有所聞。輒行奏報。爲他日免罪之地。固未暇審其誠僞也。此等事。但觀廟堂處分何如。頃僕聞薊報。卽戒彼中以鎮靜持重。務以整暇。勿致張皇。而託公傳諭西虜先事伐謀。乃是一冷着。果得

其用此不惟可以解目前之患。又有以銷未然之變也。因憶前隆慶庚午。宣大忽報西虜犯薊。薊人偵探者因遂稱見虜已西行。犯在旦夕。各路之兵嬰牆擺守。京師亦爲之戒嚴。廟堂皇皇卽謹守城之策。是時內江方幸虜之來。以信其言。輿化不能主持。舉錯紛紛。皆極可笑。而虜終無影響。防守一月見罷。費以數十萬計。頃東報沓至。若如往日舉動。則又成一笑柄矣。

### 答兩廣殷石汀

前奉手書。懇辭解任。想未見近旨也。主上屬託甚重。排衆議而用公。此恩似不可忘。且廣事十已八九。倘代者不能守公之策。致有餽飭。恐公之心亦有所不安也。俟求得代者。卽爲公處決。不久淹南溟。曾轉示公所寄林賊事一冊。具悉賊情。今但當以治內爲急。二賊相機徐徐圖之。不可以二豎子自困。廟堂自有主張。非浮言所能淆也。

### 答總憲劉紫山

佳貺屢頒。豈敢終拒。況公今已解任。而猶惓惓不遺。如此厚愛真切。亦不忍違。但猶於交際之禮。久已曠廢。往來公差。人所親見。又嚴飭族人子弟。毋敢輕受饋遺。故雖相知親舊。有惠亦概不敢當。非欲矯抗沽譽。實以當事任重。兢兢焉務矜小節。以自完而已。用是輒以厚惠。仍璧諸來使。然心領雅情。固不藉于物也。

### 答方金湖計服三衛屬夷

辱示屯政云云。俱於事理至當。願公堅定行之。屯政舉則士得飽食。可以議戰矣。比者遼左之功。固爲奇特。朝廷賞功之典。亦極其隆厚。然僕於此蓄意甚深。謹密以告公。今九邊之地。薊門爲重。以其爲國之堂奧也。自嘉靖庚戌以來。虜禍日中於薊。至罷九邊之力以奉之。而內地亦且困敝。然所以釀此禍者。皆屬夷爲之也。國初棄大寧之地與

之。冀其爲吾藩屏。而今乃如故。故屬夷不處。則邊患無已時。然欲處之。非先加之以威。彼固未肯頹首而服從也。今西虜爲貢市所羈。必不敢動。獨土蠻一枝。力弱寡援。制之爲易。今擬于上谷練得戰士二萬。遼東二萬。多備火器。却令薊人平時將內地各城堡。修令堅固。視三鎮士氣已振。度其可用。則屬夷來撫賞者。一切以正理處之。凡額外求討。及捉軍要賞者。悉正以軍法。彼不遂所欲。必結虜來犯。我則據臺以守。遏之邊外。使之一騎不入。在我雖無所獲。而在彼已爲失利。亦策之上也。如其賊衆潰牆而入。則亦勿遽爲倉惶。但令薊將斂各路之兵四五萬人。屯扼要害。令諸縣邑村落。皆清野入保。勿與之戰。而上谷遼左。不必俟命。卽各出萬人。遣驍將從邊外。將諸屬夷老小盡殲之。令大將領一萬人入關。不必衛京師。徑趨薊地。伏於賊所出路。彼賊雖已入內地。見我不動。必不敢散搶。不過四五日。虜氣衰矣。衰則必遁。然後令薊人整陣以逐之。而宣遼兩軍合而蹙擊。彼旣饑疲。又各護其獲。敗不相救。而吾以三鎮全力。擊其惰歸。破之必矣。一戰而勝。則薊鎮士氣旣倍。土蘇諸酋。不敢復窺。而屬夷亦皆可脅而撫之。以爲我

用。薊事舉。則西虜之貢市愈堅。而入援之兵可以漸減。九邊安枕無事矣。愚計如此。今先試之於遼左。蓋遼人素稱敢戰。而李將軍亦忠勇可用。故厚賞以勸之。懸利以待之。亦致士先從。隗始之意也。公視愚計如以爲可用。則幸與雷帥密議。必得戰士二萬人。多備火器乃可。今各鎮巡標下。及近處守兵。可得二萬否。雷帥膽略。可當此事否。聞白雲中有才略。可用爲奇兵之將否。此舉雖在一二年後。然其工夫須及早圖之。書生狂談。必爲智者所笑。謾以奉聞。竚俟裁教。

### 與南臺長言中貴不干外政

主上雖在冲年。天挺睿哲。宮府之事。無大無小。咸虛己而屬之於僕。中貴人無敢以一毫干預。此公在此時所親見也。僕雖不肖。而入養君德。出理庶務。咸獨秉虛公以運之。中貴人無敢有一毫阻撓。此亦公在此時所親見也。奈何南中臺諫諸君。輕聽風聞。好爲激語。或曰某與中貴人相知。或曰某因中貴人得用。或曰某爲新鄭之黨。不宜留之。

或曰某爲新鄭所進。不宜用之。紛紛藉藉。日引月長。甚無謂也。卽如太宰之清貞簡靖。非時輩人也。僕與主上面相商確。親奉御筆點用。僕卽叩頭賀曰。皇上聖明。不遺遐遠。如此。爲人臣者。孰不思竭力以圖報乎。第以渠素未留心銓事。又值文選君迂暗而不達於事理。致有一二錯誤。然皆小事。於大節未有失也。而遂羣進而攻之。使之不獲一展。又如臺長之古心卓行。處之總憲。最爲宜矣。乃近南中亦有物色之者。書曰。無侮老成人。皤皤良士。膂力旣愆。我尙多有之。宓子賤治單父。孔子使人覘之。見與老者二十餘人議政。孔子喜曰。吾知不齊能辦單父矣。今以幼主當陽。而朝多長者。豈非盛事乎。而奈何務欲侮詆之也。張進本一火者耳。酒潑放肆。送內守備答撻之。革其管事。法如是足矣。卽下之。於理亦不過問。擬不應止耳。而紛紛論列。何爲者哉。且凡臺諫交章。必相與爭。國家大事。關係理亂安危者。今以一酒醉內官。而南北臺諫。鬩然並論。又何爲者哉。隋珠彈雀。羣虎捕羊。殊可笑也。乃致主上生疑盛怒。而諭僕以人爲欺已。嚴旨忽傳。使僕措手不及。本欲爭體面。反以致君疑。所爭何有。智者固如是乎。然此非臺諫諸



君之過也。聞有一二大臣。覬銓臺而不得者。播其說於南中。聽者不察。輕事置喙。而不知僕之苦於調維也。煩公幸明語諸君。今朝廷清晏。中外乂安。倖門瑾塞。百官奉職。如是足矣。僕之淺薄。亦僅能辦此耳。若更欲求過於數者之外。則僕不能。主上幼冲。本無差失。而政令之行。動見齟齬。或事已處分。爭勝不已。甚至挑禍起釁。以結怨於中人。一旦上下相疑。南北冰炭。而後責僕以維持周全之。僕亦不能。辱在道誼。素知。敢布腹心。幸惟裁鑒。

### 答延鎮巡撫張太石

頃面奏主上。延鎮所修邊工。與常不同。公杖履跋涉。身親督工。故特遣兵部司屬住勘。冀獲實也。主上睿明。事事覈實。振舉邊事之機。實在於此。

### 答甘肅巡撫侯掖川

西涼重鎮。必仗雄才。辱華翰。知己履任視事。無任欣慰。頃巡按所報賓兔事。據王鑑川公言。此俺酋之少子丙兔。寄居西海者。乃丙兔非賓兔也。頃已傳諭俺酋。令其嚴加戒飭。然制虜之道。惟當視吾備之修否。服則懷之。叛則禦之。得其好言不足喜。得其惡言不足怒也。開市一節。望公熟計而審處之。竊以爲此地見與番人爲市。何獨不可與虜爲市。前任廖君執泥而不達於事變。其言不可爲市。不過推事避患耳。非能爲國家忠慮者也。但彼既有不遜之言。在此時未可便許。且俟俺酋戒諭之後。果帖服無言。待其再乞。然後裁許。則綏懷之恩。出於朝廷。而非由於要索矣。巡按所云。不過據各將官傳報。亦未可便以爲實。且從旁議論。與當局者不同。朝廷以邊鎮之事。專任公等。其操縱機宜。公宜悉心經理。爲國家審圖。主上英明。斷而行之。非浮言所能搖奪也。

### 答薊遼方金湖

辱教。邊事虜情。誠爲高見遠識。今在廷之臣。能爲此言者。指不一二。屈信吾黨之有人。

也。敬服敬服。據鑑川言。甘肅求市者。乃俺酋之少子丙兔。寄居西海。非賓兔也。夫甘肅既可與番人爲市。何獨不可與虜爲市。前任廖子執閫而不達於事。其言不可與市。不過推事避患耳。非能爲國家忠慮者也。頃已示意侯君。令其審處。但彼既有不遜之言。此時未可便許。且令俺酋戒諭。令其悉心效款。待來歲再乞。然後許之。則綏懷出於朝廷。而非由於要脅矣。公亦可以此意密語順意。使之知所從事。又聞大同甚饑。來春不知何如。若更艱食。公亦宜爲之請賑。今邊倉頗有積穀。可以備賑。固不必索之帑儲也。苟可支持則已之。

答滇撫羅野亭

辱華翰。領悉。泰東客死無後。天之報施善人何如哉。僕忝同榜。爲之經理後事。情理宜爾。何德之有。

## 與河道傅石川

近聞淮揚士大夫言。海口益淤。以故河流橫決四溢。今不治。則河且決而入於江。維揚之區。皆爲巨浸矣。又有言前議築遙堤爲不便者。其說皆信否。從未行此道。不知利害所歸。望公熟計其便。裁教幸甚。

## 答兩廣殷石汀計招海寇

辱示鳳賊事。前聞閩人招之。已入穀矣。近又有出洋之報。僕竊料此賊目前恐未可得。何者。閩廣之人。皆欲要以爲己功。爲閩人者必將曰。汝無歸廣。廣中名爲招撫。實欲殺汝也。爲廣人者亦必曰。汝無歸閩。閩中名爲招撫。實欲殺汝也。故賊疑而不決。歸漢歸楚。莫知適從。反使狡賊得以其間而納吾接濟之人。求其必用之物。久之復開洋而去。何處覓蹤。是我以招撫誘賊。而賊亦以招撫啗我。非計之得也。僕願廣中俱勿以招撫

爲名。但嚴兵以備之。禁海上人勿與接濟。今公在廣。料彼不敢輒肆。彼不得入廣。必走閩。却令閩人招之。或可得也。閩廣皆在疆域之內。但欲得賊耳。何必功出於己乎。且擒之逐之。其功亦自有不容掩者。然僕所爲必責之閩者。蓋以此賊舊只於廣中作賊。閩人未罹其毒。今使廣人得之。不殺。則無以洩地方之憤。殺之。則廣賊見聽招者尙多。將令反側者不安。若閩人得之。則殺之不爲失信。赦之不爲失刑。且料賊之心。亦頗信閩而不信廣也。惟公與金大參密計之。此所謂以與爲取者也。梧州鹽稅公事。所處一一精當。已下所司議行。

又

西省通鹽。不惟於軍中有濟。且府江一帶。咸有兵船往來。亦可以彈壓瑤人。通蒼梧之氣脉。誠百世之利也。今雖不用軍衛。舟中亦宜量貯火器。陰寓武備方可。大疏已下所司。一一覆允。

## 答蜀撫魯確菴計都蠻善後事

都蠻未平之先。蜀中士大夫求免其毒害而不可得。今既克復。遂欲窺其土田而有之。此私情之難狗者也。衆蠻殘孽。當其降服之初。乘吾兵威分北而散遣之。爲力甚易。今已一年餘矣。彼既戀其故土。又曾許以撫懷。乃一旦欲別處之。禍萌當自此生矣。仍宜懷之以恩義。久任劉顯以彈壓之。數年之後。人情定帖。畏威懷惠。皆吾赤子矣。蜀人有倡爲餘黨未盡之說者。皆欲利其土地耳。公宜熟計其便。毋狗人言。坐墮前功。

## 答方金湖

西事前已示意侯君。想當有處。觀西鎮諸君書云云。則順義已經戒諭。諒無他虞。但諸君之告公固如此。而騰之章奏。寄諸部科者。往往不同。大抵皆預捏危言。以爲他日避罪之地耳。人臣懷二心以事君。非忠也。所示諸書。留以爲證。

### 答殷石汀

往府江之役。以未經勘覆。久稽論報。茲榮晉樞卿。薄言酬錄。未足以當功也。近報倭警。似非其時。且越惠潮而犯嶺西。亦非其地。恐別賊假託之也。向者欽川云云。適與此符。惟公熟籌之。

### 答傅后川議河道

辱云治河議。一一領悉。但據公所言。皆爲未定之論。海口旣不可開。遙堤又不必築。開泃口則恐工鉅之難。疏草灣又慮安東之貽患。然則必如何而後爲便乎。願聞至當歸一之論。入告於上而行之。

### 答蘄鎮王巡撫

長禿生擒。亦制長昂之一機。幸惟留意審處。務使之畏威懷德可也。薊中羽翼未就。未可高飛。此輩不得不羈縻而用之。但須審察順義之情。以爲制馭之術耳。

### 答薊鎮吳環洲

聞俺酋病甚。有如不起。則疆場之事。不免又費一番經理。黃酋近日窮居塞外。動靜何如。將來局面當作何狀。今宜預思所以處之之術。又屬夷長昂三貢不入。屢在邊外捉人挾賞。昨薊人捕得其叔長禿。卽欲斬以報功。僕聞卽使人止之。令其借此以制伏長昂。若彼能服罪補貢。誓不再擾。亦卽赦而弗誅。照舊撫賞。但長昂與青把都爲婚。幸公示意青酋。令其傳意長昂。輸誠效順。勿復作歹。自取滅亡。蓋薊鎮近日撫賞。視昔不同。皆僕爲之處畫。其段布諸物。皆美好堪用者。到卽給賞。而邊吏只畏法。賊情大小。必以上聞。得賊必殺。或啓釁端。須得諸吏守約。彼此相安。則薊患永紓。而西虜之貢市益堅矣。



### 答兩廣殷石汀

鯨鯢盡戮。地方救寧。公之功可能也。驅見在之兵。當率然之變。在自戰之地。禦必死之賊。兵不別調。役不淹時。而全師奏捷。其功不可能也。廕賚之典。尙未足酬。簡在帝心。大畀有日。

### 答吳環洲

辱示薊鎮虜情。淵哉其言之也。已卽密語彼中當事諸公。俾知所從事。屬夷處置適宜。則土虜之真情可得。而兩鎮之貢市愈堅。當今邊務。莫要於此矣。公在上谷。內修戰守。外探虜情。東制西懷。自有妙用。僕復何憂。

### 答少參吳道南

頃者喬轉。僕雖不預知。然部意亦非薄也。願執事且戢翼卑棲。翻飛固自有日也。難將之說。數年以來實聞之。蓋以馬趙宿將。一則屏棄灑亭。一則抑鬱而死。咸謂意出於執事。區區竊以前用執事於上谷。固以二將奉託。豈謂反陷之耶。故雖言者屢至。終不信也。今事亦已矣。願努力建立。以副鄙望。

張江陵全集 卷十九

# 張江陵全文集二十書牘

## 答薊鎮總督方金湖

夷酋既已悔罪乞哀。宜開其自新之路。公處之極當機宜。又因而稽覈撫賞一事。尤爲邊政實務。辱教領悉。

## 答河道總督王敬所

開河之策。議在必行。但以事體重大。且此中有言其費度七八百萬乃足者。豈其然乎。故請差科臣會勘。徒以息嗷嗷之口耳。此事先年諸臣亦知其便利。獨以艱大之任。憚於承肩。今公赤忠。身任其責。更復何疑。願堅持初意。勿奪羣言。其中事體。亦須詳慎。期在萬全無害可也。俟差官行。再當請教。

### 答兩廣總督殷石汀

別楮云云。其人亦素愛其才。故薦之於公。後乃知其狂躁險刻。矜已凌人。不可大用。故昨因其稱疾。遂決去之。然公自此更不必置之齒頰矣。廣右今已大定。聞西省自府江平復。道路開通。客旅無阻。梧州之鹽方舟而下。南交通貢。買遺有無。桂林遂爲樂土。此誰之功歟。蓋粵人今日始知公之不可一日去也。

### 答少參吳道南

辱教。款虜錄紀。獎借過實。且感且媿。別楮二將事。鄙懷久已洞然。往事不足深論也。此後願益務以善善人。爲國惜才。以充其與物一體之量。則目前道路自然開通。虎狼夷狄無不可處。何至齷齪疑慮。若無地自容耶。

## 答應天巡撫宋陽山

辱華翰。一一領悉。里甲經催投靠優免四者。正吳人受病處。然所以養成此病至沉痼而不可療者。實陳周二子爲之。今丈一旦砭之以精覈之石。投之以經制之劑。宜其苦口刺腸而不能堪也。然事極必變。勢窮斯通。吳中事勢已極。理必有變。今得丈稍稍振刷。使知朝廷法紀之不可干。上下分義之不可踰。汰其太甚。而無至於跋扈橫決。而不可收拾。則吳人尙宜尸祝公以報德。而可以爲怨乎。嬰兒不剃頭則腸痛。不擱瘞則寢益。然剃頭擱瘞。固不能止。嬰兒之不啼也。近來彼中人不獨側目於丈。且推本於僕。造爲橫議。欲以搖撼國是。如昨南余云云。意皆有所由來。故不得不創之。今上意已定。正論不搖。丈宜自審畫。無爲山鬼所惑。陳乞云云。決不能遂。徒多一番舉動耳。史周文卷已解部。訪知其中頗有造作。皆舊時胡衷二子爲之。頃者邵君止據舒王二道之查呈。而舒王亦不知爲贗也。然僕于此亦不敢刻意深求。今但有楮筆可據。即可藉手以爲

解脫之地。况其人已死。比之見在盜公帑爲富翁者有間。自宜從寬以處之也。

### 答甘肅巡撫侯掖川

西涼重地。番虜雜居。措畫稍差。便成乖阻。往嘉靖初年。賴建菴晉溪二大老。經略數年而後定。近廖公以節士之概。當邊闡之任。非其宜矣。比薦公於上。或有言公好以智自免。不肯任事者。茲奉翰教。措畫周詳。音旨慷慨。用智者固如是乎。且今英主御極。名實之辨。較若黑白。闡外之議。悉假便宜。不從中制。智者不以此時取旂常鍾鼎。更復何俟。以是知談者之妄也。

### 寄石麓李相公

不奉瞻對。五易春秋。諒翁念我。亦如我之思翁也。別後無可奉聞者。唯平生所與共許。委身致主之義。則不敢有一毫有負于久要。獨此庶可少慰尊懷耳。但弟以菲薄廻廊。

翔廟。而翁以重望獨淹留林壑。揆之古人彈冠之誼。殊用歉然。賢郎以庭闈念切。特假一差省覲。便中草草附候。別具侑柬。統惟鑒納。

### 答河漕舒按院

頃者議開泇河。特爲轉漕計耳。其於河政自有常規。民患何嘗忘念。淮揚士民乃遂謂朝廷欲置黃河於度外。而不爲經理。豈其然乎。大疏已下部議覆。

### 答應天撫院王古林

巡撫一方。將盜是除。而誘人爲盜。盜焉可弭。公職專整飾戎備。爲民除害。宜如鷹鷂之逐烏雀。又何畏焉。况今朝廷大明當天。幽隱畢燭。流言浮謗。舉不能行。亦自無可畏也。賤日厚禮。概不敢當。統惟覽亮。



答吳環洲

辱示虜情。宛若指掌。至謂虜酋假虛聲以要賞。邊將信訛傳以希功。二語深中時弊。今人可與籌邊事者。猶公與金湖公而已。與他人言。頗似說夢。雖識或不逮。亦有呆衷撒奸者。昨奉嚴旨督責。當無所容矣。

答山西撫院鄭範溪

前有貴戚自晉中來。言礦賊事。僕得因面奏寢一大役。公又因之解散其黨。俾地方寧靖。事機禍福之變。安有常哉。辱華翰。知已履任。甚慰。

答浙撫謝松屏言防倭

浙無倭患久矣。一旦聯舟突犯。必有勾引之奸。且地方安恬日久。驟尋干戈。恐無以待。

寇。幸激以忠義。鼓以賞罰。悉力一創之。庶將來不敢再窺。亟剿此寇。然後徐究其禍本而除之可也。浙人咸云謝公非用武才。恐不能了此事。僕曰不然。謝公沉毅有遠慮。賊不足平也。願公勉就勲庸。以副鄙望。

### 答應天撫院宋陽山言防倭

近年海寇息警。人心頗懈。僕竊以爲憂。故昨年擬旨申飭。賴公偉略起而振之。今果能一戰而勝之。不俟登岸而遏之於外洋。功尤奇矣。天下事豈不貴豫哉。慰甚。彼前鋒旣折。必不敢窺吳。禍當中於浙矣。黃副總乃僕武舉所取士。其人才志似亦可用。但負氣不能下文吏。若少假借而用之。或亦可當一面也。

### 答吳環洲論邊臣任事

適上諭詰本兵虜情虛實之由。卽日奉翰教讀之。旨哉其言之也。上谷得公。隱然如長

城。僕內奉宸扆。外憂邊境。一日之內。神遊九塞。蓋不啻一再至而已。奈何邊臣故套難改。鮮有爲國家忠慮者。而無識言官。動卽諫白。及與之論邊事。一似說夢。近有一科臣聞遼虛報。遂欲防守京城。浚濠塹。掘戰坑。以禦虜者。虜在何處。而張皇如是。使人悶悶。此疏若行。豈不遠駭聽聞。取笑夷虜。已奏上留中寢之。以泯其迹。孤子一身。無可與計事者。故每得翰示。輒說懌竟日。非喜其說之同已也。喜其有助于昏昧也。然不敢舉以告人。恐忌者遂仄目于公。乃知大舜隱惡而揚善。亦有不可行於今者矣。人臣不忠。人心不古。可歎。自今東西虜情。的有所聞。仍望密以見示。其中情變無常。亦不必定以今日所言爲是。所聞爲的也。僕求助之意。真切懇至。幸惟亮之。揭稿一紙寄覽。仍希擲還。近聞有瞽目愚術人在邊溷擾。妨有指稱假託者。幸卽擒治之。仍明示諸將士。僕從來不薦達此輩。勿爲所誑也。

答陝西督撫石毅菴

沙麻之事。雖由於二將不和。軍心不一。然自古未有千里襲人。越險無繼而能成功者。今其事已結。似難中止。然亦須沉機審發。期于萬全。固不必期效于旦夕也。今之時政。與先年異。公受分陝之寄。凡事當守便宜。謀定而後發。亦不必汲汲求解于羣議也。

### 答二邊總督論番情

石公前爲宋御史所窘。急于圖功。以解羣議。遂輕用弗詢之謀。遽爲掩襲之計。致損威傷重。殊可恨惋。大抵西之番族。廣之瑤獞。事體略同。狐鼠鼯鼯。潛伏叵林。穴居險阻。非可以力勝者也。制禦之法。惟當選任謀勇將士。修險阻。明烽燧。責成近邊熟番。遠爲哨備。厚其賞給。約束沿邊軍人。無容勾引番人交易圖利。有警務先覺。預備奮勇追逐。必令挫折。則熟番皆畏威懷德。而生番自不敢犯。今不思以計勝之。而輕用不教之兵。深入嶮岨之地。雖微二將之隙。亦鮮有不敗者。此事在軍門爲近。撫臺隔遠。難於調度。可語石公前事已如此。須慎重審發。不可以嚴旨責成。人言旁指。遂爾惶恐。復爲輕動。目

今天暑。草木蒙密。道路崎嶇。恐難進兵。總兵人馬亦不須西駐。枉費糧餉。且只守險設伏。以待不虞。責罪熟番。發其陰私。誘以厚賞。爲我哨守。待秋冬水凍林疎。然後相機進取。或明出以示兵威。或掩襲以攻不備。必有奇道。乃可制勝。然但一創之。以洩邊人之憤足矣。固不能草薙而獸芟之矣。聞番人恃茶以爲命。須嚴土人通番之禁。使私茶不得出。則我得制其死命。至於番功之賞。不過數金。誠爲太薄。今宜比照倭功例。稍厚其賞。庶人肯用命也。凡此皆書生遙度之言。未知果當機宜否。漫附以備採擇焉。

### 答按院陳公文衡覈事實

辱教。其人乃前院論劾。今但當察其事之實否。不必問其曾得罪於何人也。諸葛孔明云。吾心如秤。不能爲人作輕重。僕亦非薄。謬膺重寄。事無大小。必默告於天地祖宗列聖而後行。豈敢以己意爲輕重哉。

## 答少參吳道南

以善養人。與物一體。皆執事所習聞者。衣中繫珠。不尋自獲。富家乞子。忽復來歸。滿中七寶。受用無量。在執事自取之耳。盟諸我不若自盟之爲切也。

## 答督撫張崐峽

往公以太君思歸。奉輿西返。僕所以不阻者。亦欲因此息忌者之喙耳。今公論已定。以素所負著。屬休明之會。不於此時取旂常鍾鼎。更復何俟。且棄瑕雪垢。不避嫌忌。而薦賢者惟僕爲然。後之人或不如是之愚也已。大疏部已報寢。幸卽戒途。以需簡畀。

## 答石麓李相公

忝來。辱翰貺。深荷雅情。及備詢起居萬福。復慰懸仰。弟自首事以來。於茲四稔。碌碌無

以自效。所賴主德日明。官府清肅。百司奉職。邊陲少警。一二黠肆干紀者。咸就誅夷。仰惟宗社闡靈。孚祐聖主。而弟以淺薄。會逢其時。優游苟祿。竊餘榮以自被。殆有幸焉。顧值休明之會。俾耆德碩望。遺置在野。不能引薦。深用媿嫌耳。賢郎請告。謹遵命屬。所司覆行。別具侑束。統惟鑒存。

### 答閩撫劉凝齋

林誠旣已入穀。果不出閩人得之之料。喜甚喜甚。但當其時。卽宜少出閩師以助之。夷情多變。恐賊圍久。或生他計。諒此時成敗已決定。傾耳以俟捷音。

### 答雲南巡撫王毅菴

辱示。知旌節已入滇視事。欣慰。儂賊事旣原無大故。自宜相機撫處。黠鼬狐狽之區。得其地不可耕。得其民不可使。因俗爲制。使不爲大害而已。何爲輕動大衆以事無益耶。

簡靜行事。協和總戎。此二言者。望公終納之。前院舉劾。殊可笑。該科亦有劾疏。通俟事寧併處也。

### 答督撫吳堯山

往奉別時。記公有不薄南遷之語。故以借重。然亦暫處耳。憶昔悠悠之談。若謂僕有所不足于君所者。今公視鄙心。何如哉。大疏既不獲請。簡書有嚴。幸過發仙舟。以副輿望。

### 答省中羅涇論士風

僕自受事以來。惓惓勸喻。今士大夫務以忠肝義膽事君。誠心直道相與。近雖稍變舊習。而餘風未殄。執事謂外吏猶事趨謁。篤虛文。誠然。所示二縣令。以卽投之囊中矣。讀華翰。具見留心民事。詩曰。人之好我。示我周行。執事有焉。敬拜以受。



### 答河漕劉百川言開膠河

膠河之可開。凡有心於國家者皆知之。獨貴鄉人以爲不便。皆私己之言也。讀大疏。具見忘私徇國之忠。已奉旨允行。又承教鳳竹公肯身任之。猶爲難得。今卽以屬之。漸菴亦曾有書云。開泃口不若疏膠河。故宜與之會同。且委用屬吏。量派夫役。亦必借其力以共濟也。至於一應疏鑿事宜。及工費多寡。俱俟鳳竹公親履其地。次第條奏。其河道官屬錢糧。俱不必與之干涉。以破其棄河不治之說。庶浮言不能興。大事可就也。

### 答河道徐鳳竹

膠河之可開。凡有心於國家者皆知之。乃竟爲浮議所阻者。其端有二。一則山東之人畏興大役。有科派之擾。又恐漕渠一開。官民船隻乘便別行。則臨清一帶商販自稀。此昔年之說。一則恐漕渠旣開。糧運無阻。將輕視河患而不爲之理。此近年之說也。凡此

皆私己之言。非公天下之慮也。今當決計行之。無事再勸。僕嘗念此。惟以不得任事之人爲慮。昨奉百川公書。公雅不辭勞。審爾大事濟矣。已卽面奏於上。特以屬公。前得山東撫臺李公書。謂開泃口不如疏膠河。意與公合。故宜會同。且委用屬吏。量派夫役。亦必借其力以共濟也。諸疏鑿造船事宜。及工費多寡。俱俟公親履其地。一一條奏。其河道官屬錢糧等項。俱絕不與之干涉。以破其棄河不治之說。庶浮言不興。大工可就也。夫世必有非常之人。然後有非常之功。然又必遇非常之時。而後其功可成。故曰非常之原。黎民惑焉。今主上英明天啓。志欲有爲。而公以非常之才。適遘此時。可不努力以建非常之業乎。大功克成。當虛揆席以待。

### 答山東撫院李漸菴言吏治河漕

辱華翰。所示具盡事理。讀之無厭。竊聞致理之要在於安民。欲民之安。責在守令。今主上年雖冲幼。已知注心邦本。然而上澤未能下究。下隱未能上通者。則以吏治欠覈。而

飢權撓法之豪。詭銜竊轡之奸。鯁乎其中故耳。易封頤中有物必嚙之而後合。故今振舉綱維。精覈吏治。章之以雷電。懸之以象魏。要在嚙其物。去其鯁。使上澤得以下究。下隱得以上通而已。二州佐旣堪其任。何愛兩知縣而不以勸天下之能者。且提調學校。特縣令下事耳。當此罷邑民致死不贖。奚暇治禮義哉。况上有府佐。下有學官。歲時考校亦自不妨也。驚僣誠爲弊政。昨計部稍去太甚者。然未能盡拔根株。俟一二年後。將鹽法屯田經理就緒。內外儲蓄少充。當盡罷之。考成一事。行之數年。自可不加賦而上用足。今計開納所入。歲不過四十萬。稍加劑量。致此固無難也。向承教膠河事。時方議鑿泃口。未遑論也。今泃口旣罷。劉徐二司空復議及此。適與公議合。故特屬之。望公協恭熟計。共濟此事。僕以淺薄。謬膺重寄。主上虛已而任之。自受事以來。晝作夜思。寢不寐。食不甘。以憂國家之事。三年於此矣。今朝廷大政。幸已略舉。惟漕河宗室。未得其理。宗室事鉅。不敢輕動。尙當有待。漕河則宜及今圖之。了此一二大事。僕卽納筦鑰。稽首歸政。乞骸而去矣。千金之裘。非一狐之腋。所望海內英哲。共助不逮。

## 答薊鎮總督方金湖

順義饋馬。效順彌堅。真朝廷之福也。書中言守邊五年。欲乞賞賚。似亦可從。俟其貢市畢。可爲之一請。僕所酬一如去歲例。俟其至邊與之。

## 答滇撫王毅菴論夷情戒多事

滇中自嘉靖以來。屢嬰多故。其初皆起於甚微。而其禍乃至於不可解。窮荒絕徼之外。得其地不可耕也。得其民不可使也。而空費財力。以事無益。使無辜之民。肝腦塗地。不仁哉。前人之所爲乎。今仗大略撫定。造福於遠人多矣。此後惟一務安靜。嚴禁軍衛有司。毋貪小利。逞小怨。以騷動夷情。則可以高枕臥治矣。辱示。曲盡彼中事理。嘆服。綿紙既可用以題奏。何不可爲書柬乎。外雲南歲貢金。舊皆一次解進。今分兩次。似爲煩費。此後若辦足。仍作一次解進如何。惟裁酌之。

答甘肅巡撫侯掖用

甘肅開市已奉諭旨。悉如所議。其中有難遙度者。公自以便宜行之。務令事久邊境獲安而已。市場似宜稍西。去西寧太近。則啓賓兔壟斷之心。去我邊太遠。則迂邊民交易之路。春市虜馬瘦弱。強爲之市。終不便也。統惟裁酌。

答列卿楊本菴

向承以令先公隧銘見屬。媿不能文。又冗甚。故遷延至今。無創雖不足以發揚令先公之盛美。然道僕平生所與令先公同心許國之誼。則實無一字不出於肺腑也。百世之下。考古尙論者。必將有徵於斯言。辱惠佳帳。祇領。餘不敢當。輒璧諸使者。

答山東巡撫李漸菴

膠河之議。非一日矣。咸以謀多築室。人鮮同心。故幾成而罷。今幸劉徐二公發端任事。公與商道長協心爲國。底績之期。可以預必。乃知就大圖艱。固有時也。所示疏浚道里。宛在目前。若如陳君所呈。更爲徑易。不知按視何如。徐公有來期否。

### 答總督方金湖

順義酬幣。既不中格。謹領入聞。今歲各路貢市。比之昨年。尤爲斂戢。足徵虜效順之堅。公籌略之遠也。慰甚慰甚。陳子論張參議。詳其語意。似非至公。而銓部不待巡撫之疏。輒與題覆。亦非事體。故昨旨以議擬不合爲詞。下巡撫再勘。實駁之也。繼得華翰及鄭公疏。則多惜之之語。乃知再勘之旨。於事理允當。如有枉誣。宜與昭雪。明主懸衡以運天下。如日之照臨。是非賞罰。惟一付之至公。不宜依違兩可之詞也。

### 答河道徐鳳竹

承華翰。知道從已臨東土。無任欣慰。大疏下所司一一覆允。此事甚鉅。費必不貲。今欲爲國家建萬年之利。寧敢借費。但齊魯之人甚不樂興此役。以近旨嚴切。雖不敢明肆阻撓。乃其心則終不以爲然。故凡言此事。必幾萬幾十萬而後可舉者。未可遽信之也。公宜與有心計誠心爲國者熟圖之。近來朝廷之上。事事精覈。凡有興作。比之先年。率費半而功倍。則虛實不同故耳。願公計慮審定。然後次第請旨行之。

答司馬王西石

張主簿人來。辱翰教。深慰遠懷。向者之處。惟欲曲遂高志。然於僕本願終違。蔽賢之罪。終不可道也。學須到形不愧影。此聖門教人慎獨之功。此工夫最難。以公高明。自能徑造直詣。如僕淺劣。因公之教。亦益加深省也。陽山光明磊落。初時吳人甚不便之。近返感慕稱頌。蓋至誠未有不動者。遂左頃復報大捷。雖斬馘止二百有餘。然奔溺於河者其衆。河水爲之不流。盡棄輜重而遁。所鹵獲駝馬器物。不可勝計。足以紓邊人之憤。而

寒旃裘之膽。真大快也。諒公所欲聞者。謾以附入。講章先刻完者附覽。

### 答閩撫劉凝齋

屢辱翰示。及別楮所云。一一領悉。頃聞有貴恙。無任懷念。想勿藥矣。近據閩廣所報賊形。皆潰亂奔竄之狀。鳳賊似不在其中。斃於呂宋之說。恐不虛也。果爾。皆閩人之功。若非遣諜行間。彼番人安肯殲之乎。今想已有的耗。傾耳以俟捷音之至。

### 答兩廣督撫凌洋山

辱華翰。知己榮代視事。無任欣慰。前閩中屢報鳳賊爲呂宋番人圍困。何得突犯廣中。據報賊形若潰亂奔歸者。鳳賊恐不在中。幸公細察之。若此賊果在。其衆旣散。必成擒矣。羅盤賊旣已奏聞。勢不能已。但須審計熟圖之。昨部覆又推原題未盡之事。似亦可行。大約廣中武備不可一日弛。與內不同。振軍聲。伐不服。以鎮壓蠻夷之心。有不能一



付之安靜者。惟公裁之。

### 寄趙大洲相公

賢郎謁選。辱華翰。深荷遠念。僕以孱弱。謬膺重任。每懷將伯之助。莫挽東山之轍。側身西望。惆悵而已。所幸主德日新。精勤問學。宮府清宴。方內乂安。此九域簪紳之侶所共欣躍而稱慶者也。翁素抱忠耿。知在林里。未忘朝廷。故謾以奉聞。賢郎圖差歸省。便此附候。別具奏稿一部。圖說一部。及薄幣二端。侑束。統惟鑒原。

### 答劉虹川總憲

天下事有欲速而返遲。求得而願失者。公是也。公昔在鄖臺有惠政。無端被誣。世所共惜。薦言屢至。召用有期。公乃急於求進。若不能須臾少竅者。異時撫臺有缺。僕卽以公屬之銓衡。乃當事者對言。此公才信可用。獨無奈其竿牘頻仍。本部以是引嫌。不敢用。

之。而僕自是亦默然慚阻。不敢復言公事矣。此非所謂欲速而返遲。求得而顧失者乎。方今明主在上。方博蒐賢雋。以興太平之治。僕之求士。甚於士之求己。雖越在萬里。沉於下僚。或身蒙訾垢。衆所指嫉。其人果賢。亦皆剔滌而簡拔之。其爲賢者謀也。又工於自爲謀。公聞之。往來之人。豈不誠然乎哉。胡乃不以賢者自處。以待僕之求。而用市道相與。餽之以厚儀。要之以必從。又欲委之於私家。陷之以難却。則不知僕亦甚矣。古人言非其義而與之。如寘之壑中。誠不意公之以僕爲壑也。以公夙所抱負。又當盛年。固時所當用者。此後闔門養重。靜以俟之。弓旌之召。將不求而自至。若必欲如流俗所爲。舍大道而由曲徑。棄道誼而用貨賄。僕不得已。必將言揚於廷。以明僕之無私。則僕旣陷於薄德。而公亦永無嚮用之路矣。是彼此俱損也。恃在夙昔至契。敢直露其愚。惟公亮而宥之。幸甚。

### 答督撫吳環洲言敬事後食之義

辱翰示。一一領悉。卽屬本兵爲之曲處。但有功必敘。有勞必酬者。朝廷厚下之仁。敬事後食。先勞後祿者。人臣自靖之義。若銖銖兩兩。計功程勞。以責望於上。似非所謂懷仁義以事君者也。僕以菲薄。待罪政府。每日戴星而入。朝不遑食。夕不遑息。形神俱瘁。心力并竭。於國家無尺寸。然自受事以來。力辭四廕。獨守舊官。每一蒙恩。輒夔夔慄慄。不能自寧。非矯也。誠以國恩難報。而臣子雖鞠躬盡瘁。不過自盡其所當爲。本無功之可言也。公所欲爲諸君處者。自見鼓舞用人之道。而區區所云。似亦爲人臣之所當知也。冒昧吐瀝。惟高明采之。

### 答兩廣凌洋山

閩中撫按有書至。甚以廣議招撫爲非。此固一隅之論。然亦宜審觀賊勢何如。據前所報。鳳賊似未必在其中。若果係殘黨入境。又未肆殺掠。則招而分北之。事理當然不爲失策。若賊首尙在。敢行侵掠。則宜與閩帥夾剿之。今不揣賊情強弱向背。而執言撫剿。

皆偏見也。今想已大定。人旋。附布區區。

### 答薊鎮巡途

頃遼左之功固奇。然本之以公密報。土酋東犯的耗。僕因而傳示該鎮。潛形而預待之。故有此捷。論其發蹤之功。公宜首敘。顧僕於此不敢冒竊。遂使大功不彰也。

### 答隴右大參李冀軒

辱華翰。得悉隴右事情。甚慰懸慮。番賊事不專在用兵。貴於善處。古人有以一介之使。當十萬之師者。當機故也。蘭州倉場稍弊。不獨寄貯民間。殆并民間所貯者。亦爲虛數。官司積棍。與奸商相通。冒領官銀。並無糴易。每有調遣。則賄囑將官量以布米等物給軍。隨卽銷除。以一日爲二三日者有之。以一千爲二三千者有之。蓋其弊久矣。茲旣清查重處。乃振弊維新之會。凡有所當行者。計處已熟。可呈詳督撫題奏。庶該部便於議

覆也。

### 答傅諫議

往者別時。曾以守己愛民四字相規。故屢辱厚惠。俱不敢受。蓋恐自背平日相規之言。有虧執事守己之節。而執事乃屢却不已。愈至愈厚。蓋以區區爲嫌少而加益耶。至於腰間之白。尤爲殊異。顧此寶物。何處得來。恐非縣令所宜有也。謹仍璧諸使者。若假之他人。可令返趙。執事從此亦宜思所以自勵焉。

### 答河道徐鳳竹

膠河已有成議。雖費亦不敢惜。其中疏濬事宜。及調用有司等項。俱聽便宜處畫。一毫不從中制。乃聞近爲羣議所苦。頗悔昔者建言之爲易。審爾則此事難以望其有成矣。僕聞疑事無功。疑行無名。明主方勵精圖治。詢事考成。豈直以未定之議嘗試朝廷哉。

神禹大智。猶必親乘四載。遍歷九土。至於手足胼胝。而後能成功。方其鑿龍門之時。民皆拾瓦礫以擊之。蓋衆庶之情。莫不欲苟安於無事。而保身自便者。孰肯淹留辛苦於泥塗橫潦之中。此衆議之所以紛紛也。願公主之以剛斷。持之以必行。心乎爲國。畢智竭忠。以成不朽之功。凡粘滯顧忌。調停人情之說。一切勿懷之於中。又親歷工所。揆慮相度。分任責成。若憚勞不親細事。徒寄耳目於人。則紛紛之議。將日聞於耳。雖勉強圖之。亦具文而已。決不能濟也。幸公孰圖之。若果未能堅持初意。恐拂衆心。則亦宜明告於上。以謝昔建議之爲非。而後重負可釋耳。此國之大事。不敢不盡其愚。幸惟鑒宥。

張江陵全集 卷二十

天

# 張江陵全集卷二十一書牘

## 答應天巡撫宋陽山

去歲海洋之捷。誠爲奇勩。榮晉一秩。未足爲酬。尙當有崇擢焉。辱示諸款。手續數過。俱見鴻猷。驛遞一事。近例頗嚴。人似無敢犯者。大抵爲政必貴身先。頃小兒回籍。應舉自行願倩。昨冬遣僕歸蠹老親。身負儀物。策蹇而行。蓋不敢身自犯之也。目前民困已覺少甦。數年之後。積餘必多。用以糴穀備賑。誠善政也。織造事值浙中亦有疏陳乞。故司空不敢減此益彼。姑以料價抵補。然此旣分四運。則目前已自足辦。一二年後。公私稍舒。了此似亦無難也。細觀別冊。向來夙弊。釐革殆盡。估價亦與近日言者迥異。足以見丈於諸事。靡不罄竭心力矣。優免核則投靠自減。投靠減則賦役自均。數言已盡。查完停妥。宜卽具題施行。水利之責御史。昨凌洋山始建此議。僕固以爲未便。乃渠則堅求必遂。故黽勉從之。今奉教信爲冗設也。巡鹽之理漕。徒增文移煩擾。僕差官時酌損之。



### 答總兵戚南塘

適會本兵譚公。問足下與閱視大匱相見之禮。云宜如總理之見督府可也。竊意今日當以欽命爲重。不在兵銜之有無。謙以自處。見者自然悅而敬之。其差去郅公。當預爲足下先容。必加優禮。決不以庸衆相待也。

### 答閩撫劉凝齋

閩師千里赴雖。雖無所獲。猶當論功。况斬馘黎丹灼然耳目者乎。廣人欲來招撫之議。忘大德而逞小忿。曲有所歸矣。聖明遠見萬里。功罪賞罰不爽秋毫。本兵已覆勘事。幸公勿以爲介。但鳳賊存亡。尙無的耗。仍望公之留意也。

### 答松谷陳相公

伏承台翰。腆貺捧讀再四。如坐春風。不知燕蜀遼闊也。備諗起居清勝。身處雲林。望隆朝野。慰仰慰仰。不肖猥以淺劣。謬膺重任。顛蒙之見。竊以爲既受國重託。宜以死報。故二三年間。諸所措畫。惟以振紀綱。剔瑕蠹爲務。以是見怪於流俗。本之德薄位尊。力小任重。其見詆誣。非不幸也。卽欲引決乞骸。以主恩深重。昔所許於先帝者。尙未克酬。故復覩顏就列。屯難之際。思我同心。恨不卽弋冥鴻。招翔鳳而致之廊廟也。

### 答奉常陸五臺論治體用剛

往丈起山中。不一歲而躋九列。僕日夜引領望丈之一至者。以丈素有超世之識。知僕所以肩鉅承艱之心。爲能疏附後先。以共濟艱危也。乃讀前後手翰。所以教僕者。則亦未越於衆人之見。而與僕之孤耿大謬也。丈前書謂僕處余懋學。傅應禎爲太過。恐失士心。後書謂救劉臺爲盛德。至引文潞公之事以相比。今海內簪紳之侶。投柬於僕者。十九爲此言也。然皆衆人也。豈意有超世之識。又知僕所以肩鉅承危之心。而所見乃

亦止此乎。古之賢聖所遇之時不同。而處之之道亦異。易大過棟撓彖曰。剛處乎中。當大過之時。爲大過之事。未免有剛過之病。然不如是不足以定傾而安國。棟撓而本末弱矣。伊周當大過之時。爲大過之事。而商周之業賴之以存。雖剛而不失爲中也。僕以一豎儒。擁十餘齡幼主。而立於天下臣民之上。威德未建。人有玩心。况自隆慶以來。議論滋多。國是靡定。紀綱倒植。名實混淆。自僕當事。始布大公彰大信。修明祖宗法度。開衆正之路。杜羣枉之門。一切以尊主庇民。振舉頽廢爲務。天下始知有君也。而疾之者乃倡爲異說。欲以仰損主威。搖亂朝政。故不得不重處一二人以定國是。以一人心。蓋所謂剛過乎中。處大過之時者也。而丈乃以爲失士心。誤矣。吾但欲安國家。定社稷耳。怨仇何足恤乎。至於潞公之事。亦復不倫。蓋潞公所事者長君。而其出處去就。未必係宋室之安危。子方狂妄後生。獨持饋錦一事。以議論前輩。此其失在於不知賢耳。故潞公得以包容之。僕今所處何時也。主上舉艱鉅之任。付之於眇然之身。今權璫貴戚。奉法遵令。俛首貼耳。而不敢肆。狡夷強虜。獻琛修貢。蹶角稽首。而惟恐後者。獨以僕攝持

之耳。其出處去就所繫。豈淺淺哉。彼讒人者。不畏不愧。職爲亂階。且其蓄意甚深。爲謀甚狡。上不及主上。旁不及中貴。而獨剗刃於僕之身。又無所污穢。而獨曰專擅專擅云云。欲以竦動幼主。隱間左右。而疑我於上耳。賴天地宗廟之靈。默啓宸衷。益堅信任。不然。天下之事。豈不爲之寒心哉。自有此事。主上食不甘味。寢不安席。以痛恨於忌者。蓋大舜疾讒說之殄行。孔子惡利口之覆邦。故去其人以安僕也。以安社稷也。離明允斷。誠理法之正。而僕所以懇懇救之者。蓋以仰答聖恩。下明臣節耳。非欲爲沽名之事也。而丈乃以潞公見風。誤矣。僕一念爲國家爲士大夫之心。自省臆誠專一。其作用處。或有不合於流俗者。要之欲成吾爲國家爲士大夫之心耳。僕嘗有言。使吾爲劊子手。吾亦不離法場而證菩提。又一偈云。高崗虎方怒。深林蟒正嗔。世無迷路客。終是不傷人。丈深於佛學者。豈不知此機乎。夫士屈於不知己。而伸於知己。今海內縉紳之侶。爲此言者甚衆。僕皆遜而謝之。乃於丈曉曉不已者。以丈有超世之見。知僕所以肩鉅承艱之心者也。讀禮有暇。試一思之。倘再會有緣。尙當刮目相待。

### 答河道吳自湖

惟公遵養林泉。望懸朝野。僕所欲推轂者屢矣。咸爲忌者所阻。今乃得遂初心。然猶恨其不早也。淮揚之民。歲苦昏墊。朝廷未嘗一日忘。顧莫有任其事者。茲讀大疏。明白洞徹。底績可期。夫治水之道。未有不先下流者。年來但講治水。不求治海。雖費何益。但海口之淤。當必有因。似宜視水必趨之路。決其淤。疏其窒。雖棄地勿惜。礙衆勿顧。庶幾有成也。設官及留餉諸事。一一如教。屬所司覆允。惟公堅定而審圖之。

### 答兩廣凌洋山計劃羅盤寇

羅盤淥水之事。石汀公在任不能處。乃諉難於後人。誠爲不恕。然此地不沾王化數十百年。義所當討。在公誠不容使之跳梁於臥榻之前也。但須審圖而後動。動而必勝。勝而無損。乃爲萬全。不然。又不如姑置之之爲便也。

## 答河漕王敬所

人有自邊來者。言公按行部中。簡靜清肅。邊人咸不知有命使之至。詩不云乎。蕭蕭馬鳴。悠悠旆旌。之子于征。有聞無聲。公之謂矣。慰仰慰仰。淮揚水患之旨。蓋欲激發吳公。使之殫力以從事也。朝廷方有事東方。而江淮之人。咸謂僕止以運道爲急。將視河害而不救。故以此默解之。自公振新漕政。萬艘飛渡。京庾充盈。卓哉偉績。孰得而掩之。豈以此一事未了爲恨哉。且不必出於己。公所未就而吳公成之。則亦公之功也已。辱教似未達。僕所以作勵時賢。共熙帝載之意。故略述其概以復。惟公裁亮焉。

## 答兩廣督撫計剿海賊

往者潮州主撫賊之議。聞人深有憾於金大參。科中遂加抨劾。僕竊以廣中之處。不爲失策。乃告銓部本兵。言金君必不可動。動則後來任事者皆恫疑首鼠而不敢爲矣。然

林鳳之見。創於呂宋。實閩人之謀。彼以大兵逐此敗殘餘黨。欲盡殲之海中。以爲功。而廣中乃一舉而收之。其致憾固宜。今惟行廣人之策。收閩人之功。則處置適宜。彼此俱得矣。銓部本兵以僕之言爲然。遂用此意題覆。今讀大疏。詳觀前後事理。果如僕言。其中措置。皆極允當。蓋昔年撫賊。率要求善地安插。蜂屯蟻聚。列兵自衛。在我常懷肘腋之虞。在賊常懷反側之意。養癰待決。誠非計也。今則隨地分北。解甲賣刀。因其求生之誠。解此三面之網。將使賊黨聞之。孰不懷我好音。變其佚志。故廣中之策是也。然觀金君所與閩人往來文移。頗覺動氣。楚固失之。而齊亦未可爲得。此氣質之小疵也。卽欲取此新績。復與舊官。但閩中勘功疏尙未至。若先處之。重激閩人之忿。故行並勘。幸促勘者速報。庶便處分也。羅旁事宜。審定而後動。期於萬全。乃可。貴屬司道有司賢否。訪據的實者。幸另開手書密示。

與雲南巡撫王凝菴

高金宸先已題奉欽依准襲矣。外嘉靖間曾聞雲南有積貯銀百萬兩。世宗欲取用。而方礪菴執言該省常用兵事。宜以待用。不知此項銀何年存剩。今尙有否。卽查覈見示。餘不悉。

### 答應天巡撫論大政大典

辱別楮所云。一一領悉。安慶軍餉。及三府糧疏。俱下部覆允。馮塞二君。屬部優處。政府人人言惡。吳中士夫賴糧之說。似別有所指。不爲丈也。異時每聞存翁言。其鄉人最無天理。及近時前後官於此土者。每呼爲鬼國云。他日天下有事。必此中倡之。蓋謂朝廷之政令。不能行於此地。而人情狡詐。能忍人之所不能忍。爲人之所不敢爲故也。此等言語。豈亦丈告政府耶。願秉道自信。毋惑流言。以終令聞。丈向移駐句容。議者咸以爲多事。近更喜其安靖。蓋用度節。則里甲無徵收之擾。趨謁省。則驛遞無供億之繁。故上下自相安耳。喜甚。今驛遞一事。在東南不知何如。畿輔諸郡。十減六七。行旅初覺不使。



近來亦頗相安。若小民歡呼歌誦。則不啻管絃之沸溢吳。且此項錢糧貯積甚多。將來裕國足民。更不外索。卽此一事。餘可類推。以今全盛之天下。爲國者肯一留意於此時。修明祖宗法度。精覈吏治。能否由此富國富民。興禮義。明教化。和撫四夷。以建萬世太平之業。誠反手耳。大抵僕今所爲。暫時雖若不便於流俗。而他日去位之後。必有思我者。蓋僕之愚。無有一毫爲己之心。故耳。祖墳事。嘉靖間。王戶侍亦曾疏請。後竟以無據報罷。竊思此事。在聖祖時已屬茫昧。夫以聖祖之永孝。豈遽忘其先世。殆必有不得於心者耳。今去二百餘年。復何所憑而修復之。且此事不在疑似之間。如以爲真。則非有司少牢之禮所能享之。又豈可以社屬待之。如其非真。則此纍纍荒塚。祀之何爲。僕嘗以我聖祖之不冒世族。不深求先世窈冥之跡。不諱言身世艱窘之狀。皆神智達觀。度越前代帝王遠甚。今日之事。似只傳疑可也。鄙見如此。惟高明裁之。

答河道吳自湖

混江龍之制。昔曾聞之。近以河政廢弛。人不知用耳。頃屬所司題覆。通行河道衙門一體製造。

### 答楚撫陳文峯

辱示。公安諸邑。連歲昏墊。生理蕭疎。昨蒙加意賑恤。頓回春意。今民力雖困。猶賴父母孔邇。橫恩溢澤。亦不過徼於臺下也。郡侯才守俱優。向以初任。銳於有爲。頗失上官之意。今則久而愈孚。令聞休洽。昨已特懇之向院。諒在彀中矣。荊州二衛班軍。分番往戍。誠於守禦有裨。已下部覆允矣。昨曾確菴來。言公舊僚。意頗相左。大非所望。或意見不同耳。願公且恢涵之。

### 答王敬所

辱示邊無諸款。皆切中機宜。事竣亦不妨條議上聞也。又承別諭云云。謹逐條手復。納

還記室。不另具復。以示不敢泄。此後有要務。請手翰密示。口授非宜。

### 答河道潘印川

惟公雅望宏猷。久切傾嚮。昔者河上之事。鄙心獨知其枉。每與太宰公評隲海內佚遺之賢。未嘗不以公爲舉首也。時屬休明之會。正宜亟時建立。用展素蓄。乃猶盤桓引却。殊乖所望。大疏已下銓部議覆。雅志恐不得遂。幸過發征磨。以慰輿望。厚儀概不敢當。謹以璧諸使者。

### 答操江王少方

江洋獲盜。事關王印。自合上聞。鄙意以爲盜賊已獲。可從寬處。不意主上覽疏中縛王刼印語。赫然震怒。面諭重處。區區從容解譬。下部議覆。上意以部覆撫按。罰治爲輕。區區又委曲議擬。乃薄得譴。蓋主上恆以冲年惡人之欺己。故以失事爲可道。而以隱慝

爲深罪也。人旋草草附復。其詳容另悉。

### 答河道吳公桂芳

淮陽之民。方苦昏墊。披髮纓冠而救之。猶恐不及。豈能豫憂運道之難處耶。今且拯此一方之民。從容講求。平江遺蹟。爲國家經久之圖。今內外儲積。幸已漸裕。法紀漸張。根本漸固。此等事他日自有賢者任之。公毋慮也。

### 答總憲吳公

盜劫官銀於會城之外。本非細故。但人贓已獲大半。公亦參論無隱。自當請旨從寬。然諸未獲者。猶宜速爲詰捕。盜者必獲。獲而必誅。則人自不敢爲矣。

### 答總憲胡公邦奇

辱別教云云。深荷至愛。前王操江亦曾以尊意告僕。而僕不以爲慮。蓋僕素以至誠待人。絕不虞人之傷己。至於近日之事。則反噬出於門牆。怨敵發於知厚。又適出常理之外。無所容於防也。古云。寧人負我。無我負人。况窺親平等。悉歸幻妄。今轉盼之間。已成陳迹矣。何足掛之懷抱乎。然感念厚心。中意藏之。

### 答操江王少方

四月二十六日五月二日二書。先後俱至。一一心會。不能悉答。滁洲鎮江二事。部覆悉如疏議。近來江防外雖鋪設可觀。內却空疎無實。此言切中時弊。蓋不獨變江防爲爾然。昨江西浙江二事。明旨森然。此後卽欲推諉粉飾。恐亦難矣。安慶軍餉。部議執前已覆。定不肯再更。然陳君之意爲長也。陳君昨考察疏亦佳。區區素知君後。當優處。聞有馬驚。頃想全愈。曾司馬近亦小恙已痊。小魯乃翁訃音至矣。允兒頃歸。一役一馬。皆自行願倩。併未敢令有司知之。

## 答巡撫鄭範溪

辱示虜情具得其真。今計惟當急圖自治。以觀其釁耳。張憲副之被論。人皆以爲枉。當時言者殆有所承望。彼時公似不宜與之會同。蓋是非之在人心。自有不容枉者。豈可徇人以爲毀譽哉。頃科中復有言者。要當請聖斷行之。

## 答應天按院舒念庭

辱示內廖守備事。已卽達之於內。言公治其違法之人。乃所以相成。而非所以相病也。其意良解。然以僕虛心論之。此輩在今日。比之先年。已爲斂戢。苟不至於太甚。似宜放寬一着。以養其爲善之意可也。惟高明裁之。

## 答薊遼總督方金湖

辱教領悉。近來東虜垂涎於貢市之利。陰與青酋交通。攜市於宣府。而明擾遼左。求爲市。故宣府之馬歲增。而遼左之患日甚。職此故也。遼人素稱忠義可用。然近亦罷敝。非用薊人助之。不能支也。顧薊鎮隔閩。三衛出塞不便。又迫近陝京。防禦爲急。必斥堠嚴明。偵探的實。知賊嚮往。乃可出他道用奇以制之耳。此意前已屢語薊人。尙未得策。承教當再申徹之。聞那吉給台吉俱親至邊。此來想彼亦有意。宜厚遇之。俺酋老矣。黃酋窮蹙無賴。虜中之勢。在此兩人。須常與之氣脉相通乃可。大約虜情只要渙之。無令得合而已。

### 答鄧範溪

張少參之事。言者明係承望搜求。公爲之昭雪。乃是非之公在人心不容泯者。奈銓部固執前說。又追論其平生。此其意不可知矣。僕欲請旨駁議。又思於該部體面大有所損。不得已詎勉從之。然僕心知張君之枉。今雖暫屈。後猶可伸也。公前雖與按院會論。

而其語亦自不同。今奉旨再勸。豈得不據實具奏。但求是非之不枉。何嫌前後之異詞哉。今朝廷之上。功罪賞罰。如鑑之虛。如恆之平。公但自信此心。秉公任直。紛紛之言。不足爲意。况朝廷又自有公論哉。

### 答遼東巡按沈鶴石

辱示領悉。順義所求。督府已傳鄙意止之矣。虜情不常。宜隨機應之。要當待以至誠。要以盟約。則貢市必可久而不變。安邊禦禦之策。無踰於此。書生不達時務。難與言也。外貴院帶管學校。近給有新勅。宜令人領去。以便行事。

### 答薊遼總督楊晴川

庸將輕率寡謀。損威辱國。死不足惜。但古北口要地。素稱險峻。乃賊至數十人。踰垣而入。肆其侵掠。而守者不知。則置兵設險。俱屬無用矣。且賊初意止於侵盜。原非設伏誘



我者。宗儒之出。從者百餘人。使人人致死。未必便爾覆敗。乃從者見賊先奔。遂致主帥陷沒。觀此舉措。將來之事。深屬可憂。轉盼秋防。僕寢不安席矣。今且先絕賊酋撫賞。諭令縛獻首惡。如處王杲事。從容相機而行。急則恐生他患。其守臺守口及棄將先奔軍人。宜以軍法重治。察其尤重者戮數人。以申軍令。薊門數年安靜。人心已懈。天其或者借此以示儆乎。若諸公當事者。狃於治安。不加戒備。則其患有不可勝言者矣。且南兵素稱敢戰。今未效一矢之力。見賊先奔。何以解於紛紛之議。惟公熟計之。

### 答南總憲吳堯山言法律章奏

南臺試職。奉教。卽屬銓部覆允。但御史以原官試職理刑。蓋使之習於事以待用也。近來居是官者。不知本職所在。舍其當務而漫求他事以塞責。居數月而考選實授。祇具文耳。一旦奉使觀風。乃不知法律爲何物。而反以吏爲師。祖宗命官責任之意。幾於淪失矣。近奉明旨修復故事。而御史大夫陳公卽以實舉行。甚稱上旨。試之日。坐於堂上。

面加校閱。舊日易卷代書之弊。悉行釐革。僕取其試卷觀之。一一親批。其所殿最。咸以招擬爲準。不論章奏之通否。蓋章奏議論。人人能之。若招擬刑名。則非素究心於此者。不可以虛言飾也。賢哉大夫。可謂霜空之矯翰矣。南北臺諫。原無輕重。今旣新奉明例。似宜一體舉行。且以公之高明峻整。視陳大夫又奚讓焉。

### 答閱邊部文川言戰守功閔

承別楮所評隲。一一精當。比者古北口之事。特欲借此以徹惕人心。其實薊鎮屬夷。促人要賞。乘間爲盜。自昔已然。昨日豎子若不輕身出塞浪追。則亦無此喪敗矣。今四方所報。殺官劫庫之事。無歲無之。中土且然。况邊境乎。薊帥昨蒙嚴旨切責。足以示懲。若舉全鎮防守之功。委無所損。數年以來。一矢不驚。內外安堵。此其功寧可誣乎。猫以辟鼠爲上品。山有虎豹。藜藿不採。又不以搏噬爲能也。似當以公初擬爲當。若欲爲之委曲除豁。則可云據近日鴉鵲屬夷之事。雖若防禦少疎。然舉一鎮修守却虜之勞。實於

功名未損。以此意措詞。不知可否。惟高明裁之。大抵薊鎮之勢。與他鎮不同。其論功伐。亦當有異。蓋此地原非邊鎮。切近陵寢。故在他鎮以戰爲守。此地以守爲守。在他鎮以能殺賊爲功。而此地以賊不入爲功。其勢居然也。至於調用南兵一節。實出於萬不得已。蓋因往時議者咸極言延寧邊兵入衛之苦。爲之罷減四枝。薊鎮分區而守。罷一枝則一區失守。又不可棄地與賊。於是譚總督戚總兵乃建言。昔在浙中部曲尙多素所練習者。可頂所罷之數。因以教練火器。整理軍營。故不得已而用之。今若以爲虛費而無用。卽當罷之。則宜思戍守不可缺人。或仍復入衛邊兵。或於本鎮地方抽換。不然。陵京重地。寧敢忽視之乎。此中事體。其說甚長。統俟面悉。

### 答總督楊晴川計處屬夷

辱示失守諸官軍俱法當其罪。從此人心庶其有儆乎。屬夷原謀止欲爲盜。庸將喪敗。實其自取。今彼既有畏誅之意。宜自從容處之。但嬖只之說未可盡信。乃自解之詞耳。

今仍宜厚結。嬖只以絕其援。盡革諸夷之賞。以孤其黨。虜貪而無親。他日必自相夷滅。炒蠻亦可縛而致也。若歸罪嬖只。是使之合其黨以抗我。且啓西虜之釁矣。

### 答總督張心齋計戰守邊將

辱示虜情。俱悉公所以應之者。誠爲得策矣。今全虜之禍。咸中於遼。連歲彼雖被創。我之士馬物故亦不少矣。彼旣憤恥。必欲一逞。今秋之事。殊爲可虞。昨已屬意本兵。於貴鎮兵食比他鎮尤當加意。臨期若的知虜賊所嚮。當令薊人助守寧前。使公等得專備東方。如犯寧前。則東西夾擊。再一創之。則彼破膽而不敢東窺矣。公幸時時諭意李帥。大將貴能勇能怯。見可知難。乃可以建大功。勉之慎之。爲國任事之臣。僕視之如子弟。旣獎率之。又寶愛之。惟恐傷也。惟公垂亮焉。

### 答山西崔巡撫計納叛招降之策

叛人背華向夷。法當顯戮。以絕禍本。但所示二策。似俱未善。蓋今之虜情。與昔不同。昔未臣服。故可用計處。今既爲一家。凡事又當待之以信。諭之以理。向者款貢。曾與之約。云除板升徒衆既多。在虜已久。許令照舊耕牧外。自納貢以後。我不受彼之降虜。彼勿納我之叛人。今彼納叛。非約也。宜令曉事通役。明言索取之。云往年所與王約誓者云何。今聞有某人在彼。其言云云。凡此等人。皆吾中國犯罪當死。及貧困不能自活者。乃逃往彼中以脫罪乞生耳。其云云者。皆妖言不足聽也。往嘉靖年間。有蕭芹者。叛入虜中。自言有神術。呪人。人輒死。喝城。城卽崩。俺答信之。令人押之於邊城。試令喝之。而其術無驗。當是時。俺答方就大同乞貢。中朝業已許之。會邊臣以此事聞。世廟惡之。遂不許貢。後蕭芹竟爲邏者所得。梟首邊關。此往事可鑒者也。今彼既與我一家。好惡同之。我之叛人。亦彼所惡。萬一此事聞之朝廷。必以彼王爲背盟約。納叛人。王雖欲輸誠款。朝廷亦將不信。則兩家大事從此壞矣。王如曉事宜。將此人及其黨與。執送軍門。朝廷必鑒王之誠款。和好益堅。賜賚愈厚。何爲納此無用之人。聽其妖妄之說。而壞已成之

功。失永久之利哉。彼聞此言。勢必聽從。卽彼不從。我常持此以責讓之。使曲在彼。則我之威信亦無所失。量此么麼幹得甚事。今板升之人。如此輩者。何啻千萬。卽索之而不得。亦惡足爲輕重乎。彼雖犬羊。亦不可欺。用術以求之。或未必得。而彼反持此以誑我矣。惟高明裁之。大抵虜情不能保其無變。今中國之人。親父子兄弟相約也。猶不能保其不負。况夷狄乎。在我兢兢自治。常若待敵。小小變動。勿遂驚惶勞攘。但當耐煩處之。隨幾應之。期令無大失而已。若欲事事完全。人人守法。則是以中國之所不能者。而責之夷狄也。有是理哉。此事似宜與軍門熟計而行。萬惟留意。

### 與總督方金湖以弈諭處置邊事

近見山西巡按疏中言邊人叛入虜中者甚衆。宣大巡按有書言擺腰入市時。伏甲於邊外。及黃酋遲延不肯就市。其意蓋謂虜情有變也。不知其中情狀何如。其云云者。皆實否。幸惟明示。又得崔巡撫書云。索叛事似爲未善。僕已復書。令其改圖。不知可否。亦

曾聞此事否。今錄回書併崔原書奉覽。以便從事。然會崔母言得見其全。况經一番變動。得一番處置。而其事愈固。往時廟堂無定見。一聞浪語。卽爲動搖。譬之低基。隨敵嚮往。應手卽下。今則不然。吾審勢已定。窺敵覲變。或無事而自補。或棄子以求先。此今日之局面也。諸公當事者宜審計焉。

### 答雲南撫院王毅菴

辱華翰。領悉。前奉詢滇中積貯。以曾聞之礪菴云云。將謂彼中尙有此數。不意年來遂以解進。今所餘但令所司謹守之。以備緩急。一二年間。調停酌量。內帑漸充。加以北虜納款。邊費少省。僕朝夕所告於上者。諄諄惟以節用愛民爲急。此後搜括之令。或可免下。所以瑣瑣奉問者。惟欲知郡國財賦虛實之數耳。礦金之害。往大理李中溪先生亦曾言之。第以此項專供御用。宮中視爲額辦。未敢輕議停寢。稍俟機會。當有處也。續刻小疏一通。奉覽。

## 答南臺諫

承諭。欲以拙稿付梓。昨已致書王少方力止之。蓋此帙雖無造膝密勿之語。而其中亦多未發科抄布者。若梓傳四方。未免掩主德而炫己長。非入告出順之義也。至於求存翁序首云云。猶不敢當。存翁吾師也。翁昔以家國見託。今思昔所許者。尙未能力踐其一二。何敢以案牘糟粗之詞。致辱名筆哉。惟丈俯鑒愚悃。早爲停寢。僕此意發自丹慄。絕無矯僞。若舍曰欲之而爲之詞。則穿窬之行。丈諒僕必不爲也。

## 答南列卿張峴

惟公雅望厚蓄。昔被浮誣。今始昭雪。故暫借南寺以廻翔遵養焉。辱華翰遺謝。深以爲媿。前賤日蒙惠。概未敢領。仍宜查之主藏者。



## 答督府吳環洲

辱翰教。領悉炒蠻者與西虜嬖只爲婚。昨遂嫁言爲盜者嬖只也。此薊人欲爲解罪之言。昨已責之。彼中當事者言初報爲盜者屬夷也。與西虜無與。朝廷所欲誅者炒蠻耳。此後勿得嫁禍於隣。然僕料此事必借公力而後能之。公幸使人密說青黃諸酋。勿與惡人爲黨。啗之以厚利。偵知炒酋所在。或誘之使復歸舊巢。則罪人或得也。已令薊人緩圖。公幸留意。

## 答山西崔巡撫

水泉之市。不知在何時。聞宣大互市。兩撫院皆親臨彈壓。故得無譁。水泉市日亦欲煩公一臨。庶無他虞。又京師近緝獲一虜人。初稱黃台吉部下所使爲細者。後審是公昔年所遣爲廖舉人僕者。及呼廖舉人而認之。良是。但不知公昔年何自得之也。幸具道

其實。以便處分。當解途臺下。隨宜安插。若以爲奸細。恐因此遂生釁端也。

### 答楚按院向明臺

頃以二三大事借留數月。故未題代差。期當在初冬矣。辱示江陵尹朱正色均差之議。其中綜理精當詳密。此君初任。人皆以爲刻核。僕獨愛其明作。今觀其所建立。必爲良吏無疑矣。慰甚慰甚。一條編之法。近亦有稱其不便者。然僕以爲行法在人。又貴因地。此法在南方頗便。旣與民宜。因之可也。但須得良有司行之耳。向所言棍徒艾姓者。後竟不知何以處之。寶慶生員毆死職官事。似宜正法。以警刁頑。

### 答南臺長陳萊峯

海洋失事。非公言。朝廷豈得聞之。人臣之義。以不欺爲本。事有失誤。當具實以聞。至於恩威輕重。則主上明聖。自有裁處。必不有乖於情法之中也。

答總督方金湖

貢市三年論敘。與昨閱視舉劾。並於一時。雖若有防。然閱視以八事爲殿最。貢市以款虜爲勤勞。閱視優於要職。貢市逮於卑官。固自並行而不悖。本兵前已題定。自宜循例舉行。但已加恩者。或不能過優耳。白帥賄李之說。前敬所已曾告之於僕。但追思當劉國被劾時。僕卽面問本兵譚公。此人若動。孰可以代之。譚卽應曰。白可。又云。若論才力。則麻錦爲宜。獨恨其多方營求。爲可惡耳。渠倉卒之間。卽以名應。似非有夙諾者。况旣惡麻之營求。又豈肯曲詢於白乎。云云之議。未必非劉麻搆之。近來將官彼此相傾。甚於文職。此中隱情。亦宜徐察之也。奸細之事。誠如尊教。近所獲者。皆未必真。已隨宜處之矣。

答潘巡撫

寧州之賊。從來已久。事關兩省。宜約會夾剿之。庶可收功。固難以旦夕定也。新除兵憲。恐不足以辦此。銓部謾爾陞授。僕知而使改之。則無及矣。公試觀之。若果不相應。當速奏調改。又公退居既久。近來改令或未盡知。宜查近年旨意。并題准事例。有與撫按相關者。籍記而時閱之。則自無廢格錯謬之虞矣。

### 答河道吳自湖言蠲積逋疏海口

頃蠲豁舊逋。乃發自聖心。僕不過仰承之耳。然須得良有司悉心綜理。庶幾主澤得以下究。惟公留神海口。疏通淮揚之間。歡聲雷動。從此人得平土而居。繫誰之力。與。以此知天下無不可爲之事。人存政舉。非虛語也。比者暫行薄賚。俟玄圭既告之日。仍當有殊錫焉。派磚事江南。撫按諸公咸以爲難措。而司空又以近日工作浩繁。不肯爲之一處。惟公裁之。

### 答應天巡撫宋陽山

鹽徒執捕。海風覆舟。在往時誠爲常事。若一一責之。該道將領。人將何所措其手足。宜丈有不平之鳴也。但按操使者。見近日屢有嚴旨。惡人欺隱。故一有所聞。卽倉皇奏報。以爲他日脫罪之地。頃王少方有書來。亦言屢勸止之不從。蓋自爲之心重。故不暇爲人謀耳。要之主上睿明。揆度事理。衡鑒明允。其輕重予奪。必不有乖於情法之中。王大參僕欲大用之。何乃以小忿決不就。幸諭安之。

### 答總督楊晴川

賊夷犯順。仗義執言以討之。馘其渠魁。赦其脅從。理之正也。但賊旣畏威遠遁。獸駭鳥舉。難躡其蹤。而揚兵出塞之舉。竊恐薊人亦未能辦也。若賊酋果真心悔罪。執送爲逆頭目一二人。散夷數十人。歸其所掠。則姑宥宥之。徐爲後圖。吳環洲示強示弱之言是

也。辱問草草。

### 答方金湖

六貢告成。邊圉寧謐。雖朝廷有道。守在四夷。而公經綸之略。安攘之勳。庸可掩乎。敬仰。近聞虜酋與察罕構隙日深。此正吾用奇之日。使之禍結而不可解。則薊遼之間。可以安枕。而西鎮之貢市愈堅矣。宜多方以間之。他日奇功偉績。必爲公所收矣。

### 答閩撫劉凝齋

鳳賊之敗潰。本之皆公謀也。頃部議但據報功之有迹者。覆請行賞。實未足以酬其什一也。然人臣事君。寧使功浮於食。况主上聖明。有功者雖微必錄。雖久不忘。尙當有大畀焉。

答遼東巡撫張心齋

連日不聞虜報。彼既得利於海西。必且歸其所掠。未能復逞。但遼左之事多在深冬。宜加意防之。虜性惟論強弱。罅隙一搆。報復不已。王台既被襲。虜讎恨必深。彼素效順中國。父子俱蒙恩賚。其德我也亦厚。宜急以計結之。俾爲外援。則北虜之真情可得。而我之藩籬益固矣。惟公熟計而審圖焉。

答吳環洲

前辱示邊事。公高見遠識。甚合鄙意。繕房堡事。僕正恐觀風者輒行奏論。致駭聽聞。擬作書止之。不意大疏隨至。而沈君亦遂匆匆參劾將官。蓋渠惟懼以隱匿獲罪。勢難中止。又連及別事則過矣。夫疆場之間。小小綻破。未能全無。妄之於大計未損。若遇有事。卽行處置一番。於大計反爲有益。顧君不察耳。今都邑之間。猶有白晝剽竊。劫庫殺官。

者。况夷狄乎。薊門三衛。服屬二百餘年矣。捉人挾賞。猶不能一一盡詰。乃可責之驕悍。新附之虜乎。要在常事者。隨宜處置。譬之於犬。搖尾則投之骨。狂吠則擊之以箠。既箠而復服。則復投之。投而復吠。則復擊之。而可與之較曲直論法守乎。前有書與方公。方答書云。耐煩二字。邊臣宜書諸紳。誠然。昨部覆已明。只如公前議行之。然僕料虜已中餌。決不舍貢市之利。以理責問。必無不從者。

### 答雲南巡撫何萊山論夷情

道從已抵貴竹。慰甚。所示安酋事。具見高識遠猷。朝廷可道南顧之憂矣。追念安酋庚午之事。本守臣處置失宜所致。及釁端已搆。遂欲調三省之兵。捐數十萬之費。以剿之。僕竊以爲非計。乃選用阮沙城巡撫。授以五章之約。阮公幸用吾策。不用一卒。不費斗糧。而黠酋稽顙繫組。納質請罪。此已事之明效也。夫土夷雜種。譬之狐鼠鼯鼬。據險爲固。得其地不可耕也。得其人不可使也。以國初兵力之強。高皇帝之威。豈不能畫野而



郡縣之勢不可也。其種類忿爭相殺。固其性然。又非可盡以漢法繩也。究觀近年之事。皆起於不才武職。貪黷有司。及四方無籍奸徒。竄入其中者。激而構煽之。星星之火。遂成燎原。守土者又不深爲地方長久之計。輕信偏僻。遽爲騰奏。小則構訟。大則用兵。驅無辜之民。置之鋒鏑。以爲夷狄報仇。幸而勝。兵罷財費。將吏冒賞。於國家無秋毫之益。不幸而敗。三軍暴骨。損威傷重。其禍又有不可勝言者。此已事可鑒也。故僕以爲制禦土夷之道。惟在謹修內治。廉察邊吏。毋令貪吏需索。結怨起釁。禁戢四方奸徒。毋令教唆播弄。致生嫌隙。鎮之以威。示之以信。毋以小術欺誘之。但令遵奉約束。不廢貢職而已。此外不必過求。其中或有爭忿相訟者。兩是而俱存之。概行會勘。亦毋輕爲奏請。待其彼此相戕。勝負已決。吾視爲理直而爲衆所服者。因而撫之。理曲而爲衆所不悅者。因而除之。卽疆場定矣。何致紛紛勞民動衆。敝內以事外乎。南北夷虜之勢不同。其處之道亦異。管見如此。惟高明擇之。

## 答陝西學道李翼軒

近見關中錄文。甚佳。多超曠之見。知必於出執事之手。爲之擊節者久之。所示西略。一領悉。春首之事。已成夢幻。不足復論。不穀於執事相與深淺。執事心知之。

## 答吳道南

承示辯揭。殊足發笑。是非混淆。一至於此。南疏必有嗾之。言者不察耳。先是。部院訪單。其說尤多。大抵皆忌者之言。故銓部議欲從重。僕再三爲理。乃得量移。然被誣已厚矣。世味人情。不過如此。區區昔與執事有世緣。出世緣。今天下幸而無事。區區且欲解簪。被從赤松子遊矣。覺與執事世緣已盡。再結出世緣耳。執事肯從我乎。

張江陵全集 卷二十一

# 張江陵全集卷二十一書牘

## 答兩廣凌洋山

羅旁之役。聞已獲功萬餘。計所鹵獲。又當稱是。卽有逸伏。諒亦無多。宜乘此勢。多方招徠。開其生路。隨宜處置。務絕後患。則一勞永逸之策也。事定後。稍用狼兵。更番屯守。諸善後事。宜次第以聞。

## 答總憲李漸菴言驛遞條編任怨

近來驛遞困敝至極。主上赫然思以釐振之。明旨屢飭。不啻三令五申矣。而猶不信。承教謂外而方面。內而部屬以上。凡得遺牌行者。有司不敢不一一應付。若如近旨。但無勸合者。皆不應付。則可盡復祖宗之舊。甦罷困之民。夫有司官卑。豈敢與大官相抗。所賴以行法振弊者。全在撫按耳。撫按官狃於故常。牽於私意。而責有司以奉法令。抗大

官勢不能也。朝廷欲法之行。惟責之撫按。不責之有司。異日倘有犯者。或別有所聞。則抗命之罪。必當有歸。昨決囚之事。可鑒也。條編之法。近旨已盡事理。其中言不便十之一二耳。法當宜民。政以人舉。民苟宜之。何分南北。白令訪其在官。素有善政。故特旨留之。大疏爲之辯雪。殊愜公論。惜公不倡言於朝廷。而獨以私示於僕也。天下至大。非一手一足之力所能成。唐虞內有百揆。四岳。外有十二牧。十亂同心。周業乃昌。僕今不難破家沉族。以狗公家之務。而一時士大夫。乃不爲之分謗任怨。以圖共濟。亦將奈之何哉。計獨有力竭而死已矣。以公知己。敢布區區。懋修謹按書語殊。凡誹取怪。乃先父及禍。李公方爲正卿。兼用。不隨人誣誹雪憤。而更有救援之疏。李公真君子哉。

### 答河道吳自湖計河漕

高郵湖堤。聞甚堅緻。一年之間。淮泗安流。土可作爨。公雖不自以爲功。孰得而掩之哉。寶應堤工。便可次第修舉。玄圭告成。當有殊典矣。頃丹陽淺阻。當事諸公。畢智竭力。僅

克有濟。懲前慮後。預爲先事之圖可也。昨見攢運陳道長建白。俱切事理。其言黃河故道不知可復否。望公虛心一商之。如有定策。幸先以見教。今宇內之事。漸已修飭。庶幾小康。惟河漕恆往來於懷。而今之時。肯爲國家任事者絕少。不能不厚望於公也。

### 答河道潘巡撫

辱示江右金花銀。亦係已征。在官之數。不准抵補。伏奉聖慈。特允免追。蓋上之至仁也。

### 答總憲李漸菴言人臣節儉之義

往者奉書。妄有所獻。誠有激於衷也。比辱華翰。不責其愚。深自引咎。其銳然有爲。確然不回之意。溢於詞表。讀之再三。無任慰仰。夫人不激。烏能有所樹乎。古之以道義相磨切者。義蓋如此。至謂今之財賦。不窘於國用之繁。而虧於士大夫之侈縱。誠膏肓之藥石也。即使國用果繁。爲士大夫亦當分任其咎。蓋以下奉上。臣民之分。而士夫者又朝

廷所用以治民者也。今乃剋上剝下。以厚自奉。可勝嘆乎。顧積習沉病已久。非痛懲之。不能挽也。語曰。得時無怠。裹糧躍馬。猶恐失時。今欲爲國家振久頹之習。建百世之利。茲其時矣。惟高明留意焉。

答閩撫龐惺菴

僕之傾向於左右。自公在臺時已然。此亦公所自知也。中更多故。不獲引置於雲霄。然鄙心未嘗忘。頃以閩臺虛席。乃得遂其夙心。然公困躓久矣。今不引之康莊。而復頓之畏途者。良以此中人情多變。借公威望彈而治之。而公因此亦大有所樹植。以塞忌者之口。則由此升亨衢。執鼎鉉。其勢爲易。則僕之所以忠於爲國。而篤於薦賢者之赤心也。至於主持公是。摧抑浮枉。則年來廟堂之舉動。公旣聞之矣。又何慮焉。如有地方事宜。不妨一一垂示。

## 答織造許樞使

辱翰教。深荷雅情。頃見發下解進段疋等件。俱厚熟密緻。與近年所織不啻霄壤。而價值乃與市估無異。且官無私弊。民不苦勞。嗟乎。使今之奉使者俱如執事。則何事不可辦。何功不可成乎。敬仰敬仰。頃得皇上面加獎賞。生亦極力稱薦。執事將來大受之基。已培於此矣。願益堅雅操。以永終譽。

## 答總憲張峒峽言用人

頃借公於上谷也。將有難鉅之託也。乃竟不得如願。令人悵恨久之。干霄之材。何患不登明堂。但僕謝事有期。不得託附於梓人。殊可恨耳。大君卹典。已屬所司。如例請允。別楮所薦諸賢。皆一時之俊。處吾夾袋中。寧止朝夕。雖未免各有所短。然堯舜在上。翕受敷施。取其所長。皆爲國器。若諸公能不恃其長。刮磨微類。致其瑩美。則希世之寶矣。辱



示敢并及之。薄奠。敬因使者布之太君仙几。

### 答總憲葛與川論友道

今之隱退者。皆以通書政府爲嫌。僕竊所不取。夫古之君子。以道相與。出處語默。曾何間焉。况大臣雖在。猷畝。猶懷廊廟之慮。所爲居政府者。非其僚友。則其素相知也。其人賢耶。固當告之以四方幽隱。以贊其廟堂之慮。不賢耶。亦當匡救其闕。而教督其所不逮。俾無致疾於國於民。斯古之君子。所以篤交誼而不忘國家也。自翁歸。政府三奉教言。輒三嘆之。夫翁亦猶行古之道也。但所奉書詞。徒聞溢美。未領切磨。將行古之道而未盡耶。毋亦其人之不足以莊語耶。

### 答翰林王弘齋

往事僕所深知。恨當時未陪國議之末。徒旁睨私憤。爲公竊置一喙。若如今日。則固已

滌濯而致之青雲久矣。豈令公抱沉痛於衡門哉。辱華翰。感今追往。益用惋惜。堯舜在上。翕受敷施。期不使鄧林有一材之斷。願公靜以需會焉。

### 答滇撫王凝菴

前承厚貺。卽璧付令弟。以不穀之辱愛於公。誠不宜例拒。但近年交際久廢。欲借告知厚者。以解於衆人耳。萬惟亮恕。諸所舉行。略覽一過。鑿鑿皆有益於地方。造福於滇人。不淺。卹刑者乃剿其說以市恩。淺之爲夫也。憲綱一書。雖屢經申飭。而臺中竟不遵行。蓋惡其不便於己。幾欲去其籍。公之此刻。亦取忌之一端也。前撫鎮不和之說。蓋彼有懲於山右之事。故爲此先發制人之舉。自彼疏來後。撫鎮並無一言。安在其爲不和耶。此是以知其說之謬悠也。相處無幾。亦善遇之。

### 答宣大王巡撫言薊邊要務

宣薊唇齒之勢。異時兩鎮視如秦越。虜禍中於薊。則宣人安枕。雖得虜情。不以實告。今移公於宣者。所以爲薊也。撫鎮協和。文武輯睦。邊境之利也。而好事者反以此爲忌。往者南中之謗。未必不自此中啓之。去歲微聞閱視。君亦有此言。今去公於薊者。所以全公也。近日薊臺有缺。每從司道中進。以其習於薊事也。而好事者亦用此爲忌。每言薊中之任。皆取總兵所欲者而用之。昨見公移鎮。輒私語曰。代者必某人也。是總兵所喜者也。斯言也。不惟不利於總兵。且不利於司道也。故出其不意。而遠求於林下之人。乃陳公。又僕素所援用者。其人達於事理。不吐不茹。蕭規曹隨。必獲同心之濟。故用陳公。則公雖去。猶未去也。僕十餘年來。經營薊事。心力俱竭。今一更置間。而其用意之深如此。他人安得知之。恃公至厚。故敢略陳其概。新本兵雖頗不悅於薊人。然亦非故作異同者。况今大事皆僕面奉宸斷而行。渠安能逞其私意。輒有所更張乎。頃聞外間云云。僕卽以曉之。渠亦深省。恐彼中將吏。未達此意。或懷疑懼。願公鑒諭之也。近日俺答報土虜東犯。其言不虛。然此時尙熱。或就邊住牧。窺吾之隙。宜慎防之。人嘗笑南兵無用。

徒糜厚餉。今若乘其入犯。一戰而勝。則羣噪自息。而虜亦寢謀。去歲曾屬戚總理以援遼之策。乃渠所以復於我者。其計甚迂。殊失鄙望。今虜若窺薊。則患在頭目。又非若干鄰之震矣。願公以義激之。使僕藉手以告於上。且以杜讒謗之口。此機不可失也。

### 答徐太室言釋怨爲公

別楮領悉。但舊僚之疑。似猶未釋。僕非姑與解脫也。今春南說之興。其所由來。實與舊僚無干。僕平生遊於宦途。但願人解怨。不願人結怨。况本無怨之可釋乎。願公之自信。而薄責於人也。沙市城議。恐勞費難成。幸姑已之。

### 答薊遼邊總督

賊至數萬。則其患不在遼而在薊。蓋虜每入寇。亦必費本。遼左荒鹵。人畜蕭疎。羣數萬之衆。駐荒陋之墟。掠野則得不償失。攻城則非其所長。况當暑雨之辰。馬疲弓解。馳騁

復難。虜之入犯。求鹵獲耳。以若所爲。求若所欲。雖至愚。其必不出於此矣。近來每於暑月。輒報十萬二十萬。旬日之間。復言出境。遼之守兵不過萬。賊若至二十萬。則各處墩堡。皆可踏平。彼復何畏而斂衆以退乎。凡此不達事理之言。僕所未解也。遼左數年。雖頗有獲。損失亦多。薊門十年以來。一矢不驚。軍民安堵。較其績效。孰少孰多。而論者於此。則百計摧抑之。於彼則多方掩護之。昨該鎮巡按遇虜。僅以身免。若令薊門有此事。則內外不知有多少劾疏矣。而彼中方盛張功伐。以掩其事。巡按亦破膽結舌。而不一言。如此尙爲有公道乎。昨令本兵從公議行賞罰。以服人心之旨。蓋爲此也。遼薊皆公所轄。何親何疏。朝廷視之。亦何輕何重。但賞罰功罪。須至公至平。人心乃服。人心服。而後可責其用命也。辱公至厚。故敢直披其愚。亦勿令薊門將士知之。恐生驕悍也。本兵新仕。頗惑于昔年南兵坐食之言。傳聞洶洶。遂調將有所更置。僕知而譬曉之。彼乃深省。近來帖然無異。公與薊門將帥。但一一務實修守。以爲戰備。一切浮費繁文。悉從簡革。臺上戍卒。無事不許擅離尺寸。但能拒賊不入。卽爲大功。不必有所斬獲。紛紛之議。

僕自爲之主持。無事疑慮。若空言無實。一旦僨事。則國法森嚴。區區亦不能終庇之。岳君已屬之銓部。如擬陞用。

### 答甘肅巡撫侯掖川計套虜

套虜當未納款時。不知曾往來內地否。若先曾往來。而今款順。反禁其往來。恐彼未肯服也。夷虜彼此侵盜。乃其常態。今彼雖款順。亦似能約其無爲邊患而已。若令縛其手足。不令西搶。恐彼亦未肯服也。順則撫之。逆則絕之。在各鎮自有機宜。不相牽制。昨宣府小酋作孽。已卽絕其貢賞。欲出師問罪。彼酋懼而罰治請贖。然後賞之。照舊許貢。此在宣大且然。况他鎮乎。今後彼若往來。經由邊臣卽宜收斂城守。使人問故。彼若以西搶爲詞。則與之約令速行。毋得戀住。恐傳聞不的。朝廷知之。以爲汝有他意。致壞貢市大事。彼若順從。則少加犒賞以懷之。若不聽約束。故行戀住。則申明盟約以驅之。驅之不從。或又侵犯。則調兵以擣之。諒彼往來不過一二枝。衆亦不過數千。未必各部皆如

是也。順者撫。逆者剿。逆而又順。則又撫之。順而又逆。則又剿之。臨機觀變。何常之有。至於虜衆經過。或小有侵擾。此雖內地官軍。猶不能一一遵守紀律。况夷性乎。且前已陪賞。不必過求矣。本兵前覆邢道長疏。言之已盡。頃大疏不過以邢有疏。恐他日責以不言耳。然部覆備矣。辱垂問。敢布區區。

### 答滇撫何萊山

安氏事如公所措畫。彼必遵奉安插。未了之案可完結矣。得先後華翰。所論夷情。每與曾司馬深加嘆服。公之忠於任事。敏於割割。僕所素知。然不謂其詳重停妥如此也。雖有吳干。必試而後知其利。信哉。望益懋勳庸。以需大受。

### 答少宰楊二山言條編

條編之法。有極言其便者。有極言其不便者。有言利害半者。僕思政以人舉。法貴宜民。

執此例彼。俱非通論。故近擬旨云。果宜於此。任從其便。如有不便。不必強行。朝廷之意。但欲愛養元元。使之省便耳。未嘗爲一切之政。以困民也。若如公言。徒利於士大夫。而害於小民。是豈上所以恤下厚人者乎。公旣灼知其不便。自宜告於撫按。當事者遵奉近旨罷之。若僕之於天下事。則不敢有一毫成心。可否興革。順天下之公而已。

### 答河道吳自湖

高郵堤工。聞已告成。乃久未完報者。想以大工甫就。新水暴漲。慮有變態。欲俟其堅定。乃完報耳。但聞興泰之間。河塘潰決。復成巨浸。未審何以拯之。河流旣自復故道。當無俟開濬。承教挽淮入河之策。甚善。考其汎地。雖多屬河道衙門。然公欲爲國家萬年之計。救淮揚目前之急。想當視爲一家同心共濟也。議定幸卽疏聞。此旣關係來歲漕計。自不容不預圖也。年來方內又安。庶幾小康。獨河漕一事。時往來於懷。而當事諸公。亦旣殫厥心力矣。乃竟不獲底於平成。豈所謂可能者人。不可能者天耶。奈河寶應湖工。



亦宜次第修舉。

又

他人一聞行取之報。恨不能即日釋去重負。而李君乃自願留任以就湖工。其志量忠慮。不啻加人一等矣。卽如教屬銓部暫留在任。不妨他日續選。且前題奉欽依。賢能有司在任年久。遇行取之日。超等選授。科卽授左右給事中。道卽免其試職。徑與實授。此子果著有成績。當破格處之。以酬其勞。便中或可諭以此意。俾得安意供事也。

答石麓李相公

去歲或傳云老伯已捐館舍。然久之不見有請恩疏。心竊疑之。坐是久缺弔唁。歉甚。茲辱示大疏。卽屬所司覆允。視彝典有加焉。蓋上之篤念舊老。而推本所自如此。弟於是乃敢以生芻薄奠。因歸使而布之仙几。承以老伯隧碑見委。弟雖不文。素辱同氣之愛。

敢不敬。承但嘉貺非所敢當。輒以璧諸使者。拙作俟秋冬間呈上也。近聞中玄疾甚。已成痿痺。可嘆。明年主上大婚。弟將告老矣。而翁又抱此大戚。宇宙茫茫。相見無日。感今悲昔。愴然爲懷。奈何奈何。

### 答總督張心齋

遼東素被虜患。公在兵間。勞苦久矣。僕無一日不往來於懷。欲少休驥足。顧未有間也。不敢忘。不敢忘。虜之欣豔貢市。其情近真。但爲國家長慮。未可許之。公所以應之者。甚爲得策。然今虜禍方中于遼。遼以一鎮當全虜之勢。兵疲力寡。不可不亟爲之慮也。公有良策。不妨披吐以聞。當別有指揮。

### 與張心齋計不許東虜款貢

西虜俺答之求貢。自嘉靖十六七年始矣。我畏之而不敢許。然當其時廟堂失策。制禦

乖方。雖許之固未如今日之款順也。比以那吉來降。歸之以禮。彼遂感恩慕義。執我叛人。復申前款。我乃因而許之。蓋機緣湊合。名義正大。故當時紛紛之議。皆以爲不可許。僕獨以爲可。皆以盟約爲不久。僕獨保其無他。蓋度彼旣感吾放寬之恩。而又適愜其平生之願。芳餌入口。不能自脫。夫事美成在久。惡成不及改。今東虜于我。非有平生懇款之素也。非有那吉納降之事也。非有執叛謝過之誠也。侵盜我內地。虔劉我人民。其迫脅無禮如此。堂堂天朝。何畏于彼而曲徇之乎。且西虜以求之懇而後得之。故每自挾以爲重。今若輕許于東。則彼亦將忽而狎視之。他日且別有請乞。以厚要于我。啓釁渝盟。必自此始。是威褻於東。而惠竭於西也。故在今日。宜且故難之。以深釣其欲。而益堅西虜之心。異日者東虜之敢大舉深入。以西虜爲之助也。今東虜有求而不獲。則西虜以我之重之也。亦挾厚賞以自重。必不從東虜矣。虜不得西虜之助。則嫌隙愈構。而其勢愈孤。而吾以全力制之。縱彼侵盜。必不能爲大患。是我一舉而樹德於西。耀威于東。計無便於此者矣。昔人云。自非聖人外。寧必有內憂。今主上冲年。國家幸而無事。宴

安鳩毒將發於不虞。盍姑釋此以爲外懼乎。僕懷此意未敢語人。茲因詢及。敢略陳其概。雖然。遼人病矣。語曰。頭痛治頭。足痛治足。今虜禍方中於遼。遼以一鎮當全虜之勢。病在足之時矣。不急治之。且將爲一身憂。遼人素稱忠勇。但苦兵寡耳。然欲足兵。必先足食。兵食既足。乃可言戰。一戰而勝。則東虜之氣挫。而西虜之好益堅。此數世之利也。願公熟慮之。

### 答總憲董嵩河

僕生平所推轂保護天下賢士甚衆。然皆不令人知。昨所聞於左右者。非市德也。蓋欲公知天下公論未嘗盡泯。而益堅任事之心也。乃辱華翰。深用爲媿。關山議設專官事。已屬所司覆行矣。

### 答河道吳自湖計分淮導河策

前奉華翰。報高郵工完時。已微聞維揚水患不減去歲矣。夏已如此。秋當何如。今但保高郵堤工不壞。猶足捍禦。灰石初合。卽經衝嚙。豈得無損。惟隨宜補葺。九堅一瑕。固不害爲成功也。聞縉紳之言。河旣從故道入海。淮又合于江。淮河分北而行。于地方亦甚便利。所可慮者。天妃以北。中間五六十之淺濶。有防于運道。且鄙意謂挽淮逆上。其勢爲難。而上陽高寶之間。所不足者非水也。若就淺處別疏一道。或引木建閘以爲運艘。由淮達河之路。而縱淮入江。以復乎孟氏之言。比之挽淮爲力似易。其河流自由故道入海。宜因其勢而益導之。使河淮永不相合。則淮安從此可免昏墊。而於運道亦無所防。但僕自來未經此地。不悉其曲折。獨以意度如此。謾呈以備採擇。黃僉憲告病。以楊二守代之。俱如尊諭。屬所司覆行。但黃昔以才望薦用。今未見成績。輒以病去。不能無託避之嫌。今旣以楊代。須委任責成。毋使後人效之也。人臣旣已款職受寄。宜思分義所當盡者。若見可而進。知難而退。國家何賴焉。

## 答憲長周友山言弭盜非全在不欲

辱華翰佳布之惠。深荷雅情。且諭憲從卽駐寧州。因以彈壓姦宄。拊綏善良。甚休甚休。蓋聞聖王殺以止殺。刑期無刑。不聞縱釋有罪以爲仁也。苟子之不欲。雖賞之不竊。此孔子箴病之言。是時魯失其政。寵賂滋彰。故言此以警之。若謂徒不欲可以弭之。無是理也。夫人之可以縱情恣意。有所欲而無不得者。莫踰于爲盜。而秉耒持鋤。力田疾作。束縛以禮法。世之所至苦也。安於其所至苦。無所懼而自不爲非者。惟夷由曾史爲然。今不曰吾嚴刑明法之可以制欲禁奸也。而徒以不欲率之。使民皆釋其所樂。而從其所至苦。是天下皆由夷曾史而後可也。舜不欲之君也。臯陶不欲之相也。蠻夷猾夏。寇賊姦宄。猶不能無明刑作士以威之。况其餘乎。異日者有司之不敢捕盜也。以盜獲而未必誅也。不誅。則彼且剗刃于上。以毒其讎。而合其黨。故盜賊愈多。犯者愈衆。今則不然。明天子振提綱維于上。而執政者持直墨而彈之。法在必行。姦無所赦。論者乃不惟

舜臯之所以致理者。而獨用懦者姑息之說。衰季苟且之政。以撓之。其無乃違明詔而詭國法乎。執事當弭盜之任。而華翰所云。又似不徇俗以爲是非者。故敢略陳區區。惟高明裁擇焉。

### 與藩伯曾陽柏

不穀猥以菲薄。謬膺重任。日夕惴惴焉。惟顛隕是虞。今賴天之靈。祖宗之佑。目前景象。庶幾小康。實主上聖明。國家之福也。不穀何功之有焉。頃辱華翰。獎許過情。援引經義。證以古哲。皆非讜劣所能當也。愧謝。確菴高明沉毅。秀雅而文。他日必爲國家柱石。不穀於國無所裨補。惟思推轂英儒。以共襄王事。然追念生平所拔舉。可託之久。要如確菴者一人而已。旣以自慶。亦以爲公慶。豚兒寡學。濫竊科名。遠辱遣賀。兼拜珍貺。感戢莫喻。茲因鱗便。用布積懷。別具侑柬。統惟鑒存。

## 答樞使張容齋

別後各撫按諸君。咸有書來。言台從所經。禁止餽遺。節省供應。雖交際常禮。一切謝却。蓋縉紳大夫。仰翁之賢。固非一日。乃今所見。又過於所聞。宜其稱揚頌說之不已也。慰仰慰仰。二南素被王化。而翁又悉心簡求。他日必有膺椒塗之選者。大疏至。卽屬所司。整備奉送矣。人去。草草附候。

## 答薊鎮巡撫楊晴川

辱示援遼之議。前說爲長。幸留意審畫。以俟一舉。但聞大議亦已質之本兵。本兵遂列之防秋。疏中以未定之說。爲廟授之算。殊可笑也。且此舉本欲出奇制勝。以圖非常之功。非可歲歲徵調。以自疲其力也。用奇之道。疾如脫兔。若歲以爲常。又舉一鎮之人。趨前那後。接踵而移。此漕舟挨幫之規。非兵家握奇之算也。



### 答福建巡按商燕陽

劉凝齋以任事致謗。公論不平。非執事秉虛公行直道。孰肯爲之極力昭雪乎。非獨劉一人之感。將以持是非之衡。而作任事之氣。其有裨于世道不淺也。慰仰慰仰。

### 答河漕傅后川

河漕意見不同。此中亦聞之。竊謂河漕如左右手。當同心協力。以期共濟。如所見必不能合。亦宜各陳。以俟宸斷。不宜默默而已。國之大事。不妨公議。事君無隱。豈爲失忠厚之道耶。

### 答總憲陳我度

昔借公於蘇松。實出鄙意。或乃執政者謂公有私于雲間也。遂有按劍之疑。是時讒慝

盈朝。僕雖深知其枉。弗能救也。然于是恆以爲歉。茲幸英主御極。大明當空。振幽啓順。以興太平之治。僕乃敢以公進。然不徑登之廊廟。而置之節鎮者。則以薊門要地。暫借重望。以輯睦文武。計寧邊圉。共襄安攘之業耳。簡命渙頒。輿情胥慶。比聞旌節已至。尤慰鄙懷。

### 答應天巡撫胡雅齋言嚴治爲善愛

辱華翰及別楮。捧讀數過。不勝浣慰。不勝敬仰。蓋吳中財賦之區。一向苦于賦役不均。豪右撓法。致使官民兩困。僕甚患之。往屬陽山公稍爲經理。而人心玩愒日久。一旦驟繩以法。人遂不堪。謗議四起。然僕終不爲動。任之愈力。今觀公所措畫。不吐不如。式和厥中。積歲恃頑強梗。咸頰首祇奉約束。蓋至是吳人始知有法。而陽山公之經理于始者。賴卒成之矣。雖然。此吳人之福。而彼不知也。夫富者怨之府。利者禍之胎。而人所以能守其富。而衆莫之敢攘者。恃有朝廷之法故耳。彼不以法自檢。乃怙其富勢而放利。

以斂怨。則人亦將不畏公法。而挾怨以逞忿。是人也。在治世則王法之所不宥。在亂世則大盜之所先窺。烏能長有其富乎。今能奉公守法。出其百一之蓄。以完積年之逋。使追呼之吏。足跡於門巷。馴良之稱。見旌於官府。由是秉禮以持其勢。循法以守其富。雖有金粟如山。莫之敢窺。終身乘堅策肥。澤流苗裔。其爲利也不亦厚乎。故僕以爲此吳人之福。而彼不知也。夫嬰兒不剃首則腹痛。不搨瘞則寢益。而慈母之於愛子。必剃且搨之者。忍於其所小苦。而成其所大快也。僕竊以彼中於執法之吏。當尸而祝之。而又何謗議爲哉。况今明主在上。是非審覈。卽有流謗。適足以速禍而自弊耳。何能爲。何能爲。願公益堅初志。以永膚功。

### 答向臺長

近得家信。言執事有餽於寒舍甚厚。舍弟輩以夙有省戒。不敢承領。已卽返諸來使。竊計執事榮代。不審趙璧之果完否也。唯幸查照。前屢承嘉惠。俱未敢當。不圖執事之終

不見諒也。

### 答河道巡撫

孟瀆既開。練湖亦有次第。甚慰懸切。但聞下圖田莊。俱已查革。而道墩一區。巋然獨存。人以爲法未盡行也。吳歛相閔。本部議欠妥。當時僕曾喻司徒。以此事經二百年。雖少偏累。而相沿已久。無可奈何。一旦更之。恐衆不服。而渠固求允議。今果有此。實自貽之感。然關繫地方大故。或至猖披。後難收拾。幸公責該道有司。委曲善處。消患於未萌可也。奏對拙稿。隨時私刻。留傳後人耳。而偶以一冊寄之陽仙。意渠遂鋟梓。今望公勿多傳。蓋其中密勿造膝之語。雖不盡載。而諸所論建。亦有留中不發者。顯以示人。非入告出順之義也。幸惟裁亮。

### 答宋陽山

徽州絲絹事。明旨處分已盡。撫按諸君奉而行之可也。此事雖由殷石汀議處欠當。然既奉欽依。則令由上出。乃不行申訴。輒糾衆鼓譟。是抗王法也。此而不懲。則海內效尤。漸不可長。當事者動以激變爲言。挾衆勢以脅朝廷。非所以佐天子振紀綱而齊海內也。且以北虜之強。南夷之獷。朝廷折箠而制之。皆反首繫頸。繫致闕下。彼素稱衣冠文物之區。渠敢反乎。有以待之。不足畏也。

### 答吳總憲

李總戎以死勤事。殊爲可憫。代者王君。以其久於粵西。故用之。頃得家信。言公有餽於寒舍甚厚。舍弟輩以夙有省戒。不敢領。卽以璧諸來使。謹以原帖納上。幸惟查照。往者屢辭嘉命。未蒙見諒。後若再及。不敢不以上聞。恐彼此俱弗便也。

### 答楚學道金省吾論學政

辱翰示。知道從己入楚。欣慰。楚中士習久敝。頃公一振之。士稍稍向方。然其志未定也。仗公之重。再加振餉。庶幾丕變。至注厝所宜。不外乎華翰遵勅諭三字而已。夫以孔子之聖。平生所志。惟在東周。生今反古。深用爲戒。老不得行其道。猶修春秋以存周典。此豈以周之法獨善于前代哉。蓋爲下之禮宜爾也。今世俗皆曰願學孔子。乃不務遵祖宗之典。以服官寡過。而好言上古久遠之事。以異趨爲高。動循衰世苟且之政。以徇情賈譽。此豈聖人所謂爲下不倍哉。惡在其爲遵孔氏也。不穀素無學術。謬膺重任。思所以鼓駑鈍佐明主者。惟日取我祖宗之法度修明之。然十猶未二三也。竊以爲今之教士。與士之爲學。皆如不穀之所以事上致理者。而後有得於遵孔之義。不識高明以爲何如。

### 答閩撫龐惺菴

辱華翰。領悉。大疏俱屬所司。一一議覆。軍餉既有剩餘。如擬蠲負。以寬民力。然非前人

任怨催併。則公庾安得贏餘。舊逋安得蠲免。諸葛孔明云。法行而後知恩。正此之謂。今人不達於治理。動以姑息疎縱爲德。及罹於辟。然後從而罪之。是罔民也。僕秉政之初。人亦有以爲嚴急少恩者。然今數年之間。吏斤斤奉法循職。庶務修舉。賢者得以効其功能。不肖者亦免於罪戾。不蹈刑辟。其所成就者幾何。安全者幾何。故曰小仁大仁之賊也。子產鑄刑書。制田里。政尙威猛。而孔子稱之曰惠人也。然則聖賢之意。斷可識矣。以公之高明深識治體者。敢質此請教。錢法原以足民非爲興利。然足國之道亦不外此。蓋世間銀少銅多。公私之費。皆取足於銀。故常患不足。今化銅爲寶。則民用益饒。民用既饒。則上供易辦。故足民亦所以足國也。閩中錢法通利。此地方阜安之兆。可喜。幸公因其勢而導之。

### 答戶部王疎菴

僕平生無他行能。獨好推轂天下賢者。自在詞林。迨入政府。其所保護引拔。甯止數十

百人。然以爲國非爲私也。乃僕以誠心求賢。而人不以誠心相與。若乃披肝膽。見情慤。一心奉公。不引嫌。不避怨。與吾共圖國家之事者。如公亦不多見。向以求歸懇切。不得已。暫遂高懷。別後惘然。如有所失。比聞太君康壽。道體安和。宿恙全愈。當此清明之會。忍遂忘情于斯世乎。倘翻然回轍。當虛一席以俟。豚犬寡學。濫竊科名。猥辱遺賀。彌用爲愧。厚貺概不敢當。輒附使歸璧。草草附謝。

### 答守備太監王函齋

辱華翰。知道從己入郢。欣慰。書中謂蒞事之初。未遑施措。惟有競業。只此競業二字。便是施爲之本。堯舜之所爲聖者。亦不外此。幸勉圖力踐。他日入筦內樞。植駿業。垂名青史。可預卜矣。敬仰敬仰。門下未及下車。輒煩遣使存問老親。念此雅情。惟有銘感。此後但俯垂存念。卽是惠及蓬廬。不煩恩禮致累清德也。



答薊薊總總方全湖言俺酋西行不利

北虜貢議。公實始之。蓋八年於茲。而夷情愈順。邊鄙用寧。公今入朝。又克終其事矣。凡此大功。固宜銘之太常。垂之青史。豈特一時賴之而已乎。虜酋西行。旣決。難以挽留。邊人咸恐。此酋旣去。來年貢市。或不如初。不知虜人嗜利。觀其會三鎮之人。與之盟誓而去。彼蓋猶恐吾之有變。肯自渝負以失大利乎。要在邊臣善加撫馭。毋自失信。以起釁可也。但僕料老酋此去。必不利。渠本無去意。但爲切盡所迫。黽勉從之。諸部亦不樂行。衆心不齊。戰必不力。一也。自款貢以來。叅縻於中國之服食。志驕氣惰。不足以當瓦剌新銳之虜。二也。南畏中國。東畏土蠻。牽制內顧。勢力自分。三也。三者皆兵家所忌。故曰必敗之道也。公試觀之。

答河道吳自湖

辱翰示。知淮已歸流。水勢漸退。慰甚。河患自古記之。有非人力所能勝者。但僕今謬當大任。一聞愁嘆哀號之聲。痛心疾首。雖智力短淺。濟時無策。然不忍坐視民之失所。而不思以拯救之也。淮水既已會河。則導江之說。無煩再議。高郵堤加以木城。真萬全之策。寶堤既難舉。李尹留之。無所事事。咨部赴選可也。

### 答巡撫高鳳翥

兩辱翰示。具悉同心之雅。感謝。前奉書謂宜止虜酋之西伐。猶未知彼有約三鎮訂盟之舉也。後見金湖疏謂彼西行已決。僕亦以爲不可止矣。今觀答公書。則其意尙狐疑。僕前書所料固不謬也。然此酋不去則已。去則必敗。彼既年老志偷。而其衆皆不欲行。又叅縻於我之服食已久。無復曩時之颯疾。以驕惰不習之兵。當瓦剌新銳之虜。其勢固不敵也。且南畏中國。東畏察罕。力分而勢渙。強行而衆疑。故曰必敗也。今既以書勸止之。已見公相爲之意。此後但宜任其去留。不必固止。彼去吾亦利。不去吾亦利也。

### 答四川總兵劉草塘

辱華翰。深荷雅情。厚惠概不敢當。輒璧諸使者。不穀素以薦賢爲心。又見近日武氣不振。故每每曲爲保護獎率。然以爲國。非以市德於左右也。頃向確菴公一言之。渠必以告。統惟鑒存。

### 答兩廣凌洋山計羅旁善後

羅旁之役。初意但恐宿寇初除根。株未盡。姑少遲建設。以俟人心之定。會新司馬亦以此爲言。遂從再議。近來彼中人來。皆言此地。在四府之中。素稱沃壤。與廣右邊徼不同。且遠近之民。願受塵者衆。不設官建治。何以統之。以是知再議之爲迂謬也。今既經理有緒。崢峻大疏至。卽屬銓部選除矣。但聞願附籍者多。係遠縣之民。其中或有來歷不明。流浪無根。或賊黨詭名僞姓。若但務招徠。不加審別。蘭棘並植。狼羊同飼。將復爲昔

日之羅旁矣。竊以四府隣近之人。亦自有就招者。彼風土既習。板籍有據。環數百里之內。封壤相接。遷徙無難。且彼素被賊患。茹苦日久。今畀之以沃土。與之以安樂。亦所以賞之也。其中徭賦務從輕省。法令不宜煩苛。使人懷定居。遠邇爭赴。數年之後。可盡化爲樂國矣。夫戡亂非難。已亂爲難。當此重開再闢之時。卽宜爲長治久安之計。惟高明擇焉。

### 答滇撫王凝齋

向奉書云云。恃在世講至愛。故敢直獻其愚。猥辱採納。地方之幸也。莽酋事昨羅大參來問之。皆如察院言。且謂此酋有兵百萬。戰衆萬餘。西南諸夷。盡爲所并。交趾亦半屬之。將來必爲滇人憂。其言不知何所據也。大抵修內治。飭武備。雖邊圉無虞。亦不可懈。豈視外夷強弱以爲緩急乎。自今該道兵憲及州縣正官。宜慎選其人。俾加意整飭。使遠至邇安。則有備無患之道也。

### 答司寇王西石

張尹至辱翰貺。深荷雅情。豚兒寡學。謬竊科名。其臘登上第。則出主上親拔。非僕庶幾所敢望也。茲辱諭獎。彌增其媿。老父頃患甚劇。今雖暫愈。然聞動履尙屬艱難。桑榆暮景。風燭可虞。顛擬主人。大婚後。乃敢乞身。今定婚期於來歲三月。則陳情之舉。當在夏初矣。遙望此期。以日爲歲。奈何。太君之壽祉茂臻。我公朝夕歡養。誠人間希覲之事。其視僕等媿歎無地矣。簡兒叨授一職。遣歸完娶。賢郎歸已。託致鄙悰。老母高年。內人又不知禮節。尙有不備。惟冀垂念夙雅。俯賜矜涵。非所望也。敢布腹心。

### 答藩伯張周田

惟公雅度宏才。昔在銓部。僕已切傾嚮。中罹排陷。至於垂翼。又竊爲惋惜。今當清明之會。羣才畢集。閣習昭蘇。驂駟屬路。從此皆康莊矣。願懋建鴻鉅。以副所期。

## 答南司成屠平石論爲學

成均任重。宜借高賢。簡命渙頒。輿情胥慶。在僕素心。喜可知矣。雖然。亦有區區之愚。不敢不以告也。往聞公好譚理學。雅稱同志。意必實有所得。非空言者。顧僕奉教之日淺。未能仰窺精蘊。獨見公之督學浙中。秉公執憲。屹然不搖。卽誠務躬行不事空談者。故今日之舉。亦願公以浙事行之也。夫昔之爲同志者。僕亦嘗周旋其間。聽其議論矣。然窺其微處。則皆以聚黨賈譽。行徑捷舉。所稱道德之說。虛而無當。莊子所謂其噬言者若哇。佛氏所謂蝦蟇禪耳。而其徒侶衆盛。異趨爲事。大者搖撼朝廷。爽亂名實。小者匿蔽醜穢。趨利逃名。嘉隆之間。深被其禍。今猶未殄。此主持此教者所深憂也。記曰。凡學官先事。士先志。士君子未遇時。則相與講明所以修己治人者。以需他日之用。及其服官有事。卽以其事爲學。兢兢然求所以稱職免咎者。以共上之命。未有舍其本事而別開一門以爲學者也。孔子周行不遇。不得所謂事與職者而行之。故與七十子之徒。切

磋商究。其持論空言。亦各隨根器。循循善誘。固未嘗專揭一語。如近時所謂話頭者。概施之也。告魯哀公曰。政在節財。齊景公曰。君臣父子。在衛曰正名。在楚曰近悅遠來。亦未嘗獨揭一語。不度其勢之所宜者而強聒之也。究觀其經綸大略。則惟憲章文武。志服東周。以生今反古爲戒。以爲下不倍爲準。老不行其道。猶取魯史以存周禮。故曰吾志在春秋。其志何志也。志在從周而已。春秋所載。皆周官之典也。夫孔子殷人也。豈不欲行殷禮哉。周官之法。豈盡度越前代而不可易者哉。生周之世。爲周之臣。不敢倍也。假令孔子生今之時。爲國子司成。則必遵奉我聖祖學規以教胄。而不敢失墜。爲提學憲臣。則必遵奉皇上勅諭以造士。而不敢失墜。必不舍其本業。而別開一門以自蹈於反古之罪也。今世談學者。皆言遵孔氏。乃不務孔氏之所以治世立教者。而甘蹈於反古之罪。是尙謂能學孔矣乎。明興二百餘年。名卿碩輔。勳業烜赫者。大抵皆直躬勁節。寡言慎行。奉公守法之人。而講學者。每詆之曰。彼雖有所建立。然不知學。皆氣質用事耳。而近時所謂知學。爲世所宗仰者。考其所樹立。又遠出於所詆之下。將令後生小子

何所師法耶。此僕所未解也。僕願今之學者。以足踏實地爲功。以崇尚本質爲行。以遵守成憲爲準。以誠心順上爲忠。兔魚未獲。無舍筌蹄。家當未完。毋撤藩衛。毋以前輩爲不足學。而輕事詆毀。毋相與造爲虛談。逞其胸臆。以撓上之法也。嗟乎。斯言也。使出於他人。則以爲謗。而僕固素有志於學者也。其所以言此。必有慨於中者。惟高明裁之。

### 答邊鎮巡撫

虜衆旣敗於西。復挫於東。自此以後。奉約束當益謹。邊患可少紓矣。但在我猶當堅守恩信。益務以德懷之。蓋此虜雖弱。旣已附屬。猶足爲我外藩。若使瓦剌生虜得志。非中國之利也。其所定約法。至爲簡當。彼卽不果西行。亦可循而勿改。今邊鎮所急。惟在廣積貯。興屯利。畜壯勇。休士力。以待他日之變。其他皆虛文耳。惟公加意焉。

### 答總憲高鳳翥



不孝積愆累覺。遭此閔凶。疊辱弔唁。不勝哀感。比者屢瀝血誠。懇乞終制。不蒙俞允。更荷踰分之恩。在主上雖自爲國家計。而於孤之微情。則有歉矣。嬰茲窮苦。無可奈何。乃有辭俸守制。預訂歸葬之請。誠不得已也。乃二三少年。不達皇上所以懇切勉強之意。又不白孤所以委曲順命之心。妄行瀆擾。遂致上干天怒。赫然震撼。傷動聖心。虧損國體。此又孤不幸中之大不幸也。傷痛之餘。加以震懼。形神俱瘁。病勢轉增。奈何奈何。辱示錢法。並邊務諸款。雖未得細讀。然略觀其措畫。皆經綸大着數也。幸卽疏聞。卽時整理。乃爲有濟。

### 答太宰王疎菴

前兵部差人去。孤方在苦塊間。荒迷未及奉書。想垂原亮。銓衡重任。非公不足以當之。比時孤方乞歸。然不敢以去國之故。而忘謀國之心。故敢以公進。然公之忠亮。實素簡於上心。故疏上。卽荷俞允。非俟孤言以爲用舍也。簡命渙頒。輿情胥服。方翹首跂足以

望公之至。願遣發征麾。以慰鄙望。

### 答藩伯楊魏村

辱垂念年誼。弔唁勤惓。無任哀感。承諸年丈欲俯臨貺奠。極荷至情。但孤自召見視事之後。卽閉門守制。更不敢於私宅接賓受弔。四方相知奠儀。一切謝却。雖諸年丈辱在世誼。與衆不同。然亦不敢當也。謹錄奠章佳稿先寄回。宣之先人柩側。冥漠有知。必深啣感。厚奠則再不煩貺及。便中草草附謝。仍希叱名於諸年丈。統容來歲南歸。一一踵謝。唯鑒原。

### 答河道吳自湖

孤自遘閔凶。兩辱慰唁。無任哀感。厚奠概不敢當。輒璧諸使者。謝謝。維楊蠲賑事。大疏未至。已屬計曹題請。茲又取疏中未盡者屬之再題矣。夫天道玄遠。災祥之應皆未可

知。孤嘗學此于天官氏矣。考其占驗。咸屬茫昧。民之饑溺。自當拯援。雖微星變。寧忍坐視。古之聖王。遇災而警。惟修人事。鎮靜以處之。不宜牽合事應。過爲驚惶。以致搖衆也。

### 答甘肅巡撫侯掖川

惟公任西陲。勞績茂著。頃者循例晉秩。未足爲酬。俺酋已報西行。渠近奉約甚謹。雖經貴鎮諒無勞擾。望公戒約邊吏。謹守汛地。以禮處之。如過有濶索。卽以孤意喻之。令其安靜守約。無壞大事。蓋彼數年在宣大。凡孤使人傳示。渠未嘗不服從也。

### 答吳環洲

承示虜王竟已西行。卽傳示西鎮。以禮處之。諒無騷擾。但此虜以遲暮之齡。當參飽之後。不宜遠事忿爭。若徒揚虛聲。中道而返。猶足以蓄銳示威。倘不量彼己。逞于一決。乃必敗之道也。在我乘此休暇。益修守備。以待彼之變。

## 答薊鎮巡撫陳我度言辭俸守制

嗔貺再臨。又辱別諭云云。敢不敬承雅意。但孤暫留在此。實守制以備顧問耳。與奪情起復者不同。故上不食公家之祿。下不通四方交遺。惟赤條條一身。光淨淨一心。以理國家之務。終顧命之託。而不敢有一毫自利之心。所謂或遠或近。或去或不去。歸潔其身而已。此孤之微志已。况昨承恩眷。特使廩人繼粟。庖人繼肉。數口之家。不啻足矣。若獨辭上祿以沽名。又受私餽以自潤。內欺其心。外欺其主。孤不敢也。至于公比者之起。雖出孤意。然非敢市德于左右也。徒念薊門重鎮。撫臺要職。辱與公爲知己。故以仰託。冀有疏附後先之助耳。公第綏和將士。保固疆圉。卽所以酬聖恩。答相知。外此秋毫非所敢望也。再違寵命。恐公不達鄙意。而以孤爲疎外于左右。故敢直吐衷懷。如此。語率無次。萬望矜原。其節間所惠。亦俱附壁來使。統希查照。

### 答陝西巡撫宋禮齋

近日曾有人言榆中築臺工急。軍人嗟怨者。孤竊以勞民動衆之事。誰肯樂從。惟謀國者主持不惑。當事者措畫有方。乃有望其底績耳。昔譚司馬在薊。建議築臺。其時人情洶洶。流言四起。忌者欲因此中以奇禍。政府諸公亦皆懼而求罷。獨孤一人力持不顧。乃克有成。數年以來。虜不敢窺薊者。實賴守險之力。若如當時之議。豈得有今日乎。今虜方款貢。正宜及時爲備。諸言練兵除戎云者。悉虛文耳。惟修守一事。庶爲切實。且邊卒無荷戈死敵之苦。徒用其力。未足爲勞。但須寬其程限。示以勿亟。時一親閱。鼓以賞犒。則自樂于趨事矣。

### 答李石麓相公

不孝積愆累釁。遘茲閔凶。遠辱慰唁。兼拜厚奠。無任哀感。念先人昔得侍于年伯翁。投

分不淺。翁之愛弟。有踰同氣。今年伯翁與先人相繼永逝。而翁與弟同抱惛憂。以此言哀。哀可知矣。願翁謝政歸侍數年。養生送終。兩俱無憾。弟一別先人十有九年。生不得侍養焉。沒不得視含焉。乃又爲時所羈縲。不得一申憑棺之情。抱恨終天。死不能贖。此則弟所遇之尤舛。情事之獨苦。而翁之所不知者也。天乎痛哉。誰則憐之。頃已面懇聖慈。俟大禮成後。當復申歸葬之請。想翁所垂念者。輒以奉聞。使旋草草附謝。嗣容顯裁。統希鑒亮。

張江陵全集

卷二十二

# 張江陵全集上冊勘誤表

卷數 頁數 行數 字數 誤 正

重刊 一 九 二十八 響 響 同 同 七十七 十二 八 源 同 同 二十三 七 八及九 每榮 榮每

例言 一 九 二十八 響 響 同 同 七十九 二 六 漏 齋字 同 同 二十六 八 三 如 加

明史 三 一 十三 揚 皆 同 同 九十二 八 六 太 夫 同 同 十一 十一 究 究

本傳 三 一 十三 揚 皆 同 同 九十六 十二 七 陞 陞 三 同 十五 六 等 卿 卿等

同 同 九 六 三十二 犯 死 同 同 九十九 九 二 第四字詩下漏五言古三字 同 同 八 七 十七 選 選

同 同 九 一 十六 七 儼 曰 儼 同 同 百〇九 九 二 第二字題下漏一文 同 同 十二 四 一 裏 裏

目錄 一 八 十二 禮 體 同 同 百一十 十二 三 留 劉 同 同 十四 四 四 裏 裏

同 同 四 十二 三 贊 贊 同 同 百一十二 九 七 第一字袁上漏 途字 同 同 十五 四 四 問 問

同 同 六 二 四 修 修 同 同 百一十七 三 七 啓 集 同 同 十七 十 二十 距 距

同 同 十三 二 四 修 休 同 同 百一十八 一 五 口 傳 同 同 二十六 六 六 彼 彼

同 同 三十 七 六 義 李 同 同 七 啓 集 同 同 三十 九 九 知 知

同 同 四十一 五 八 辨 協 同 同 四 口 治 成 同 同 二 二 二十 二 十 際 際

張江陵全集上冊勘誤表

一









上海图书馆藏书



A541 212 0013 4379B

